



G
c: b1.

ff *e* 16

G. c. b1

Oct. 21.



NICOLAI BVRGVNDI I.C.
ET PROFESSORIS ORDINARI
CODICIS IN ACADEMIA
INGOLSTADIENSI.

HISTORIA
BELGICA.

AB ANNO M.D.LVIII.



INGOLSTADII,

Ex Officinâ WILHELMI EDERI.

Apud JOANNEM BAYR.

ANNO DOMINI M. DC. XXIX.

Ur

THE HISTORY OF
HISTORIA

OF THE
BRITISH
AND
ANTIENT



OF THE
BRITISH
AND
ANTIENT
OF THE
BRITISH
AND
ANTIENT

SERENISSIMO AC POTENTISSIMO
PRINCIPI
MAXIMILIANO

S. R. I.
ARCHIDAPIFERO
ELECTORI
VTRIVSQUE BAVARIÆ
D V C I

ET
COMITI
PALATINO RHENI



ON offendam, MAXIMILIANE
Princeps Serenissime, si hunc
libellum sub nominis Tui Mag-
nitudine exire patiar. Belgium
meum cum felicissimum ac miserrimum,
simul fuit, veluti in picturâ quadam repræ-
sento. Videbis virtutis vitiorumque certa-
men. Videbis perfidiam cum fide luctan-
tem. Sectasque nostrorum temporum
in religionem attollentes supercilium.
Breuiter, quidquid malorum prorupit

in publicam perniciem, ex æmulatione &
inuidiâ Magnatum, Principi suo non sat
obedientium. Hæc sunt initia, quibus po-
pulus ille distractus est in partes. His cau-
sis inter se nunc commissus, totius Orbis
oculos, tanquam ad spectaculum quod-
dam gladiatorium, in se auertit. Pul-
chrum tibi erit alienæ gentis calamitates
percurrere, vt subditorum tuorum felicitatem
agnoscas, quos pestilentissimum hoc
sydus nunquam afflauit, in medijs tamen
collidentium inter se religionum fluctibus
deprehenso. Ego cùm hæc scriberem, non
semel inhorruui. In acerbâ illâ miseriarum
contemplatione diutiùs hærere non erat a-
nimus, nisi reluctantem coëgissent viri ma-
gni, quibus nec negare quidquam debe-
bam, nec poteram. Fatigatus igitur foren-
sium occupationum molestiâ, alienas curas
in hoc otio deposui, posteritatisque negoti-
um agere institui. Ne autem liber iste iam-
diu neglectus, inter quisquilias meas pulue-
rulentus ingemiscat, sub nomine Serenita-
tis Tuæ manumisi. Vt si liuorem contrahat,
inueniat patrocinium: si publicum fauorē,
inter

inter donaria numeretur. Persis olim nefas
fuit sine munusculo Reges accedere. Horum
exemplo Serenitati Tuæ voueo, quod sem-
per habui inter pignora charissimum. Ag-
nosco enim quo me fauore exceperis, cum
è Belgio euocatum, celeberrimæ Tuæ Aca-
demiæ Ingolstadiensi adscripsisti. Sed si
quæsissem Fastigio Tuo dignum munus,
non inuenirem satis idoneum. Possem e-
quidem in virtutes Tuas ire. Victorias ex-
tollere, quibus contumaces inimicorum
spiritus confecisti. Sed laudes Tuas tam æ-
grè admittis, quàm cæteri mortales luben-
ter audiunt. Virtutis mercedem in consci-
entiâ facti reponis, solidamque gloriam,
nullâ adulatione libatam, à posteritate ex-
spectas. Admitte igitur benigno oculo ex-
ile monumentum ingenij mei, & hoc do-
nario Serenitatem Tuam adorari patere.

SERENITATI TVÆ

Deuotus

Nicolaus Burgundius.

AD LECTOREM.



Istoriā Belgicā hīc habes. Si tempora aestimes, prope antiquā: si res gestas, prope nouā. Multi hactenus prouinciā illā ingressi sunt: sed non omnes fidem intulere quā debebant. Plerisque ad veritatem affectus obfuit. Alij rectis monumentis destituti, rerum alieno auctore gestarum ignorantia laborant. Ego sanē polliceri possum, nihil me posteritati imponere. Fidelissimis manuscriptis adiutus sum. Quidquid in Belgicis concilijs actum, ex schedis Viglij accepi. quidquid in Hispanicis, ex commentarijs Tissenacqij. Viri illi falli non potuerunt. Vterq; enim rebus interfuit. Litteras denique omnes percurrere, quas & Rex ad Gubernatricem, & ad Regem transmisit Gubernatrix. Ex quibus multa hausi, quae temporum ratio & ignorantia absconderant. Quisquis hac leget, nisi malignus esse velit, bonam fidem aestimabit.

V. C.
NICOLAO BVRGVNDIO
IVRISCONS.

Summo, in summâ Flandriæ Curiâ
caussarum Patrono.

Cum à Sereniss. Duce Bauariæ
euocatus ad lectionem Iuris publicam
in Academia suâ Ingolstadiensi
staret in procinctu suæ
profectionis.

S At scio, Amicitia prima ab origine nostra,
Et voto docti tempore conloquij:
Quod sanxere nouem, nostri, sacra Numina, amoris;
Ac cum prudenti Pallade, iusta Themis:
Non maleuada tuam penetravit opinio mentem,
Que enervet Fidei robora firma mea.
Nam illa; velut scopulus contra maris impetum inanem,
Immoto rumpens nauifragam vndam animo:
Mutui in æternum victuri conscia Amoris;
Non per longinqui tedia discidij,
Sit labefactari potis: hanc per corporum amantum
Vasilitiem, aut presens qua mala languor habet.
Atque adeo si quis nigrâ sit sensus in urnâ,
Vivere post mortem hanc experire meam.
Verumetiam ut nostri quedam externa Symbola Amoris;
Fidi index animi; sit tibi, sitque alijs:
Hoc tibi, BVRGVNDI, huic nostro adposui Monumento
Mnemosunum; æterna pignus Amicitia.
Nam cluas nostri licet ingens Belgica secli
Laus, ut Pieridum delicia et Charitum:

Nec vix

Nec vix in quoquam tibi se equiparare potuisti :
 Atque vicissatim me quoque perditè ames :
 Coniutar tamen (heic faucas mibi SANCE, FIDIG.!)
 Hanc tibi in hoc stadio laureolam eripere.
 BVRGVNDI (quem faucas, suo cum Præsìde, MVSÆ;
 Et Pallas curâ perpoliere pari)
 Mortale est quodcumque vides : Anima sed origo ;
 In cuius penetrâli inlatebrauit Amor
 Se ille tui, æterna est : sic nostri mutua nexus
 Fœdera ; ut illius vndique pars melior.
 Quare etiam frustrâ est, nostros tibi ut eloquar ignes.
 Nam quæ cera potest paruula eos capere ?
 Cum penita nequeant vix hoc in corde medulla.
 Tanta meis superat flamma cupidinibus.
 Hinc scio nil Pyladis, nil Tbesei fama valeret,
 Vnanimique nihil gloria Peirithoi :
 Illo nos olim si vixissemus in auro ;
 Omnibus ac nosler cognitus esset Amor.
 At tibi sit semper mens sana in corpore sano,
 BVRGVNDI ; ex voto es vita superstes eat.
 Missiculataque scripta volent : perfrigeret astum,
 Ne inrepens sensum torpor Amicitia.
 Sed potius (meminens nostri) alternata , requirant
 Sape , satin' salua ? Sic tibi , mique vale.

IEREMIAS PIERSSENÆVS

I. V. D.

in eadem Curia Regis Catholici Consiliarius
& Fiscì Patronus

Amico Optimo Maximo

cum mœrore L. M. Q. P.

ac omnia felicia & beata cum incremento Dignitatis
suz EX VOTO adprecor

in Maximâ Flandror ipsius Kal. Septembr.

∞. c19. c. XXVII,

NICOLAI BVRGVNDJ
HISTORIAE
BELGICÆ.

LIBER I.

EAT O generis humani quemadmodum siderum, ita & rerum vi-ces circumaguntur. Prima potestas in populo multis fuit; quæ citò ad primores flectendo; & ibi fracta discordijs, apud reges demùm fessa confedit: vnde iterum ad exordium suum exosa reuertitur. Raro gentibus tam felicia fata sunt, vt in eodem statu tranquillæ perdurent. Vnumquodque sæculum sua calamitas prosequitur simul, atque deponit. Igitur semper bella nasci, pacem subsequi, marcentem pacem vitia excipere, & hæc ipsa rursùs vbi processerint in summa, iratum numen ad vltionem prouocant. Quippe natura multitudine onusta

A quie-

quietis est intolerans. & ob id se velut ipsam accito Marte necessum expurgat: quasiq; renascitur, vt in profundo otio iterum convescat. Sed vitæ mortalium dux, atque moderatrix sapientia est, quæ contra omnes casus virtute instructa, impendentia mala ex alto prospicit, minantemque tempestatem immota exspectat. Secura potissimum, non ob aliud, quam quòd nihil acerbius accidere videat, quod non aliquandò acciderit. Omnis ætas de sæculo suo queritur, & suum quisque infelicissimum falsò credit; quia suum: hoc est; quòd nulla calamitas altiùs penetret, quam quæ sentitur. Homines cottidiè mutantur; mores hominum in orbem redeunt, eadem fabula sæpiùs, iterumque peragitur, sub alijs, atque alijs personis. Luxus, fraus, libido, peculatus, & eiusmodi flagitia quæ hodiernos affligunt mores, & olim prona, atque in aperto fuere. Sed non aliter ad posteros, quam per silentium veniunt. Quocircà rei publicæ interest scriptores existere. Hi sunt qui famam rerum gestarum longiùs traducunt;

cunt; euentu, præceptisque salubria docent; iniquitati denique temporum constantiâ, vel consilio occurrere. Quippè nemo rectius, quàm exemplis instruitur. Proindè operæpretium duxi, aggredi bellum, quo nullum vnquam diuturnius aut acerbius Belgium habuit, tùm confictu totius orbis Christiani, cùm atrocitate præliorum, & nutatione victoriæ, exercitibus hinc pro religione, & imperio, illinc pro vindicandâ libertate nō minore animo concurrentibus. Nam qui hæc leget, facile discet scenarū rerum humanarum. Eadem causâ, idem furor, eadem rabies primo Gallias inflammauit, mox in Scotiam deflexit inde Belgis incubuit. At mihi principium narrandi facturo, pauca explanare conuenit de statu reipublicæ. Nam & exteris me scribere memini, qui alijs, atque alijs conditionibus regnantur.

Belgica omnis longè, latèque, per Gallias, Germaniâmq; diffunditur. Cuius non vnagens; sed proprijs nationibus, prouincijs, nominibûsque discreta, in commune Belgæ

Statum Belgici breuiter descriptio.

vocantur, aut inferioris Germaniæ populi. Olim in singulis prouincijs imperium fecerant. Imperium dominicum; inde regium, hoc est; legitimum; quo ad vim dominationis priuilegijs frangendo in formam principatus concessit. Summa imperij penes singulos, quos nascendi fors, & promiscua successio, non aura popularis, vel ambitio rebus præposuit. Licentia principum suprâ leges. post insanis castigata priuilegijs, multorum motuum causam dedit. nunquam satis concordi potentiâ, quæ ad vnum, vel plures, aut omnes tota non pertinet. Insurgentibus enim principibus, populus contra niti cœpit; non passus vim dominorum intendi, quorum iugum iam exuere cœperat. Breuîque ostendit, nullum maius esse priuilegium, quàm carere omni priuilegio, cuius umbrâ publica tranquillitas sæpe illuditur. Sed hæc ipsa Principes ab initio benignius indulserant, vt immunitatis dulcedine animarent multitudinem ad opificia, & exterarum gentium commercia elicerent. Nec fefellit.

hæc

hæc moderatio dominationis magnum quoque incrementum dedit. Quippè ibi populus, & diuitiæ, vbi & libertas. in tantum breui potentia creuit, vt etiam formidolosa haberetur Principibus suis, nec ijsdem artibus. quibus erat elata, deprimi posset. Post multos deinde per ordinem successionis dominos, vniuersa Belgarum sceptra in Burgundicam gentem felicitas transtulit, nuptijs, pactis, successionibus, & fortunâ ad omnia prodigâ. tunc cum sub vno spiritu, vnoque rectore, ad terrorem Europæ circumferrentur Belgica signa, statim quoque popularis licentia cessit, magnitudine potentiæ debilitata, & timore compulsa ad reuerentiam obsequij. simul ad imaginem regni adunatæ prouinciæ, in vnum quasi reipublicæ corpus formamque coaluere. Status autem habitusque talis erat: Porro titulo alio, atque alio, omnes tamen vnius nutum intuebantur. Penes eundem pacis, bellique arbitrium, & administratio erat, Militiæ nomina dabant, non lecti, aut iussi: sed voluntarij. Namque populus

lus olim ad pacem mitigatus, stipendiorum collatione vacationem redemerat. Letis Principibus, & augmentum potestatis libenter retinentibus. quippè sordidâ adulatione exoluti, nec à libidine, vel ingenio plebis pendentes, vim armorum, hoc est; materiam facémque seditionum turbidæ multitudinis audaciæ eripuerant. Subsidia & tributa Ordinibus imperabantur, non promiscuo iure, veluti in solutis regnis: sed consensu ciuium, hoc vnum ex imagine libertatis retinentium, vt peteretur, quod negari iure non potest necessitatem æstimantibus. Ordines autem constituebant delegati cuiusque prouinciæ, quos ex ecclesiasticis, nobilitate & ciuitatibus suffragia elegerant. *Ærario* principis senatus præerat. *Finantiarum* nomine designabatur. quem duo præsides (vulgo capita nominantur) cum thesaurario & præfectis aliquot cōstituunt. patrimonium, & domesticas principis opes, simul & ingentia tributa curabat. Iudicia magistratibus permissa. Necubi tamen Iustitia gerneret, prouocatio placuit ad
supre-

supremas curias prouinciarum. Vnde ad Mechliniense tribunal à plerisque recurritur. Gentis procures prouincijs præerant, gubernaculis vrbiũ admouebantur, legionibus imperabant, populum in obsequio principis; & subinde principem in metu tenebant bencuolentiã populi diuturnitate victã. Minorũ gentium nobilitas per vrbes sparsa, atquẽ diffusa, cum plebe magistratus implere, suã quisque patriã operari dare, præsidio esse, incrementum quærere. Populus suis vivebat legibus, pace adultus, commercijs potens, obsequium principi, inter libertatem, & seruitutem. Cæterum Carolo Cæsare in longinqua abstracto, tantum imperium à Mariã sorore videbatur aptè regi non posse, quam si cum multis communicaret consilium. Senatum igitur excitat, qui de statu rerum, hoc est; de bello, pace, fœderibus Principum, præsidiiisque & munitionibus deliberaret, & ob id Concilium Status appellauit. Procures gentium vt plurimum citrà numerum assumbebantur. procures, quòd commilitio Cæsaris

faris assueti, tamen procùl illo agente ab administratione non exclusi, absentiam & desiderium principis per speciem fallerent. gentium verò, ne peregrinorum odia in seditionem erumperent. an quòd imperia patientius populus ferat, quæ a suis proficiscuntur? Huic Concilio Princeps præerat, aut Gubernator. Rebus quoque ciuilibus curiam aperuit. Præsidem ei imposuit. Concilium Sanctius, aut Priuatum nominauit. Priuatum enim cum Principe expendit arcana imperij. Apud Græcos olim apocleti vocabantur. Per hos prouinciarum, vrbiúmque querelæ, atque discordiæ plerúmque dirimuntur, diplomata edicta, & rescripta, abolitiones quoque, & indulgentias, vt & alia quædam Suprema in Belgio Concilia expediunt, atque omnia ea quæ supra leges, citrà tamen iniuriam princeps potest. Nec ea potentium dignitas fuit. sine respectu generis, sine curâ ambitionis, duodecim primo assumpti sunt, quos fama, & virtus, legúmque studium supra vulgus euexerat. nunc pro regnantium arbitrio nu-

merus constat. Interiecto Cæsar tempore
prouinciarum habenas in filium transtulit,
onustus senectute, ægróque corpore, & fessus
longâ potentia. Philippus ergò inter initia
imperij, vim omnem principatus ad se reuo-
cauit. salutari more potentiam repetens, quâ
subinde procures assuetudine imperandi ig-
naui dominis totam eripiunt. Bellum ad-
uersus Gallos supererat, assiduos hostes, & ut
ita dicam prope hereditarios. sed quo interim
vacuum foret de pace agere, annorum quin-
què inducias condixit. Quas paullò post
Gallus fregit, & manifestius quàm ut à scele-
re excusari possit. Ingenio velox, pœnitentiâ
mobilis, ad pacem, ad bellum perindè subi-
tus. Et núnquam postea aperto Marte, nisi
infelicitè dimicauit. scires curæ esse Deo vl-
tationem. Sed mutuis vulneribus fatigati, cū
utérque sibi confideret, neuter frangeretur
ad tranquillitatem respexere; vltimum sem-
per lassus, vel exhaustis refugium. Hinc à
pace mihi initium historiæ, sine amore, sine
odio partium. quibus hætenus vitij maxi-

mè laboratum est: Multi sterilitate litterarum, plerique incitiâ genij tam regionis, quàm populi & reipublicæ; plures tamen religionibus vel infensi nimis, vel nimis obnoxij. Mihi sacrorum cultus, quem à maioribus accepi, non adimet libertatem, quam felicitas temporum promiscuam fecit.

MDCLVIII

Pax cum

Gallis com-

ponitur.

Gallus ergò præsentium rerum fastidium conceperat. Læto amoribus, venustisq; studijs ingenio, & horum loco aduersa fortuna armorum statim tædium fecit, & pacē quàm bellum malebat. Similis querulo, quòd tam frigidè à Paulo Pontifice exceptus fuerat cum Guisio exercitus. Nec eundem videbat in bellum instructum, cuius impulsu causaque, pacem ruperat. Et sine dubio Pontificis ceruicibus vires Hispanorum graues erant: at si frangerentur, Gallorū mores suspecti. Proinde (vt fertur) non causæ, non studijs partium; sed nec amoris reipublicæ bellū dederat. contentus inter se commisisse reges, vt utroque lassato, & ad pacem respiciente, Etruriam ipse, tanquàm adhuc incertæ possessionis sibi

sibi auferret. Et hinc promissa extrahere
coeperat. satis gnarus, non bello magis,
quàm morâ belli Gallos consumi, qui vi-
ctoriam omnem in impetu constituunt, cu-
ius statim obliuiscuntur, vbi in externos ex-
undant. Proinde Gallis tam ingentes cona-
tus in Italiâ frustra expertis, postremę duæ cla-
des cum internecone nobilitatis, de super-
cilio eorum multum detraxerant. Sed præ-
cipuus concordie auctor Annas Montmo-
rancius, Magister equitum, seu Franciæ
Conestabilis, regij exercitus prætor. Sancto-
Quintino prælio in Belgarum manus vene-
rat. dein conuento pretio remissus, spem,
& fiduciam pacis, quam captiuus fecerat
liber non abiecit. Huic vni viro bellum
aduersus Philippum semper displicuit. so-
lus omnium suaferat Regi, ne feralem Gal-
lis repetetet Italiam, equites se transituros
Alpes, vt pedites inde reuerterentur af-
firmans. Nec econtra Philippus abhor-
rebat à concordia. ingenio ad tranquil-
la promptiore, & alienis magis armis,
quàm

quàm propriâ voluntate, ad bellum compulſus. Nam & Carolum patrem extinctum accipiens, animum cogitationemque ad Hispaniam appulerat. Et hinc procliuior ad tranquillitatem temporum, cuius ante deſiderium conceperat. Sed in pari Regum voto, nemo erat qui prior loqui vellet. Pudebat confessione propriæ infirmitatis victorem hoſtem facere. Inerat magnus vtrique animus. & acceſſione Italicarum virium, par iam victori victus exercitus. Cunctantibus ergo publicam calamitatem extinguere priuatâ verecundiâ, Chriſtierna Lotharingi vidua concordia mentionem iniecit. Prudens, & virilis animi mulier. Alteri regum ſanguine, alteri per coniunctionem filij annexa erat. ac tùm quidem per finitimorum rabiem expoſita iniurijs, haut ægrè expugnauit, vt conſentirent in colloquium. Actumque vt circa Idus Octob. Cericampum conuenirent. Cœnobium eſt Cisterciensis Ordinis, inter terminos vtriuſque regni. Cardinalis Lotharingus, Ioannes Moruelle.

uellerius Aurelianensium episcopus, Annas Montmorantius Conestabilis, Iacobus Albo Sancto-andreae, tribunus militum siue (vt dicunt) Marechalus, & Claudius Albaspinæus Secretarius, ab Henrico rege præmissi. & vt cupidores pacis viderentur, Philippi caduceatores paullo diutius expectauere. A Philippo autem hi succedebant, Antonius Perenottus Granuellanus Atrebatensium episcopus, Ferdinandus Aluares à Toledo, dux Albanus, Guillelmus Nassouijs princeps, Ruygomes de Siluâ Melitæ comes, & Vlricus Viglius ab Ayta Suichemus præfes Priuati Consilij. Ante omnia caduceatoribus placuit dimitti vtrimque exercitus. ne proximus armorum strepitus, tam salutare turbaret commercium. At ne tunc quoque dilationem Gallus fecit. equitibus domum remissis, pedites in præsidia distribuit. curam deducendorum Germanorum Niuernio tradidit. Nam & Philippus iam in Atrebatibus exercitum dissoluebat. Magna pro Sabaudia contentio fuit. Gallus per successionem

auia ad se trahens, & quod omni iure potentius est, præmio victoriæ retinebat. Multum ex aduerso Thomâ Langusco Stropianæ comite, ac Præsidi Astensi pro Phileberto nitentibus; non armis in hoc contendendum esse; sed forum ex more, legesque respicerent. Nec displicuit Gallis resumere cognitionem. at longè aliud poscebatur, vt paucis ciuitatibus pignori relictis, sua Phileberto restitueretur possessio. Sed hoc ipsum à Gallis contumaciter negabatur. Nec aliter quàm in gratiam Margaretæ sororis Henrici Regis Philebertus postea obtinuit, quam se in vxorem ducturum spondit. Tota igitur concordia moles circa Caletum fuit. urbem in Gallico littore positam, multis ætatibus Angli infederant. quæ longa possessio effecit, vt veluti suam constantius vindicarēt. Gliscebant inter partes certamen, & neuter remissurus aliquid videbatur de pertinaciâ: cū Philippus, & ipse de pace desperans, Comitem Feriæ dimisit in Angliam, ad percunctandam vxorem Mariam, an mercari pacem vellet, quæ
fine

sine damno eius componi non posset: si bellum haberet in animo, nuptijs Elisabethæ sororis in spem successionis regni sui Sabaudum adoptaret, ad quem iam potissimum detrimentum omne armorum perueniat. Sed medio tempore Maria decessit. cuius mors colloquium foederis in tempus dissoluit. Elisabetha verò sceptrum adepta, & semper per dissimulationem dubia, tanquam alicui nuptura, primum externis, deinde & domesticis, postea omnibus imposuit. seq; & regnum hac arte egregie tutata, ubi inuidiam superatam vidit, nuptiarum æmulos sensim sustulit. tantasque gentes, vix hodie patienter vni viro obediētes, femina, quod mirere, tot annis in profundissimā pace cōtinuit. cui nihil dulcius regno vnquā fuit. quod ne alteri traderet, omne matrimonium despexit. Sunt qui velint ad nuptias eius intēdisse Regē Philippū. Cui⁹ rei certū auctore non habeo. nisi quod Gallos acceperim, sollicitasse summum Pontificē ne gratiā affinitatis Philippo faceret, vel disturbaret cōsilia ei⁹. sed inani suspicione correptos existimō. nec enim

enim Reges alio affectu sæpius peccant; quibus semper formidolosa est aliena felicitas. Cæterum post calend. febr. resumtæ sunt conditiones fœderis. Et iam prona omnia fortuna fecerat. Elisabetha consilij ambigua, sed ad stabiliendum sceptrum recens partum conuenire pacem rata, simul metuens offensam Philippi, quod sub initia regni libertatem religionis vulgasset, cum Henrico ipsa per legatos de Caletto transegit: vt in annos octo Gallis cederet. restituerent deinde; vel quinquaginta aureorum millia penderent; in hoc legitimi obsides traderentur. Restabant ergo Genuenses, Cosmtisque Medicæus. inuoluti & ipsi contagio alieni belli. quia societatem Hispanorum palam induerant. alter eorum Senas tanquam suas; illi Corsicam repetebant. Nec tam ingentia armorum præmia Gallus ægrius dimisit, quam ceperat. vna dies, vna hora, vnus calami ictus tot victorias repentè abstulit. adeò vt quidam dicerent, sic pacisci Gallos, quasi nunquam bellum essent habituri. Elisabetham

Hen-

Henrici regis filiam Philippus sibi iuncturus erat. & hoc plerisque fatis videbatur ad securitatem. Prorsus quasi necessitudo fidem tueretur, quam religio non poterat. vsus certè comprobauit, affinitatem principum ad miserationem erga oppressos fatisvalidam; inter æmulos, & infensos odia non minuere. quippe speciem magis amicitix, quàm vim retinent, pacemque & bellum æstimant ex temporum ac fortunæ ingenio. sed & sanguinis pignora, suorumque matrimonia, & sacramentum pro vtilitate ferè dispensant. In cæteris iustitiam, in regno fidem, aut naturā non agnoscunt. Leges pacis hæc conuenere.

Pacta Madriti, & Valliscellis inita, firma, rataq; sunt, nisi aliter conuenit.

Pax solida, æternāq; concordia, bonā fide inter reges tanquam fratres costoz; quam non obtentu Turcici fœderis, non aliter lادere, vel offendere, liceat.

Fidem inuicem præstanto Romana religionis curam æturos, daturosq; operam, ut æcumenicum concilium celebretur.

Esto utrimque prateritorum obliuio. esto liberum commercium. nulli fraudi sit stetit in partibus. bona in eam causam publicata, vel distracta restituuntur. demum tamen Neapolitanorum, Siculorum, atque Insulorum exulibus.

Oppida ab hinc octennio capta, utrimque redduntur. Gallus Theonuellam, Marieburgum, luosum, Danuillerium, Montmedium, Valentiam Insulie, eiusque arces, & castella: Philippus vero Sancto-Quintinum, Hanum, & Castelletum.

Eo statu quo nunc est Terouana restituitur. luosum manibus nudatur, alterutrum munire ius non esto. non arcem, non propugnaculum in proximis mille passibus exstruere.

Ditio Carolatensis, cum Hefdino ad Philippum spectato. Delfinus Gallie in Crepacordij possessionem admittitur; saluo iure Crunij toparcha.

Philippus Elisabetham regis filiam matrimonio adiungito. trecenta aureorum millia dos esto.

Ema-

Emanueli Phileberto omnis Sabaudia, trans, cisq; Alpes redditor. Augusta Taurinorum, Pinarolum, Clerium, Clavaesium & Villanova loco pignoris à Gallo retinetor, quoad de iure successionis pronuntiatum fuerit. interim & Vercella & Asta Hispanorum presidys occupantor.

Dux Sabaudia neutralis maneto. Margaretam Regis sororem in uxorem ducito. trecenta aureorum millia cum usufructu principatus Bituricensis dos sunt.

Gallorum Rex presidium Etruriâ educito. patricij Senenses, aliq; ad Ilcini-montem profugi restituuntor. si imperio audientes fuerint bona his redduntor.

Gallus Corsicam, & qua in Luguriâ occupat Genuensibus restituito. Genuenses contra eiusdem Regis amicitiam colunt. militiam eius secutis, & proscriptis pœnam remittunt.

Arx Bullonia Leodiensium episcopo restitutor. negotium Sedanense excipitor.

Lusitana dote maternâ securè fruitor.

*Quidquid alteruter Monferrati occupat
Guillelmo duci Mantuæ restituito. arces &
munimenta à se exstructa cuique diruere ius
esto.*

*Maria Borbonia Fano - Pauli securè frui-
tor, saluis aliorum actionibus.*

*Gallus intra proximum trimestre prior pa-
cta exequitor. Inde Philippus post alterum
mensem fidem præstato. obsides interim tra-
dito.*

Is demùm annus III. non. April. Potentis-
simos validissimósque Reges, veriùs lassauit,
bellumque magis, quàm bonâ fide diffiden-
tiam, odiâque sustulit. In castro Cameracen-
si condiciones hæ conuenerant. & hinc pax
Cameracensis vulgò dicitur. quæ Pontificem,
Ferrariensem, Mediolanenses, Etruscos, Nea-
politano Siculos, Genuenses, id est; propè
totam Italiam tot annorum bello absoluit.
quorum causa, Belgas, simul & Hispanos &
Anglos, cum Gallis commiserat. At Senen-
sibus libertatis infelicitè auspicaæ finem at-
tulit. quam plerique exules etiam tum à Gal-
lo

lo incassum repetentes, sanctitate fœderis repulsi sunt. Cæterum & Pontifex, & Cæsar, & Electores, tetrarchæ, ciuitatésque imperij; simul Polonus, Danus, Sueuus, Anglus, Scotus, Veneti, Heluetij, Rheti, Sabaudus, Lotharingus, Parmensis, Ferrariensis, Mantuanus, Genuenses, ac Lucenses, breuiter, tota Europæ fœderi adscripta. prorsus vt non cum vnâ gente & pugnatum hætenus, & compositum: sed in vnâ gente totus Christianus orbis, & concussus, & sedatus videretur. Paullò pòst conditiones Gallus impleuit. Albanum, Auriacum, Egmondanum, & Arschotanum obsides habuit.

Hinc conuersus ad pacem Philippus, pri- MIDLIX. stylo veteri Rex Philippum Gu- bernatricem Belgio im-
mum omnium paternis manibus ingenti
pompa Bruxellæ parentauit. Mox nauiga-
turus in Hispaniam, prouincias ordinat, sta-
túmque reipublicæ componit, ac firmat. ponit.

Sed eum maximè agitabat, quem cum potestate summæ rerum, ac gubernaculo præficeret. Imperator Ferdinandus pro Archiduce filio haut obscurè ambiebat. Auriacus

& Egmondanus rumoribus populi maximè destinabantur, neutrum tamen in sermone Rex habuerat, non quod factiones metueret ex æqualium inuidiâ, atq; indè discrimen: quamuis hoc quoquè spectaretur, at quia magnatum potentia, alias grauis, & semper nimia, periculum accerferet; ne quod ex alieno sumerent arbitrio, ex suo deponerent. Cuncta scrutanti, optimum visum, paterno exemplo gentis suæ feminam Belgis imponere. Animus huic sexui quantumuis impotens; tamē ad res nouas videbatur meticulosus, ac mollior. Nec dubitabatur, quin tantæ familiæ splendor, ac maiestas, tot illustrissimis Belgarum proceribus venerationem incuteret. Secretò agitatum de Christiernâ Lotharingi viduâ, & Margaretâ vxore Parmensis, illa quidem amitæ filia, hæc ex concubinâ soror. alioquin virtute animoq; & cætera pares, ac fortunâ prorsus dignâ tanto fastigio. Sed difficiliorem electionem reddebant studia procerum in diuersum accensa, non amore, vel curâ reipublicæ suæ quémque spes, vel ambitio impulerat hanc, vel illam

Iam suffragijs destinare imperio. Auriacus Lotharingæ fautor aderat. adstrepente vulgi famâ anteferendam esse, vtpote Belgis acceptam, morûmque similitudine propiorem, cui & pacem se debere meminerant. Ille tamen ad longè aliud intendebat. iam pridem nec minore ambitu filiæ eius Dorotheæ nuptias sollicitauerat. tunc quidem maiorum ornamentis ac stirpe imperatoriâ tumens: mōx pretio suffultus tanti certaminis, & veluti iure exacturus si gubernaculi munus beneficij sui fecisset. Nec segnius Granuëllanus Atrebatensium episcopus pro Margaritâ nitebatur, ardore retinendæ potentiæ, quâ hætenûs in aulâ præualuerat. Verumtamen vt consilio suo adijceret robur, Albanum simul in partes exstimulat, promptum suâ sponte, & aduersus Belgas satis obliquum. Erat tunc Philippo frequens, seorsim, & quasi aliud agenti sententias exquirere. quod plerosque reges sapienter factitasse legimus; ne qui in commune rogantur, in gratiam potentiorum consilia flectant

flectant, aut solitâ purpuratis adulatione
consilia dirigant, quo principem ire vident.
Albanus ergo pro more rogatus, in expedito
regi suavit, *Securitatis interesse Margaretam
elegi. sanctimoniam vitæ, fidemque probatam,
cuius filium veluti obsidem, maritum teneret
in Italiâ clausum; Et alioquin destitutum po-
tentiam ad occupandum facinus. Lotharin-
gos Belgis finitimos esse, Et affinitate Gallo-
rum, veterisq; inimicitie recordatione sus-
pectos: Geldriam denique ad se trahere, timere
ergo ne fiduciam virium, Et fauore populi di-
turnitate victo periculum faciant, maxime
cum Et iam per speciem amicitie proceribus
blandiantur. sacrosanctum principatus arca-
num esse, neminem aliquem magnum facere,
cuius fortunam in potestate non teneas, nimi-
am credulitatem multos perdere. suspectandū
semper dominantibus qui capax habetur, Et
imperio proximus. Nec Christiernam accu-
sari; quamvis vulgi rumore prodigam, atque
alieni eris famam laborantem: sed humanum
ingenium, potentie audum, ac per fas nefasq;
præceptis*

præceptis ad profundam animi cupidinem.
 Ratio tam salubris consilij facile vicit, vt Margareta sine morâ euocaretur, tribus subnixâ Concilijs rectura prouincias. fatali indignatione Auriaci, qui exinde Granuellano aduersus, sanctissimam hætenus amicitiaë tesseram fregit, atque inexpiabile odium concipiens, venturæ calamitatis fundamenta posuit.

Prouincias verò inter proceres Rex diuisit, vt præter summam imperij, Brabantiam quoque Parmensis haberet. Flandriam, Artesiamque Egmondano tradidit, diuitijs, armisque validissimas. Hollandia Zeelandia Vltraiectum, Auriaco data sunt. nauticus populus, & hanc vnam artem eâ tempestate sibi vindicans, cuius nunc commercium vnus orbis non capit. Frisia, ac Transislandia Ioanni de Ligne comiti Arenbergio: Geldria, cum Zutphania Carolo de Brimeu comiti Meghemo permissa. Petrus Ernestus comes Mansveldius Luxenburgum sortitus est. In Hannoniam Ioannes Glimæus marchio

*Prouincias
inter Pro-
ceres dis-
tribuit.*

Bergensis missus, adiunctis Valencenis, atque arce Cameracensi. Namurcum Barlaimontio; Insulæ, Duacum, & Orcinum Ioanni Montmorantio Courrurij domino; Tornacum Florentio Montmorantio Baroni Montignæo cuenere. In transmosanos Brabantix terminos, destinatus est Ioannes comes Frisix Orientalis.

*Ordinari-
as equitū
turmas
magnati-
bus assi-
gnat.*

Ordinarias equitum turmas, (vulgo Ordinantiarum) inter magnates quoque distribuit. Hodiè nomina tantum, & solatia, olim flos prouinciæ, vires, neruûsq; exercitus. siue numerum spectes, tria equitum millia fecerant: siue robur, omnes electi: siue animos, plerique nobiles habebantur. bello feroces, & ad improuisos impetus prompti, validique: pace verò in suas quisque domos disparati, ac tributis exempti, ad vsum præliorum sine stipendio seponebantur.

*Comitis
Hornani
et Grann-
ellani dis-
sidium.*

Philippum Montmorantium comitem Hornanum. mari clâsique Rex præposuit. Ante illum diem Geldriam sub fiduciâ rexerat, & eandem prouinciâ porrò affectabat. sed
fue-

fuere qui in eo suspectarent artes Granuellani; ut ingenium turbidum, & olim sibi discors, procul amoliretur à republicâ. ac profectò tardè, nec sine precibus, Concilio Status adscriptum conuenit. seu conscius rei Granuellanus, siue innocens fuerit: tamen suspicionibus odia fouebantur, propemodùm deteriora præteritis discordijs. Nam tristissimas inter se pridem similtates exercuerant; quarum causa hæc fuit. Simonem Renardum Debremontij toparcham Granuellanus detulerat, non satis integrâ fide insolentes inducias cum Gallo pepegisse. Et eundem Renardum ob eam causam in aulâ suspectum, Carolus Lalaignij comes tanquam suum dedecus accepit. Siquidem legationis eius princeps fuerat. Hinc contentio, mōx iurgium. Solitâque contagione proximos, & affines indignatio corripuit. Ante alios Hornanus excanduit; naturâ suâ vehemens, & Lalaignio affinis, qui sororem illius habebat vxorem. sed postea quoque Granuellanus proprio nomine iram eius

elicit, asperauitque. Cum enim ab eo Hornanus quæreret, an sibi Geldriæ præfecturam relicturus esset Rex: & quid, (respondit ille) si sciam, an proditulum me putas tibi? Haut dubiè superba vox erat. sed opinor irato exciderat. Hornanum tamen vehementer offendit. Itaque clàm Granuellanum proscindere cœpit, actisque eius obstrepere, donec in aperta odia erumperent. Contumelia enim in virum non inciderat vt altius absconderetur per dissimulationem, vel constantia virtutis indignationem concoqueret. Nam si discussâ opinionum caligine verum volumus, aut omninò iniuriam in rerum naturâ non existere, aut in faciente esse necesse est: quia sapientis animum non afficit.

*Philippus
Rex Mech-
liniâ pro-
fiscitur.*

Cæterum ad firmandum religionis statum, comitia Ordinum Gandavi Rex indixit. ipse sibi per Mechliniam iter pronuntiat. nunquam satis de religione securus, quam supremo Concilio volebat commendare. satis doctus, mutationem status in expedito fore, si noxiâ superstitione caperetur populus pace
lasci-

lasciuiens, & ad nouandum naturâ propensus: quem magnates armatum occupando, pro suâ quisque vel egestate, vel ambitione, aut vindictâ, pietatis obtentu in principes exstimulant. Proinde magno animo exerceri leges iubet; pœnâsque exigi à sectarijs, exutâ omni dissimulatione, & misericordia.

Et pridem Franciscum Zonnum theologum Louaniensem, ad Paulum Pontificem legauerat, cum mandatis eiusmodi; Inualescere cottidie hæreticorum vecordiam, atque vti tabem proximas quâsque ciuitates inuadere. de cætero verendum, ne flagrantibus vsquequaque finitimis, ipsa contagio & Belgas corripiat. publicâ circa res diuinas torpedine, & vilesciente sacrorum maiestate per sacerdotum incuriam. Remotiores episcopos, vt officia intendant. latius imperium, quàm in ordinem redigant, non genio populi, non commercio linguæ coniunctum. præsentissimum tot malis remedium, singulis prouincijs assignari præfules, ac partito onere curam in angustias contrahere. Ad-

*Novos episcopos
scopus
solitur.*

iecitque libellum. Magnitudo Belgarum continebatur, quot archiepiscopos, quot episcopos destinaret: sedes, opes, iurisdictionem. In cathedralibus ecclesijs tres omninò theologos, totidémque iurisperitos ac nobiles requirebat. Archidiaconos, & archipræsbyteros pro magnitudine imperij. quæ cuncta Granuellanus curiosè descripserat.

*Concilium
status re-
stituit.*

Pòst hæc ad pristinam formam reuocauit Concilium Status, quod sub initia imperij ad se retraxerat. Ad huius ministerij procurationem Antonius Perénottus Granuellanus episcopus Atrebatensis, Guillelmus Nassouius princeps Auriacus, Amorallus comes Egmondanus, Philippus à Stauele Glaionij dominus, Carolus baro Barlaimontius, Viglius Ayta Suichemus assumpti sunt. Atenim secretis codicillis imperat Gubernatrici, in perplexitate rerum & reliquos Aurei Velleris equites in communionem adscisceret. Concilium ipsa cogeret, quoties videretur, ipsa præesset, suffragia exquireret, sequeretur, aut statueret, non quod plures sentirent; sed quod putaret optimum

mum. nunc cum paucis, aliquandò cum om-
 nibus, sæpe cum multis, semper tamen cum
 Granuellano deliberaret, è Finātijs subinde ac
 Priuato Concilio vires aduocando. Sic nihil
 temerè, omnia tutò agi. singulos falli posse,
 neminem omnes decipere. Gomefium quoq;
 Figueroam Feriæ comitem Concilio Status
 adscripserat, & in Belgio relicturus erat. Sed
 nescio quo fato mutauerit consilium. Pro-
 cerum arte factum dicitur; maximè in-
 uidiâ eorum penes quos auctoritas, & si
 deijcerentur externi, plus potentiæ speran-
 tium. Nam vt primùm Ordines Gandauum
 conuenere, non vno prætextu alium ab alio
 diuerfos admonebant, *ne sinerent prodi li-*
bertatem publicam. Pessimo consilio subiuga-
ri prouincias. Externorum dominationem
sensim insurgere. adeone effætam patriam,
vt reipublica senatum suppeditare nequeat?
an prouincialium fides periclitatura esset,
nisi in Concilium peregrini veniant? Comi-
 tem Feriæ senatui Status adscriptum. Quan-
 tum abesse, vt omne prouinciarum regimen
 Hispan-

Ordines
 Prouincia-
 rum insti-
 gantur à
 proceribus

Hispani in se transcriberent? à patrj's bonoribus Belgas excluderent? Et ad similitudinem victarum gentium cunctis imperarent? Primas dominandi spes in modico. ubi semel processerint paulatim insurrecturos, atq; ad se tracturos omnia. Quid enim illis cum his provincijs? nisi ut arcana imperij scrutarentur, ac dominandi licentiam à suâ cupiditate in patientiam Belgarum transferrent? sensimque populum assuescerent, non tam Regi absenti, quàm genti servire in quâ Rex degeret? adesse Hispanicas legiones, Et in præsidia distribui, tanquam sua patria Belgis tutò credi non possit. à provincialibus stipendia expectare. Et sic nullum tributorum finem fore, manentibus semper exigendi Et conferendi causis. nempe ut quod nunc voluntatis, Et liberalitatis esset, in necessitatem, dominumque verteretur. pudendum sibi, pudendum populo servitium; cum nihil civium oculis nisi Hispanicum occurreret, atque omnia externa. Meminissent ergo missionem exposcere, iampridem promissam. Et hoc potissimum

mun Ordinisbus conuenire. Pronis auribus hæc accepta, & certatim inclinatio animorum sequebatur. Inflammantibus insuper Ant-verpiensium querelis. Nam & Atrebatenses aduersus insolentiam militum orabant auxilium. ceteris quoq; promissam missionis spem in suum ludibrium recedisse murmurantibus. Igitur inter se de remedio consultabant. Præsentissima materies ad resoluendam vim principatus, cuius rationem quam singuli nõ audent, omnes exigunt; & nihil magis vnquam dominantibus displicuit, quam ex totâ gente concilium. Fremebant omnes tuendam libertatem. Plerisque addentibus, si promissa missio non procederet, reuocanda esse tributa in decem annos indulta. Alij reuoluebantur ad priuilegia sua; & hoc ipsum acerrimum telum aduersus licentiam principum.

Philippus interim Rex magnâ curâ iusta
 persoluebat manibus Henrici Galliæ Regis,
 paullò antè miserabiliter extincti. Inter lu-
 dos hostiles cum comite Montgomerio III.

*Rex Phi-
 lippus Gal-
 liæ Regi pa-
 rentis.*

cal, August, concurrens, dextro oculo vulnus acceperat vnde statim ex equo collapsus exanimis, sequentibus nonis exspiravit. Cuius morti Philippus ingemuisse dicitur. sed & Andream Vesalium, de salute eius sollicitus, in Galliam dimiserat. Erat enim nobilis medicus, Philippum sequens, natione Belgæ, qui non solum illius ætatis genium; sed ferè omnes ante se mortales humani corporis peritiâ superavit.

Aurei Velleris equites creat,

Hinc aurei velleris solemnia Rex celebrat, in cuius Ordinem assumpti sunt Franciscus Rex Galliæ, Guidobaldus à Monfeltre dux Urbini, Marcus Antonius Columna dux Paliani, Philippus Montmorantius dominus Hachicourtius, Balduinus Lanoius dominus Tourcoignij, Guillelmus Croyus marchio Rentei, Florentius Montmorantius baro Montignæi, Philippus comes Lignius, Carolus Lanoyus Princeps Sulmonensis, Antonius Lalaignius comes Hoochstratanus, Ioachimus baro Nieuhaufius Cancellarius Bohemiæ.

Ingres.

Ingressus indè conuentum Ordinum ex more suo pauca locutus est, sed sermonem eius Granuellanus excipiens, eiusmodi verba fecit. *Optandum erat Regi, partâ iam pace frui posse, ac vobiscum vnâ diutius in commune consulere. sed nutantia alibi sceptrâ inuitum abstrahunt. Hispania nouo Caesaris imperio non sat firmata, sine Rege diutius esse non possunt. Seditiois consilia apertius agitant, quàm aut fallere possint, aut contemni debeant. Prasentia maiestatis haut ullo negotio dissipabit periculum adhuc incipiens, cateroqui fortè noxium. Vos interim nisi spectatos haberet, hortaretur ad constantiam. Sed nec vestri mores, nec fiducia eius patiuntur. Dubitare nefas, similes adhuc vobis, id est; an Belga sitis. Fidem, & obsequium, nec per metum hætenùs retinuistis. Quam cætera nationes in Principe fortunam, vos in fortunâ Principem reueremini. Sed hæc laus ita manebit inculpata, si fæda sectariorum contagio non obliteret. nec id*

Oratio Granuellani ad Ordines Prouinciarum.

uestro; sed rei vitio, quæ sine concussione status non inualefcit. Reliqua scelera nocent singulis, hoc unum armatum est in perniciem vniuersi. Aliorum exitus vos docere possunt, quàm fragile sit imperium quod religionis turbine quatitur. Remissio legum Germaniam perdidit. Prouidendum vobis est, ne eadem indulgentia & Belgium corrumpat. ut tolli scelerum possint, puniendi sunt. Bonus nocet qui pepercit malis. remedium erit in ceteros, si vnus, atq; alter in exemplum veniat. Enimvero Princeps edicto pridem intonuit. sed peccauit, si in hoc leges dedit, ut per silentium, & secordiam iudicum populus disceret licentiùs transgredi. aut exercende pœne sunt, aut impares eritis flagitijs. Et quidem si satis esse crederet supremis Concilijs hoc ipsum mandasse: hodiè solitudinem, fidemque vestram nequaquam imploraret. sed in magno discrimine non satis prospicitur. Nimium firmari non potest cui sceptrum nituntur, & imperia seruiunt. De cætero, in omnem ipse partem sic prospexit, ut nisi quod sine illo eritis, abesse non

sen-

sentietis. Et quoniam Sabauda ad sua regres-
sus est, Margaretam sororem in duos annos
gubernaculo substituit. Carolum filium datu-
rus vobis erat, si eius esset ætatis, quâ librare
posset imperij corpus tot periculis septum. Bel-
gam tamen legit, recturam Belgas. ita ut
quoties discrimen impenderit, coram eundem
habituri sitis & Principem, & imperatorem.
Nec antè ab illo, quàm à periculis destituemi-
ni. Vos interim cultum, & reuerentiam quam
debetis Principi, deserte gubernatrici: &
quanti illum facitis, in hac ostendite. Reli-
qui veneratione, & silentio; Syndicus Gan-
dauensis (quippe sic conuenerat) Ordinum
nomine gratias egit beneuolentiæ Regis. *Ca-* Ordinum
responsio.
terum, inquit, idem animus futurus est tuis
qui fuit semper, ad religionem constans,
quia pro Principe pertinax. Et tamen Deus
auertat nefas. interim si irruperit, paratos
habebis ultores. Scimus quidem quod nec id
ipsum imperaturus fueras, si in tuâ esset pote-
state, sollicitudini, quàm voluptatibus, otioq;
mensuram ponere. Quippe hæcenus & reli-

giosi legum custodes, & acerrimi vindices
sumus. Veruntamen constantiam nostram
paullò antè extulisti suprà mortales. Pudo-
ri nostro graue preconium: sed ex affectu
tuo natum, cuius fiducià audebimus pete-
re à maiestate tuà, ut alienigenas elimi-
nes, qui tanta laudis gratiam inutili mo-
rà infringunt. Quid obsecro ad hanc rem-
publicam peregrina nomina? nunquid nos
ut cetera nationes inconstantia, aut stoli-
ditatis arguant? Ac ne externo quidem o-
pus presidio in pace sedentibus. fides nostra
faciet ut stabile, firmumque sit imperium.
Beneuolentia populi optimus regni custos.
Vanum est in pace alere, propter quod pa-
cem fecimus. sic lenior pace Mars erit.
quia tum necessitas patientiam acuit, in
tranquillitate calamitatibus succumbimus.
An externos credis temperaturos ab iniu-
rià, quos presentia Regis sui in modestià
non continuit? ecce Antverpienses, Atre-
batensésque, & Cameracenses de vi conquē-
runtur. Theonvilla, ac Marieburgum de-

*serta oppida. Pacem verò fecisti, non ut ibi
solitudinem relinqueres, quæ tamen ex ma-
gnâ parte manebit, si depopulatores istos non
eduxeris, Belgica præsidia imponens. For-
te tamen Gallorum inconstantiam, iam an-
te prospicis. Rectè id quidem. sed fama lon-
gè bellum præcurrit. Interim quid attinet
magno ere peregrinos redimere, in alieno
semper rapidos; Et tanquam mox abitu-
ros, spolia intendentes? supersunt validi
Belgarum manipuli. hæc sunt præsidia, quo-
rum virtuti Cæsar gravissimis temporibus
rempub. credidit. cur iam damnetur illorum
fides, quam per tot sæcula inuiolatam præ-
stiterè maioribus tuis? tantisper autem
bellum protrahent, donec externa gentes
sub signa conveniant, aut è proximo con-
curratur ad auxilium. Fulminatus est
Rex improvise expostulatione, admira-
tusque novitatem exempli, irascetur ne-
haut faciliè dixerim. Nec dubio, arcana
imperij tentari senserat. confestim tamen,
de-*

descendit è folio. Dixisse quidam ferunt, num & se exesse vellent, qui Hispanus utique sit. simul extra curiam se proripuit. Nulla tamen postea iracundiæ signa ostendit. Dux Sabaudia peruiaciam Ordinum verbis castigauit. Nam in illum diem vicarium imperium gesserat. Et mirari se aiebat tam procaciter interpellari principem, qui preteritis comitijs fidem prestitisset suam. certiora pignora dare non posse. pollicendo sancire Reges. nec eorum aliam esse cautionem. Detur ergo iustum esse quod peterent, interim non frustrari desideria Ordinum. tantum expectarent in alterum vel tertium mensem, saltem donec in Hispaniam venisset Rex, ubi stationes & hyberna assignaturus est legionibus, quæ præsens locus ostendit melius. Serò quidè Ordines pœnituit, iracundiâ Regis veritos. Sabaudum tamen hortati sunt, ut causam prouinciârum ageret.

Rex è Belgio soluit
& in Hispaniam
nauigat.

VII. calend Septemb. Vlissingâ Rex soluit. Comitum Feriâ secum vnâ reduxit. & nequam querelæ materiam, procul se agente,
in

in prouinciâ relinqueret, externorum præsidia post sextum mensem in Italiam reuocauit. arcésque & gubernacula ciuitatum prouincialibus tradidit. In comitatu eius paucè Belgis fuere. Hornanus classi præerat. Carolus Tiffinacquijs à consilijs Belgicis futurus Regi: Iodocus Corteuillius à secretis.

Hinc varij sermones per omnem prouinciam. plerisque laudantibus Regem, plerisque arguentibus, prout cuique amor, odium, aut ingenium erat. Prudentiores tamen causam abcessus, statúmque rei publicæ expendebant. Regem quidem necessitate actum in Hispaniam velificasse, quæ tot sceptrâ magnitudine caperet: vnde Italiæ commodè prospici, Indiæ contineri, atque ex opposito Barbari compesci possint. Seditiones verò obtentui sumptas, quò facilius imponeret populo, cuncta rapienti in deterius. Neutiquam tamen res in Belgio tutas esse. turbari facilè ac misceri posse, principe in Hispanijs continenter agente, crudóque ad longinqua imperia. qui non sæculi vitij,

non ingenijs hominum æstimatis, arces, præsidia, ciuitates, prouincias, hoc est; præmia defectionis optimatibus prodidit. Quid enim sequetur, nisi vt populus in vnus Regis sui reuerentiam antè intentus, nunc propiore spe, atquè utilitate suis præfectis velutè principibus sensim assuescat, ac consurgendi fiduciâ, virésque sufficiat? Formidabiles re verâ quorundam opes & hos quoquè in Concilium Status adscitos, vt intutæ potentix adijcerentur vires publici consilij. Sapienter eos dixisse, qui suasissent Regi, vt suæ gentis Proceres aliquot, quorum fortunam haberet in manu, cum auctoritate in Belgio relinqueret; qui Procerum acta specularentur, & non sibi, sed Regi cogerent administrare rempublicam. Æquum fortè multis videri, vt Belgæ relinquuntur legibus suis, sine peregrino magistratu, sine externo exercitu. sed hæc ipsa in prouinciarum perniciem quandoq; redundatura, otij ebrietate, ac longâ pacis segnitie.

MICLX.
Style veteri.

Profecto Rege Luxuriare cœpit Belgica felicitas, crescentibus sensim diuitijs quibus
 secura

secura pax viam aperuit. Diuitias autem
 sua exceperere vitia ; hoc est , superbia , la-
 sciuita , luxuria priuatorum , & magnifi-
 centia principum. Inter Proceres statim
 gliscebat æmulatio : quæ præsentia Phi-
 lippi Regis haut ægrè compressa , eodem
 absente sine retinaculo erumpebat. Ple-
 rique Granuellano infensi , criminabantur
 potentiam sibi grauem , multis nimiam.
 Et primò quidè Simon Renardus mul-
 tò antè discors , veteres inimicitias ani-
 mosè exercebat. Sed non vltrà , quàm
 vt actis eius contradiceret. Tacitis ad-
 huc cæterorum odijs , & manente in spe-
 ciem concordia ; donec Egmondanus atro-
 cius erumperet. nullà vetere irâ : sed
 irritatus , quod Helfautij toparcham , ad
 Hefdini præfecturam Granuellanus ex-
 tulerat ; adhibitis aulæ artibus , quas op-
 timi principes & declinant semper , & in-
 currunt. Iusserat Rex inter alia imperij
 decreta , vt ad vacua , & honorata mi-
 nisteria , à gubernatoribus prouinciarum

*Initium di-
 scordia in-
 ter Proce-
 res.*

nominarèntur tres , è quibus postea iudicium sibi , & electionem permetterent. Egmondanus ergò totidè m repræsèntaturus erat Regi. Quippe Hefdinum Artesiæ oppidum gubernaculo eius suberat. sed vt quarto loco , atquè extra ordinem Helfautium adscriberet, precibus Granuellani dederat; spondentis quidem, non ob aliud se id velle, quàm vt Helfautius splendidâ repulsâ Regi notus, ad futura momenta reseruaretur. Detecta fraus obliquis animis accepta. sed amicorum adulatio indignationem auxit, inferendo sæpius querelas , & ambiguos de Granuellano sermones. Clientes quoquè maledicendi licentiam insolentius efferebant ; ad læta , & tristia Procerum perindè semper compositi. Nec deerat Auriacus inueterato odio æstuans: Sororem Ducis Saxonie acceperat vxorem. & has ei tedas vt infaustas reipublicæ, & religionis exitium portendentes Granuellanus exprobrauerat. Adhæc Lazarus Swendius homo Germanus, Auriacum in gratiam cum Egmondano reduxit. vt qui ante illum diem

diem inter se discordes, conspiratis animis Granuellani potentiam destruerent. Nam & ipse Swendius armis inclytus, & magnatum amicitia subnixus, remoto Granuellano altiore fortunam præsumebat animo, hunc vnum sibi credens ad fastigium officere.

Tali rerum statu, cum offensi procures ad ^{MIDLXI, styletensi} ultionem spectarent, nouorum episcoporum fama adfertur. Res haut dubie saluberrima, ^{Noni episcopi inflantur,} & à multis retrò principibus frustra agitata, quam plerique secordia, plures bello retenti, Cæsar quoque ob consanguinitatem amicitiamque circumfidentium antistitum extraxerat, Philippo filio quasi per successionem tradens. Indignum ratus alienæ gentis episcopos, longum & secors in suos exercere imperium. Atque eâ tempestate in Belgio quatuor omnino episcopatus. Atrebatensis ex olim. Tornacensem, Vltraiectinum, & Cameracensem diuersæ principum pactiones adiecerant. sed tot simul prouincijs pares illi esse non poterant. Externi deinde Archiepiscopi his imminebant, qui salubria illorum

decreta turbare aut euertere confucuerant. Igitur Pius Quartus Pontifex Maximus, cum septem Cardinalibus deliberatâ, in tres archiepiscopatus discreuit prouincias Designatæ sedes, Mechlinia, Vltraiectum, Cameracum. E quibus Mechlinia dignitate eminentior, sex complecteretur episcopatus: Antverpiensem, & Siluæducensem in Brabantia: Gandauensem, Brugensem, & Ipreensem in Flandria: Ruremondensem in Geldria: Quinquè episcopi Vltraiectino submissi, Harlemensis in Hollandia; Middelburgensis in Zeelandia, Leeuwardensis in Frisia: Dauentrienfis in Transislandia, & Grocningensis. reliquæ prouinciæ linguâ, situque Gallis affines, quatuor episcopatus sub imperio Cameracensis explebant. Atrebatensem, & Audomarensem in Artesia, Tornacensem, & Namurcensem. Reliquum erat vt nouæ dignitates honestis opibus instruerentur. Frequens curia sub Paulo Quarto Romæ decreuerat, proximorum monasteriorum decimis tria aureorum millia detrahi. Deinde reper-

tum

tum, vt expunctis abbatibus, episcopi substituerentur. Eius consilij auctorem Granuellanum fuisse inuidia ostendit. Et sinistra de monachis fama, Pij Pontificis assensum facile attraxit. Præsidentibus enim episcopis, in ordinem redituri credebantur, qui solutis vetustate moribus, sanctissimam maiorum disciplinam corruperant. Præpositusque Granuellanusei curæ, proxima quæque monasteria corripuit. Forte eâ tempestate Affligemium, sanctusque Bernardus & Tongerloa abbates non habebant, & circa eligendi successoris consilium intentos, Mechliniensi, Antverpiensi, & Siluæducenti assignat. Nam & Donsanum Brugenſi, & Martinianum Ipreſi, & Egmondanum Harlemensi, Margarittanumque ac Liddanum Leeuwardensi, Bertinianum, sanctumque Gerardum Audomarenſi atque Namurcenſi ita addixit, vt quamdiu superuixissent abbates priorem opulentiam complecterentur, episcopis interim dotem conferrent. Gandaui S. Bauonis Præpositura erat, magnis opibus florens; nec multò diuitijs infe-

inferior S.^{ci} Læuini Præpositura Dauentriæ pollebat, quas vtriusque vrbis episcopus ad se retraxit. Archiepiscopatus Mechliniensis Granuellano cessit. Antuerpia Philippo Nigri destinata: Sonnius Siluæducensibus præficitur: Cornelius Iansenius theologus Louanienſis Gandauenſibus: Petrus Curtius Brugenſibus: Guillelmus Damasi Lindanus theologus Ruremondensibus: Fredericus Schencæ Tautenbergh, Vltraicctum retinuit. Harlemum Nicolao à Terra-Noua: Dauentrium Ægidio de Monte Franciscano: Leeuwerdia Cunerò Petri à Brauwershauen; Groeninga Ioanni Cnifio Franciscano euenere. Nicolaus à Castro Abbas Præmonstratensium Middelburgensibus imponitur. patrimoniumque omne cum monachis partitus, abbatiâ tranſtulit in cathedralem eccleſiam. Maximilianus à Bergis Cameraci relictus est: Carolus Croyus Tornaci. Franciscus Richardus Burgundus Granuellano Atrebatî ſucceſſit. Namurcum Antonio Hauetio Dominicano; Audomarum Gerardo Hamericour-

courtio abbati Bertiniensi contigit.

Hanc mutationem rerum aduersus rumor excepit, quem pro diuerso animorum motu multi explicabant. Procerum pars Granuellano infensa, & adeptâ materiâ ad criminationem vertebatur. Inde & contagionem attraxit nobilitas magnis potissimum domibus annexa. Nam promptissimus quisque adulatione, & obsequio, honoribus colebatur. sed & populus statim exarsit, irritatus acerbis multorum sermone, vagis auctoribus sparso, tanquam in priuilegia impingeret Rex, quòd sine Ordinum consensu eiusmodi nouitatem induceret. aliud specie præferri, aliud re agi. Granuellanum hominem arrogantem & Hispanis obnoxium; ac Hispanos dominationem cogitantes, hæc ipsa moliri. qui per artem intruderent episcopos, ut atrocitatem Inquisitionis inferrent. Nec dubitabatur, quin confestim tres theologi nobilesque & totidem iurisperiti in cathedralibus ecclesijs ad canonicatus subueherentur. Duo ex his Inquisitioni præfuturi

G

erant.

erant. Inquisitores vocarentur. reliqui verò
Assessores. quippe ea cuncta Romani Pon-
tificis diploma promiserat. Credulitatem
iuuere monachorum querelæ, in deterius
cuncta trahentes. & has passim iactas, teme-
rè creditas, inquieta multorum, & fœcun-
da rumoribus ingenia, cottidie in auctius
differebant. At profundâ irâ Auriacus Pro-
ceres alium ab alio diuersos aggrediebatur,
nouorûmq; episcoporum consilium argue-
bat, simul & Granuellanum onerabat ingen-
ti inuidiâ. Erat enim ingenio solers, & de-
merendis hominibus apto. splendore fami-
liæ, iuxta opibus potens, quamuis plerum-
que falsa, & inania ingereret, tamen cum fide
audiebatur. Quippe multis opinionem fece-
rat penetrasse se in arcana Regis, cuius in-
nocentiam modestè criminabatur; fluxam
illi fidem, nec Principe dignam. peregrinis
consilijs imbutum, & Granuellano obno-
xium, in summo imperio, non nisi imperi-
um cogitare. Inde plerique fastidire Regem,
cùm potissimum iactaretur, abrogationem
priui-

priuilegiorum imminere à Principe Belgis infesto, in quorum exitium Inquisitionem induceret. Multi proinde Granuellani acta propius expendere, amicitiam, congressum, familiaritatem exuere; Qui contra nitens, & spernendis rumoribus validus, archiepiscopatum Mechliniensem nihilò segnius auspiciatum ibat. Annotauere curiosi, neminem ex Proceribus extitisse, qui honoris causâ obuiam processerit. siue tamen neglexerint, siue aspernati sint officium honestatis, noui sermonis irritamentum fuit.

Sed eum paullò post in Ordinem Cardinalem Pontifex adoptauit. Galerum autem ipse Rex transmisit purpuratorum insigne, vt eminentiâ dignitatis Proceribus æquatum inuidiæ subtraheret, quem fastiditum omnibus iam pridem cognouerat. Nec ideò tamen inuidiam imminuit. adeo difficile est hominibus conceptū semel odium exuere, cuius nullus est modus, cum semel terminum transierit.

Cæterum antehac nihil adhuc aduersus religionem proruperat. metu legum,

Granuellanus in Ordinem Cardinalium assumitur.

Sectarij studia sua.

quas olim inexorabiles , infesta Procerum
dissidia resoluebant. Externorum commer-
cia non paucos Belgarum corruperant. & hi
episcopos infectandi specie, subinde religio-
ni & cæremonijs illudebant. Iam enim mor-
taliū omnium odia in episcopos se conuer-
terant. Execrabatur eos populus, vt Inquisi-
tores ; fastidiebant ecclesiastici, vt seuerissi-
mos morum censores; monachi denique, vt
bonorum suorum raptores. idem omnibus
questus, ex causis diuersis. miscentibus se se-
ctarijs, atq; animis multitudinis tædium pri-
stinæ religionis, simul & studia sua insinuan-
tibus; propter libidinem talia loquendi im-
punitam , cuius exemplum Proceres fece-
rant. nullum enim populo maius momen-
tum ad virtutes aut vitia , quàm inclinatio
Principum , ad quorum mores cæteri com-
ponuntur. Hinc ad hæresim ne sibi quidem
satis notam inclinari cœpit. occultis primū
studijs, & ob id nocentioribus. Donec alijs
scrutatis, pluribus conscientia obstrictis, &
vbi aderant vires, in parte religionis fuit pub-
licare flagitium.

Pri-

Primus furor Tornaco erupit. circa
calend. Septemb. è secreto & latebris in
apertum prodijt. Incolas eius ciuita-
tis ius commercij Gallis potissimùm mis-
cuerat, corruperátque. sed non aliud adhuc
quàm psalmos more suo noctu modulaban-
tur. audaciâ tuti, quam tenebræ absconde-
rant. Accessit deinde ad impetum nouitatis
Matthæus Launoy, homo ingeniosè malus,
& præstigiatori similis, prurientibus facem
subijciens. Is apud Caluinum adoleuerat à
primâ ætate, & in illâ scholâ studiorum suo-
rum rudimenta posuerat. Tornacum inde
accitus, multos eloquentiâ seduxit, cui spe-
ciem pietatis intexuerat. Emptæ furtim mu-
lierculæ fanaticum morbum mentiebantur;
quæ deinde mimicam sanitatem acceptum
ei ferebant. His potissimùm commentis au-
ctoritatem astruxit. Nam è proximis vibri-
bus, pagisque, & vndique effundebantur
homines tanquam ad miraculum. Et fuere,
qui sanctitatis famam ei circundarent. ne
quid deesset mendacio, centones vestium.

*sectarij in-
surgere in-
cipiunt.*

in religione habebantur, quas pro reliquiis ignari colebant, & profanâ manu contigisse in parte felicitatis reposuerant. Nec deerat ipse cohortari singulos, adire municipia, vbique adesse, Ministri munus exequi; neque iam occultò; sed propalâ: nisi quòd adhuc concionaretur in siluis, abditisque saltibus audaciam concluderet. Munia, quæ ipse non poterat obibant discipuli. qui non minori imposturâ rudem populum ludificabantur. sed non occultum diu mendacium fuit. Fanaticæ illæ mulierculæ, promissum operæ suæ pretium exigentes; & cùm negaretur, laruam omnem detraxere. Ne quis à nobis ficta hæc esse crederet, ipse Launoi libello vulgavit. quippe postea redditus est Romanæ ecclesiæ; vanæque credulitatis vestigia sustulit. Paullò tristius Valencenæ conflagrauere, Philippi Mailart, & Simonis Faueau vecordiâ accensæ. obscuri & ex vltimâ plebe homines Ministrorum prouinciam assumserant. sed flagitij comperti, conduntur in carcerem.

agrè

agrè id ferebant sectarij. totàque nocte
per forum & tenebras lymphantibus similes
volitabant, clamoribus turbidi, & psalmorum
cantilenis in vernaculum numerum tradu-
ctis lasciuiantes. Sed nec abstinebant minis
in prætorem, cuius aures crebris verbera-
bant iniurijs. simul auxilium afflictis spon-
debant. Nec magistratus obuiam ibat.
plurium vesania audaciam excusserat. &
inconsultâ gubernatrice, cum periculo
seditionis incipere nemo audebat. Parmen-
sis re cognitâ animosè leges exerceri iubet.
Itaque primores ciuitatis in curiam coeunt,
quam compleuerant armatis; ac ne effusa
opificum turba seditionem faceret, pri-
mo, diliculo reos traducunt ad publicum
iudicium. Ingens multitudo ad rogam con-
currit, quem in foro excitauerat liCTOR. Iam-
que eò quoq; damnati producebantur; cum
à plerisque lapidatio vrgeri cœpit. deindè ira
peruenit in rabiem. impetùque factò auda-
cissimi quiq; violentis manibus rogam dissi-
pant. itum inde ad damnatos, quos liCTOR
tumul-

tumultu in carcerem timidus retraxerat. effractis foribus vincula rumpunt. carnificumque manibus in præsens noxios eripiunt, vt paullo post vecordem spiritum digno redderent supplicio. Igitur venere iudices extra ordinem à gubernatrice. præsidium militare ex proximis hybernis vnà transmissum. Ferocissimorum sanguine expiatum est facinus. cæteris autem mens obtorpuìt, iam attonitis, & sibi metuentibus. vt facile appareret vim populi in multitudine perniciosam: sparsam verò, atque solutam impune contemni.

Hæc impendentium malorum initia, seu portenta erant; reliquis gentibus fortasse terribilia: Belgis tamen non intelligebantur. Tanta animorum obstinatio fuit. Immemores alienæ calamitatis, sibiq; imminentis, turbare religionem malebant, quàm non arce-
re episcopos, quos etiam ultro in remedium expetere debuerant. At illi nihilominus ad destinatas sibi prouincias accingebantur. Flandri, & Audomarenses haut ægrè admiserunt. Sil-

re. Siluæduceses, & Harlempjeses parumpèr commoti sunt. Reliqua Brabantia vt ad iugum inhorruit. Fortè Ordinum frequentiam solita tunc comitia Bruxellam contraxerant. Ibi abbates identidè in gerebant; *maiorum mores, & priuilegia pollus. episcopos in cœnobia intrudi; hanc alià causâ, quàm vt primo loco sederent in comitijs, prouinciarum vires specularentur, principumq; petitionibus mensuram statuerent ex suâ libidine: Denique vt nihil liberum, nihil sincerum amplius esset in Ordinibus. Quem enim in comitijs liberam vocem exercere, quem recusare aliquid, aut hircere contrâ ausurum? imminentibus suprà caput episcopis, cuiusque nutum, verbaque notantibus? aut adulandum fore illis hominibus, aut spem honorum in posterum abiiciendam; quando nemo deinceps ad magistratus, quàm per episcopos perueniret. Iam rectores illos in aula voluptatibus habitos, fractosque, à monasticâ disciplinâ prorsus abhorre. & hoc nihil aliud esse, quàm perturbationem Ordinum, & confusionem sacrorum.*

inducere. Tantum abesse ut religionis incrementum quareretur; Inquisitionis praefectos mutato in mollius nomine appellari episcopos. Per artem nunc theologos assumi; ut quemadmodum nova imperia; ita quoque egregijs virtutibus auctoritatem sanciant. Irrupturos mox aulicos illos. irrupturos alienigenarum liberos, nullo patriae amore retentos. Qui non conscientiam, non integros mores in comitia adferrent: sed aulicorum ambitu euecti, ac dominationem cogitantes, aliena tantum cupiditati inservirent. Neminem principum aquis oculis libertatem aspicere: ultimum in principatu semper esse regnum. Nec divitias illas totas suas esse. benignam maiorum liberalitatem partim in hospitalitatem, partim in compendium pauperum contulisse. manere adhuc posteros eorum. quo animo laturos, parentum suorum beneficia episcoporum fastui, ac pompa, tanquam instrumenta luxurie accedere? Omnia se expertos consilia, iurisconsultos toto orbe Chri-

stia-

stiano quasiuissē. nec laborare de iure, si
 leges valerent. Nunc cū imperio agere-
 tur aestimare necessitatem. Si tamen Ordi-
 nes secum miscerentur, fiduciam ponere
 in benignitate Regis. qui non suā voluntate;
 sed paucorum ambitione circumuentus tran-
 sisset in hac consilia. Illum Ordines adirent,
 omnium nomine affarentur, causaq; sua iusti-
 tiam representarent. Hæc & plura hic at-
 quē ibi iactata, traxerunt Ordines in sen-
 tentiam.

Eā tempestate Geneua vrbs antiqua, &
 studijs nobilis, passim à Belgis frequentaba-
 tur. Non tam liberalium artium causā, quæ
 Louanij non minus laudabiliter colebantur:
 quàm quòd Gallorum sermonem simul edi-
 fcerent. Cæterum nouitate religionum, quā
 tunc maximè Geneuenses præter cæteros in-
 signes habebantur offensus Rex, littera-
 rum commercio eius vrbs, Belgis interdixit.
 Et quòd facilius lubricam iuuenum ætatem
 concessis studijs retineret, nouam Acade-
 miam ex consilio Viglij, Duaci instituit.

vigilarent ; sed hoc ipsum suspicacibus exter-
norum animis persuaderi non posse ; Et pluri-
imum urbi suæ accessurum , si hoc incommodo
absoluerentur. multitudinem non aliter va-
nis , Et inanibus , quàm vero terreri : Et ma-
lorum hominum deliramentis concussam , stul-
tè omnia in metus trahere. Philippus Rex de-
liberaturum se præfatus, libellos recepit. Ré-
que pensatâ possessionem episcopatus in-
aduentum suum vacuum esse iussit. His au-
ditis, Geldrij, Frisij, Groeningenses, & Da-
uentrienses contumaciores reddebantur.
Nam & ipsi ab initio aduentantes episcopos
constanter repulerant. animati studijs Proce-
rum, inuidiam Granuellano ex omni parte
quærentium.

Medio tempore nuntiaturum est discorda-
re Gallias, & ingenti apparatu in ciuile bel-
lum reuolui. Et à Carolo Rege aderant le-
gati, auxilium orantes in vltionem sceleris
erga se perpetrati, cuius exemplum commu-
nis Regum causa postularet. suberat tamen
metus, ne complexi dexterarum verterent arma,

& infesta signa Belgis inferrent. Proceres in concilium vocatos Gubernatrix perpendere iubet, quid sibi agendum, & post triduum referre sententiam. Egressi curia, multi ex his cum Auriaco concedunt ad epulas, quas tum fortè solemniore instruxerat. Ibi de Granuellano plurimus sermo. Iam enim plerisque videbatur elatior quàm ferri posset. Quippe sine illius suffragatione neminem ad magna, & honorata ministeria prouchi aspexerant. & si quid in Hispaniam scriberetur, haut aliæ sententiæ Rex accèdebat, quàm cuius ille auctor fuerat, tantàm de se prudentiæ opinionem fecerat. vir sanè præstans, disciplinâ, & indole erectus ad magnâ, Regique charissimus, atque illo amicitiae gradu dignus, in quem consilij publici fata hætenus recubuerant. Hinc potissimum dolor, & indignatio, quòd homo talis, & quidem externus, occuparet primum gratiæ locum apud Regem, & in secretorum omnium ad-
mit-

mitteretur consortium. Itaque ut sæpe alias, tunc quoque passim criminabantur, quòd solus ille rempublicam regeret. quòd ex libidine cunctos extolleret, aut deprimeret. quòd sui ratio non haberetur, praeualeſcente ſemper illius ſententiâ, tanquam plus omnibus ſaperet. unum quidem è ſenatoribus eſſe; ſed re verâ imperij ſummam habere in manibus. Et ob id, ſuis artibus Gubernatricem ad prouinciarum regimen euexiſſe, non viribus, non experienciâ validam, ut reipublica munia ſibi arrogaret, ex arbitrio ſtatum formaret, ceteroſque calcaret recenti potentiâ. Nil ſe in concilio quàm numerum facere, egregiè ſcilicet ornatos, vano, Et ſuperuacuo titulo, uno Granuellano in ſacra, in profana, Et in omnia regimen uſurpante. Non aliâ cauſâ nouos introduxiſſe epiſcopos, quàm ut inuiſis hominibus, Et ſui ſimilibus Ordines impleret, ne qua pars reipublice Granuellaniſtis careat. mox fratres, mox cognatos Et affines Concilio Status illaturum. qui actiones Procerum obſeruent, Et apud Regem

Regem vniuersos accusent, vt supplantatâ nobilitate ad Hispanorum arbitrium rempublicam instituant. Olim Principes omnia per Magnates egisse. nec pœnitere veteris status. ad stabiliendum imperium maximè pertinere, si ratio apud vnum, cura cum multis communicetur. Eundum obuiam vanitati, & arrogantia hominis. Et hoc in expedito fore, si vnanimes fuerint, atq; vno semper ore sententiam prompserint. idem velle, idem nolle, id est; amicos esse debere, qui societate velleris propiore nexus iungerentur. eâque concordia auctoritatem illius conuulsuros. Et instabat Auriacus, vt priuatim nunc statuerent, quid post triduum dicturi essent in curiâ. Pauci quidem assentiebantur ei. Neque enim vsqueadeò corrupti mores erant. plebisque adhuc priuatas similitudines sic exercentibus, vt salutis publicæ curam non deponerent. Ab his igitur responsum, tres dies ad deliberandum datos, vt ab eo quod hodiè placeret, medio tempore liceret recedere. neque conuenire, vt priuatim inter se de
tanta

tantâ re decernant, qui coram, & sub oculis Gubernatricis iussi essent ferre suffragium. Condicto autem die, cum super inopiâ ærarij, Gallorûmque postulatis consulerentur, sinceris iudicijs decreuere, referendum esse ad Regem. actûmque vt Montignæus eâ legatione fungeretur.

Inter quæ Hornanus ex Hispaniâ superuenit, Conciliarij Status titulo excultus. vetus odium diuturnitate non exuerat. Statimque se factiosis applicuit. Cæterum Auriacus pluribus artibus nobilitatem iuxta, ac plebem sibi deuinxerat. comis, liberalis, magnificus, non contemptor, non superbus, commune nobilitatis vitium: solertissimè populo blandus, congressu & sermone familiaris, infimo cuique honorem reddebat, prorsus vulgari auræ commodissimus. tôtque bonas artes prudentiâ, calliditate, & solertiâ miscuerat; vitijs nisi plerisque Principum familiaribus, non corruerat. nihil temerè loqui, egregiè dissimulare, aliud lingnâ præferre, aliud pectore claudere tutissima quæq;

metuere. magnæ sanè virtutes quoties in virum bonum, & ciuilia patientem inciderint. Ingenium eius olim notauerat Carolus Cæsar, & reipublicæ quandoque graue, & periculosum fore prædixerat. Regi quoque paullò suspectior erat, quàm volebat videri. & ob id Flandriam ambientem, Hollandiæ præposuerat, eà tempestate inopi, atque infirmæ prouinciæ. Granuellanum quoque custodiæ causâ adhibuerat Concilio Status; virum constantem, & obstrepere ausum, quoties à ratione abiretur, & iustitiâ. Quæ res potissimum Granuellani inuidiam inexpiabilem fecit. Proceribus libertati eius irascentibus, nec satis patientibus secundo gradu post illum consistere. sed iam furore, & ambitu cuncta compleuerant. consilia domi frequenter habere, apud Gubernatricem impotentiam criminari, consilijs eius officere, nihil pensi habere dum è prouincijs amolirentur.

*Proceres ad
Regem scri-
bunt vt
Granuel-
lanum amo-
ueant.*

Eò tandem res deducitur, vt Auriacus, Egmondanus, & Hornanus ad Regem scriberent

berent in hunc modum. *Agris oculis Proceres summam reipublica in unum aliquem, translatam aspicere. Qua iam ut maximè incolumis esset, stare tamen non posse, nisi amoto Granuellano, cuius impotentiam omnes fastidire inciperent. se ad id consilij publico urgeri periculo. Malum esse displicere cunctis ut uni placeas. si qua suaderent, etiam crederes, omnia in melius processura. Placida Parmensis imperia populum continere. Neq; hac in ambitionem consuli, cuius causas procul haberent. Pro beneficio accepturos, si expungerentur è Concilio Status, ubi Granuellano presente, non indoli, non existimationi, ac ne sacramento quidem suo satisfacerent. Religionis curam diligenter acturos. Et illam hætenus inuiolatam stetisse solitudine suâ: quæ dissolutis Granuellani moribus perire sensim inciperet.*

Rerum nouitas ingentem Regi sollicitudinem incussit. Mox Debrementij dominum redire in Burgundiam iubet, quem pridem Granuellano infensum, mutuas similitates

*Responsum
Regis Phi-
lippi.*

MIDLXII
stylu veteri

exercere p̄ceperat. Proceribus autem in
hæc verba rescripsit. *Affectum animi vestri
perspectum habeo. cur tamen res in præsens
mutari debeant, non video. si ex vobis alteruter
excurrerit; cuncta ex liquido cognoscam. Re-
gem me esse meminî, & inauditû damnare non
posse.* Ingrata Proceribus epistola fuit. Quip-
pe non obscurè repulsi erant. & hoc ipsum
in contemptum sui interpretabantur. Inde
ad fortiora consilia respexere. & quod præ-
sentissimum remedium rebantur, Generalia
Ordinum concilia sollicitare incipiunt. Sed
Gubernatrix decretum Regis in contrarium
obtendebat. Nam inter plura alia arcana
mandata, hoc ipsum diligentissimè iusserat
Rex, ne absente se Generalia Ordinum comi-
tia indicerentur. Cùm ergò mentionem eo-
rum grauati admisisset, plus indignationis
factiosis accessit.

Auriacum
Bemonda-
nus & Hor-
nanus è
Concilio se
subducunt

Post aliquot dies, tres illi quos ante no-
minaui Gubernatricem aggrediuntur libel-
lo, in hanc sententiam. *Proceres sæpe inter
se miscuisse sermonem de statu publico. qui ab
exitio*

exitio quantillū abesset, ex his intelligeret. No-
uis opinionibus addictum esse populum. mili-
tibus stipendia non dependi, toties flagitata,
atque promissa. blanditijs ultra pacari non
posse. exhaustum esse Regis ararium, & alie-
no are grauatum. Parum abesse, quin im-
portuna creditorum libido negotiatoribus Bel-
gicis manus foris inijciat, & commercia in-
teruertat. Ista tot mala anteuerti potuisse
Generalium ordinum comitijs, vsitato hactē-
nus in anxijs rebus remedio. Cū ei verò
displicerent hac consilia, orare ut salutarī ali-
quā ratione subueniret. Nam quod ad se at-
tineret, abdicare Concilium Status, in quo ha-
ctenus pro umbrā seruierint. Simul omnes
abstinebant curiā, nec precibus, nec aucto-
ritate ad mutandam sententiam compelli
poterant.

Deinde ut erant ad omnia quæ agitaſſent
peruicacis animi, sumpſere rursus tabellas, <sup>Præcer
rursus ad
Regem scri-
bunt.</sup>
& eiusmodi verba ad Regem exarant. Lau-
dabile id quidem, quòd indictā causā in tuos
non statuas. Neque se Granuellanum reum
I 3 facere.

facere. contra bene illi consultum velle, si adimeretur onus, superuacuum forsan; at certe cuius humeri magnitudinem non caperent. Causam si requiris, à malis publicis exigenda est. Ipsa calamitates erudire te possunt, quàm impares lacertos imperio subiiciat. In Hispaniam, nisi per rempublicam foret, non vnus aliquis nostrum; sed vniuersi veniremus. Armorum strepitus, qui vicinas concutit gentes, ad intensiorem curam nos compellit, & in suas quemque cogit provincias. Attamen si verum scire vis, ex litteris nostris consequi potes. quarum fidei praesentia nostra, nec detrabet aliquid, nec adyicies. De cetero rogamus, ut in bonam partem consulas, destitutum esse à nobis Concilium Status. ubi intempestiuis simultatibus tempus terendo, magis graues, quàm vtilis eramus. Difficile est cum eo viuere, qui modum nescit in imperio.

In his motibus Proceres toti erant. cùm & populus, nihil horum ignarus, non mediocriter murmurare coepit. Multi non tam
Gra-

Granuellano infensi, quàm Proceribus adu-
lantes, maledictis agebant. Proceres enim af-
fectus omnium in se attraxerant, qui per cre-
ditas sibi prouincias animis ciuium propius
incumbentes; cùm amicos, & adultores ho-
noribus excolerent, & promptissimus quis-
que supra cæteros attolleretur, arcanū quod-
dam in omnes gerebant imperium. Igitur fa-
ctionem, & contumaciam eorum vulgus lau-
dare, Granuellani famam verbis, famosisque
libellis, atque omni prorsus modo proscin-
dere; auaritiam, ambitionem, libidinem obie-
ctare; crucem, & lapidationem meritum cla-
mare; vtique postquam per multitudinem
spargi cœpit, suasisse illum Regi, vt à Summo
Pontifice peteret absolutionem sacramenti in
auspicijs principatus emissi, quò sua ciuibus
iura; ac priuilegia eriperet. Sed longè aliter
prudenciores æstimabant ciuiles; artes, re-
rūque experientiam, & eruditionem atque
eloquentiam in viro summam, virtutes ama-
res, vitia non nocebant; quæ sub vmbra
magnitudinis excusata latebant.

Inter

*Falsus ru-
mor. Spar-
gitur Gra-
nuellani
in capita
Procerum
percussores
compara-
se.*

*Idem Pro-
ceres fœ-
dus inu-
nit.*

Inter quæ Bruxellæ vulgatum, destinatos occultè in Procerum capita percussores, & Granuellanum esse, qui licitasset. Rumorem illum à magnatibus vltro ad augendam inuidiam compositum, multi intelligebant magis, quàm credulo populo persuadere poterant. Proceres verò simulauerint ne metum, fide inuicem datâ, acceptâque sacramento obstringuntur. Legem fœderis nemo meminit. Nihil in Regem, aut religionem meditatum conuenit. Initium ab Auriaco cœpit. Egmondanus & Hornanus viua repentè odia intulere. Hoochstratanus, Montignæus, & Brederodius, spontanei sociare consilia. Bergensem nulla sua iniuria adiunxit. Ob æmulationem Granuellano aduersus, premendi inimici occasionem arripuit. Plures inierint ne fœdus, per scriptores non conuenit. Multi enim vt nomina dare, & participes esse vellent, perpelli non poterant. & modestissimus quisque ab eiusmodi factionibus abhorrebat. Constat autem cœnantes apud Gasparum Scetum Regis

ærarij

ærarij, seu Finantiarum quæstorem, inter vina, & facetias sortitò tesseram quæfuisse. Fortuna eligendi arbitrium in Egmondanum transtulit. Ille signum flagitantibus dedit, ut factiosorum seruitia nigro cultu instruerentur, & supra pallij latus, aureo internitente filo morionis cucullum exprimerent. Postridie lugere omnes dices, nisi quòd eminebat in veste ludibrium, quod non obscure ad Granuellanum referebatur. Ea res multitudini grata, bonorum indignationem contraxit. sed ante alios Gubernatrix offendebar, quòd non vnus hominis famam, quàm religionis reuerentiam ad risum, iocumque tractam aspiceret. Modestè igitur inculsati Proceres, loco cuculli reposuere fasciculum sagittarum, sinuantibus funiculis in medio astrictum. tanquam inuicti, quamdiu concordēs agerent. Granuellanus autem publico ludibrio expositus, Mechliniam turbatus se recepit. Prudentique absentiam furori cedens, negotijs imperij in posterum abstinuit. Nam & nobiles ad solita Brabantiae comitia

debeat. odium, & inuidiam pratendere, ut abducto custode imperium ipsi inuadant, & quod nunc alienum administrare coguntur, suum faciant. ausuros peiora, si prima processerint. Nec distas provincias aliter retineri posse, quàm si aliqui extiterint, qui Magnatum ceruicibus incumbentes, actiones eorum obseruent, intra obsequij limites cohibeant, nec in noxias cupiditates euagari patiantur. Hæc quidem Rex fauorabiliter audiebat. vicit tamen naturalis bonitas. simul discordiæ priuata odia supergressæ timebantur. Haut ignarus quantum sceptri sui interesset gentem illam in pace relinquere. quod vnum ipsi Carolus pater ante omnia commendauerat, & inter arcana imperij censi voluerat. Proceribus itaque in concilium redire iussis, tacito mandato Granuellanum euocauit, quæsito prætextu viam instituere iubens, ne id sibi extortum Proceres crederet.

Neque mora, Granuellanus prid. idu. mart. iter sibi in Burgundiā pronuntiat, Maximilia-
Granuellanus prouincij excedit.
 num dis.

num Morilonum, propositum Arienſem, archiepiscopaliſus officijs ſubſtituit. virum virtute inſignem, ſibiſue chariſſimum, ſimul & litterarum, atque eloquentiæ neruiſus inſtruetum. Cauſam reuiſendæ matris in prætextum viæ accepit. & ob id Chantenottum, & Champignem fratres vnâ proficiſci mandauit. ſed re verâ animum ad Hiſpaniam adiecerat. ſtruentibus fatiſus viam faſtigio, quod deinde aſcendit. Quippe illum comitata eſt perpetuâ, & inconcuſſa felicitas: cùm eos ferè ad vltimum fortuna faſtidire, & tanquam fatigata excutere ſoleat, quos Principibus aliquando chariſſimos fecit.

NICOLAI BVRGVNDJ
 HISTORIAE
 BELGICÆ.
 LIBER II.



ACTENVS quidē adhuc priuata Anno M
 odia videri poterant. sequens ta- 1544.
 men furor anno MDLXIV ex- *style ven-*
 ordium cœpit. fatale sæculum *teri.*
 discordijs; quarum initia, causæque in di-
 uersâ parte terrarum variè struebantur. Nec
 deerant vaticinantium ingenia, cū cœli a-
 spectus nihil mitius promitteret. Superiores
 tres planetæ, vnà cum Sole, & Mercurio in
 Leone concurrebant. præsaga malorum sy-
 dera, ruinam, stragēmque portendentia.
 Quippè eandem astrorum faciem ante quin-
 gentos annos exitiosam populis didicerant.
 Sed nihil tristius à Belgis expectabatur, se-

datiora sperantibus extruso Granuellano ; cuius fortuna inuidiæ cedens , liberiora factiosis scēlera fecit. Quippè vir acer, summis adornatus virtutibus , & per omnia sortem natalium egressus, insigni constantiâ, & auctoritate, consilio, & prudentiâ religionem protexerat. Nec tristis Gubernatrix; sed dominationis pædagogum iampridem exosa, materiam tranquillitatis auidè arripuit. Confestim & sine morâ Auriacum , Egmondanumque, & Hornanum ad se accitos in senatum redire iubet. Qui primò hærentes specie recusantium ; postquam verò flagitarentur, ad pristina officia rediere. Prima erat cura, necubi desiderium Granuellani esset : aut, absentiam eius sentiret respublica. Proindè summâ fide , consilioque cuncta, agebantur. nihilque intermissâ rerum curâ , subinde negotia in intempestam noctem protrahebant. Syncerâ etiâ inter Statúsque ac Priuatum Concilium , & Finantias concordia ; nisi quoddam liuentibus oculis Viglium , & Barlaumontium aspicerent,

rent, occultis tamen odijs: *Quæ perinde non extinguuntur ut cæpere: sed sublato dulce manent in partibus, & post certamen, metumque durant.* Huc accedebat facilis animus; perindè magnificus: & ex utrôque beneuolentia populi. Nam delegatos gentium, vrbiùmque hospitio, & conuiuijs certatim inliciebant, potentiæ studio, & æmulatione magnitudinis. Haut ignari, Belgarum animos non aliâ arte facilius capi. Nec frustrâ fuit tam profusa humanitatis explicatio. Nam subindè à prouincialibus noua tributa; & ex magnâ petitione semper aliquid auferebant. Quibus rebus Gubernatrici grati, sibi graues, cæteris luxuriæ exemplum, affligere mores sæculi. Et si fateri licet, hoc initium fuit malorum omnium. Tantam enim magnificentiam, & ex eâ inopiam, cupiditas excepit. cùm nemo turpe crederet, quod lucrosum quomodocûnque auferre; vt succurreret necessitati, quam luxus hiantem fecerat: pompæque suppeditaret instrumenta, prodigis sum-

humana polluta , quæstuique fuere. Nihil tam inexorabile , quod auri fulgor non flecteret : nihil tam flagitiosum , quod non molliret: nihil tam sanctum, quod non corrumperet. Quidquid in priuato Concilio seueritas expunxerat, in Concilio Status statim redimebatur. vbi non ex fide, & honesto: sed ex libidine omnia, & sine metu procedebant. ignarâ , aut incredulâ Gubernatrice, & quoquo modo acta , scrutari altius insolita. In cuius secreta quò facilius proceres penetrarent , Armenterium Hispanum sibi adiungunt, fidemque eius per speciem familiaritatis expugnant. vt verè dicere liceat , nihil mortalibus suauius quidem ; sed nihil quoque periculosius amicitia ; in quâ raræ felicitatis est tanti boni metam attingere, indissolubili , securoque nexu, & non suspecto commercio. Et Armenterius quidem antea rectus , & innocens , vbi semel dulcedine, munerum cupiditates soluit, subito prauus, par , similisque cæteris, in concupiscendâ pecuniâ, non modum, non terminum no-

uerat, vt sua tegeret, aliena vitia diffimulabat: quorum licentiæ Proceres fiduciam inſuper præferebant. Quippe muliercularum ingenia edocti, aſſentationum, & adulationum illecebris Gubernatricis animum adeò deuinxerant ſibi; vt ſi quid Præſes Viglius ſecretò ſuaſiſſet, protenùs ipſa referret ad Concilium Status: ſine quo nihil agi, nihil adminiſtrari permetteret. Hinc omnia ad Proceres vergere. preceſ, & libellos illi excipiebant, magiſtratus, honores, officia mandabant; Nemo in gubernaculo minus quàm Gubernatrix poterat. Neque adhuc tamen aliud, quàm conditionis ſuæ ſtatum venalem, atque inſolentem fecerant. Poſteà id quoque acceſſit, vt magiſtratum officia, hoc eſt; forum & ius, legum & tribunalium munia ad ſe reuocarent. Iam primum apud illos priuatorum negotia tractabantur. Si quis de iuſtitiâ cauſæ apud magiſtratus diffideret, prætextu boni publici euocabat in Concilium Status. Iam vocatiſ in controuerſiam Gorcomio, Worcomio

comio Salinisque Burgundicis, per modica,
& crebra damna lacerabant patrimonium.
Regis, & iudicia in quæstu habebant. Hinc
fluxa magistratuum auctoritas, priscam se-
ueritatem, & innocentiam retinentium, &
quod est perniciosissimum, iacebat Pro-
uincialium Conciliorum pressa, atque con-
tempta reuerentia, & sub pedibus sacrosan-
cta potestas. Nobilitas veluti frænis exo-
luta, ad omnia contumax. nullum in legi-
bus auxilium; cum vi, & armis resisteretur
lictoribus, & imperia magistratuum ignaua
redderentur. Idque Ordines prouinciarum
ægrè tolerauere, & vndequaque querelæ in
aulam confluxerant. sed delegati Ordinum
ingentibus onusti promissis, & sic remissi do-
mum, tamdiu in spe retenti sunt, donec impe-
tus spatio vanesceret. Accedentibus in super
ministorum nequitijs, per quorum vestigia
quærebatur fauor Procerum, & tanquam
internuncij responsa gentibus promebant.
Nam & hi muneribus venales, quò plura e-
mungerent, incredibili tædio lassabant pati-
entiam exigentium in aulâ vltionem. Sic

atrocissima quæque facinora impunè grassabantur. crescentibus semper vitijs, dilato semel remedio. Domus rapinis afflictæ, spoliata delubra, expilata monasteria, in omnes audaciâ, denique terror vrbibus intentabatur. Quæ & ipsa maximè onerabant famam Procerum, tanquam facinus imperantium. qui fontibus faciles, ad indulgentiam prompti, & ad omnia conniundo, causam suspicionibus dederant. Crebræ nunc quærelæ, nunc calumniæ de sacerdotibus percipiebantur. alijs diuitias, alijs dissolutionem morum infami licentiâ traducentibus. & sic maiestatem religionis in ministrorum sordibus contemnebant. Fuere etiam, qui censerent adimendam gladij potestatem huic Ordini, quem sacrorum integritas à profanis curis secreuisset. Prorsùs immemores, quòd eorum maiores profusâ liberalitate extulissent ecclesiam in tantum fastigium. Fortè autem Præpositus Brugenſis vacuam dignitatem per mortem fecerat. Neque accessio Præposituræ quamvis pridem destinata, Episcopo-

scopo antè permissa est, quàm Laicæ iurisdictionis insignia eiurasset. magnâ cum indignatione ecclesiastici status, cuius hæc prima iniuria noscitur. Præses Viglius iratior fremebat, quòd inutili nouatione maiestatem religionis proijcerent. Sed consilia eius suspecta erant. quasi idem timeret, qui idem esse cœperat; hoc est, Præposituram Bauonianam adeptus fuerat, lato imperio, titulisque amictam.

Itaque in tantâ morum vecordiâ, nihil facilius erat, quàm hæresim perrumpere. cum languerent iudicia, non lex, non metus conciliabula retineret. Inquisitorum seueritas, ante arrogans, atque implacabilis, in fastidium, risumque venerat. doctis reis, spiritum quem supplicio debebant, fauore, ambitu, & ad vltimum pecuniâ redimere. Pro quibus Auriacus, & Hornanus non rarò intercedebant. innixus vterque vxorum conscientia; quas in Germaniâ genitas, ac Luteranis imbutas sacris, patrius ritus non deseruerat. Plerisque mirantibus, & inter arcana imperij

numerantibus, ne matrimonijs aliarum gentium, aut rituum, purpurati miscerentur. Quâ in re quoque ab initio aduersarium Auriacus Granuellanum habuerat: nempe vaticinantem, quòd aliquando potentiâ affiniû, ad impotentiam abuteretur. Henricus Brederodius, & Florentius Pallantius Culenburgi comes subinde etiam damnatis aderant; & si possent, supplicio eximebant. audaces & turbulenti homines. ac tunc quidem vxorum auspicijs ad alios ritus transgressi, metuebant legum vindictam. Nam quantum in se liceret, multorum exitus, paupertas, exilia ostenderât. Hinc sermo, & initium cœpit de mitigandis legibus. Quæ res exinde perpetuis contentionibus agitata fuit: donec religioni, & reipublicæ, nec minus diuerso tempore, suis quoquè auctoribus exitium attulerit. Non deerant qui apertè iam dicerent, haut aliud superesse remedium in corrupto, & ad discordias vergente populo; quàm si contagio mollius haberetur, & lentus vsus peruicaciam frangeret, quam ignis, ferrumque debellare non poterat.

rat. Sine dubio malitia creuerat. ita tamen ut non & multi supplicijs absumerentur, ac maxime quorum promptitudo flagitij misericordiam excefferat. At hi contumaces aduersus tormenta, nulliusque sceleris extra nouitatem comperti, tanquam innocentes perire videbantur. vnde miseratio in vulgum, quasi non utilitate publicâ; sed in sæuitiam legum vlticibus flammis sanguinem profunderent. Antverpiæ verò, & tumultus exortus est. leuis, & modicus; qui tamen intra minas non confisteret. Christofferum Smetium ex Carmelitarum ordine ad sectariorum ministeria transgressum, leges ad ignem protraxerant. Fanatica multitudo ad spectaculum collecta, primò ut in turbâ, licentius fremere; psalmis, & blasphemijs insultare, ferociusque agere. Iamque quod in eiusmodi audaciâ vltimum esse solet, saxi, fustibusque crumpens, præsentī, metu mortis lictorem exterruit. Ac ille reum rerum capitalium transegit ferro, fugâque se furentibus eripuit. Sed ne tunc vesania stetit, postquam desiisset esse pro quo certaret. irruptione in curiam factâ, vltionem quam à lictore

lietore non poterat, à iudice exegit. Magistratus foro pellitur. armati per urbem vagabantur. & egentissimus quisque ex plebe circumspectare direptionis initium, sceleratum prorsus spectaculum, clausæ toto biduo officinæ, formam captæ urbis faciebant. Neque hæc seditio Proceribus displicuit. Leges in fastidium venerant. quas, vt magis inui-
sas populo redderent; Hispanicæ Inquisitionis cognomentum indiderant. Nec minus interim de temperamento frequens inter se consilium habebant. & iam Gubernatricis animum explorare cœperant. Sed priuata, curia ex aduerso nitebatur. hætenus sana, constans, innocentia, & sanctitate morum eximia. Huius auctoritas in leges plurimum valebat. & proinde hac incolumi sperare, Proceres mutationem non poterant. Ludouicus Nassouius suaserat Auriaco fratri, vt homines aliquot suæ factionis Priuatæ inferret curiæ, & aduersariorum vires accideret. Et eundem Nassouium in Belgio versatum ad concitandas discordias, post ipsas discor-

discordias demùm sensimus, fax, & turbo sui sæculi. sine lare, sine bonis, sine familiâ, omnem spem, fortunam, consilium in turbidis habebat. Sectariorum partes in Galliâ amplexus, bonorum suspicionem in Belgio non euasit: tanquam & hîc seditionis semina sereret, vt semper esset, si bellum conditionibus in Galliâ poneretur, vbi inter armatos viuere posset.

Eodem tempore Georgius Gassander, & Franciscus Balduinus, magnâ studiorum famâ celebrabantur. Et Cassandrum quidem Hornanus, Ludouicus Nassouius Balduinum in arbitros religionis obtulerant. simul vtrumque exciuere sedibus. sed Cassandrum vmbatica vanitas, & rudes aulæ mores, statim vnde venerat in Germaniam reiecere. Balduinus natione Atrebas, in adolescentiâ hæresis crimine postulatus, & post fugam proscriptus, ad Caluinum decurrit. Eodem vsurus doctore, quem auctorem nouitatis habuerat. cui se celeriter liberalitate ingenij insinuauit. Erat enim formæ veneratione, & eloquen-

tiâ insignis. sed Sanctorum Patrum lectione crebrò otium infumens, & exinde magistro suo discors, reconciliatus est Romanæ ecclesiæ. Vnde se Iurisprudentiæ studio totum applicuit, liberalium artium mansuetudinem, & consortia admiscens. Vtroque genere disciplinæ ad famam prouectus, Heidelbergæ profiteri cœpit. & ibi Ludouico Nasouio imprimis innotuit. Post illustribus Galliæ familijs, eruditionis, geniique beneficio immerfus; vt in Belgium venit, magnam sui expectationem omnibus fecit. solers animo, obsequendi gratiâ, & ciuili congressu, nec minus officij comitate, ad ingenia principum vitam instruxerat. Nec enim nouorum hominum deliramenta sectabatur, & rursus in religione scrupulum moderat. Humaniusque credebat, iniquitati temporum cedere, pietatisque integritatem in paucis violare, quàm vim adferre turbatis conscientijs, quas in contaminatis hominibus nulla vnquàm supplicia eluunt. Itaque Auriacus ad se accitum promissis onerat. & ad professionem

sionem publicam in Louanicensi; vel Duacensi Academiâ destinat. Mox futurum, spondens, vt fauore proprii nominis, suoque, & magnatum suffragio accerferetur in Priuatum Concilium. Rebus sic compositis tanquam breui rediturum à se dimittens, muneribus honorauit. in spem adductus, religionis arbitria suscipi posse, si vir tantus cum Viglio, Masioque, & Hopero æquatâ dignitate componeretur. Nam & Barlaimontium per Gasparum Scetum sollicitabat in societatem consilij; peculiaria quoque in ipsum officia sua repromittens, si aduersus Hispanicæ Inquisitionis tristitiâ vnâ consurgeret. Quippe repulso Granuellano hunc iam titulum factionibus prætexerāt. Cæterum Barlaimontius vir sanctus, & innocens, virtute, & prudentiâ eximius, Granuellani partibus se iunxerat. Eius abcessu discordijs, odiq; relictus, fidem & constantiam nullâ tempestate libatas ad vltimum Regi seruauit. Ex aliâ parte Balduinus tempestiuâ pœnitentiâ consilium suū damnauit. stultum ratus, pro securis, & præsentibus, incerta, & præcipitia eligere. & vt

quid, si flagitaret multorum annorum stipendia seditiosus miles, si hareticorum tumultus ingrueret, reddendam sibi rationem; qui non legibus, non arario præessent: sed in hoc duntaxat haberentur, ut speciosa dignitatis umbrâ, noua semper tributa extorquerent à populo. Pares nempe se toti reipublicæ. curæq; sufficere, quæ frustra in plures spargeretur. Reuocanda esse Priuata curiæ, Finantiarumque officia ad Concilium Status, ut vnius reipublicæ una tantum esset veluti anima, concorsque sententia. Multis æqua sentire videbatur, quò hæc pertinerent non satis adhuc animaduertentibus. Concilij formam concepit, ut duodecim primorum gentium equites in senatum sublegerentur; iudicia Mechliniam reijcerent; gratiam, abolitiones, & eiusmodi, Præsidi cum assessoribus permitterent; Ærarium ipsi regerent; minores curas delegatis committerent. Sed hæc consilia etiam suis auctoribus ardua videbantur. Nec enim suppetebat, quo pacto persuaderent Regi, inter tot obtrectatores,

qui potentiam Procerum ante exosam, time-
re inciperent. Itaque diu secum expendentes,
centuriones clam subornant, qui exposcerent
in aulâ stipendium obæratîs militibus; & si
differrentur seditionem in promptu assere-
rent. Fortè & libelli curiæ oblatis, torpedinem
iustitiæ, & inde discrimen, in vastâ hæretico-
rum frequentîâ querebantur. Ergò in tot
malorum remedium, Gubernatrix contraxit
Proceres in Concilium. Omnes vno ore dixe-
re suffragium; Legatus in Hispaniam decer-
neretur, qui indicaret hæc Regi, & leuamen-
tum peteret. Ignarus adhuc Viglius quid
Proceres machinarentur, & melioribus con-
silijs dirigens fata reipublicæ, loco sententiæ
dicebat: *Seſtarios latè corripuisse provincias;
sed non esse desperatum remedium, neque au-
thoritatem imperij omninò proiectam. Profe-
ctò si floreret in republicâ leges; si pro modo fla-
gitij magistratus animaduertent, minori ne-
gotio debacchantium illam colluviem tolli pos-
se, quàm surrexerit. nunc verò nullum in ma-
gistratibus præsidium; & hinc scelera impunè*
gras-

grassari, & ab uno, ad aliud, sine retinaculo
transitum facere. sua tantum quisque impleat
officia, atque uterentur remedio à maioribus
reperito; haut dubie supplantaturos partem,
illam vulgi, & modicam respectu ceterorum,
& planè timidam. Non unius quidem anni
negotium esse, nec tot flagitia simul posse erui:
quemadmodum nec uno gradu istos homines
innocentia destituit. tempore opus esse. Virtus
publica, ut sensim adulta, ita & sensim corri-
genda. ab unitate auspiciandum; ut ad sum-
mam venias, neminem inde cœpisse, quò in-
credibile est peruenisse. esse in procinctu Tri-
dentinum Concilium: ne afflictis sacerdotum
mores desiderium suum deterrent. Addebat
deinde. Haut aliundè proteri ministros iusti-
tie, quàm quòd plerique Satrape insolentiores,
omnem reuerentiam, & obsequium erga ma-
gistratus exuerent. Vnde in ceteros impunita-
tis spes, liberiùsq; vitia gliscere quæ primorum
exemplo aluntur. Languentem iustitia ma-
num ad nervos renocare in expedito esse volen-
tibus. nec ob id accersenda procul regis
confi-

consilia. si prouinciarum rectores presidium militare licitoribus succenturiarent; si abolitiones, si indulgentia, haecenus promiscue, intra modum legesque coercerentur, mox redituram magistratibus reuerentiam suam. Exhausti erary nullam in ministris culpam. Bello Gallico Regis opes attritas, aliter recreari non posse, quam si vel Hispania, vel prouinciae nouis tributis subuenerint, quae autem hic extorqueat nemo, nisi sub oculis principis, cuius etiam maturam praesentiam tot simul republicae vulnera implorarent. Nescire ergo se quò pertineret destinare legatos in Hispaniam, quasi uerò hac hodie noua essent, & non pridem audita Regi. Si tamen discernere perseverarent, non aduersari se quidem, si in hoc fieret, uti Rex Philippus acceleraret reditum in prouincias. Sedit ergò sententia quæ legatum mitteret. Omnium consensu Egmondanus assumptus est. Erat enim propter militarem gloriam Regi acceptus: adhuc insigni corporis habitu, cuius apud principes ferè eximia est veneratio. Mandata quæ perferren-

ferrentur in codicillos Viglius redegit. postero die in curiâ recitauit. Pauca omnino erant. Sectariorum multitudinem, iustitiæ contemptum, & ærarij inopiam querebatur magis, quàm exprimebat. Denique orandum Regem, vt occursurus tot malis festinaret in prouincias. Plerisque probantibus quòd facundiæ legati plura reseruarentur, Auriacus ad occasionem intentus, meditato impetu in hæc verba detonuit. *Quid adhuc dissimulare conuenit? sine ambage nuntian- dum est Regi, hoc in statu saluam stare non posse rempublicam. Multitudo ex magnâ parte à religione maiorum defecit. nec pares sunt magistratus tanto incendio. proprio vitio prouincia laborant, propter sacerdotum mores sordibus maculatos. frustra contagio arcetur, cuius causa in visceribus alitur. Quid edictorum seueritas hætenus profecit, nisi vt atrocior succederet Inquisitio? neque hac ipsa coercendis flagitijs satis valida. mitioribus remedijs eluenda sunt hæc macula. Ostentata tormenta ingenia exasperant.*

N

ribus

ribus mille renascuntur. malè id cogitur ad quod persuadendo peruenire oportet. acrius stimulat qui conscientii vim adfert. Et in-tempestiua sunt remedia quibus delicta magis accendimus. imitandi sunt periti medici, qui interdum plus quiete, quàm mouendo proficiunt. honestè cedit, qui tempori cedit: hoc est, necessitatem aestimat. Nemo mihi priorū saeculorum innocentiam obiiciat. Idem genius hodierna ingenia non coniungit. Neque olim pœnarum metus, sed sui mores quémque continere. Ne irritamenta quidè eadem sectis nascentibus; cùm adhuc intra paucorum; viliūque conscientiam concluderentur. tota hodiè regiones huic disciplinæ accedunt. ut mirum adeò videri non debeat, si plerisque Belgis impetus iste nouitatis imposuerit. qui ut frangatur, relinquendus est sibi, in pingui, inertique licentiâ, ne ad insaniora adigatur necessitate. Vidimus quantum turba Valencenis, Tornaci, Et Antverpiæ accenderit. quid futurum si plures simul vrbes reuerentiam exuant?

Incer-

Incertum est remedium quod pollicetur nobis Tridentinum Concilium. Et ut vanum esse credamus, Germani non recipiunt. Exemplo eorum mitius viuendum est cum sectariis; quos ne catholici illic principes cruciatibus asperant. si crederem ad conscientias hominum valere supplicium, suaderem exquisitiorem quamq; crudelitatem. sed cum per tot annos igne, ferroque nihil profectum videam; utilius iudico detrahere aliquid horrori legum, quam palam facere impares eas esse flagitijs. Priscorum temporum sectas gladius non deleuit. eruditione, Et eloquentia, vitaeque exemplo reuocati sunt erronei illi ad ecclesiam. His armis hominum animis vim inferimus. religio imperium despicit. nemo cogi potest, ut credat inuitus. Et haec solidiora pacis sunt consilia; quae tamen Priuata Curia senatores non recipiunt. malunt omnia flagrare incendio, ut in turbidis undis largius piscentur. Vnde enim iustitia ista corruptela, nisi ab ingentibus illorum vitijs, insatiabili audacitate cuncta prostituentium?

*Non superarent tot diuitie istis hominibus, è scholastico squallore in Concilium accitis, si muneribus nihil concederent. Scimus quo conducti sint stipendio. nec illud par esse, quod luxum, & pompam, & tam infames sumptus toleret. Utinam tam modestè peccarent ut negari flagitia possent. Nunc si populo credimus, non aliter rectius quàm auro tentantur. nec quidquam tam sanctè indulgent, ut non accipiant. sed ut promiscuè omnes auaritia non in simulem: accusare certamina, inuidiam simultates possum, & priuati odij stimulos, quibus aduersandi libidine inuicem se laceffunt, & miserorum calamitatibus iniuria sua li-
tant. Quis probet intempestiuam Cancellarij Brabantia iurgandi licentiam, & exerceri solitas cum Masio contentiones? dicerem erump-
pturas in publicam pernitiem, nisi quis crederet à me malignius prolata, ad constandam inuidiam. Interim scimus quàm turbida sint consilia eorum, quibus affectus officit. Non est igitur quòd in discrimen vocent innocentiam Procerum. quasi scilicet Gubernatores,*

ad infamis cuiusque licetoris libidinem centurias militum subministrare debeant. Ponant illi senatores modum animo suo. ne tam proxi sint ad indulgentias, quas cum à nobis non impetrauerint rei, in istâ curiâ statim redimunt. Hoc est quod rempublicam funditus trahit. Nemo ad remittenda scelera facilis esse potest, quin semper aliquid adijciat malo publico. Nunquam mihi placuit, in tot Concilia curas imperij, & arcana distrahi. Sufficit omnibus Concilium Status. & hoc ipsum Proceres non rarò inter se secretò musitauerunt: ideòq; nunc repeto, ut omnes intelligant, haut aliter tot malorum finem haberi posse, quàm si Priuata curia, & Finantiarum officia, in Proceres transferat Rex Philippus; Conciliũque unum, veluti unum corpus, ex omnibus faciat. Postulandum hoc est ab eo disertis verbis, nullũ alioqui fructum legatio habitura est. Tum conceptam à se formulam depromens, in intempestam noctem sermonẽ protraxit. Lassa Gubernatrix & attonita ad cœnam discessit atq; in posterum diem

Concilium distulit. Ad hanc orationem Viglius diriguit. In se potissimum iaculatam viderat, & fundamenta imperij quati senserat. Ergo anxius animo, secretâ æstimatione voluebat, quid postridiè responsurus esset calumnijs. Inter curam & meditationes insomnem noctem protraxit. Surgente die habitum corporis componens, rotantibus oculis linqui animo cœpit. nervisque in stuporem actis, totum corpus sensus destituit. Exspiranti similem minister inuenit. cum nec satis compotem mentis amici renunciarent, in eius locum ad Concilium Status Ioachim Hoperus accitus fuit. Vir antiquus, & grauis, sanctitate morum, & eloquentiâ excellens. Quædam de abrogandâ Inquisitione, derogandisque legibus, & confusione Curiarum mandatis adiecit; non tam volente Gubernatrice, quàm non prohibente. Post calend. Ianu. digredientem Egmondanum Viglius orauit, vt vacationem sibi à Rege peteret. Ægritudinem animi in contemplationem doloris detenti, & fatigatum laboribus corpus

corpus prætendens: re verâ apud amicos priuatae vitæ desiderium testabatur; *Peruenisse se ad extremum fastigij. decidere posse, progredi verò non posse. tempus esse subducere ceruicem iugo tritam, & eripere se fortune fastidio. Rarò potentiam diuturnam. nec eodem statu fortunam consistere; qua post satietatem, ferè defauit in eos, quos proprio amicitia gradu Principibus admouit. Posse reliquum ætatis sapientia concedi: quod in republicâ per indignationem, & discordias transmittendum sibi foret proceribus inuiso; non aliquâ suâ culpâ: sed quia flagitiorum impatiens, suaderet optima. Prospectare imminentes seditiones, per nimium magnatum in scelus consensum; per laceratam superstitionibus regionem, legibusque parere nesciam. & ni benignius aliquod astrum adfulserit, undaturam breui civili sanguine. & hac omnia priuatâ vitâ se vitare.*

Interea Egmondanum in Hispaniâ magno honore, donisque Rex coluit. Ea tamen, quæ in Belgio agitarentur tristior accepit.

Quem

MDLXV.
Stylo ve-
neri.

Quem cum Alexandro Farnesio Gubernatricis filio à se dimittens , perferenda mandata dedit in hanc sententiam. *Gratissimis auribus legationem excepi. ex his quæ deferebantur cognosco sollicitudinem tuam. salutem publicam fidei tuæ diligenter commendo. Propter impendentem Turcicorum armorum necessitatem arctius in Hispaniâ detineor. nec referre pedem inde possum, nisi ut fugitivo similis videar, ac desperare de successu victoriæ. ut proximo anno veniam, summa ope nitemur. Destino interim ad te ingentem vim pecuniæ, ut nominibus meis æ alienum exolvas. De remedio iustitiæ vos videritis, & integrum ad me negotium referte. Caterum religionis causam perfunctoriam non existimo. multa simul in contemplationem veniunt. quæ hoc amplius curam intendunt meam, quò priori vinculo obstricta sunt fastigia. cæteris in rebus in eo stant consilia mea ut eligere possim. huius longè alia est condicio. Rex per leges esse non possum, nisi & catholicus; nec proinde alijs quàm catholicis*

tholicis imperare. Equidem spiritu nihil
carius habeo. eius tamen naufragium longè
vilius religione duco. Imò potius milles mori-
ar (si per naturam liceat) quàm ut in
hac re mutationem admittam. Itaque tres
episcopos, cum theologis, ac consiliarijs ali-
quot vocabis in concilium. memento viros
eligas, famà conspicuos, nec deteriores inge-
niis. Inter eos unum tibi Rythouium prae-
cipio. de ceteris ipsa melius despicies. Quo pa-
cto optima praecipì possint constituere eos ius-
beo. ne plebeia ingenia inopià doctrinae, post-
hac trahantur in errores animi. contamina-
ti verò sanitatem debeant melioribus disci-
plinis. Deinde quis ordo servandus in scho-
lis; quà ratione iuventus formanda quàm
optimis studiis. Multi enim institutionis vi-
tio degenerant à sensu maiorum, & falsas
sibi persuasiones induunt. Discutient deniq;
an pristina legum poëna mitigari debeant.
Nam ut relictum sibi scelus, sine metu licen-
tiam exerceat, mihi non est animus. Poë-
nam aliquam sanciri volo: & quidem va-
lidam

lidam , ad frenandam istorum hominum amentiam. Nam ut inultis , & securi degant, nec condicio publica tranquillitatis, nec diuini cultus ministerium postulat. Quamuis interim ostentata supplicia nec mihi satis videantur conducere rationibus temporum. quia damnatos audio letantium more canentes , atque inuicem se adhortantes, ultimam necessitatem excipere. Hæc ergo summâ agentur diligentia , prout magnitudo rerum postulat. ut si nos intentos viderint boni, resumant animum: mali verò despondeant. integra tamen omnia mihi serua.

Proceres e-
piscopi &
consiliarij
conueni-
unt.

Hæc relationis summa erat. quam III. non. May Gubernatrici exhibuit. pronumque Regis in Proceres affectum, sincerumque gaudium testabatur quod eâ legatione perceperat. Dein agitatam quosad exequendam Regis voluntatem adhiberent in concilium. Ex episcopis suprâ Rythouium, in Namurcensem & Audomarensem consensum est. His adiuncti Iacobus Martins Flandriæ, Hippo-

Hippolitus Persin Vltraiectensium præfides, Antonius Meulenare consiliarius Mechliniensis, Iodocus Tiletanus theologiæ, Wilmarus Bernarts canonum, professores. Viri eruditione illius temporis exculti, ac diuini humanique iuris scientiâ præter cæteros insignes. iv. cal. Iun. in aulam conuenere. sed ne rei quæ ageretur suspensionem populo facerent, quæsitus est color. Concilium Tridentinum retractaturi fingebantur. Primâ die facilis, & expedita deliberatio. Quærebatur de rectâ institutione fidei; de excutiendis sacerdotum ingenijs, non irritâ vetustate ad ignauiam prolapsis. sed in eam partem Concilium Tridentinum abundè prospexerat. saluberrima ecclesiæ reperta, Christianisque principibus ferè placita, sine scelere verti non posse. dandam operam vt in mores venirent. Et in hanc sententiam facta est discessio. Sequens cognitio longâ contentione, variisque orationibus agitata fuit. Episcopi contumaciter intercedebant pro legibus, quarum vtilitatem

prioris temporis innocentia sanxerat. Proceres è diuerso, quondam placuisse dicebant acriora remedia, temporibus sic postulanti-
bus. aliam etatem, alios mores requirere. ut annorum vices, ita & vitiorum esse. Veteres seculi sui innocentiam: se presentis aui genium intelligere. in republicâ idem semper spectare oportere; non idem semper conuenire. legum opportunitates non uno statu consistere. mutari solere pro temporum moribus, atque utilitatum presentium rationibus inferuire. Non esse laudatam in vnâ sententiâ perpetuam permansionem. Nautas aliquando non aliter, quàm flectendo in portum peruenire. cùm homines non possunt, flecti debere leges, quas mortales, & temporibus aptas prudentia condidisset. Eas quidem salubres olim, satisque validas fuisse ut perniciosâ excluderent. vitijs vsque adeo non feruentibus; cùm malorum initia adhuc in potestate forent: nunc tamen impares esse ad extirpandum virus quod tot simul gentes corripuit. adeò facilius excludi vitia, quam

quàm ejci. Sic diffissum est negotium. Auriacus verò postridiè iussu Gubernatricis præsentis temporis calamitatem exposuit. Nec immeritò, inquit, commoveor nomine reipublicæ; quam circum, intrâque sectarj læcessunt, & penetratâ eius crebris quatiunt motibus. Remedia ista languentis cui modum excedant, nisi sponte in Labyrinthum currere placet, unde fera nos pœnitentia sine pudore, & damno non eripiat, si nescitis, atrocissima religionis sunt disidia. In Gallis præsens habemus exemplum. nunc in se acrius, quàm in nos olim incurrerunt. tam vastum regnum ita seditione distractum est, ut videatur aliter componi non posse, quàm alterius partis extio. Quid si sectarj nostri, quod suis nequeunt consequi viribus, excidio patriæ quarant, amulâsq; gentes specie auxilij accersant in laceratum discordiis imperium? acerrimus morsus est irritata necessitatis. Neque ignoro adferri multa posse, quæ a derogandis legibus nos absterreant. Nam nec ipse

leges temerè vertendas iudico; si pares erant
 flagitijs; si condicio seculi inutiles non fe-
 cit; si tempora aliud non desiderent.
 Nunc etiàm horrorem illarum iudices auer-
 santur, & ad rigorem calculos non porri-
 gunt. Et quid obsecro profectum tam ex-
 quisitis supplicijs? Carcerem, laqueos, cru-
 ciatus homines isti ridendo excipiunt. aduer-
 sus terribiles flammarum apparatus rectos
 oculos tenent, nemo tot vexatus tormentis
 pœnitentie vestigia exhibuit. Et si verum
 volumus, cottidianis spectaculis animatur
 constantia, unius exitium, plurium est ille-
 cebra. Adhuc verendum ne lacescita pati-
 entia exeat in furorem, & ad armorum
 necessitatem desperatio traducatur.

episcopi
 certant pro
 legibus.

Hæc & similia Auriacus. Sed episcopi in
 contrarium arguebant: Sectarios nullâ flecti
 clementiâ. patientiam nostram contemptam
 pro imbecillitate accipere. Diuersum ceteris
 mortalibus illud esse genus hominum, reliqua
 scelera intra conscientiam latere. hoc unum
 non ante quiescere, quàm regnum occupa-
 uerit.

uerit. ferro opus ut excindatur tabes, priusquam in plures serpat. nundum eo gradu consistere, unde deici non possit. sed ne quid damni coërcitio in rempublicam infundat, pœnarum gradus statui posse. Doctoribus, Ministris, relapsis, contumacibus ultima ponantur supplicia. pœnitentiâ flexi, excusis bonis prouinciâ cedant. verberibus & exilio plectatur nequitia, quæ non ex alto processit; sed animorum simplicitatem occupauit. In omni denique animaduersione dignitatis, sexus, ætatis rationem iudices habeant. Si publicum exemplum non permiserit iracundia temporis, integrum eis sit repetitis calculis condemnatos ad triremes abycere. Hac secretò mandari iudicibus posse, ut ipsi cognoscant neque gratiæ aliquid concedi, neq; inexorabiles pœnas constitui. Cùm feruescerent studia partium, his pro legibus, illis contra contumaciter nitentibus, iussi sunt episcopi in codicillos referre sententiam suam. Proceres autem ut subscriberent persuaderi non poterant. Rogati verò
torpe-

torpedini iustitiæ remedium quærent, varijs dilationibus relationem frustrati, spatio tandem languescere passi sunt: vt ferè in republicâ solent fastidita negotia. Odio præsentium, & ne sine causâ mutationem legum postulasse crederentur, turbari cuncta malebant. Et nunquam postea de iustitiâ quæsitum.

Inter quæ superueniunt à rege epistolæ, Concilij Tridentini publicationem mandantes, cum paucorum Anabaptistarum supplicio; quorum exitium non ausa Gubernatrix, ad Philippum detulerat. Tunc demùm recruduit ira Procerum. Ausûsque est Auriacus Egmondanum insimulare, blanditijs captum, nihil præter inanem promissorum pompam ex Hispaniâ retulisse. Et ille non obscurè arguebat inconstantiam Philippi Regis, nec verbis eius fidem constare. Sed Gubernatrix cuncta in mollius flectebat, & ad roganda Concilij Tridentini decreta cogebat Proceres in curiam.

Tri-

Tridentum in Venetiarum finibus, inter
 montium amplexus, modicâ planitiæ ad At-
 hesim accumbit. Tristis scopulis, & horri-
 da regio. immitibusque damnata frigoribus,
 sed amœna ædificijs ciuitas, Italicis sicarijs
 quasi ad asylum seponitur. In hac œcume-
 nicum Concilium magnâ frequentiâ cele-
 bratû, ex loci vocabulo nomen accepit. Nam
 cùm Martinus Lutherus sacerdotû odio ferox,
 lacefferet passim tranquillitatem ecclesiæ: Ca-
 rolus Cæsar in hoc totus incubuit, vt dissi-
 dentes Germanias generali aliquo Concilio
 reuocaret ad pacem. Leonem tamen, & A-
 drianum, & Clementem Pontifices nequic-
 quam sollicitauit. Cæterùm grauescentibus
 indies malis, desideratas diu curas Paulus
 Tertius salutaribus auspicijs aggressus est. ac
 primùm Mantuæ, deinde Vicetiæ, ad extre-
 mum Tridenti conuentum indixit. Huic
 rei non alia ciuitas magis idonea. inter Ger-
 manos, Italosque media, ab Hispanis, Gal-
 lisque haut procul seiungitur. Sed cùm
 nunc commissi inter se bello principes Chri-
 stiani

*Concilium
 Tridenti-
 num pro-
 mulgari
 iubetur.*

stiani, nunc aliæ, atque aliæ causæ, & suspiciones, tam sanctum negotium interromperent: Pius Quartus VII. cal. Febr. MDLXIII finem imposuit, eiúsque publicationē Christianis Principibus passim comendauit. Transmissum ergò in Belgium à Philippo Rege, Proceribus examinandum traditur. Nec eares minori acta est certamine. Duæ sententiæ senatum distrahebant. altera suadebat rogationem, quæ ubi mandaretur à Rege sine scelere differri non posset. altera patriarum legum reuerentiam opponebat. Quo enim animo laturum populum, instituta maiorum, & priuilegia inaudito sibi eripi? scribendum ante ad episcopos; scribendum ad prouinciarum rectores, ut ijs saltē consentientibus noua illa decreta ferantur. Et hoc vltimum Gubernatrici non displicuit. statimque misit per prouincias. Responsum est ab episcopis, cæterisque Tridentinum Concilium publicari ita posse, ut regalibus, priuilegijs, iurisdictionibus, indultis, nominationibus, visitationibus, patronis, pauperumque, & ecclesiæ bonis non deroget.

roget. Hinc inter Proceres magna opinionum
circà ipsam promulgationem differentia. alij
sub formulâ ; alij sine exceptione faciendam
suadebant. Digna res visa de quâ consulere-
tur Rex Philippus. Et ille quidem promul-
gationem sine exceptione mandauit ; cætera
se curaturum affirmans. Itaque Gubernatrix
XI. cal. Iul. vno exemplo scripsit ad archiepif-
copos in hanc sententiam. *Publicationem
Concilij Tridentini Rex in se suscepit. Idem
mihî iniunxit, ut in Belgio quamprimum per-
ficerem. A vobis peto ne tam salutare differa-
tis negotium. Si manus militari est opus, exigite
à rectoribus prouinciarum, nisi eligatis à me
accipere. sed ne quis priuilegiorum, aut consti-
tutorum, vel alio aliquo pretextu excusatio-
nem obtendat: voluntas Regis est, sua cuiq; iura
interim salua, atque inuiolata relinquere.* Pri-
mus omnium archiepiscopus Cameracensis,
nec sine contentione vulgauit. Eandem enim
regionem necdum contagio latè infederat.
Post multum demùm temporis Mechlini-
ensis ægrius obtinuit. Ultraiectino perti-
naciùs contradietum. Canonici in soli-

tam feueritatem aspernabantur. spernendi morum, & licentiæ assueti, cum archiepiscopo crebrò intendebant certamen, cuius frugalitatem pro vitijs oderant. Frisiorum ciuitates misere legatos in curiam. Opponentibus maiorum mores, & constituta, responsum fuit, nihil adferri cur morarentur desiderium Regis, quod cæteræ prouinciæ tam promptè absoluerant. Nec eosdem nunc scrupulos sibi primùm moueri. plures prouincias idem agitasse: sed manere iura sua cunctis integra, quoad-disquisierit Rex, quid de his fieri placeat. Non mouebant hæc Frisios, obstinatos aduersus imperium. multisque contradictionibus auctoritatem Gubernatricis destructam, sequens motus languentem extinxit.

*Responsum
Regis ad
episcoporum
sententiã.*

Cæterum Rex Philippus, episcoporum, & theologorum, aliorumque sententiam pridem acceperat. diuque pensatis omnibus, & habito sæpius consilio, tandem in hunc modum rescripsit Gubernatrici. *In quo rerum articulo conflictetur religio, ex te accipi. vim legum*

legum remittere non conuenit. Quis ignorat quin facturus sim pessimo publico, si crescentibus sceleribus pœnas detraxero? Horum ultione nihil cordi magis habeo. ut iudices admoneas officij, fidei committo tua. sine publico exitio segnes esse non possunt. Et certè qui tanti mali causam propius quæret, illorum ignauia meritò imputet. Nimiùm mansueti in fontes fuere. quod illi misericordiam, ego crudelitatem esse censeo. Proinde si qui tibi posthac meticulosi videbuntur, licet ad me scribas, ego verò animosiores substituam. Non deerunt in tam vastâ regione, qui officium colant, numinûmque cultum vindicent. Inquisitionem superuacuum non duco. tolli non potest, nisi ut diuina simul, & humana iura violentur. Neque ego iam noua incipio. Casarea maiestas questionem eam induxit. utor ergò prouisis olim remedijs. Cui enim non constat, longè tristiora expectanda esse, si securum iter relinquamus flagitiis? occupandi sunt hæretici, priusquàm ab illis occupemur. Quantò intentius nos agemus, tantò

illis animus futurus est infirmior. Supplicij acerbitas bene viuendi disciplina est. Primo statim tempore, volo Anabaptistas in vinculis habitos ultimo tradi supplicio. samdiu extinctos esse oportuit. Nec Egmondano cum ad me venit fidem dedi, interim eos me sine noxâ habiturum. Referenti quippe sectarios magno gaudio tormenta excipere; videret igitur, respondi, an publicè non conduceret, secretò fontibus eripere spiritum. De cetero quod ad eam rem attinet, episcoporum iudicium sequor. Rectè illi censent insanabiles esse misericordiâ hæreticorum animos. ita altè contumaciam perbibere, ut nisi cum animâ superstitionem exuant. Fortius itaq; inurendum est aliquid, solida malitia, solida remedia postulat. In communi periculo optimum misericordie genus est, occidere. Si exempla non admittimus, quì consuli poterit ne peccetur? Inquisitores præter me intueri neminem volo. Lacescant scelus securi. satis est mihi, si scandalum declinauerint. Ego ira populi me offeram; locumque inueniam desperata

rata victoria. Codicillos episcoporum vnà remisit, adiectis ad marginem notis; vt magis eluceret, quæ culpanda, quæ probanda credidisset. De curiarum confusione mentionem non fecit. Ducem tamen Arscho-
tanum extulit in Concilium Status. tenacem religionis, & æmulatione familiæ Nassouijs pridem infestum nouerat; & si pristina re crudecerent odia, securitatem sibi promittebat ex discordiâ Procerum, rarò noxiâ principibus, quoties ipsi partibus non accesserint. Acceptâ à Viglio ætatis excusatione, Carolum Tissenacquium suffecit; prudentiam, bonasque artes in viro secutus. Ioachimum Hoperum Tissenacquio substituit.

Vbi hæc fama manauit in publicum, summa populi turbatio fuit. Hispanicæ Inquisitionis auspiciū litteræ Regis mandare ferebantur. Et pridem Inquisitionis nomen in horrorem cesserat, cui atrocissima quæque malignitas affinxerat. Criminabatur Proceres Philippum Regem à Granuellano obsessum;
inter

inter gentem Belgis æmulam, atque infensam cogitare seruitutem prouinciarum omnium, & in præludiū eius Inquisitionem præmittere. Quæ cuncta clientes licentiùs spargebant in populum. Nec crebrior alius sermo per circulos, & conuiuia, quàm, *velamentum queri ad perdendam innocentiam, iurisdictiones, & imperia hominibus concedi, qui non iure, non legibus agerent: sed per vanam, per calumnias, per nebulas suspicionum grassarentur in familias diuitum, ademptum iam cuique commercium sermonis, paratis semper delatoribus, qui in foro, in conuiujs, in domibus, & undique vniuscuiusq; verba, nutumque exciperent. neminem fore infontem, qui inimicum inueniet ausurum accusare. tantam nulli potentiam, in quem superciliosa illa auctoritas non arrogaret imperium. nihil fascibus concedere, nihil sceptris deferre. Carolum Casarem criminationibus notatum, quòd cum Lutheranis in Germaniâ mitius vixisset. Parari in Germaniâ exercitus, qui inuisum Belgis tribunal per vim stabili-*

stabiliant. Alfonso de Canto, carcerem, vincula, compedes Bruxellis instruere. His rebus iter sibi moliri ad versenda prsuilegia; ad extorquendam libertatem, Dominantibus semper inuisam. Mera sine dubio insomnia erant. plebs tamen promiscuè credebatur, querebaturque; sine veri, aut falsi discrimine; ut quémque metus, dolor, indignatio, conscientia impulerat. Hinc nefariæ voces, & turbulenti sermones. qui intra paucorum conscientiam ante occulti, tunc primum soluto metu vagabantur. Libertatem eiusmodi loquendi proteruiâ Procerum aperuerat.

Fortè eâ tempestate inciderant Montignæi nuptiæ. Multi ex magnatibus ad solennia conuenerant. Incalescentes mero in Inquisitionem, & edicta atrociter perorabant; nec maledictis abstinerebant. Regem, adeò ut quidam obtestarentur sacramento, ni leges flecteret suas, ab inuito se libertatem expectituros. Quæ vox ab astantibus excepta, & inde repens in vulgus, nihil modestiæ reli-

quum fecit. Positi ad valuas Procerum palam libelli; parentes, patroni, protectores nouæ religionis appellabantur; & si animus sit pro libertate confurgere, promittebant non defore populū. Quidam etiā mimographorum, & id genus ludrica carmina in sacerdotes, & episcopos spargebant; simul in Romanum Pontificem exonerabant virus infanientis ingenij. Nec quidquam eorum latebat Gubernatricem: sed de imperio Regis sollicita, à primoribus ciuitatum secretò quærebat, an suprà remedium malitia consisteret. Plerisque omnibus consistere negantibus: Priuatum Concilium cum Proceribus in curiam contraxit, rogatura auxilium. Anceps deliberatio fuit, hinc Inquisitionis inuidiam, indè obfirmatum Regis imperium reputantibus. Sententia Viglij litterarum regiarum publicationem differendam esse ferebat; quo in statu res publica esset ostendens. importuniora remedia illa pristinis malis. Monēdos potius Inquisitores, ne iudicia, quæ in hæresim habent, vltra solitum intendant, vel ad aliena traducant

cant delicta, & sine duritie potestatem exerceant. Huic mòx consilio Auriacum aduersarium expertus est. Liquidum Regis imperium sine contumaciæ scelere protrahi non posse. interùm rem esse altam, plenámque periculi. quomodò tamen excusaturòs, quòd tot protelationibus deliberatam eius voluntatem frustrarentur? Agedùm, inquit Viglius, ego totam Regis iram in me suscipio. seruata reipublicæ tranquillitas nos absoluet. Et videbatur Gubernatrix inclinatura in hanc sententiam; cum Auriacus irato similis, intonare cœpit; perfectum hætenùs, ne quid amplius à se desideraretur. nihil litteris, nihil legationibus profectum. quid ergò exspectarent? nisi parere omninò nollent Regi, vt omnem ipsi inuidiam in Proceres reijcerent. Incerta consilij Gubernatrix, atquè hùc, illuc ex cuiusque sententiâ fluctuans, accessit tandèm tristiora suadentibus. quanquàm irati populi insaniam & impendentia pericula satis prospiceret: omnem tamen fiduciam in proceribus reponebat. Sed illi econtra

maturabant exitum publicum. vt funestus rerum exitus probaret, consilium quod ipsi tradidissent Regi, fuisse optimum. Lætus ergò Auriacus, atque renidens, proximè sibi assidenti susurravit in aurem, visuros se propedièmi ingentem tragœdiam.

*Initium
Inquisitionis.*

Sed locus admonet, vt de initijs, & progressu Inquisitionis pauca disseram; quibusque causis ad hanc legum acerbitem peruentum sit. Hispania à Romanis subacta, frigente iam imperio, Alanis, Vandalisque Galliâ pulsis refugium dedit. Quos cùm & illic Gotorum arma persequerentur, Gensericò, & Gunthario ducibus traiecere in Africam. Gotti verò tanquàm non sibi, sed Hispanis ipsis vicissent, pristinis incolis coadunantur, & ex varijs gentibus vnum veluti corpus, & Christianum populum constituunt. Post multum temporis Rodericus Rex nobilissimæ filiæ stuprum intulit. Iulianus comes puellæ pater, in ultionem sceleris Alanos, Vandalosque rursus accersit in Hispaniam. Qui permixtis sibi Iudæis, ac Sarace-

racenis, ingentique variarum gentium colluie, opposita Africae littora populis inundant. Hispanos congregi ausos, varijs claudibus afficiunt. Postremò ad internecionem caesos, & in Asturiae compulsos saltus, pro victis relinquunt. Inde Barbari iam securi, & sibi quisque regnum occupantes, in diuersa distrahuntur imperia. sed nec infelicitis exercitus reliquiae in horridis suis montibus diu quievere. Pelagium quendam regio ortum sanguine, ducem assumunt. Cuius fiducia cum Barbaris conferre manus ausi, & interdum victores, subegere primùm finitimos. deindè alium post alium Regem aggressi, dum cum singulis pugnant, magnorum incrementorum fundamenta collocant. Sed nihil adhuc quàm sceptrum victis ademerant; tributo contenti, quod capitatim pendere solebant barbari. Cæterùm Christianis cum Saraceno non satis conueniebat, crebras iras exercentibus discordiâ religionis. Et Barbari ferè potentiores erant, quàm vt timeri non possent. Itaque Ferdinandus, &

Isabella semel & in perpetuum securitati
consulere volentes, diuittunt per regna præ-
cones, qui iuberent omnes excedere regno,
aut Christiano ritu imbui. Plures Mauri pe-
nè octo iam sæculis Hispaniæ incubantes,
redditi sunt Africæ suæ. multos tamen na-
talis soli dulcedo retinuit. Qui ne simula-
tâ religione inter Christianos profani viue-
rent, Ferdinandus atrocibus deterruit legi-
bus, & ad eosdem persequendos Inquisito-
res instituit. Sed vt potestatem illam san-
ctiorem efficeret, Dominicanæ familiæ pe-
culiarem fecit. non habentibus tribunal ere-
xit. leges, & cæremonias in eam rem
utiliter reperit, & ad terrorem omnia
instruxit. Dammati tanquam piaculares
victimæ ad supplicia protrahuntur solem-
ni pompâ sacerdotes præeunt, sacrum ca-
nentes carmen. Ponè sacerdotes reus se-
quitur, croceo amiculo velatus, quod ni-
grantia geniorum simulacra, circumqua-
que interstingunt. mitram è papyro ca-
pite sustinet, in modum turbinis surgen-
tem;

tem ; in cuius apice humana eminet species, lambentibus flammis terribilis, quam circumvolantes geniorum figurę horribiliorem efficiunt. pila ori inserta vocem impedit. Sequuntur hunc Abbates, & canonici pontificali cultu adornati. Post quos præfides, gubernatores, magistratus, & tota nobilitas. Crederes funus ad cremandum efferri. Et hæc est illa Inquisitio, ad cuius nomen Belgæ adeò exhorruerant. Multitudini utcumque formidabilis, cuius animos nihil magis quàm rerum umbræ, atque oculis subiecta terri culamenta penetrant : tamen nihil in se habet, quod prudentiores deterreat. Cæterum vetustissimi Belgarum inter sectas quoque iactati fuere. adeoque hæresis anno DCCXII furialibus facibus Gandauenses armauit in mutuum exitium. Eam tamen non ferro, non metu legum, aut sanguine : sed morum disciplinà extinctam comperio. Exin continua pax, ac durata in Romanam sedem fides, & longa securitas ecclesiæ, cuius tranquillitatē anno MCCCCXLIV
homo

homo plebèius Duaci sollicitare ausus , petitis ab Archiepiscopo iudicibus,violatæ religionis pœnas primus exoluit. Vrbani magistratibus insolitam sibi quæstionem exercere non audentibus. Quippe canonistarum suffragia Pontificio foro peculiarem fecerant. At posteaquàm Martinus Lutherus tentare publicam animorum pacem , & in Christianorum exitium crescere cœpit : religionis inclinationem excepere leges , & iudicia , ad extinguendam tabem composita. Ac imprimis Leo Decimus Pontifex maximus in contumacem Lutherum atrocissimè detonuit. nec contentus censurâ ecclesiæ; insuper Hieronimum Alexandrum Præpositum S. Ioannis Leodiensis , Protonotarium , ac bibliothecarium apostolicum legauit ad Carolum imperatorem , audacis insanix vltionem , prouocans. Et quidem Cæsar habitis Wormatiæ comitijs imperij, postquàm Lutherum publicâ fide interpositâ cò accitum , fatentémque palàm scelus , frustra sollicitasset ad palinodiam, illic vndè venerat
secu-

securè redditum, seuerissimis sanctionibus proscripsit. Legesque has omnium primas post. non Maij MDXXI in sectarios vibrauit.

Ne cum Martino Luthero hospitij, vel commercij iura misceto. I.

Quisquis cum habuerit in potestate, plectito, aut vinctum Casari transmittito. II.

Illicitis eius commentis ne adhareto; adherentes cum ecclesiâ in gratiam redeunto, aut legibus plectuntor. III.

Damnatorum bona fisco, iudici, delatori, addicuntor pro aequalibus partibus. IV.

Famosos, vetitosque libellos, seu probrosas imagines ne parato. paratos exurito. V.

Typographi que ad religionem pertinent sine censurâ Ordinariorum ne excudunto in ceteris à Casare facultatem postulant. VI.

Cæterum præualefcente impetu nouitatis, successit Inquisitio; & ipsa suis armata legibus. quam primus omnium Franciscus Hultsius Brabantix Consiliarius anno MDXXII in Belgio exercuit. Iacobus Laurentius Me-

chliniensium Præses ei præerat viri boni, industriâ validi, moribûsque infontes, apud Cæsarem tot virtutibus commendari promeruerant. Cæterùm plerisque hanc potestatem Pontificio foro pèculiarem esse contendentibus; Adrianus Sextus diplomate firmavit. theologos tamen aliquot in assessores Hultio attribuit. Ei postea Clemens Pontifex iurisdictionem ademit, Cardinale à Marcâ episcopo Leodiensi succedere iussit. Nec à Marca tot simul curis par esse poterat. Itaque præcibus Cæsaris Pontifex indulgens, anno MDXXVII tres quæsitores Belgio assignat. Præpositum canonicorum regularium Asprensum Flandriæ imposuit. Præpositum. Scholarium Montensium Hannoniæ, atque adiacentibus prouincijs. Iacobus de Montibus Decanus Louaniensis feüero atque implacabili ingenio erat. eoque accommodatior vitijs temporum, Brabantia, Hollandiæ, Zeelandiæ, Frisiæ præfectus est. Multis illè vecordiam doctrinâ excussit. plures flagitium supplicio finire. Post
cuius

eius mortem, cæteros vt functione illa indignos, amotos accepimus. Ergo Paulus Tertius Pontifex anno MDXXXIII Renardum Tapperum theologum atque decanum, Michaëlemque Drachium, I. C. & vtrumque professores Louanienſes ſubſtituit. In quorum locum Pius Pontifex anno MDLX Iodocum Tileranum Præpoſitum Wallecourtij, necnon Michaelẽ Baium canonicum, theologos Louanienſes inſtituit. Quibus Cæſar prid. cal. Iul. MDL. quærendi leges præſcripſit in hanc formulam.

Inquiſitores, & delegati, adſcito tabellione commiſſas ſibi viſitabunt prouincias impendio publico. A magiſtratibus, viriſq; piis, & integris diligenter quærent in hæreticos, aut non perfunctoriè ſuſpectos. Qui damnatos habeant libros, qui legant, qui conuenticula in quibus de religione & ſcripturis tractetur, ſoneant. qui hæreticorū fautores, qui receptatores. Tabelliones ſcriptis elogia mandent atq; cuſtodiāt.

Fidem teſtium haut aliter explorent, quàm iuriſiurandi religione obſtrictam.

illos interim seriò admoneant, ne vel inuidiâ, vel odio, vel alio prauo affectu quemquam insimulent.

Qui eâ lege detulerit, ut nomen eius non inferatur elogio; ne admittatur in testimonium.

Ea quæ deferentur occulta maneant. Nomina denuntiatorum, aut testimonia, haut aliter Inquisitores publicent, quàm si aduersus reos iudicium experti fuerint.

Delatores interim indifferenter audiant. Cùm sinceram fuisse delationem constabit ex aliorum testimonio, delatum vocent in ius, sine respectu nullitatis prioris denuntiationis.

Si quis inuidiâ, vel odio, aut prauo animi affectu falsò deferat; iudicibus & magistratibus, aut supremis curijs plectendus tradatur.

Quisquis ad Inquisitores vocabitur, venire debet; cuiuscumque tandem auctoritatis, vel condicionis, siue præsides, siue consiliarij Prouinciales, aut magistratus, aut consules, vel senatores. Eosdem ad iuramentum compel-

compellent, dicturos se ex animi sententiâ, que vel scient, vel rogabuntur; utrû ne cognoscant hereticorû quempiâ, aut vehementer suspectû.

Qui testimonium inuitus dixerit, aut omninò perhibere detrectauerit, ab Inquisitoribus admonebitur. Si admonitus non paruerit, tanquam fautor rapietur in iudicium; aut arbitrariâ plectetur pœnâ.

Et si in pristinâ contumaciâ laicus perseuerauerit, ex edicto tanquam fautor hereticorum plectetur, aduersus ecclesiasticos iure agetur.

Præsides, consiliarij, iudices, pratores, vassalli, & generaliter quicumque officiales, magistratus & subditi, Inquisitoribus, tabellionibus, alijsque ministris auxilium præstent. tutos eos ab iniuriâ reddant. contumeliam inferre ausos pœnis coërceant. Si quis neglexerit, aut dissimulauerit, ut fautor plectetur.

Hi, quos liquebit esse hereticos, aut in edicta peccasse, vel qui duorû testimonio, vel aliquoquin legitime eiusdem criminis conuicti fuerint, comprehensi compingentur in carcerem. lu-

dices & officiales eam in rem præstent operam suam. inuiti, & negligentes pœnâ fautorum plectantur.

Inquisitores à Casare litteras accipiant, ad compellendos iudices, & magistratus in auxilium. Nam & Casar supremis, ac Prouincialibus Curijs mandaturus est, ut de inuitis, & negligentibus pœnam sumant, vel in eos se animaduersurum. Ecclesiastici ab Inquisitoribus comprehensi, condantur in carcerem Concilij Prouincialis, aut ordinarij. aduersus quos agatur sine strepitu, aut formâ iudicij. Lite instructâ è Concilio Casareo nonnulli adsciscantur ad ferendam sententiam.

Quisquis ab Inquisitoribus in hoc eligitur, de causâ cognoscere debet, & ad absolutionem, vel condemnationem rei suffragium promere.

Concilium quoque Prouinciale cognoscere, & pronuntiare cogatur, si ab Inquisitoribus interpellatum fuerit.

Si quis grauabitur, aut omninò detrectauerit conferre operam suâ, debebunt hoc ipsum Inqui-

Inquisitores denuntiare Gubernatrici , aut Priuato Concilio. Si Inquisitores adscito sibi Consiliario aliquo degradandum esse reum pronuntiauerint , laicus iudex sine morâ de degradato sumat supplicium.

Si ex elogio appareat laicum edicta transgressum esse; Inquisitores negotium conferant cum consiliario Casareo. ex cuius relatione Prouinciale Concilium in fontem secundum edictum animaduertet.

Sed ne interim Inquisitores incurrant periculum irregularitatis , veniam expectabunt à sede Apostolicâ.

Interea ad conficiendum elogium , Consiliarium sibi adsciscant. qui , si in edicta peccatum videat , magistratibus regionis , aut Prouinciali curiæ , & procuratori Generali elogium communicare debet, ut aduersus fontes litem instituant.

Si laicus ex elogio suspectus appareat , in edicta tamen peccasse non probetur: tunc Inquisitores adscito Consiliario , vel perito aliquo à Prouinciali cursâ delegato , de causâ cognoscent.

Simi-

Similiter si lite coram laico institutà , in edicta peccatum esse non liqueat ; reus tamen aut suspectus , aut iure communi plectendus videatur : utique iudex reum absoluet ab instantià : ad Inquisitorem tamen transmittet , ut cognoscat ille , an ex integro in ius vocari debeat.

Prouincialibus autem curijs mandat Cesar sub pœnà indignationis , ne Inquisitoribus impedimentum facessant. Et si controuersia inter eos oriatur Gubernatrici denuntient.

Officiales , Et Ordinarij molestiam Inquisitori non exhibeant : alioquin ecclesiasticis censuris deterreat eos Inquisitor , aut Gubernatrici opem imploret. illa verò subsidio erit Inquisitoribus , cauebitque ne tam sanctum differatur negotium.

Sed nec econtrà Inquisitor , Officialis aut Ordinarij iurisdictionem perturbet.

Cùm alterius prouincie incola ad Inquisitorem deferentur ; elogium ille transmittet ad Inquisitorem domicilij , ut de crimine cognoscat.

Inqui-

Inquisitorem deferentur; elogium ille transmittet ad Inquisitorem domicilij, ut de crimine cognoscat.

Inquisitores quoq; pastorum mores expendant, an viri boni, & sinceri, an catholici sint. si qui mercenarij deserto monachorum habitu pastoralia subierint officia, submouebit eos Inquisitor; quamuis ecclesiastici iudicis consensu rationem viuendi, cultumque mutauerint.

Pastores palam fouentes concubinam, aut qui ceteris scandalo fuerint; item indoctos, & inidoneos, episcopi, & Officiales, ex relatione Inquisitorum submoueant, dignioresque substituant. saluo iure collationis, & presentationis. Si episcopi, aut Officiales parere detrectauerint, Inquisitor imploret Cubernatricis auxilium.

In ludimagistris famam, & mores obseruet. simul quid inuentuti prelegant. si quid emendandum duxerit, denuntiet ijs qui subrogandi ius habent; ut vel ipsi corrigant, vel si videbitur ludimagistrum dimittant. Qui si

hoc ipsum facere grauabuntur, Gubernatrici denuntiet. Inquisitor deniq, in libros inquireret, ne damnati, aut suspecti excudantur vel distrabantur. item in mores, & familiaritates typographorum, & bibliopolarum. si quid corrigendum erit, statim emendet, ex magistratus aut curia Prouincialis suffragio.

In primis ea adhibenda est cura, ne pium hoc negotium ex difficili reddatur impossibile. simul ne emungant, aut deglubant populum Inquisitores. & ante omnia remedium adhibeant his, qua sine periculo religionis, aut detrimento reipublica ferri non possunt. persuasumque omnibus reddant, se non qua sua; sed qua Christi sunt querere. in hoc potissimum intenti ut à Belgio contagionem arceant,

Inquisitores eorumque ministri, stipendium à Casare accipiant.

Impensas capture & carceris prestabunt iudices, qui manum reo iniecerint, quas rationibus Cesaris imputent.

Philip-

Philippus Rex IIII cal. Decemb. MIOLV, sicut antè diximus, imperium adeptus, hæc parentis sui præscripta diplomate corroborauit, & sub titulo nominis sui tulit ad populum. Sed medio tempore alia, atque alia edita. gliscentibus indies nouis sceleribus, quibus sequentes leges obuiam ibant. Primæ illæ Anno MIOXXVI vltra mulctam nihil inflixerant. quas Anno MIOXXXIX transgredi capitale fuit. Mox MIOXXXI. MIOXXXII MIOXL. MIOXLIV. & MIOXLV. variè auctas: dein MIOXLVI intensas; atque MIOXLIX interpretatas, ad vltimum Cæsar IIII. calend. Maij MIO L in vnum omnes corpus contraxit, & hanc tabulam populo proposuit.

Libros Martini Lutheri, Ioannis Oecolampadij, Vlrici Zwingly, Martini Buceri, Ioannis Caluini, editiones sue ab vniuersitate Louaniensi proscriptas, ne vulgato, ne distrahito, neue legito, Famosas, & probrosas in religionem imagines ne fingito. fictas ne retine-to, ne distrahito. sacras imagines ne viola-to. secretos cætus ne agitato. à conciliabulis,

Et conuenticulis abstineto. Extra theologos ab vniuersitate admissos, de scripturarum sensu sermonem, controuersiâque nemo misceeto. Proferendi, differendi, concionandi illicita ius non esto. Qui secus faxit, perduellus esto. ex die criminis intestabilis esto. alienandi facultatem ne habeto.

Pœnarum gradus sunt. pœnitentiâ ducti, si viri, gladio plectuntor. fœmine in terram viua defodiuntor, contumaces igne cremantor, bona vniuersorum in fiscum rediguntor.

Domum sciens ne aperito sectariis. victum, et amictum ne administrato. ad Inquisitores vel magistratus deferto. quod si quis earum rerum prescriptum excesserit, noxa par ceteris esto.

Qui imprudens heresim contraxerit, et innocentèr habitam legitimè maledixerit, si de religione sermonem sparserit, relapsus habetor.

Qui suspicionibus diffamatus heresi maledixerit, aut ex eâ causâ pœnas dederit; amplexus illicita, etsi in edicta non peccauerit, relapsus habetor.

habetor. Relapsi ultimo supplicio, cum publicatione bonorum puniuntor. Suspecti vel ad pœnitentiam admissi, ad magistratus, dignitates, officia ne assumuntor.

Peregrini ad incolatum sine testimonio parochi ne admittuntor, suspecti habentor, in ius rapiuntor.

Patroni & magistratus territoriorum, flagitia ad laicum iudicem spectantia animosè vindicant. alioquin imperio & iurisdictione priuantor, arbitrariam mulctam incurrunt.

Inquisitoribus cùm in ius vocant, aut in vincula ducunt subsidio sunt. si ad persequenda ea, quæ ad Inquisitionem spectant, concurrere velint, admittuntor. Procuratores fisci negligentibus, & dissimulantibus dicam scribunt.

Archiepiscopi, episcopi, archidiaconi, abbates, prelati, capitula, vicarij, Officiales, Pontificij iudices, atquæ Inquisitores in sacerdotes hæreticos iudicia exercent.

Ad perpetuos carceres damnati, vel ad palinodiam admissi, si præterea in edicta deliquerint, seditiosius egerint, aliudue tur-

bulentum peccassint, magistratus publicationem bonorum persequunto.

Hereticum ad Inquisitores, episcopos, vel parochos deserto, transgressorem edictorum, ad magistratus, qui celauerit, fautor habetor, pœnâ vindicator.

Delator dimidium bonorum conuicti auferto; ita tamen, si ultra centum libras Flandricas in bonis non habuerit, eorum quæ amplius centum in bonis fuerint, dimidium percipito.

Qui conciliabula, & conuenticula indicassit, si particeps fuerit, impunitatem eius rei habeto. si non fuerit, dimidium bonorum centenarij, decimamque eorum, qui centenario maiores erunt, auferto.

Judices prouinciales de his delictis cognoscunto. magistratus municipales si prauenerint, iudicium exercento. bona tamen principali fisco addicunto, deductis impensis. salvo tamen iure XII. cal. Decemb. MDCXLIX vasallis prescripto.

Pœnas legum arbitrari, vel mitigare fas non

non esto. qui faxit, dignitate, & officio priuator. ad magistratus, & honores inhabilis esto. pœnam arbitrariam incurrito.

Fugitiui, & contumaces pro conuictis habentor. qui pro fugitiuis Imperatori supplicauerit, ad publica munera, ad honores, ad postulandum indignus esto.

Artem typographicam sine veniâ ne exerceto. nihil sine facultate Ordinarij praelis committito. Qui secus faxit, & illicita imprefferit, pœnâ sectariorum plectitor: si licita; exilium, & quinquaginta libra pœna sunt. domini pro familiâ tenentor. famuli extra officinam heri ne imprimunto.

Facultatem imprimendi, nisi boni nominis, nemo impetrato. Qui facultatem impetrauerit, iuramentum praestato, nihil extra prouinciâ, citrà censuram excusurum. nomen, & domicilium, simul & compendium diplomatis libellis praefigito.

*Ante distractionem librorum, Ordinariis aut vicarijs exemplar transmittito. sin secus, arbitrariâ pœnâ plectitor. Bibliopola
sine*

sine facultate ne sunt. librorum non priuilegiatorum quastum ne faciunt. Editiones extra, prouinciam excusas ante censuram Ordinarij, aut vicarij ne prostituunt. alioquin si illicita distraxerint capital esto. si licita XX. Caroli pœna sunt.

Boni nominis bibliopole sunt. in hasce leges iuranto. extra ciuitates ne habitant, neue distrabunt. inuentarium licitorum, & illicitorum librorum in officinâ habent, vel centum Carolis mulctantur Magistratus municipales, cum eruditioribus bis quotannis officinas scrutantur. bibliopole magistratibus officinas aperiunt. prater bibliopolas nemo venundato.

Ludum litterarium sine veniâ magistratus & parochi, vel eorum quibus hac prouincia mandata est, nemo aperito. noxa XII. Caroli sunt. iteranti, pœna dupli, cum exilio. boni nominis professores sunt. libros ab vniuersitate Louaniensi prescriptos inuentuti pralegunt.

Harum

Harum legum aterna auctoritas esto. ac ne in obliuionem veniant; singulis trimestribus publicantur. magistratus, si omiserint decem, Carolos fisco prestanto. secunda culpa duplo plectitor. tertia pœnis legum tenetur.

Ac ne tum quidem omissum, quò multa, & diuersa Antverpienses quererentur. Terrebat illos præcipuè quòd cum inquinatis hominibus miscere hospitium, & inire commercia vetabatur. Igitur Cæsar VII cal. Octob. MIDL. leges suas ad vltimum interpretatus, hæreticos in fraudem legum tantum, alienandi ius non habere edixit; aduenasque passim hospitio suscipi posse, si nihil irreligiosius, aut seditiosius dixerint, egerintue. Sic tandem ei rei pacem parauit, quoad sequens temporum malignitas, rursus in edicta conflueret.

Ergo vt istuc redeam, vndè me necessitas paullo longius abduxit; posteaquàm litteræ Regiæ, (quas supra retulimus) à præcone vulgari, & in fontes poenæ reuocari cœptæ; immanè, quantam feralis illa vox excitauerit

facem. non iam solùm territa plebes seditionis fremere : sed & omnis factio nobilium, totàsque prouincias murmur & infania peruadere, hoc non esse regnum exercere, sed tyrannidem, cùm alijs mortem, alijs exilium, omnibus metum prætextu violatæ religionis intentet Rex Philippus; vt singulorum bonis re verâ inhiat, non se adeo stolidos, vt ignorent, quæ sint officia principis, quæ populi, debere se obsequium, cætera liberos solutósque. Proindè si pergeret ille tentare, quæ extrema sunt in seruitute, inuenturum qui armata opponent corpora sua, bello honestius, quàm licitorum manibus perituros. Hæc & eiusmodi per cuneos, ac conuentus promiscuè iactabantur. Nam plærique verâ credebant Hispanicæ Inquisitionis adferri initium.

Eodem tempore Maria Portugalicæ Regis filio genita, in Belgium venit. Alexandro Farnesio Gubernatricis filio paullò antè desponsa; & ad eandem accersendam comes Mansveldius vnà cum familiâ in Portugalam concessit.

cesserat. Nuptiarum dies pro magnitudine fortunæ apparatibus insignis, multos mortales exciuerat. Nam & pater Octavius magnâ Italarû iuuenû manu aduenerat. ac ne studio magnificentiæ Belgæ vincerentur, cultu ad pompam exacto, hostiles ludos ad inuidiam instruxerant. Mensis Nouember erat, in hoc vltima dies S. Andreæ sacer, magno honore aurei velleris equitibus colebatur. Quippe patronum cum maiorum pietas huic Ordini præscripserat. Cùm igitur solita sacrificij solemnia, ipsos proceres cum reliquâ nobilitate corrogassent in templum; Præses Viglius Ordinis Cancellarius pro concione exponere cœpit; *Splendidissimum hunc Ordinem, hanc aliâ causâ cœpisse originem, quàm ut religionē & concordiam, maxima regni præsidia, Proceres alerent. Basim, & fundamentû reipublicæ religionē esse. sine illâ humanarû rerû regimen stare non posse. tutelâ eius omnibus incumbere; ac in primis Principibus viris, ad prodendû in vulgus exemplû. Ceteros mortales Regibus subiici. Reges autē Ecclesiæ. nec eam esse aliâ quàm Romanâ; hoc est, Christi Ecclesiam, quæ a tem-*

poribus apostolorum continuâ serie ad nos descendens, Beatum Andream huic Ordini patronum dederit. Eundem sicuti memoria traditur, idolus sacrificare iussu, Agaa proconsuli intrepidè respondiſſe, se cottidiè pretiosissimum corpus, sanguinèmq; domini nostri Iesu Christi aeterno patri in victimam offerre. illam esse veterem hereditatem ecclesie, ab ipso Christo nobis testamento relictam. multos olim ecclesiam expertam hereticos: neminem tamen hæctenus inuentum esse, qui in sacrificium confurgeret, tantique sacramenti veritatem in questionem reuocaret. Hanc primùm ætatem oppugnasse sanctissimum mysterium. Nec habitura fuisse commenta illa tot sectatores, nisi accessissent studia Principum, priuatis respectibus cuncta nouantium. Non Reges Anglia, non Germania principes amore diuini cultus professiones illas amplexos esse. alios, ut licentius indulgerent voluptatibus; alios, ut lautis sacerdotum patrimonijs implerent erarium accessisse huic disciplina. Gallorum deniq; Proceres ambitione flaman-

tes, aulâq; infensos, quò factioni suæ vires, & in amulos potentiam quærerent, prabuisse se tumultuantibus duces. breuiter, si à principibus mutata religionis causam exigas, haut aliam reddituros, quàm ut rationibus politicis, ad cuiusque affectum, pro larvâ seruiret. Hinc verò tabem illam cepisse incrementum, quæ apud nos eò proclivius erui possit, quòd intra obscurissimorum hominum ingenia adhuc absconderetur. Et hanc potissimum solitudinem ad Proceres spectare, aurei velleris sacramento obstrictos.

A plerisque effuso risu excepta est oratio; interrogantibus ecquas adhuc haberet aniles fabulas, qui modò de sancto Andream vanissima commenta, somniâque recitasset. Quæ ex eo hîc inserui, ut corrupti sæculi mores noscitarêtur. Quippe nobilitas in segnitiam, torporémque resoluta, nec ut olim intenta, ad martem, pascebat animum peregrinationibus. Ac specie studiorum Genènam transiens, dum bonas artes, & ciuilia inuestigare crederetur; prauos ritus, turbidosque mores

in patriam referebat. Hinc pristinatorum sacrorum fastidio laboravit. Numen denique contemnere cœpit. de quo ad ultimum nihil certi habuit.

Circà idē tempus, Swartenburgius, Hollius, & Westerholtius Bruxellis agebant. Germani principes erant. Sed à sensu maiorū abstracti, lacescebant subinde cauillis patiētiam Procerum, & si in eum modum incesferentur, ferro se libertatem asserebant ulturos. furiosi turbines ad discutiendum composita, per quorum etiam amicitiam Belgæ fidentius scelera audebant. Et mox omnia in turbas vergere. Prouinciarum Gubernatores concordī voce denuntiabant Gubernatrici, non velle se, & si maximè vellent, non posse tamen Inquisitoribus administrare subsidiū, aut inuidiosissimarū legum exercitium admittere. ita induxisse in animum, si obstinatius pergeret ipsa mandare, quæ communi officerent libertati, continuò se magistratu abdicaturos. Brabantiae Ordines apud Prouinciale Conciliū (Cancellariam ipsi nominant) exponebant

bant libello, non esse fas ecclesiasticis in Brabantia incrementum accipere, aut extra pristina tribunalia in ius vocare. easdem leges sacramento Regis sancitas esse, proterique, quoties contra solitos mores inferretur Inquisitio. Proinde ut reuocaretur mandatum, quo magistratus ciuitatum Inquisitoribus adesse iuebantur, orare. Trepidante consilij Curia, . consultatio ad Gubernatricem reijcitur. Et illa quidem attonita, primò, & ante omnia Inquisitorum Louaniensium sententiam explorauit. cum illi nescio quid inordinatum promississent; Brabanticæ Curia senatores, cum Priuatâ Curia, atque vnâ Proceres in consilium adhibuit. Tres fuere sententiæ. Prima, Cancellariæ, & illa obscurior. singulis non satis adhuc audentibus inuidiæ se offerre. Post apertius suffragari iussi, Inquisitionē hactenus Brabantis insolitam pronuntiant. edictis, & legibus, non inusitato eiusmodi remedio compellendos esse hæreticos ad officium. Priuata Curia cēsebat Brabantos Inquisitioni obno-

obnoxios. Sed Proceres statim Cancellariæ assentiebantur : posteriorem sententiam ut duram rigidamque reprehendentes , alteram illam laudabant, tanquam moderatā, aptamq; temporis; & quòd æquum esset credere, cum de interpretatione legum quæreretur , leges ipsas tractantibus. Orta ergò est & tertia sententia. Nam cum cæteræ curiæ hoc amplius decernerent , referendum esse de toto negotio ad Regem; Proceres econtra vociferabantur, *Non esse nunc tempus respiciendi ad tam seruum auxilium. Imo confestim, & sine morâ pronuntiandum pro legibus patrijs, in quarum iustitiam plurimum suffragia consentirent. nihil enim Ordines arbitratos, quàm negotium extrahi, ut tempore evanescat.* Et sine morâ Gubernatrix Proceribus accessit. cuius imprudentiam consilij, sequentium malorum euentus explicuit. Mox quippè cæteræ prouinciæ idem postulant, non expectato Gubernatricis imperio vniuersis Inquisitoribus adimebant iurisdictionis ministerium. Inquisitores verò paullò antè à Gubernatri-

natrice ad constantiam seueritatis animati, iamque attoniti, incertique quid agerent, vanis querimonijs in aula exprobrabant, compelli se ad intensionem officij, cuius potestas à magistratibus destituta, sine auctoritate, & formidine, imò vana, & ridicula relinqueretur. simul omnes parati Inquisitionis munia deponere; nihil aliud retulere quàm verba, & voces, & adulatoria, aulicorum fastidia. ambigua semper Gubernatrice, reliquisque occultè aduersis.

Quæ res viuendi licentiam palam soluit, populi mores, studiâque labefactauit. At, nihil æquè publicam accelerauit calamitatem, quàm turbulenta colloquia, quibus per multos hosce dies, non solum otiosa, segnisque multitudo maledicis sermonibus traducebat Regem: sed & nobilissimi passim viri, quem ego morbum perniciosissimum, iudico, quandò à capite diffunditur. Ergo ex omni parte seditionis materia quærebatur. multis haut obscurè frementibus, vindicandam esse ferro libertatem. Atque omnia

prorsus audaciæ opportuna dicebant. Nulli
in Belgio peregrinum exercitū. veteranos alie-
no are oppressos, perindè querulos. quibus in
pace nulla spes reliqua. causam, & initium ad
flagitanda per seditionem stipendia circumspe-
ctare. nec à Gubernatrice ad expeditionē exci-
ri posse promissu, roties frustratos. Quid tamen
si excirentur? nullum ex ijs metum. qui non in-
tegram fidem adferrent, plerisq; centurionibus
Inquisitionem detestantibus. ceterosque facile
consensuros in scelus, cum Proceres, cum tribu-
nos, cum duces in partibus viderint. Tardum
esse peregrinos elicere exercitus. sed nec illos sine
stipendio vexilla seruatuos.

Hos & eiusmodi sermones pronis auribus
plerique accipiebant, expendebantque. nam
& opes reipublicæ accisas nouerant, vulgatis,
passim arcanis imperij. Hinc audacia, atroxq;
consilium, & fiducia rerum nouandarum.
iam primū nimia licentiā, dein conscien-
tiā labentis aulæ, & quod negari non potest,
nouitatibus oblectatæ; cuius mores, & inge-
nium omnis ferè regio induerat.

Primum coniurationis consilium Bruxellæ fuit. sex nobiles ad cœnam conuenerant, interque pocula increpantes ignauiam Procerum, quòd toties de abrogandâ Inquisitione consultando perdidissent operam; atque inde indignitas animos acueret, tristissimum facinus exorsi sunt. ferendum utcumque erat, etsi non æquo animo, si saltèm plebei homines tanto sceleri præbuisent initium. sex aurati equites coniurauere in perniciem publicam, & pacem Belgarum, statumque concussere. nec enim plures in exordio fuisse memoratur, ut iure miretur posteritas, à tam paucis cœptum, quod tot millium sanguis, nec adhuc satis expiauit. remulenti per insolentiam, atque lasciuiam susceperere nefanda consilia, ut pari audaciâ iam sobrij, nec minus vecordes exequerentur. Seu compromissum, aut compactum, seu societas (quæ inter malos nulla esse potest) siue potius coniuratio, seu quoquo nomine hoc ipsum quod egerunt, appellandum sit, fide inuicem datâ, acceptâque subscribere certæ formulæ. De nominibus auctorum omnium non conuenit. Quædam ætas

*Exordium
coniura-
tionis no-
bilium.*

obliterauit, atque odium partium, ego quò-
què consultò nonnullis parco, quorum ve-
stigia per annales dissipata inuenio. non quòd
posterorum magnitudinem in maiorum ma-
culis, pudendisque imaginibus, offendere
metuam. nam quomodocumque hæc scri-
psero, scio mihi imminere inuidiam. nolo
tamen erubescant illi, quos iam fastigijs
admotos video. quidam enim hodie eâ
laborant intemperie animi, vt maiorum si-
ue errorem, siue fatalem recordiam expo-
brare non timeant liberis innocentibus. Ini-
mica res tranquillitati publicæ, multisque
gentibus ciuili sanguine per factiones expia-
ta. Ego virtutes, & vitia temporum tradere
constitui: nemini verò ruborem expri-
mere. Cæterum Philippum Marnixium San-
ctæ aldogundum legem fœderis in hunc sen-
sum dictasse comperio.

Formula
coniurati-
onis.

*Satis constat, quosdam peruersos, callidosque
homines, insatiabili auaritia, intolerabilique
ambitioni, & superbia sue inferuientes, sub
falsâ religionis umbrâ, sub publica tranquilli-
tatis*

tatis prae-textu, perduxisse eò Regem; ut conatus ille sit, contra bonorum suffragia, contrà sacrosanctum Deòq; & hominibus dictum sacramentum, perniciosissimam Inquisitionem, per vim inferre. rem gentibus abominandam, diuinisq; & humanis legibus contrariam. infandam eius crudelitatem, nulla infidelium barbaries, nulla tyrannorum seuitia exaequat. nec ob aliud reperta est, quàm in contemptum diuini nominis, & exitium publicum. Si quidem iurisdictionem omnem Inquisitoribus transcribit. ceteros in seruitutem redigit. ciuium omnium capita in discrimen adducit.

Nemo enim insons futurus est, quisquis vel sacerdotē, vel Hispanum inimicum sibi inueniet, vel scurram aliquem in caput suum subornatum. Nam dicenda cause potestas, omnisq; defensio reus adimitur. Hac ergo reuocamus ad animū. & officij nostri ducimus imminentibus succurrere malis, corporaque & facultates nostras praeda eripere: ne prae-textu violata religionis innocentium sanguine calumnia pascatur. Itaque pulcherrimum facinus contrà societate aggressi sumus. grauissimisque

obsecrationibus obstringimus mutua capitæ,
nullam nos Inquisitionem in Belgio passuros, nec
ullam rem quæ eò pertineat, quoquo titulo ad-
umbratam; siue Inquisitio, siue visitatio, aut
edictum, seu quocumque alio nomine appelle-
tur. sed econtrà sublaturus, atquæ eradica-
ros eam funditùs, tanquàm fontem confusio-
nis, & iniustitiæ. Obtestamur interim hanc aliò
hac respicere, quàm ad honorem gloriàmque
diuini cultus, & amplitudinem Regis, ac salu-
tem publicam. ut salubri aliquà ratione popu-
laribus discordiis obuiare liceat. Proinde De-
um in testem accipimus, non cõmissuros, ut In-
quisitio, vel edicta nostrorum quempiam la-
cessant. ceteroquæ corpus, & bona oblaturus in
ultionem. sed nec ullus color, aut occasio, nul-
lus titulus, aut causa, ad excusationem profi-
ciet; quo minus ad auxilium quisquæ conflue-
re debeat, etiamsi rebellionis crimen contra-
ctum obtendat. Nec enim rebelles dici possunt,
qui gloriam quarunt diuini nominis, Regisquæ
maiestatem tuentur, & salutem publicam; qui
bonorum curam gerunt, uxoremque, & li-
beros, & familiam vindiscant ab iniuriâ; in
quo-

quorum tutelam Deus, & natura uniuersos obstrinxit. Interea ut sancta hac societas inconcussa semper, & inuiolata permaneat, fidem inuicem prestamus, ea nos acturos, ratumque habituros, que statuentur ex communi consilio, vel ex suffragio illorum quibus ea cura mandata fuerit. Creatorem cæli, & terra, mentium scrutatorem, in testem accipimus nostrarum actionum; sanctissimumque eius nomen inuocamus, precamurque suppliciter, ne cæpta hac nostra successus destituat. utq; per gratiam S. Spiritus ad honorem sanctissimi nominis sui, publicamq; tranquillitatem, & animarum nostrarum salutem dirigere velit. Amen.

Ipsa ferè retuli verba, sicut erant incompta, atque acerba, quantum Latino sermone assequi licuit. Primus deinde Marxius subscripsit; & si fallat, iratum Deum, hominesque inuocat. Cæteri deinde idem faciunt. Hæc enim erat tessera coniurationis. Cæterum ut furori pararet vires, itum inde per prouincias. amicos, propinquos, necessarios, fami-

familiares , notos atque ignotos, bonos ac malos, in idem facinus concitant. Multi levis animi vitio easdem partes amplexi sunt: pauci consilio. catholici, an hæretici, nullo discrimine. Toti dies comessationibus transigebantur; & ut quemque in contubernium attraxerant, obuiam ei ire, prensare, amplecti, onerare poculis, præire sacramentum, dextram chartæ ad signandum, adducere, dubitantibus exprobrare vecordiam, minis cogere. sic passim, latèque nomina data. & à plerisque tantâ securitate, ut ne scirent quidè quid subscriberent, atque interm pigeret exquirere. postridiè verò cum animo suo reputantibus magnitudinem facinoris, non patebat regressus ad poenitentiam. Auriacus, Egmondanus, Hornanus, Megemus, Bergensis & præterea multi eiusdem Ordinis, ut auctores, vel participes coniurationis iactabantur, quorum signa, quoque falsò codicillis impresserant. hac arte centuriones potissimùm, & signiferi in scelus obstricti sunt. in quibus tamen plus
amen-

amentia, quàm sceleris fuit. Scio quoque Henricum Brederodium, in Ordinariæ turmæ signiferum strinxisse ferrum, quòd sacramentum accipere detrectaret.

Primum colloquiū factiosis Bredæ fuit. Sub Id. Mart. non vno prætextu cum Hornano, ad Auriacū diuerterant, secretum inituri consilium. Forte autèm Swartenburgius, Hollius, & Westerholtius in Germaniam recedebant. Hoostratanus solemne viaticum abituris instruxerat, in Hoostrateni prætorio suo, frequentésque coniuratos conuiuio adhibuit. Egmondanus, & Megemus eòdem veniebant. Cùm multo incalescerent mero, trecentos, & ampliùs nobilissimos viros coniurasse in Inquisitionem & edicta Auriacus memorauit, virésque illorum non immodicè æstimare cœpit. Megemus nouitatem consilij admiratus; quid? inquit, tam pauci in perniciem publicam? ita me Deus, ducenta, florenorum millia permiserit mihi Rex, scurris ego illis caput imminuam. Vt facilè appareret abhorrere eum à furiosis consilijs.

Sublatâ iam mensâ Auriacus sollicitâ manu Egmondanum protraxit in secretum, totâque scenam coniurationis aperuit. quacumque tandem mente, Egmondanus inde cum Megemo Bruxellam iter instituit. Promptius hinc agitatum inter temulentos de summâ coniurationis. Auriacum, & Hornanum arbitros fecerant amentia suâ. magna nomina, & momentū partium. Publici enim consilij incumbabant. Quærebatur potissimum inermes, an armati; oratione, an libello sententiam exponerent. vicit mitior ratio, vt inermes, & libello; tanquam ius, forūque respicerent. In dictando libello non vnus aliquis consensus, sæpius in aliam atque aliam verterunt formam. Sunt qui Hispanicè conscriptum velint. quos ego falli existimo. De Gallico idiomate plures mecum consentiūt, quod & publica exemplaria promiscuè præferunt, apud omnes tamen in hanc sententiam fuisse inuenio.

*Libellus à
coniurationis
Gubernatri
obla-*

Celsitudini Parmensi.

*Belgas venerationi principis sui religiosius
semper fuisse deditos, nullus est terrarum angu-*
lus

lus qui ignoret, hanc in primis gloriam nobilibus peculiarem genius fecit, fortunarum suarum, vitæq; prodigiis pro salute Principis. Proinde nihil prius nobis fuit, quàm ne, maiorum vestigijs inhaerentes, vinceremur obsequio. Mouemur enim causâ reipublicæ. Aliquantillum inuidiæ subire eligimus, quàm intempestiuo peccare silentio, & ad præsens omittere, quæ ad communem incolumitatem pertinent. Quantum summa rerû collaturi simus, tempus aperiet, nullum maius à nobis obsequium expectari potest. Quamuis ergo nemo dubitet, hanc perperam fecisse Regem, quòd seruari iusserit leges, quas rectis forte consilijs Cæsar edixit: tamen habenda est ratio temporis, eius condicio, alia, atq; alia remedia exigit. Eadem illæ leges, ultra priscum rigorem exercitata, multorum motum hæcenus causa fuere. Quas cum nuperis suis litteris Rex non mitigauerit; sed contra exerceri eas acrius iusserit: timemus sanè, ne ingrauescentia mala in tumultus exeant, quos funesta terrarum vastatio excipiat. multa cottidiè indicia seditionis erumpunt. Iamdudum expectauimus, ut Proceres, Ordinesue

prouinciarum hanc in securam transferrent, atq; imminentium calamitatum radicem exscinderent: sed cum hoc illi grauentur officium, & in procinctu stet perniciēs, ac ruina publica: unusquisq; nostrum muneri sui esse credidit, exoluere se sacramento, atq; impendentis tempestatis periculum auertere. Satis quippe confidimus aequi, boniq; consulturum Regem hac monita. Maximè enim nostra interest. Quoniam ruri agentes, & populationibus expositi, omnium proximi habemur, in quos tumultuantium rabies feratur. Adhuc si rigorem illum semel admittimus, quem deinceps innocentem Rex habiturus est? non deerunt certè, qui improbà premiij spe inuitabuntur ad calumniam: qui pretextu violatae religionis, periculum singulis intendent. quippe accusatis nullum relictum est refugium, quàm clementia, & dissimulatio iudicis, in cuius misericordiâ omnium vitæ opesque sitæ sunt. Oramus ergò ut obuiam eas: & pro magnitudine causæ mittas ocyus ad Regem; ut videat, ne quid detrimenti respub-

respublica accipiat. Salua illa stare non potest, nisi mala hec, edictorum abrogatione anteuertat, & perire leges malit, quàm rempublicam. Quamuis deniq; necessitas temporis edicta non reijceret: iustitia tamen, & equitas abrogari postulât. Huius consilij rationem reddemus vobis, quotiescumq; Rex à nobis exegerit. Sed ne officia hac nostra inimicorum acerbitas in deteriorem partem interpretetur; tanquam contendamus dominantibus prescribere leges, aut Maiestati frenum inycere: Placebit Regi resingere leges generalium Ordinum consensu, & ultionem flagitiorum sic exigere. Rogamus tamen Celsitudinem tuam, ut dùm expectas voluntatem Regis, exercitium interim legum, & Inquisitionis suspendas. Quod officij fuit nostri, exegimus. impendentium calamitatum indicia non suppressimus. ne, si quid euenerit tristius, imputari nobis debeat. Proindè Deum, & Regem, & Celsitudinem tuam, ipsum denique Concilium, Status, propriamque conscientiam in testes accipimus presentis obsequij. in quo haud alios

*nos gessimus, quàm fidos clientes, & ministros
conuenit. Ideoque instamus quàm maximè,
ut maturè subuenias.* Offerendi partes Bre-
derodius poposcit, priscis Hollandiæ comi-
tibus stirpis suæ auctoribus ferox, atque
ore tenus facundus, perinde audax, atque fa-
ctiosus, & ad flagitium promptissimus ha-
bebatur. Bruxellæ ad calendas proximas ad-
esse omnes iussi.

Nihil adhuc de coniuratione in apertum
eruperat. Primus Gubernatrici indicium
Megemus fecit, ita tamen, ut nec totam ape-
raret tragediæ speciem. Imminere periculum
reipublicæ, flagitio trecentorum nobilium,
libertatem religionis petentium; quam fœ-
dere inter se per iusiurandum ic̃to, viribúsque
externis subnixa, mox armati postulatum ve-
nirent. Vnde id accepisset, quamuis rogatus,
non adiecit. externum sibi nobilem retulisse
simulans, cuius nomine abstineret, sacra-
mento pietatis obstrictus. Quippe Megemus, cæ-
tera egregius, & in paucis Gubernatrici postea
charus, rigorem legum, atque Inquisitionem
iux-

iuxtâ oderat, rarò hominibus tantâ virtutum
infitâ constantiâ, vt meliora semper suade-
ant exuti affectibus. supra mortales creden-
dus est, qui amicitia, vel odio, animique con-
tumaciâ aliquando non peccat. optimus ta-
men ille est, qui minus peccat. Paullò post Eg-
mondanus fœderis exemplar Gubernatrici
exhibuit. Nomina coniuratorum, nec om-
nium prodidit. Secutæ mox sunt ab Auriaco
atrociores epistolæ; parari exercitum, duces,
& centuriones legionibus assignatos, viginti
hominum millia breui in procinctu fore, co-
lorem quæri discordijs, denique mutationem
principis in sermone haberi. Ea se deferre,
quæ audierit. quamuis grauiâ, & incredibi-
lia, non omnia tamen ex falso constare.
Hæc ab illo ficta, & ad simulationem ma-
gnarum virium composita dicuntur, vt a-
moliretur suspicionem conscientia, simul
& Gubernatrici trepidationem iniiceret.
Quæ interim attonita, stupentique similis,
& iam magis, magisque pauida, reputânsque
secû quid faceret, quid primùm aggrediretur,
con-

concilium Procerum quos casus obtulerat, atque eorum quos maximè ducebat idoneos properè contraxit. variantibus sententijs, propè in altercationem res venit. Megemus clamabat; *non esse iam tempus certare otiosis opinionibus, & consultando dies perdere. aut delectum, bellumq; habendum esse; aut vulgandam religionis libertatem. Sed cum neutrum horum fieri possit inconsulto Rege, & imminētis periculi magnitudo interval- lum non postulet: quod reliquum esset, parendum necessitati; hoc est, Inquisitionem abrogandam, atque aliquid laxamenti dandum legibus, impunitate contracti sceleris factiosis promissa.* Et huic Egmondanus verbo assensus est: fremente Barlaimontio, *vanos esse rumores, & ad terrorem de industrià compositos. fieri non posse, ut strepitum tanti exercitus velocitas fame non praeueniat. cur metuerent paucorum colluviem, ex seditiosis aliquot pendente caputibus? momento temporis dissipari posse, conspirantibus in unum, Proceribus. Et si se audirent, extemplò in-*
signem

signem aliquem ducem obtorto collo arriperent. uno, atque altero percusso, quieturos ceteros. Et hoc maximè pertinere ad exemplum. Non placere sibi abolitionem concedi, ubi nec res, nec crimina proderentur. hoc non esse scelera tollere; sed prouocare: non componere seditionem; sed irritare, Et spe impunitatis, illecebram peccandi porrigere. Gubernatrix ad frequentius Conciliū, quod intra paucos dies habitura erat, rem ex integro distulit. variisque interim cogitationibus distracta, potens sui non erat. incautus ad credendum pauor, constantiam abstulerat quidquid in tristiore parte metus suggererat, secretā æstimatione librabat. colligeret copias? alieno ære demersum ærarium. neruum belli pecuniam esse. sed cui alas, cui centurias, cui legiones, cui deniquè exercitum crederet, intimis aulæ suspectis? conclamatum fore de religione, silentibus inter arma legibus; & sic bello amissuram, propter quod bellum gereret.

Erumpens in publicum coniuratio, populum exspectatione euentus detentum, variè affecit. prudentissimus quisque nec probare: nec tamen aliud quàm tentationem credere mitigandarum legum, quæ publicè exosæ, multis quoque familijs funestæ, atque exitiosæ timebantur. Longè alijs vulgo sensus erat. seditiosissimus quisque increpare peruicaciam Regis ducebat egregium. extitisse viros, qui assertum irent libertatem; qui iura, & leges tuerentur. irent nunc Inquisitores; citarent armatos; nunc torquerent; nunc vrerent. victam esse tandem, versamque in furorem patientiam læsam. Cæterùm acerrima seditionum materies fuit, quòd Erijius Brunswicensium dux traderetur composuisse legiones, & easdem à Rege conductas, extruendarum arcium, & Inquisitionis firmandæ causâ; rectâque iter in Belgium dirigere. Nec de legionibus dubitabatur, quas nullâ probabili causâ Brunswicensis conscripserat. & quorsùm tenderent nemo sciebat. Nam & vicinorum Principum securitatem,

con-

concussit, insidias, atque arma metuentium.
Quod inter cæteros mortales invidia, id in
principibus pro virtute est, suspicio alienæ
potentiæ. Cliuia erat, quâ Bruswicensibus in
Belgium venturis transitus erat. Cæterum,
dux eiusdem regionis profecturus Augustam
Vindelicorū ad comitia imperij, omnes eos,
qui fide clientelæ, aut obsequio eius teneban-
tur, arma, & equos parare, atque ad classicum
intentos considerare domi iusserat. Hinc fama
sine auctore exierat, consensisse eum in coniu-
ratorum facinus. Crebris litteris Brunswicen-
sem Gubernatrix admonuit, vt ab armis falso
Regis titulo sumptis, decederet. & cum pro-
prio nomine impetrare non posset, aucto-
ritatem Cæsaris nequicquam implorauit.
Nec ideo tamen mitigatus est populus, cui-
cumq; famæ credulus. Itaq; varijs criminatio-
nibus incessebat Gubernatricem, vt falla-
cem & callidam, vanis & inanibus promif-
sis, hominibus illudere. sparsa quoque Ant-
verpiæ scedia, seditiosis referta carminibus,
incitamenta discordiæ, in vrbe fœcundâ
rumoribus, quibus plebs totis illis diebus

perquam dedita erat: sed magistratus imprimis ad lectionem inhorruit. confestim igitur, & sine morâ in libellorum auctores quæstionem exercuit, ingentia præmia decernens, si quis indicasset. vigilias quoque diurnas, nocturnasque intensius habuit. stationesque per urbem disponit, nec mortalium cuiquam fidere iussit. Ergo hinc, inde, & undique atroces nuncij deferebantur in regiam. Antverpienses ut non apertâ consensione; ita viritim descendisse in coniuratorum facinus, mandatúmque multitudini ut imparatam occuparet urbem, & si forte arma mouerentur à Gubernatrice, ne pecuniam, vel quid aliud, ad usum belli exportari permitterent. Adhæc Gallos, Anglosque pepegisse, non defuturos se coniuratis, si Gubernatrix ad arma spectare cœperit. Et illa quidem de Gallis omninò secura non erat. Quippe Hugenessi (Gallicis hæreticis hoc nomen fecit sectæ genius) magnis copijs Caletum intrauerant. Zeelandicas moliri insulas, & ob hoc ipsum instruere classem fe-

reban-

rebantur. sed artē fuisse postea apparuit. Exoneraturus Gallias suas Rex, seditiosissimam hominum faciem in Floridas insulas iure colonorum ignaram traduxit. Saluber-
rimo more, & ferè vſitato magnis imperijs; vt repurgato populo domi tranquillitas, apud victos munimenta pararentur. Relatum est præterea, Auriaco, & Hornano intercedere cum Coniuratis priuata consilia. Dies appetebat solemni Procerum conuentui indictus. Nec Gubernatrix dubitauit, Auriacum, & Hornanum litteris in senatum perlicere. Nam si per omnia sprete forent, causam offensæ crederentur accepisse. & iam de coniuratione placidiora omnia acceperat. Vterque quoque abesse non sustinuit. Itaque vi. cal. April. præter eos, in curiam quoque ex optimatum numero conuenere Egmondanus, Arschotanus, Bergensis, Mege-
mus, Arenbergius, Hoochstratanus, Lignius, Montignæus, Barlaimontius, & Hachicourtius. Priuatæ curiæ senatores, vnà cum Bruxellio pariter adsciti sunt. Multis diebus

assidui in eo fuerunt, quid statuerent de Inquisitione & edictis; in hanc, aut illam partem suffragia variantes. Multi pro legibus stabant. Plures mediam sententiam eligebant. Alij leges omninò detestabantur. E quibus Auriacus ita disseruit. *Vtinam in principio credidisses nobis. suaferamus si morbi sauitiam ponere velles, uterere potius alijs artibus, ijsq; mitioribus, quàm metu mortis contaminatos in desperationem adduceres. Omnes ut vides eiusdem animi sumus. religionem Catholicam saluam volumus. Et si integritas eius sine ope Inquisitionis retineri non possit; agedum digna hac est, cui fortunas impendamus, Et spiritum. sed ut modò audisti, longè nobis diuersa sententia est, tolli ergo debet tot malorum seges atque materia, ut nos periculo liberet. Inquisitionem tamen rectè distinxit, quisquis paullo ante duo eius genera constituit; Papalem, Et Episcopalem. priorem illam quia possumus, habere desinamus: alteram enim omninò non possumus; nisi ut episcopos exterminemus*
sedi-

sedibus, quorum esse munus nemo ignorat, in cuiusque mores, & genium, vitiaque inquirere. Et hoc ipsum, quidquid est, Inquisitio est. Neque tamen illa est, quam nefaria voce perstringit populus. Papalis illa, seu Romana, siue Hispanica, seu quouis alio nomine dicta, illa tamen sola in fastidium venit, quæstusque, & odia hominum prope in tumultum concitat. Quid igitur eâ opus est nobis, quam multis gentibus deesse video? Pristinus rerum status, plerisque Gallia, & Germanie populis nihil ad constantiam obfuit. satis erit meâ sententiâ, si pastores curam intendant, si episcopi officium impleant suum. Nam & saluâ Regis pace, Papalem adimi posse sat coniunctio. Ille enim cum ad te scriberet, nihil se ex vetere more mutare velle adiecit. Ante Lutheri ortum Inquisitionem Papalem nemo nouerat. Imperatoria Maiestas primus induxit. at cum otia-retur Ecclesia, cum torperent episcopi, cum sorderent sacerdotum mores, breuiter, cum tempora exigere. Nescio tamen, utilisne Caesar, an periculosius fecerit, quod leges publi-

publicas, hoc est; fundamenta reipublica concusseris. Interim alia est hodiè imperij facies, alius dignitatum aspectus, alius rerum ordo. Prouincias aspice, tot episcopis, quot opulentis ferè ciuitatibus instructas. Ecquid mirum, si ad seculi nostri genium remedia exigimus? Medici non nisi agrè ad tristiora recurrunt. omnia prius experiuntur, antequàm ad vstionem veniant. nundum deplorata res est, & consumpta remedia. Periculose statas bene constituti leges vertuntur. Imitandi sunt periti medici, qui acerbiora medicamenta suaui temperant mixturà, & stomacho nauseantis accommodant. lenitate, non rigore opus est nobis. videmus fastidium populi. mitigandum hoc est, ne (quod abominor) in seditionem exeat. Quod ad me igitur attinet, magnopere censerem, hoc esse tempus, quo Inquisitionis exercitium differre oporteat. quod sine cuiusquam fraude facere licet. Inquisitores ab hodierno Pontifice diploma non habent. sine quo hactenus illorum nemo iurisdictionem incepit. & ipsi quoq; facta

Pon-

Pontificis, mandatum suum extingui existimant. hac de Inquisitione, mea, nec (ut vides) sola sententia est. De edictis verò quid iudicem, iam antè multa audisti, & plura nunc in contemplationem veniunt. Nihilominus Viglius perueniendum putat ad gladios. aliter sectarios, ait, tolli non posse. Et ut verum fatear, ea sententia olim plurimum fuit, sed ego illam conditioni temporum, non prudentia imputo. Vsu rerum perceptum est, exquisitiorem quàmque crudelitatem, magis esse sectarum illecebram. Nam, qui nouæ religioni accedunt, ita plerumque affecti sunt, ut à Deo traductam putent fidem suam, atq; vnam presenti morti perniciam anteponant. Proximis annis multi professiones illas amplexi sunt, haut alio vitio, quàm quòd in perituris constantiam mortis attoniti admirarentur. Rectè eos credere debere ducebant, qui ob hoc ipsum quod crederent, corpora sua, (qua utique non oderant) supplicijs offerrent in pignus, & infanda tormenta latè exciperent. Hoc in Gallia,

hoc in Angliâ, hoc apud nos deniq; crudelitas
profecit, ut plures de nouo reos faceret.
Primi quoque Christiani iactare solebant
sanguinem martyrum, semen esse Ecclesie.
Proinde Iulianus Imperator, ut eos sibi
inuisos funditus erueret, mitius habuit. Et
sanè plures ille pace, Et otio à fide abstra-
xit, quàm priores illi ferro, Et sangui-
ne. Non est gladio ius in animum. Iu-
deorum peruicaciam nullus unquam Re-
gum excussit. Animi viribus debellandus est
animus. Quàm atrociter heresis Græcorum
concussit imperium? ferè tamen Cæsares
exilio contenti fuere. Nec Constantinus
ab Ario, Constantius ab Aetio, Theodosius
à Nestorio grauiora exegit supplicia. Et hic
tamen tristissimas pœnas legibus sanxerat, ut
terreret noxios, quorum interim nemo gla-
dio periit. ubi iam sunt Ariani, quos non
unum regnum, non unum imperium, fe-
rè dicam, non unus capiebat orbis? secu-
ra segnities, Et non irritata vetustas uni-
uersos extinxit. Omnis heresis hoc in se
habet.

habet, ut exoriens tollat supercilium: simul verò atque exuta nouitas est, sibi relicta, & nullo cogente sponte excidat. Contenti simus pœnis, quibus tanti Imperatores fregere flagitia. nunquam tutius quàm per exempla progredimur. Noua & inexpectata cum periculo incipiuntur. Carolus Casar anno M I O L. sollicitantibus prouincijs de rigore legum quadam detraxit. sicut Rex Philippus proximè meditabatur. benignitatem eius Episcopi deterruere. an rectis consilijs, ipsi viderint. Ego interim leges pro moribus temporum flectendas iudico. vincemus scelera, si non vicerint. Nam ut omninò esse desinant, vix equidem fieri posse existimo. Nascituras semper hareses Apostolus pradixit. Demus verò leges illas optimas esse: quid iam tamen proficient? In plures contagio serpsit, quàm citari possint singulorum nomina. quid si, dùm intentos iugulo suo viderint enses, ad insaniora necessitate adigantur? Ex parua scintilla magnum saepe ortum est incendium.

Haut alijs inuys Galli in seditiones secessere ; cum quibus coniuratos intelligo sociare consilia. Placandi ergo aliquâ ratione sunt nobis, si pacem retinere volumus. Quod impræsentiarum dedi, tutum est consilium. quæ vobis optima videbuntur Deus secundet. Nemini mirum videri debet, tantam in illo principe eluxisse cognitionem philosophiæ. Ex Balduini colloquijs hauserat. His ille artibus rempublicam componere susceperat. Libratis ergo hinc, inde rationibus, media placuit via, hoc est; derogare aliquid legibus, quas nec saluâ pace retinere poterant, nec saluâ religione abrogare. Dein coniuratis respondendum esse censebant, quòd Inquisitionem non habentibus, nullam inferrent: habentibus, interim exercitium eius mollirent, quoad de voluntate Regis redderentur certiores. moderationem legum Gubernatrici & Proceribus curæ fore: nec laturos alias, quàm quas consensus Ordinum comprobasset communi suffragio. Nec morâ Gubernatrix Priuatam,

curi-

curiam, primo quoquo tempore noui edicti formulam componere iussit.

Dum hæc aguntur, rumor curiam penetrat, venisse in urbem coniuratos. Brederodius cum paucis appulerat. cæteri postridie successuri forebantur. Et hoc nuncians alius superuenit. Rogare gubernatrix cœpit, quid auctores sibi fierent, vtrum appropinquanti multitudini occluderet portas vrbis, an potius in tutum secedens furentibus se eriperet. Egmondani sententia abhorrebat à fugâ, violandisque ijs, qui ad tribunal decurrerent. Quem intuens Barlaimontius, quîn, imò inquit, compleamus curiam armatis, & vniuersis trucidatis tam effusam vindicemus licentiam. Auriacus negabat se commissurum, vt instar barbaricæ feritatis damnaret, quos nundum constaret esse reos. multos eorum sanguine, vel affinitate sibi permixtos. si supplices venirent, quare non liceret his, quod promiscuè omnibus licet? si inermes, nihil esse quod formidarent. Quidam censebant occultè hortandos coniuratos, vt

singuli, & sine turbâ venirent in oppidum, vel prouinciarum rectoribus libellos porrigerēt.

*Coniurati
in curiam
prodeunt.*

Non intererat Coniuratorum quid decerneretur. cogi ad obsequium non poterant. In urbem recepti, nonis April. progrediuntur in curiam. bini ac bipi longo ordine procedebant. Dicerēs pompam funebrem ducere. De numero scriptores non consentiunt, trecentos fuisse multi tradidere, plures alij, pauciores nonnulli constituunt. Ego in litteris Gubernatricis ducentos inuenio. Egregium agmen splendorum equitum, nec inania nomina præferentium. Eminebant inter illos Ludouicus Nassouius cum Brederodio, syrma claudentes; altisque spiritibus inflati, & non vulgari specie, omnium oculos in se attraxerant. Ingens turba densis ruebat agminibus in spectaculum, expectatione suspensa. Pauci ex plebe hoc conspectu mouebantur. Ignari adhuc quantum feralis illa vecordia conflaret incendium; cuius calamitas maximâ ex parte in se redundaret. Frequens eo die Concilium aduocatum erat, admissisque in conspectum coniuratis Bredero-

derodius vno genu procumbebat in terram, vultuque elato, post officiosæ dimissionis ve-

nerationem hæc verba locutus est: *Domina,* Oratio con-
sistat eorum
libellum
offeren-
tium.
Nobiles hi, quorum numerum vides, grauissi-

mis de rebus, & ad salutem publicam perti-

nentibus, ad te libellum adferunt. plures idem

facturi erant. sed sua cuiq; ratio adesse non pa-

titur. Prouidere tibi placeat, quæ putabis in

commune conducere; atq; equi, boniq; hæc con-

sulere. Dein porrexit libellum, & ceterum, Do-

mina, inquit, quidam actis nostris obrectare

ansi, egere negotium calumnia, turbas, sedi-

tionem, & quod atrocius est, mutationem status

moliri nos differunt; fœderaq; cum alienigenis

contrahere. Indigna prorsus animo nostro co-

gitatio & sacramento aduersa. Rogamus er-

go delatores renuncies; & ad quos tantum per-

tineat facinus, vt. peruestigato scelere debitas

pœnas à noxijs exigas. Gubernatrix accepto

libello ad Conciliū relaturam se dixit. iussitq;

in vesperam opperiri responsum. Dein margi-

nibus libelli ex Procerum consilio adscripsit;

Legatos se missuram ad regem. in ingenio ac

benignitate eius fiduciam ponerent. se quoque

inter-

interposituram officij sui ministerium. De
mitigandis edictis iam multò ante cum Pro-
ceribus egisse: & in promptu esse formulam,
quam destinaret Regi. pro certo haberent
non displicituram eam prouincijs. scire uti-
què & ipsos, quàm in potestate suà non esset,
intermittere Inquisitionis, legumque munia,
vel prouincias ex eà parte exleges relinquere.
contentos esse debere, quòd de postulatis eorum
ad Regem scriberet. Daturàmque operam,
dum responsum opperiunt, ut Inquisitores, &
magistratus prouidentius, modestiusque se ge-
rant, nec querela causam cuiquam pre-
beant. Eos quoque se mores ab illis expectare.
Considerent itaque, Inquisitionem se non illa-
turam his prouincijs, quibus hactenus insoli-
ta fuerit. & hoc esse, quod Brabantis nuper
rescripserit. ad qua impetranda eò procluius
operam, curàmque impenderet suam. quòd
ab omni mutatione religionis alienos eos in-
telligeret. Tenebrante vesperà coniurati re-
uertuntur in curiam. recepto libello, rescrip-
tum tumultuantibus magnopere displicuit.

Et.

Et certè exspectatione minora consecuti fuerant. Itaque preces repetere statuunt. Et quoniam fatalis quædam amentia peruagabatur prouincias, multi cottidiè deficiebant ad illos. & qui priùs sociauerant consilia, plures iam aderant. Culenburgius quoque simul interuenit, magnâ nobilium iuuenum manu stipatus. VII idu. Apr. eâdem pompâ rursus iter in curiam dirigunt. Admissi in conspectum, *magnas*, inquit Brederodius, *debemus tibi grâtiâs, Domina, quòd de his qua fecimus rectè sentias, nec protelationibus ullis responsum moreris. caterùm si ambiguam voluntatem tuam, nonnihil liquidiorẽ effeceris, nihil est, quod debeamus amplius optare. Nam Inquisitionis, legumque arbitrium, non esse tue potestatis, longè ante cognouimus. Interim tamen, dum desideria nostra perferuntur ad Regem, sine contatione concedere potes, ne Iudices, vel Inquisitores supplicijs quemquam conficiant. Leges quas ex suffragio Ordinum laturus est Rex, non tantum summâ fide custodiemus: sed &*

omni ope nitentur , ut eâdem sanctitate ab alijs colantur. Si quos nostrorum seditionis noxâ , contactos existimes , per nos licet supplicia expetas. Hac coram testari voluimus , ne si quid fortè acciderit tristius , nobis imputes. cum fidem non habueris instantis periculi discrimen denuntiantibus. Oramus itaque ut cuncta referas ad rempublicam. pro quâ & corpora nostra offerimus , nec recusamus occumbere. Ad ea Gubernatrix , rescripto contentos esse iussit. maiora impresentiarum præstare non posse. Exaratas esse litteras , quas magistratibus , Inquisitoribûsque transmitteret. Has deinde recitari eis curat. monuitque ut litarent modestiæ , nec quemquam ultra in societatem admitterent. Curiâ egrediens circumfusus rogabat Proceres , nunquid sibi iratiores viderentur Coniurati. Quid ? inquit Barlaimontius , securam ego te efficio. non est , quod Geusios illos extimescas. Quæ vox ab astantibus excepta , causam nomini fecit , ut dicemus postea. Multi variant in tempore,

& ante oblationem libelli vocem illam emissam affirmant. Nec refert quando, de facto non ambigitur. Coniurati autem blandis vocibus castigati, coibant ad epulas, quas Florentius Pallas Culenburgij comes vniuersis instruxerat. Multi se omnis ordinis applicuere conuiuio. Adultâ iam cœnâ poculis certare incipiunt, strepitûque confuso personabat triclinium, & in diuersa trahebatur alacritas. Ex his bacchantium nescio quis, & ipse insigniter madidus, Geusios se per amaritudinem cauilli apellatos proclamat. arreptôq; protenus ingenti scypho, Geusijs libauit. exhausto eo ad vmbilicum perpetuo spiritu, cîa viuat Rex, viuant Geusij vociferari cœpit. sed & eâdem lege circumferri craterem, & singulos hauustus pari clamore prosequi iussit. Omnes incaluerant mero. tam ministri, quàm conuiuæ in furorem soluebantur, non clamoribus, non poculis temperabant. Ita res in serium versa est. Et inde nominis originem secta inuenit, quæ initio sui modica: nunc Regis sui vires, & imperium quassare non

timuit. Scurras, & mendicos Belgæ Geuten, appellant. ductam à Gothis vocem plerique conijciunt; quorum barbaries latrocinantibus similis, nomen gentis posteris ignominiosum fecit. Nos hæc curiosis ingenijs scrutanda relinquimus. Igitur in hunc modum bacchantibus, Hoochstratanus superuenit à Gubernatrice. Explorare iussus erat, an in fide se mansuros polliceri vellent. Sed à lymphantibus intrò abripitur. credebat ludicrum agi. verticibus capitis alternatim obuersos imponebant galeros, manticam circumstantes quam Brederodius è lacunari suspenderat. perque vicem in sedem tollebantur. vbi inter solemnem aliorum vociferationem exsiccato scypho, per panem, salémque, & manticam, in constantiam fœderis sacramentum præstabant. Postero die ebrietate excusâ nihil saniores, abradi mentum iubent. subcineritios cultus sibi induunt, ligneasque scutellas de circulo galeri suspendunt. prorsùs, ne quid differrent à mēdicis, quorum nomen assumerant, habitumque

que , & mores imitabantur. Aureum numisma de collo demittunt. duraturi fœderis tessera erat. sine quâ suorum quemquam prodire in publicum nefas sanxerant. In vno latere Philippi Régis imago eminebat, vibrantibus oculis animata, crispisque labris; & in tumorem surgentibus, vt Austriacum agnosceres. Extremitates verò percurrerat hæc inscriptio FIDELES REGI. Alteram faciem duæ asperabant manus, implicatis inter se pectinatim digitis porrectæ, tanquam in fœdus concurrerent, exprimentes fidei signum. De pollicibus peradimittebatur, pendentibus funiculis constricta. in ambitu eius eminentibus litteris cælatum erat, VSQVE AD MANTICAM. Inde duos ex suorum numero, in eum modum excultos, ad Gubernatricem adornant. Necessitatem fœderis excusatum ibant, in quod publico se compendio adaçtos, nihil aduersus numen, Regémque decretum dicerent. proinde vt apertâ professione placere sibi testaretur, instanter petebant. Ad tam

perplexæ interrogationis insidias ; Ego , respondit Gubernatrix , huius vtique causæ iudex non sum. tempora nos erudient, vtrum rectè, an perperam feceritis. Satis ostendens, promptam tantæ turbæ lasciuiam admodum sibi grauem esse. Et hoc ipsum quoque Coniurati senserant. Duodecim igitur præfectos constituunt, Eos vulgus per cauillum, ex numeri similitudine, Apostolos vocabat. Cæteris domum remissis, soli illi ad sollicitandam promissorum fidem Bruxellis relinquuntur.

Inter quæ Priuata curia noui edicti tabulam Gubernatrici repræsentauit. illa verò excutiendam tradidit Procerum Concilio. Auriacus cum suis, ita legibus illis assensus est, si exemplò ferrentur. Priuata curia in contrarium incubuit, & Gubernatricem traxit in sententiam suam, auctoritate Regis opus esse dictitantem. Hinc inter eos orta contentio est. Et Auriacus ingentem iram concipiens animo ; intelligo, inquit, suspecta esse consilia mea. Neque Regi opus est amicis, quorum damnat fidem : neque mihi gloriosum

sum pro fastidiente principe certare obsequio. Ego me deinceps reipublicæ subtraham. Nec diuersa ab his Hornanus dixit. Egmondanus verò, ex medicorum præscripto Baias se Aquisgranenses petere iussum obtinens, paucorum mensium rogabat inducias. Hanc rem Gubernatrix grauitè tulit. inter tot pericula, querebatur se destitui. Precibus deinde Auriacū aggressa, & si nec meo, inquit, nec reipublicæ nomine mouearis, saltem ne suspicionem conscientia vulgo facias. Ludouicus Nassouius ac Brederodius fouerunt apud te iura hospitij. & hoc palam, atque in ore est omni populo. Quid igitur existimabit cum te quoque hinc proreptum, & contumacius abstinere curiā viderit? nonne ut princeps coniurationis habearis, aut participes? Ad vltimum abire perseuerantes verbis terret, culpæ eos substituens, si quid detrimenti infunderetur reipublicæ. deinde iterum ad preces conuersa, ut manerent expressit. Post hæc Bergensem, & Montignæum in Hispaniam decernit. Acceptum, utrumque coniuratis nouerat, Inquisitioni, legi-

legibúsq; iuxtà infensum. sed ne vacua rectoribus gubernacula relinquerent. In locum Bèrgensis, Philippum à Sancto-aldegon-da Noircarmy dominum Hannoniæ Valencenísque ad tempus suffecit. Eàdem lege Ioanni Casteleto Mailbasij domino Torna-cum attribuit. Noui quoque edicti exempla distribuit rectoribus prouinciarum, tra-denda Ordinibus Eius forma talis erit. *Religionem, quàm catholicam ne doceto. functionem Ministerij nemo exerceto. noxios libros ne conscribito. domum conuenticulis ne aperito. turbas ne concitato. catholicos ne offendito. Qui horum quid faxit, & pœnitens fuerit, gladio plectitor; si contumax, laqueo exstinguitor. bona damnatorum eatenus publicantor, quatenus per leges municipales licet.*

Qui haresim contraxerit, & horum nihil fecerit, si coram episcopo renuntiauerit, fraudi ei non esto. si non renuntiauerit relegator. bonis interim fruitor, alienandi, aut testandi facultatem ne habeto. catholici intestatis succe-

succedunto. Si proscriptus publicam vel religionis tranquillitatem turbasset, bona amittito.

Anabaptista pœnitentes, & alterius noxe non comperti, arbitrio iudicis, citra mortem puniuntur. contumaces exilio, bonisque amissis cœrcentur.

Relapsi qui non maledixerint, publicatis bonis prouincijs cedunt. qui maledixerint, ultimo afficiuntur supplicio. Anabaptista relapsi sine discrimine damnantur ad laqueos.

Qui dolo malo seditiosos, aut contaminatos libellos sapius excuderit, pœnâ Ministrorum tenetur. si rariùs, exilio plectitur, & arbitrio iudicis. Qui duntaxat lucri causâ fecerit, extra ordinem coercetur.

Disputationem seductionis causâ frequentius instituere capital esto. Rariùs, animiq; gratiâ, arbitraria pœna.

Qui vetitos legerit libros; qui legendos alteri exhibuerit; qui vetitas imagines pinxerit; statuas finxerit; aut horum aliquid habuerit; qui interfuerit sectariorum conuen-

*ticulis , pro conditione criminis , & persona
plectitor, iudicis arbitrio.*

*Qui illicita conuenticula prodiderit , si
particeps fuerit , impunitatem habeto : si
non fuerit , dimidium bonorum , quoti-
es non exceſſerint ſexcentos florenos, aufero;
quoties exceſſerint , quartam partem per-
cipito.*

*Peregrini in vrbes vicôſque , ſine pa-
ſtoris , aut Magiſtratus teſtimonio ne ad-
mittuntor. hac lex tamen peregrinos mer-
catores non teneat , ſi modèſtè ſc, ac ſine
cuiusquam offenſà geſſerint.*

*Regij iudices, inferioréſue magiſtratus, &
vaſalli in reos animaduertunto . ſin ſecus;
honoribus, muneribus, feudo priuantor.*

*Magiſtratibus, & territoriorum patronis,
reuocandi domum ius non eſto.*

*Si cui noxa indulta fuerit; ad honores, &
magiſtratus inhabilis eſto.*

*Qui ſuſpecti pronuntiati erunt, reſtitutio-
nêmque impetrauerint , ad munera & ho-
nores admittuntor.*

Quam-

Quamuis extra territorium relegare non liceat, quisquis tamen ob hæresim proscriptus fuerit, vniuersis prouincijs cedito.

In typographos, bibliopolas & ludimagistros haut diuersa à superioribus legibus statuebantur. Vnus mensis deliberandi causâ datus est magistratibus. post illum sententiam remittere iubebantur. Prolixiusque spatium Gubernatrix indulserat; quòd interim aut scripturum putabat Regem, an ratas haberet leges, aut quoquo modo factiosorum vecordiam repressurum.

Hinc de ipsâ coniuratione in circulis, & coetibus plurimus sermo. tristis, aut lætus, prout cuique fides, aut ingenium erat. Fuisse qui ad portentum, oménque referrent, quòd Coniuratos in curiam prodeuntes claudus duxerit. Alij initia, causasque Gallici motus expendentes, præsentibus rebus conferebant. Edicta, & quæstiones sub Carolo Imperatore, ac Philippo eius filio, iuxta ac sub Francisco, atque Henrico Galliarum regibus exitiosas multis, in quorum

corpus, bonâq; ignis & hasta sæuierat. Neutiquam tamen fregisse flagitium, quod intra paucorum conscientiam nihilominus cohibuere. Nec vt impares radicem exscindere: sed mutuis cladibus intenti, subtraxerant curam legibus, inter arma inualidis; quibus etiam temporibus, vtpote turbulentis, fœda omnia adfluxerant. Nulla tamen adhuc formido ex sectarijs. Donec inde excessu Henrici; hinc Philippo in Hispaniam abstracto, inter Optimares vtroque superueniret ambitio, vetus aulæ malum. Ambitionem Procèrum inuidia excepit, & factionum atrocitas. Flagrantibus in Galliâ odijs aduersus Cardinalem Lotharingum, in Belgio aduersus Cardinalem Granuellanum. quorum alter sub Catharinâ, & Francisco filio, alter sub Margarêtâ Gubernatrice rerum potiebantur, atque omnia poterant. Postquam Cardinalibus vtroque adempta est potestas, mansere tamen odia partium. multâque sectarijs indulta fuere, fœdâ edictorum inconstantia. dum per alterius Regis continuam pueritiam;

alteri-

alterius contumacem absentiam, sana consilia exscindendæ contagionis, tanquam à Cardinalibus profecta, factiosorum invidia eluduntur; hoc ipsum indignantium aliquos esse qui vellent corrigere. Ad vltimum aucto morbo, Admirallium, & Brederodium, hunc Gubernatricis, illum Regis sui genibus aduolutum, & vtrumque fauore Procerum, studiisque nobilitatis subnixum, postulasse libertatem religionis. Nec in Galliâ prius quieuisse tumultuantium ingenia, turbulentissimo sectæ genio accensa, quàm signa attollerentur in Regem, & in vno regno alium, atque alium populum facerent. Nihil ergo mitius exspectandum in Belgis, agitatæ eodem illo pestilentissimo sydere. Leni ad omnia Gubernatrice, & incautâ ad imbuendum consilia, quæ velut non ex arte, fallax quorundam familiaritas insinuat.

Cùm econtra Catharina, grauis regno mater, Italicis artibus cuncta corrumperet.

NICOLAI BVRGVNDJ
 HISTORIAE
 BELGICÆ.
 LIBER III.

Anno
 MDLXV
 stylo ve-
 stri.

PRINCIPIO anni nihil prius
 quàm de legibus actum. ingra-
 ta res coniuratis, qui generalia
 Ordinum comitia optauerant.
 haud dubiè vt leges, quas detrectauerant,
 accipere, Principi ponerent. Caterùm,
 Gubernatrix à singulis prouincijs singula
 suffragia requirebat. Sufficere rata quo-
 quo modo auctoritas Ordinum accede-
 ret. Generalia vtique comitia, vt pern-
 tiosa dominantibus, aspernaturum esse
 Regem, & si forte indicerentur, sen-
 tentiam singulorum prænouerat. Sed nec
 eadem mens prouincijs, nec rescribendi
 cura

cura omnibus fuit. Luxemburgenses, & Namurcenses sine scrupulo consentiebant in leges. Artesiæ Ordines id modò cautum volebant, vt poenâ talionis calumniatores obstringeret Hannones hoc amplius exegerant, vt publicationi bonorum surrogaretur arbitraria poena. Obstinati in patriarum consuetudinum reuerentiam, vindicabant pristinos mores, qui confiscationi hætenus locum non fecerant. Flandri ita legibus sunt assensi, si ecclesiasticorum quaestionibus profani non tenerentur, reuocandi domum ius esset, munia Inquisitionis cessarent. coram Pastore, & magistratu fas esset hæresi maledicere. Brabantia Ordines Bruxellam euocati, postquam ea quæ de edictis proponerentur acceperant, relatueros se ad populum responderant. Iudicium populi Gubernatrici suspectum erat. primorésq; maximè monere cœpit, *ne tam periculosam rem subijcerent suffragio plebis, iisdem vitijs contenta, quæ pararent vlcersci. pro comperto se habere, seditiosissimū quemq; intercessurū decretos;*
quod

*quod frustrari tamen non debeant, nisi patria exitiosi esse vellent, ipsam deniq; Maiestatem offendi concuperent. Memorésque esse debere, cuncta ad populum vocando, auctoritatem primorum resolui. Facile persuasum est Ordinibus. Cæterum hi multitudini imponere non poterant, adimi sibi priuilegia mustitanti. si Ordines rogarentur, cur plebem excluderent? sine calculo eius consensum Ordinum solemnem non esse. tertium in ciuitatibus membrum multitudinem constitue-
re. Vt nemo adhuc aliquis apertè; ita multi priuatim Gubernatricem criminabantur. fixisque palàm scedijs consensum Ordinum, inuidiosè proscribebant, tanquàm minus legitimum. res sanè ad accendendas seditio-
nes temporibus nostris & vsitata semper, & semper vetita, nunquam satis punita. Vnde præcipuè indignatio, seditiosæque voces, & turbulenta colloquia, in discordibus animis, & ob remissa legum fræna promiscuam li-
centiam vsurpantibus. Cæteræ igitur pro-
uinciæ in recensendis legibus marcebant,*
Neque

Neque interim legatio diutius differri poterat. Montignæus, & Bergensis formulam edicti, simul & supradictarum prouinciarum censuram accipiunt, ac primo quoquo tempore in Hispaniam deferre iubentur. In mandatis insuper hæc habebant. De Inquisitione, & edictis sententiam promere festinaret Rex Philippus. Concilium Status reuocaret in eum modum, quem præteritâ legatione Egmondanus proposuerat. Præteritarum rerum obliuionem concederet, & hoc pacto diffidentia occurreret, quæ aliâ ratione ablui non posset ex animis fœderatorum, peccasse timentium.

Inter quæ ab episcopo Leodiensi superueniunt legati, ademptum sibi territorium repetentes. Diu erat, quod hoc ipsum apud summum Pontificem contenderat frequentibus libellis. In comitijs quoquæ Augustanis multa nequicquam questus fuerat. Tunc verò, cum hic omnia nutarent discordijs, faciliior spes promittebatur. Et ne non tempore vteretur, iurisdictionem in Campiniâ

exercere vi cœpit, intempestiuísque tribunalibus religioni illudere. Eâ tempestate episcopatum Siluæducentem obtinebat Zonnus, de quo ante habita mentio est. In hunc sibi resistentem ecclesiasticis censuris intemperanter Leodiensis inuehitur, minacésque libellos portis ciuitatis, templorúmque affigit, vt in omnium oculis proscriptus Sonnius excuteretur è cathedrâ. Iusta-ne ira Leodiensem impulerit, longum esset inquirere. Non habuit sanè rationem temporum. Alienam dignitatem proscribendo, seque pariter, & auctoritatem suam destruebat, intempestiuís discordijs.

Exinde ciuitates Culenburgio obnoxias, studia nouitatis apertâ professione induisse nunciatur Gubernatrici. Super hæc Egmondanus, & Raslegemius maiore terrore, sollicitudinem eius perculerant. Gallos dissimulato habitu misceri passim Belgis, munitissimáque oppida ignotos lustrare. Nec ex ficto omnia erant. Nam etsi è Galliâ quie-

quieta cuncta adferrentur, suspecta tamen, erat gentilis leuitas. pauentibusque sollicitudo subiecerat, nihil nefas esse regibus. omnem rationem augendi regnum, honestam. nulli tantas opes, vt cupiditatem expleant. non deesse speciem æquitatis bellum concupiscentibus, maiorum iurgijs nunquam satis fidâ pace sopitis. At non idem consultioribus videbatur, molliora augurantibus de illo Rege, Optimatum factionibus colliso; neque externa arma laceffituro, quæ domi timeat. Satis tamen constabat machinas illas admoueri à magnatibus Gallicis, pari discordiâ Belgas inter se committere molientibus, vt si à Rege suo ipsi premerentur, hîc haberent vnde accerferent auxilium. Gubernatrix interea improuiso territa malo, in diuersas cogitationes abripitur. Neque enim à domesticis turbis secura erat. Præsidarij propriâ indigentiâ, & super hæc, eiusdem anni caritate annonæ pressi, passim destituebant vexilla. alij in monasteria, villasque petulanti licentiâ

ferebantur. ibi quisquè pro libidine sumebat hospitium. Hinc ergo metus, ne militares animi desperatione accensi, apertâ consensione ad coniuratos deficerent. Quippe, coniurati, non satis bonâ fide pacati abcesserant. Manebat plerosque conscientia sceleris. & quasi aliorum scelere absoluerentur, multitudinem prouocare adorsi sunt ad libertatem religionis, vt reipublicę libello consulisse crederentur, & per confusionem Statius, ea quæ volebant exprimerent.

Itaque iam Ministri, iam fœda cuncta, tanquam in sentinam in prouincias confluebant. Boni malis, dubij integris permixti, inuicem corrumpebant, corrumpebanturque. seditiosissimi quisque supercilium attollere; mox crescente licentiâ, nouarum rerum studia proferre; adeoque procaciter, vt quidam Aldenardæ sacrificanti sacerdoti hostiam subtraxerit. Ille quidem atrocitatem audaciæ flammis expiauit. Sed ad eum modum cætera corrigi non poterant. Prætori Flandriæ nocturnis cœtibus comprimendis, octoginta satellites statuuntur. Parem numerum

merum Brabantix prætor conscripsit. & quasi paruus hic numerus esset, ducenti equites vtrique adduntur. Impar adhuc manus vecordix multitudinis, quæ armorum præsidio concionandi iura sibi asserebat, contumaciam suam prætorum viribus conferens. In ciuitatibus, vt multi boni, integrique, ita dubij, metuentésque, quisnam exitus foret, contrarias partes fouisse noluerant. Egentissimus quisque ex plebe coniuratis adhærebat, si forte casus daretur, ad spoliū accursurus. Sparsaque in agris nobilitas, vbi pro Inquisitione, & edictis stare crederetur, ædes suas exponebat iniuriæ. Sic ergo, vbi nihil vsquam sincerum, aut tutum, frequentari liberè conuenticula cœpere. Inquisitionem & edicta vsus reiecerat. non tam volente Gubernatrice, quàm quòd crederetur voluisse. Supremis prouinciarum concilijs, atquè rectoribus in eam sententiam scripserat; *Dari operam volo, vt Inquisitores, iudicésque prudentius se, modestiusque gerant, nec querela cuiquam locum faciant.*

Si quos seditionis, aut scandalis crimine iudicet contactos, causam eorum ad me remittite. Hæc sectarij haut aliter accipiebant, quàm si legum fræna resoluiſſet. Quædam Procurator Generalis Flandriæ, quædam Audenburghenses conuenticula dissipauere, & trecentorum aureorum præmio exculi sunt. Sed ad plectendum vires deerant, auctoritate Gubernatricis in risum versâ. quæ inter contumaces, metuque solutos, omne decus maiestatis amiserat. Ne tamen ipsa, conuiuere videretur flagitijs, atroci edicto in conciones detonuit. Ministris, receptatoribusq; mortē indixit, inermes auditores arbitrariâ pœnâ: armatos autē exilio plecti iussit. Ministrum comprehendentibus trecentorū aureorum mercedem constituit. Sed nunquam magis patuit quàm sit vanum sine viribus imperium. Miserabilis reipublicæ, miserabilior facies. Vrbes, pagos, tantūmq; non totas prouincias sectarij infederant. Nouissque legibus nihil ampliùs profectum, quàm vt constaret impares eas esse flagitijs.

Dux

Duæ sententiæ Gubernatricem distinebant. Alij conscribendum censebant exercitum. Temperandum pluribus videbatur. Nam si moderatio legum maturè succederet, cuncta ad pacem sponte reditura. Igitur legati stimulantur ad iter. Sed fortuna in omnibus maligna remoram iniecit. Bergensis in arcam curiæ inter ludentes obambulans, palmulæ ictu in crure percussus est. Quorundam superstitio hoc ipsum in deterius omen accepit. Ille interim nihil deterritus, vulnere tamen retardabatur. Et Montignæus ut sine comite præcederet, exorari vix poterat. Interim Prætori Flandriæ trecenti quinquaginta pedites rursus adiecti. In quatuor agmina diuidere copias, atque in diuersa iubetur contendere. Sed nullum iam præsidium sat firmum videbatur aduersus furem multitudinem. Plerisque etiam fortunam tentantibus, haut prosperè cesserat. Ergo vndique atroces nuncij; Zeelandos, Alldenardenses, Valencenenses, Tornacenses, & Antverpienses illicitis cœtibus amplius resistere non

non posse. Gubernatrix tot simul malis confusa, adhibitis in consilium Proceribus rursus quærebat, an efferatæ audaciæ opponeret armatos. Auriacus, Hornanus, & qui præterea eiusdem factionis erant, nihildum mouendum censebant. nisi amaret classicum dare, ad cuius strepitum infani, vrbes, pagos, & monasteria diriperent, atque inde deficerent ad Gallos; accersitisque in prouincias peregrinis exercitibus, excidio patriæ efficerent, quod viribus suis nequirent consequi. Roganti, quid igitur facto opus? vox eorum fuit, postulatis legatorum assentiretur Rex Philippus, exarmaturos ipsos protenus licentiam populi, pacemque reddituros prouincijs. cæteroqui pro Inquisitione, & edictis arma non sumpturos. Viglius facile quid vellent intellexit. stimulisque iræ sensim concedens; *Videre se, dixit, scienter, volentérque rempublicam destitui. quid enim de Inquisitione, & edictis tantoperè ipsi sollicitarentur? permitterent hoc Regi, & suum quisque impleret officium. Vellent*

lentne ergo Principi dare leges? vel per immodestiam extorquere, ut vel inuitus concedat in eorum libidinem? Meminisse debere, totam hanc tragœdiam, ab intempestiua principalium litterarum publicatione initium, causamque ducere. cuius rei Proceres reluctantibus sibi auctores fuerint. Si gladio offeri serenitas possit, uterentur occasione. Reddendam sibi rationem pratermissi officij, ni precipitata consilia maturè corrigerent. quod in illorum esse potestate, etiam ex propria confessione se accipere. Quos enim iustius arma opposituros, quàm qui prouincys prapositi, mandatum Gubernatricis acciperent? Multa quæ pertimescerent in melius cessura. Populum mobili impetu ferri. Terrorem circumfusi exercitus statim tela excussurum è manibus. Seditionis principia formidolosiora esse, quàm remedia. Gallorum auxilia nullos iactantius spondere, quàm quorum interesset ea venire. Quis autem promittet non aliquandò deinde successura, ad turbandum statum, quaquà ratione compo-

tum; si Belgas contra ignavos aspexerint? Arma armis retunderent. Leuia adhuc esse, & vana fortasse indicia, quæ de Gallorum machinis spargerentur. Nec se præterea quidquam de apparatu audiuisse. An Inquisitionem, & edicta extremum putarent, quod postulaturi essent sectarij? Nihil minus quieturum populum sibi relictum; priusquam libertatem religionis adeptus fuerit. ad quem scopum duntaxat collinearet tanta licentia. His auditis Proceres peius accensi sunt. Non temperauit iræ Hornanus, cuius satis potens non erat. Flagrantique cum intuens vultu; Nos ergo, inquit, Vigli tibi videmur, qui irati populi insaniam in tumultus auertimus? quid istæ sibi vult oratio? Litteras Regias publicari suasimus; quia princeps iusserat. Mandatis eius morem gerere officij nostri fuit, cuius tu tam intemperanter rationem exigis. Si non paruissimus, tunc meritò sceleris nos arguere poteras. nunc quia paruimus, cur nobis inuidiam facis? Quare eadem operâ non culpas Regem, quòd litteras miserit?

ille,

Ille , si dicere licet , huius culpa auctor fuit. Si intelligere vellet , multum nobis deberet. Ex eo enim scire inciperet , quàm stolidè Hispanorum consilijs totus adhareat. Hac tibi gens Vigli, ante omnes culpanda fuerat. Nemo alius litteras composuit. Ego totam culpam transfero in illos homines, qui haut aliter Belgis,quàm Mediolanensibus,Siculisq, & Neapolitanis dominari praesumunt, Satis video , quòd vestrorum ingratis hic sumus. Ut nempe Granuellanista securè occupetis rempublicam, & Hispanis possidendam per manus tradatis. Plura dicturus erat, & fortasse atrociora præteritis. Sed ex omni parte oriebatur fremitus, ardentibus Procerum animis, passimque Viglium contumelijs, & invidia onerantibus. Nihil ergo in commune consulebatur. cùm Gubernatrix ad tot clamores perplexa, curiâ excessit, senatum dimittens, mollique sermone adhortans ad concordiam.

Dicant alij quidquid volent, mihi semper tumultuum horum causa fuisse

videtur, ambitio, & inuidia Procerum, per tot trophæa pro nobilitate suâ magnos spiritus gerentium. Primo quidem Granuellanum prouincijs extrudere, tanquam principalibus illudentem curis, Proceresque calcantem recenti potentiâ. Cuius abcessu gubernaculi viribus ad illos translatis; cum nec Rex in omnibus libidini eorum morem gereret, & hi econtra deterreri illum potissimum arbitrarentur Hispanorum consilio: hoc ipsum maximè indignabantur, aliquos esse, qui possent contradicere. Hinc ad omnia principi discordes, irati, & contumaces. atque vt optimum videretur consilium quod attulissent ipsi; durabant in exitium reipublicæ; & hanc perire malebant, quàm mutare sententiam. Meherculè verò, nihil ego populari inuidiæ non attribuo. Nouis tamen episcopatibus, & Inquisitioni, & edictis, quibus tum maximè irascebantur, cuncta non imputo. Altiores causæ stimulabant Procere in facinus. Furor, & ambitus cæcos obsederat. De cætero Inquisitionis, edi-

cto-

etorúmque laruas palam assumpserant, ut sub honesto titulo litarent inuidiæ suæ, & publicæ utilitatis speciem æmulationi præferrent. Quis non videt, repentem tumultuantium insaniam potuisse comprimi ferro, si extitisset qui gladium educeret? Nullo postea negotio sectarij concessere victoriam. Vnius ciuitatis deditione ceruices subdidere. Proceribus itaque non constabat fides. Hæc est causa sequentium malorum. & ut propius radicem attingam, profunda pax luxuriam pepererat. quam superbia, contemptusque numinis excepit. Hæc inquam vitia perdere rempublicam. & super omnia diuina prouidentia; quæ ubi scelera nostra vlcisci, fortunamque mutare constituit, prudentiam adimit, ac consilia corrumpit.

Cæterum nihil eorum quæ in Belgio agitantur Rex ignorabat. sed in aduentum legatorum remedium distulerat. Cunctabundus ingenio, & semper exequi differens consilium, quod tardè sumpserat. cum interim ubi principijs non occurreret, publica mala

progredierentur in peius, & tunc post res consilia adferrentur.

- Regionem omnem tres distraxerant sectæ. In Flandriâ, proximisque Galliæ Calvinistæ præcellebant. vicina Germanis inuaseraut, Lutherani, Hollandiam, & Zeelandiam Anabaptistæ. Vniuersæ facies Antverpiam inderant. Inter Flandros verò, finitimisque Gallis, Aldenardenses, Poperingenses, Tornacenses, & Valencenenses eminebant. Reliquæ ciuitates, quamuis & ipsæ superstitionibus contactæ: tamen consensu bonorum superabantur. In his verò malorum numerus excreuerat.

Aldenarda popularibus ingenijs vrbs est procax. Theatralis licentia sacræ scripturæ lectionem ciuibus promiscuè indulserat. Quibus se opinionum nouitas haut ægrè insinuauit; naturâ suâ blanda, & pellax animorum nullo litterarum studio mitigatorum. Totam mox plebem, positâsq; circum gentes, velut incendium quoddam ea pestis corripuit. Torpentibus per iniquitatem temporum legibus, & Ministris ad imponendum acribus, per species

cies virtutibus similes. Hactenus professio-
nem suam tenebris absconderant. Vbi verò
coniuratorum factio domuisse crederetur sce-
leris ultionem: audacia modestiæ impatiens,
pedetentim erigere superciliū cœpit. Donec
ad ultimum cal. Iul. in apertum prorumperet.

Iter est ad Gandauum, in vicum Rodium *Sectarij*
ducens. Haut procul portâ in patentissimam *palam con-*
planitiem extenditur. Huc Ioannes Winge- *cionari in-*
ne, turbulenti vir ingenij à coniuratis inflam- *cipiunt,*
matus, infandam multitudinem Rotnaco, Al-
denardâque deduxerat. Habebat in comitatu
Ministram, Hermannum Strickerium, haut ab-
fur dum corporis habitu, ingenio vanum, &
tumidum, vultu arroganti, facundiâ præci-
puum, auræque popularis captatorem; dig-
num planè qui non degeneraret à maiorum
cæremoniis, nisi egregias naturæ dotes tur-
bidissimis moribus corrupisset, vt postea
dicemus. Fuit hic Swollæ in Transilvania
genitus, parentibus ultimæ fortis. Indè
autem legibus pulsus, famam quam per
modestiam professionis (fuit enim mo-
nachus) cōsequi non poterat, sacrorum
nou-

nouitatibus Aldenardæ sollicitare cœpit. Primusque omnium ad publicas conciones multitudinem prouocauit. Insolita res erat. Ruebátque ex proximis ciuitatibus, atque vicis, & vndique populus, cognoscendi auidus, & tum maximè, quia prohibebatur. Nec solum quibus corrupta fides erat; sed plerosque etiam innoxios curiositas attraxerat. Numerum referre vix ausim. Septem millia interfuisse traduntur. Sed in tam confusâ multitudine, iustum calculum iniri non potuisse crediderim potius, quàm temerè asseuerauerim. Iudicium scriptorum sequor, quando aliter de veritate non constat. Ergo omnes ad sermonem erexerant aures. Quidquid ferè spatij septis claudebatur, multitudo impleuerat. Cornelius Croësenius Gentbruggensis prætor non dubitauit, quin primo impetu concio proteri posset. Itaque rem ausus ingentem, contemptim in eos concitat equum, alterâ manu strictum tenens gladium, alterâ sclopo armatus. Percuneos populi receptus, ad comprehendendum

dum Ministrum deferebatur. Sed hic tumultu audito in proximam se proripuerat siluam, satis gnarus vnum se potissimum peti. Multitudini ferè arma deerant, & statim furor inuenit. Denso saxorum nimbo aërem condidit. Croësenium eminùs, cominùs petebant tot iactus. & ille ad omnes ietus expositus, plura iam vulnera capite exceperat. Cum non furibundus vt ante; sed supplex, ac fugam circumspectans, proiecit arma, & præfenti mortì non perfunctoriè castigatus, se subtraxit. Hinc sectarijs fiducia creuit. & quia auspicia prosperè cesserant, alacriori animo x. calend. August. solemnia repetunt. Ingens compitum, siue pascuum erat. haut procul Gandauo Persellina expositum portâ. Alostum S. Petri vulgo dicitur. Ibi vehiculis inter se iunctis, castrorum speciem fecerant. Aditus omnes, vigiles infederant. alij hastam, alij securim, multi scloppum habebant. In principijs stabant bibliopolæ, illicitos libellos accepto pretio distribuentes intrantibus. Dispositi per viam, qui
Ec igna-

ignaros deducerent. & vt quemque casus ob-
tulerat, inuitabant ad sacrum. Sublimem in
medio compiti excitauerant suggestum, su-
bitarijs asseribus instar scenæ curru imposi-
tis. In hunc sublatus Minister Hermannus,
quæ ad superstitionem pertinerent elatâ vo-
ce docebat. Ingens agmen stipauerat latera.
Quos nullo iam meru sua quemque libido
attraxerat. Concione peractâ, virorum fæmi-
narumque cantus oritur, suo more identidem
carmen sonantium. Post quæ pelui aquam
inferunt, quam è proximo hauserant flumine;
& oblatum infantem, non ritibus, non cære-
monijs maiorum adhibitis; sed vt erat in pro-
fanâ veste Minister baptizat. Magna pars ci-
uium Gandauenfium excefferat portis. quos
fere omnes postea Albanus conquisitos, aut
morte aut exilio mulctauit. Biduū ibi super-
stitionibus datum. Inde verò Deinsam mo-
uere, tertio fere lapide recedentem à com-
pito. Post Eeckloam, & in Brugarum confinia;
hinc aliò, atque aliò transeuntes, totam Flan-
driam orientâlẽ concionabundi peragraban-
tur.

Iisdem

Iisdem diebus Magister Petrus Dathenus Poperingenses in regione Flandriæ occidentali maiori furore compleuerat. Fuerat ille eiusdem ciuitatis quondam monachus. Reiectoque cucullo defecerat ad Palatinum. quò ferè eâ tempestate perfugere consueuerant delira ingenia , & fœda omnia. Mox factionum atrocitate tranquillitatem prouinciarum libante , Poperingam redijt, & inter sectarios principatum facilè obtinuit , facundiâ pollens , quam longo usu exercuerat. Quindecim millia ad concionem pertraxit , quam tunc primùm publicè erat habiturus. Quantò maior multitudo , tantò violentior. Nec enim pari quàm Aldenardenses modestiâ , nouitatem suam licentiæ consecrauit. Duo Anabaptistæ Armentarij tenebantur in vinculis , quorum supplicium idoneis temporibus reseruabatur. Protenùs ergò sectarij magistratui denunciari iubent , resoluere captiuos , & si differret , armis se repetituros . Nec segniùs quàm minati

fuerant, fecerunt. Nemo venientes prohibere sustinuit, audaciâ multitudinis in merum crescente. Fractæ sunt carceris fores, captiui ex custodiâ educti, patratoque facinore dimissi domum sectarij, paullisper quievere.

Valencenenses vetus malû stupore morientium legum licentius aluerant. Primores ciuitatis externus timor maximè intentos habebat. Cæterum concionandi libidini pares esse non poterant. Viam licentiæ Coniurati aperuerant. Accedebat & metus, ne si intempestiuis quæstionibus asperaretur populus, desperatione adactus ad Gallos respiceret. Hinc sectarij ad infaniora progressi sunt. Promiscuam religionis libertatem, oblato magistratibus libello superbè flagitare cœpere. Anxij Primores tantis malis, Gubernatricem exemplò certiores faciunt, quid de his fieri vellet. Illa quidem attonita, nihil ampliùs quàm leges exerceri iussit. Vanum prorsus sine viribus solatium. Potentior legibus vis erat. Sine metu seditionis supplicia exerceri non poterant. Igitur cùm in tantâ licentiâ
intu-

intutum videretur iram multitudinis quaestionibus prouocare: sectarij quod nequie-
rant precibus, per vim occupare constituunt.
A Coniuratis denique secretò adhortaban-
tur. Nec cessabant Ministri fatigare clamo-
ribus; *Maeste animo, iam tempus appetere,*
quo euangelium proferrent in publicum. Quid
ultrà suppliciorum metu retinerentur? Va-
nam esse iram magistratuum, in consensu mul-
titudinis. Inania dignitatum nomina ne
pauescerent, quarum tota potestas consisteret
in obedientiâ parentium. Increpare fœdera-
tos illorum ignauiam. Vires suas periclitatu-
ris promittere. Flandros nuper eadem ausos;
& impunè cessisse. Turpe sibi esse, quòd à reli-
quis nationibus ardore vincerentur. Ant-
verpienses, & Tornacenses idem velle: sed
initium erumpendi circumspicere. Non erat
opus tantâ facundiâ. Is habitus animorum
fuit, vt facinus omnes vellent, nemo tamen
auderet incipere. Mittunt igitur ad Antver-
pienses & Tornacenses, qui communicarent
consilia. Quippe tres hæ ciuitates communi

fere consensu regebantur. Plebs utrobique ab Optimatibus dissentiebat. Primores obsequium fidemque colebant. Multitudo fere nouitatibus accesserat.

Sectarios Tornacenses continenter agitabat Ambrosius Willius, homo Gallus, & delatâ sibi Ministerij prærogatiuâ ferox. Senatus enim quosdam sectariorum in custodiâ retinebat. Ad eos vi armisque eximendos non semel Willius multitudinis aures incassum verberauerat. Sed cum clamore & questu nihil proficeret, conscripsit tabellas in hanc summam: *Captiuos extemplò dimitterent, ac desinerent terrere edictis, quos scirent armatâ manu ultionem petituros.* Hos ille codicillos proiecit in concionem, pleniusque irarum ad senatum protenus deferri iussit. Audax proteruia Primores exterruit. Ac nemini dubium erat, quin grauioris sceleris fiduciam præferret. Itaque præcipuos plebis in curiam vocatos, hortantur ad tuendam armis rempublicam. Milites præterea quinquaginta

ginta paullò ante conscripserant publico arc
mereturos. Eos quoque ad signum inten
tos esse iubent. Sed nec hi persuaderi pote
rant, vt in parentes & propinquos arma
stringerent. & plurima plebs nouitati
bus gaudebat. Optimates igitur altiora
metuentes, intempestâ nocte captiuos in
arcem traducunt. Præerat arci Ioannes Ca
steletus Molbaisij Dominus, fiduciariâ præ
fecturâ Montignæo suffectus, fidus Guber
natrici, nec religione deterior. Senatus ei
militem omnem ad custodiam arcis attri
buit. Galli erant qui potissimùm time
bantur. Nam prodicioni arcis imminere
incertus rumor attulerat. Willium deni
que sæpe palam iactasse constabat, religio
nem suam in anxio semper fore, nisi gu
bernacula reipublicæ à patribus transfer
rent ad populum, traditurum deinde
Gallis ciuitatis imperium. Sed ne vrbs
sine custodiâ relinqueretur, Senatus à Gu
bernatrice præsidium militare petere con
stituit. Huic mox decreto ira multitudi
nis

nis se opposuit. Nicolaus Taffinus vir plebeius, opibus potens, iuxta factiosus, plebis animos ad seditionem crexerat. Magnâ verborum contentione certatum est inter patres & plebem. Miseria enim temporis, etiam humillimis in magistratus licentiam fecerat. Dicebant patres, decretum reuocari non posse, nisi ab externis hostibus, seditionibus, & concionibus tutam vellent præstare urbem, & in hoc idonei fideiussores traderentur. Sectarije contra publicum sibi templum in ciuitate dari petebant. Eoque negato, Valencensibus iunguntur, & in publicas conciones prorumpere constituunt.

Vtrisque populis dicta est dies. viii. id. Iul. in suburbijis suæ quisque ciuitatis solemniorum auspicia incipere statuit. Destinata luce appetente, non ex ciuitatibus modò, sed ex vicis, pagisque, omnis generis mortales accurrebant ad sacrum. Viri armati ibant, foeminæ paruos trahebant liberos. Non alias vnquam maior turba in vnum confluxerat. Circiter quinque millia Valencenis numerata sunt

ta sunt. Ampliorem paullo numerum Tornacenses expleuerant. Hic quoque turbidus ille Willius insanè furebat; armis se persecuturum iniuriam vociferans, si Insulenses non abstinere à probris, ciuibúsque conscientia sibi obsticktis, infesti esse non desinere.

Siquidem Insulenses nouitatibus ut plurimum aduersi, quoscumque ex agrarijs concionibus redire conspexerant, petulantibus verberabant contumelijs, & in publico ludibrio habebant. Non aliam magis urbem, procellis temporum expositam, reuerentia, Maiestatis in fide continuit. Adiuvantibus rectorum ingenijs, pro maiorum pietate, constantibus. cum econtra Montignæus, & Bergensis nimia dissimulatione, Valencenensibus, atque Tornacensibus plus æquo indulgissent. Ad primum sectariorum motum, Gilbertus D' Oignij Tornacensis episcopus, huc se recepit. Quò pridem ea quæ ad sacra pertinerent, captatis temporibus conuexerat. Fidissimi ciuium in præsidio erant, à magi-

Ff stra-

stratibus nuper in sacramentum accepti; quibus præerat Gislenus Hayninus Brencij dominus. Maximilianus Vilainius Rassegemij dominus, arcem in sedebat, non contemnendo præsidio. Quippe mortuo Courritij domino, fiduciariâ Insulensium præfecturâ acceperat. in paucis Gubernatrici charus, & qui per hæc bella incorruptam semper fidem Regi seruauit. Comes Reusius cum Ordinariorum equitum turmâ in proximis excubabat vicis, laturus opem periclitantibus. Namque Gubernatrix peruagante iam prouincias incendio, Arschotanium, & Reusium, simul comitem Bossuium, atque Barlaimontium, Ordinarias, quibus præerant turmas, adornare iusserat. Horum fides minimè timebatur. Cum turbulentis consilia non miscuerant. In hoc quidem turbine, multi Insulensium nouitatibus capiebantur. Nemo tamen ciuitatis conspectum concionibus fœdare sustinuit. Numinibus operaturi plerumque secedebant in Saillium pagum, primo lapide distantem ab oppido. Ingentem secum hababant

bebant agricolarum manum, & ipsam quidem armatam; sed vecordiâ ferociorem. Pro fide semorituros, sacramentum inuicem dederant. Cognitâque peruicaciâ nemo eos laceffere sustinuit. Sciebat quippe Raslegemius in eo stare victoriam, si tutam à flagitijs præstaret urbem, quando aliter infaniæ occurri non poterat.

Antverpia non solùm Belgicarum urbium domina; sed cum præcipuis orbis terrarum ciuitatibus certare ausa, eâ certè tempestate commercijs parem non nouerat. Commune Christianorum emporium Mercurius fecerat. In ripâ Scaldis posita, procumbit in planitie; sed in longum porrecta, non recedit à flumine laborante suas vndas miscere Oceano. Nihil ergo portu commodius, neq; enim ita recedit à mari, vt continuo velo benignitatem eius totam non admittat: neq; ita proximus, vt refluentis æstus fœtorem percipiat. Plurimum naturæ debet; non minora tamen industriæ, omnium quæ in Belgio sunt ciuitatum, quæsito decore,

pulcherrima. Altitudo ædificiorum, & ornamenta, prioris sæculi simplicitatem proferibunt. Nunc ciuilibus desolata bellis, sibi que longè dissimilis, spirat adhuc tamen ad æmularum inuidiam, & priscam magnitudinem in reliquijs ostentat. documento futura, magnas vrbes, & vasta imperia, mortalia esse, & suo quæque tempore nasci, florere, senescere, ac tandem occidere. Haut adedò nuper Brugæ, Flandrorum ciuitas, de culmine tantæ felicitatis exciderat. Cuius occasu Antverpia creuit. Sed de causis eius mihi pauca dicere est animus. Brugarum enim magnitudinem nemo meminisset, nisi historiæ ostenderent, caduca vestigia. Diu est, quòd hæc vrbs cum fortunâ luctatur. Sed magnæ ciuitates difficilè resurgunt, cùm semel de fastigio deciderint. fatiscentibus per senectutem legibus, sensimque degenerantibus à suo principio: potentiam deinde ad interitum trahentibus, non iisdem amplius fundamentis subnixam. Priscis temporibus vgebant

bant in Flandriâ bonæ artes, nullique ad eam rem acriores habebantur, iuuantibus potissimum legibus, ignaviæ infestis, otiumque seuerissimè mulctantibus. Cottidiano quæstu ciues alebantur. Sed ne secordiæ amore de industriâ aliquid remitterent; annuamque prædiorum pensionem otiosi expectare, quàm suis laboribus viuere mallet; vulgo fas non erat extrâ pomeria fundos acquirere. Iuri quoque ciuitatis renuntiare nemo poterat, nisi decimam facultatum suarum partem reipublicæ relinqueret. Adhæc diligentissimè cautum erat, vt defunctorum facultates pro æquali portione, ad hæredes transirent. Quibus maximè rebus effectum est, vt liberi paternis artibus instituti, ad industriam, virtutis fecundissimam matrem, acuerentur. Hinc artificum vis ingens, & frugalis opulentia, nullo luxu, aut mollitie fracta. Lanaria, linteariæque opificia vt plurimum colebant. easdémque merces toto spargebant orbe, ad vsum mortalium, hoc tunc cultu maximè gaudentium.

Orientem, occidentem & quidquid terrarum mari, quidquid insularum, vrbiúmque oceano alluitur, classibus lustrabant. Namque antehac Hollandi, & Zeelandi ciuilibus discordijs dediti, vrbes tantum suas, portúsque nouerant. Longinquamaria dissitasque Oceano regiones, magis auribus, quàm experimento perceperant. Gloriam naualem Flandris concedebant: appellentibus ad eos Italís, Hispanis, Anglis, Germanis & quantum regionum pelago prætenditur. His disciplinis populus ille surrexit in summa. Donec mutatis per diuersissimas leges animorum affectibus, sensim fortuna se remitteret. Accessit deinde pestilens sydus ciuiliũ armorum, magnis imperijs præsentissimã perniciēs. Res tamen Brugensium Maximilianus princeps ante omnes maximè afflixit. Mortuã enim vxore Mariã, ille se auelli non sustinebat à filio in fortunam principatus genito; quem Gandauenses tenebant in potestate, Ordinibus Flandriæ tutelam eius ad se trahentibus. Et hinc princeps populo discors, crebris

brisque expeditionibus non satis domito pacem dedit. Cuius fiducia Brugis existens, captius à suis efficitur. Nec multò post dimissus, atque indignitate accensus, ad ultionem maiestatis surrexit, multarum, prouinciarum accursu, & viribus. Pater quoque Fredericus Imperator ad auxilium venit. Qui vt faciliùs rebellium contumaciam frangeret; Teutonicis ciuitatibus Flandrorum, commercio interdixit. Et hoc est, quòd fatiscentem iam Brugenſium fortunam ad interitum traxit. Nam portu Slusano à Cliuiensi infesso, obstructoque ne qua nauis posset appellere; vexatus crebris motibus mercator Antverpiam diuertit. Fluminisque opportunitate non indelectatus, nescio quo fastidio etiam in pace Brugarum portum, destituit, ægrè iam transmittentem grauiora nauigia. Quibus Rebus Antverpia diuitijs creuit, vrbs genium in eam magnitudinem efferentibus, quam vt hodiè intelligamus, ab Amsterdamo exigere debemus. Illuc enim fortunam Mercurius transtulit. Cuius quoque vices, ex factorum dispendio, aliæ, atque

que aliaē vrbes, haut immeritò expectant. Talis tamen pridem Antverpia fuit In quā nihil proclivius erat quàm religionem corrumpi, per affluentiam populorum, novitatem omnem inferentium. Flagitium vigentibus legibus non satis supplantatum, ijs sepultis coerceri non poterat. Sectarij studia sua diutius non premebant. Suprà imperij reuerentiam excreuerant, cottidiano scelere audaciores. Quàm inultè magistratus contemni posset, experti fuerant. Cuius auctoritatem adèò despexerant, vt nefarium obtruderent libellum, in quo Reformatæ religionis titulum sibi adscripserant. Petebant autem templum ad sacra: vel si id minùs placeret, vt extrà urbem saltem facientibus sibi satellites ad custodiam statuerentur. Ferrum alioqui & extrema experturos, cum ciuium pernicie. Preces erant; sed quibus nemo audebat contradicere. Magistratus, sumpto deliberandi spatio, fortunas vrbis apud Gubernatricem deflere cœpit, nullum aliū recordiæ finem fore dictitans, quàm si vel ipsa

ipsa ad eos descenderet, habitura ibi domicilium, vel Procerum aliquem cum imperio transmitteret. Illa quidem tot curis obruta, & quid faceret incerta, eos cum quibus consulere solita erat in consilium adhibuit. Hi certatim transitionem dissuadebant. Indignum facturam, si peteret ciuitatem, in qua non leges, non imperium valerent: vbi non auditura modò, sed & visura esset abominanda flagitia. caput denique suum furentibus non credituram sine notâ stultitiæ. Secundùm hæc, magistratui renuntiari iussit; sine militari præsidio venire se non posse. Hoc si præsto foret intranti, protenus adfuturam.

Interim Brederodius Antverpiam appulit. Cuius interuentu accensa improbitas, modum excessit. Nihilque iam dissimulatâ audaciâ VIII. cal. Iulias in concionem prorupit, quam Burgerhauti, in campo Lario, haut procul mœnibus, Ministri indixerant. Eandem diem Tornacenses, Valencenensésque pari insaniâ feralem fecerant.

propterea ne quis dubitaret ex composito egisse.
Permixtæ viris fœminæ ad sexdecim ferè mil-
lia excessere portis. Armati deducebant Mini-
stros, homines infimæ sortis, nullisque littera-
rum studijs imbutos. Alter eorum sartor, flami-
marius alter erat, Quibus vix diurno quæstu
famem propulsantibus, rudis facundia, & in-
cepta vanitas, fastusque in scripturas, præroga-
tiuum sacrorum detulerat. Patientia campi
iunctis vehiculis inter se committebant. Post
quæ latebant armati, propulsaturi Braban-
tiæ prætorem, in viciniâ agentem cum mi-
litibus, ut incautos exciperet. reliqua multi-
tudo in duos cuneos collecta sermonibus va-
cabat, Ministris vocem intendentibus ut ab
omnibus possent audiri. Ab hoc sacro rediue-
runt in urbem. Percussis cæterorum ciuium
animis, sponteque furori cedentibus. Senatus
consilij inops nequicquam reluctabatur. cui
præter sanam plebis mentem nihil decrat.
Fortè tum Megemus in vrbe agebat, pau-
corum dierum moram trahens, speculatu-
rus Brederodij consilia. Hinc suspicionem
vulgo

vulgo fecit, de inducendis præfidiarijs cum primoribus consultare. Verane ea fuerint, an incerto rumore conficta parum affirmatur. Magnus certè motus exortus est. Tantoque discrimine nutauit ciuitas, vt mercatorum præcipui atrocius aliquid metuentes, de fugâ cogitarent, résque suas conuolare inciperent; donec senatus edicto intercessit, præsentiam Gubernatricis rursus implorans. Illa tum nihil cunctandum rata, Auriacum Antverpiam destinauit. Vicecomes vrbis erat, nec ingratum ciuibz fore cognouerat. Megemum verò, cum Brederodio mouere inde iussit. Neque moram Megemus fecit. Brederodius ad omnia contumax, sext. Idib. Iul. Auriaco Antverpiam propinquanti quasi per honorem obuiam processit. Ingens quoque multitudo sequebatur Erecta omnium studia erant ad nouū Gubernatorem. Alij extra portas, alij in muris cōsistebant. Eoq; conspecto qui primi occurrerant, attolluntur in clamorē plaudentibus similem, & inconditâ vociferatione.

Vuant Gensj, ingeminare incipiunt. Eadem vox ab his qui extremi venerant excepta, in auctius reddebatur. Nec minore clamore in vrbe excipitur. Adeo vt modico risu diductus, subinde proximis diceret, viderent ne mox pœnitentiam agerent intempestiuæ lætitiæ. Magistratus cā vesperâ publicas epulas instruxit, quibus Brederodius quoque adhibitus est. Multum indignante Gubernatrice, quod qui Megemum exturbare sustinuerant, solemni conuiuio Brederodium excolerent. Interim Auriacus valetudinem vrbis curare adorsus, deteriorem reddidit. Quippe sectarijs, extra muros suo ritu inermes operari permisit, quoad Generalium Ordinum decretum succederet. Præsidiariorum metum pauentibus ademit, & inordinatam lasciuiam aliquamdiu in pace continuit. Inde ad S. Trudonis fanum Brederodius se recepit.

*Coniurati
ad Sancti
Trudonem
conueni-
unt.*

Vrbem hanc in regione Leodiensium sitam, habendo conuentui Coniurati definierant.

rant Miserat paullo ante ad eos epistolas Gu-
bernatrix, quibus ad illicita religionis studia
reprimenda, ex prolixâ promissorum fide ad-
monebantur. Et hoc prætextu concilium
suorum indixerant. Cæterum altiores sube-
rant causæ. Quippe cum per tot menses ni-
hil læti ex Hispaniâ acciperent, inexcusabile
suum crimen, & abominandum regibus
exemplum timere cœperant; sub specie si-
lentij securiori se vindictæ seruari credentes.
Sciebant enim quàm multum peccassent.
Neque in animum dimittere poterant, præ-
teritarum rerum insolentiam obliuioni da-
turum esse Regem, vel Generalia inducturum
comitia, nisi noui tumultibus extorquerent
inuito. Itaque ad Sanctum-Trudonem non
coniuratos modò, sed & Ministros, & secta-
riorum præcipuos tempestas compulit. Non
pauciores duobus equitum millibus conue-
nisse traduntur. Quærebant autem, quâ po-
tissimum ratione salutis consulerent suæ. de-
nique quid ultra facturi essent de libello,
quid de sectarijs promiscuam religionis
libertatem ibidem postulantibus. Aliquot

incertam adhuc quò tanta vis crumperet. Gubernatrix animo ægra, & ne in furiosum exitum rebelles spectarent sollicita, suorum præcipuos rogauit, ecquid haberent consilij. Nihil superesse videbatur, quàm vt iratos utcumque conciliatos, quamprimum resolveret. Protenus igitur Auriacus, & Egmondanus Coniuratis non iniucundi, ad hoc destinantur officium. Mandatum his fuit, si quid rebelles vellent, remissâ domum multitudine, certos delegatos Arscho-tum mitterent. Nescio quâ causâ Arscho-tum Coniuratis non placuit. Dufflam tamen (vicus est haut procul Mechliniâ) venturos se constituunt. Quidam volunt ex communi consilio conceptos fuisse libellos ad Imperatorem, vt Belgicæ libertatis patrocini-um apud Regem susciperet. De quibus mihi parum constat. Cæterum XIV. cal. soluto cœtu, Ludouicus Nassouius, Brederodius, & Culenburgius cum nouem alijs coniuratis Dufflam veniunt. Proceres quoque moram
non

non fecere. Mandata quæ deferrent, hæc acceperant, in codicillos contracta sub nomine Gubernatricis. *Auriacum, & Egmondanum ad vos destino, interrogaturos quid, malum, hac sibi velit tumultuaria secessio. Neque enim satis scio quid imprudens peccauerim, aut in quo offenderim nuperà satisfactione dimissos. Quid ergo est quod ultra petitis? quid vobis vultis? legatos petentibus, in Hispaniam decreui. Inquisitionem, & edicta rigoris insimulastis; mitigavi. Generalia Ordinum comitia desiderastis; quia in potestate meà non erant, ad Regem scripsi. An ex illo tempore quo libellus oblatuſ est, aliquid noui commenta sum? An, quod magis puto, desperatis de clementià Regis, ne iratus vobis placari non possit? Nemo subditorum unquam scititiem eius expertus est. Nunquam in suos ira, quàm clementia consuluit. Bonum animum habere vos iubeo, & hoc nomine esse securos. Saltem daturus est precibus meis obliuionem prateritorum, cui eà de re fauorabiliter toties scripsi. Hocine illud est*

quod

quod promiseratis, ne quem tumultum moueretur in populo? ubi sunt magnifica illa verba, quibus morituros vouebatis vos pro obsequio principis? quibus repressuros concionum licentiam pollicebamini? quibus ante pedes meos non recusastis occumbere? Ego nunc fidem à vobis exigo. Quam prestare non potestis, nisi libidinem frantem popularis vecordia. Iam turbas, iam seditiones, & exitium reipublice sectarij moliuntur, in quorum subsidium externa etiam gentes, veteresque Belgarum hostes conueniunt. His si conuiuetis, conscientiam sceleris confitemini. Interea rumor publicus omnem in vos inuidiam transfert, criminique substituit; turbarum capita, atque auctores demonstrat. Quid hoc aliud est, quàm ad motus ciuiles commodare operam, & contra morem obsequij licentia concionum libello consulere, publica tranquillatis laruà adumbrato? Quæ si vera non sunt, re ipsâ refellite. Ex iracundiâ vestrâ intelligam, postulata illa reipublice utilitatem, obsequiumque respicere.

Percussit coniuratos inuidiosa expostulatio. Prolixâque oratione obiectum crimen diluere adorsi, à Proceribus monentur, defensionem suam scripto committere. Capto deliberandi spatio, sex delecti IIII. cal. Augusti, Bruxellam veniunt, laturi responsum: Petebântque intromitti ad Gubernatricem. Sed illa præsentiam eorum auersata: quare, inquit, Auriacum, & Egmondanum non conueniunt? iussitque hoc ipsum renuntiari expectantibus. Hi se ad Gubernatricem missos dicebant, significantes esse, quod nisi vni illi promere iussi fuissent in fœderatorum concilio. quod postulante Gubernatrice solutum, rursus euocandum foret, si perseveraret ipsos excludere. His relatis, ad memoriam concilij Gubernatrix exhorruit. Proceribusque aduocatis incuriam, tres ex fœderatorum numero introduci iussit. E quibus vnus, quæ res poscebat locutus, tabellas obtulit in hanc sententiam; *Domina, Gratiam bene-*
uolen-

uolentia tue dignam referre non possumus, quòd legatos in Hispaniam dixeris. Ex his quæ tradentur, facile confidimus iustitiam causæ nostræ absoluturum Regem. Pro cuius ministerio ne iam quoque sanguinem dubitamus prodigere. Credimus denique ex quo libellus oblatus est, nihil à te nouatum esse. Verumenimvero cum videamus alios religionis causâ in ius rapi, alios ad supplicia seruari carceribus; persuademus certè nobis, magistratus non gessisse morem tuo imperio. At enim promissorum fidem à nobis requiris. Quasi in coercendis concionibus non omnem locauerimus industriam? Quod ad nos pertinet, conciones iacent. Iracundiâ populi cohiberi non potuit. Multa simul queritur. Quòd Rex libello nostro respondere differat. Duos menses datos esse, inter illos nihil succedere. Insolita quoque comitiorum forma, non paucis displicuit. Ecclesiasticorum deinque malignitas proteruâ linguâ terrore cuncta complentium, multos in rabiem

efferauit. *He causa illis ingenys fecere prorumpendi audaciam. Nisi antevertissemus mala ista oblatione libelli, iam diu est, quod prodenda conscientia consilium inierant. Si externi rebus se immisceant nostris, primi surgemus in ultionem. Ferrum tamen in ciues stringere, non est animus. Sed nec ministerium Regis id ipsum postulat. Gladio premendi non sunt, qui ad ius prouocant, et Generalium Ordinum decretum expectant. Nisi crudeles esse volumus in communem perniciem. At herculè fama publica reos nos facit. Nemo magis fallitur, quàm qui rumoribus se permisit. Quàm saepe fama mentitur? Quis ergo plebem concitauit? quis ad concionandum persuasit? quis ad ferociam impulit? Cum res exiret in tumultus, passi sumus lasciuire eos, qui in officio contineri non poterant. Hoc ipsum purgare Celsitudini tua parati sumus. Non inficiamur quidem, plerosque fœderatorum iisdem ritibus imbutos, non auersari promiscuam sacrorum licentiam. Nemo tamen eorum adhuc inuen-*

tus est excessisse terminos, officij sui, aut obsequium exuisse ergà Principem. Animi sui vota modestià compensant. Quoties plebem precibus aggressi sunt, ut abstraherent à furioso exitu? Abominamur certè tam proteruam licentiam. Proinde si quid habes, quo peruicacia obuiam ire potes, ediffere Domina, tibi omnem pollicemur operam. Caterum non adeò peruersam rationem sollicitudo nostra instituit, ut diffidere Regi oporteat. Iustitia & benignitas eius meliora spondent. Nam si hic sit (quod in votis omnium diu fuit) videres cuncta in Ordinem concedere. Perperàm itaque de prateritarum rerum obliuione securos nos esse iubes. Quid enim fecimus, ut venià opus sit? Venturis malis libello cauimus. Et ut scires vera fuisse, magnam calamitatum partem experti sumus. Restat ergo ut reipublica videamur consuluisset, non seditionibus, aut priuatis affectibus. Quòd tam fauorabiliter de nobis scripseris ad Regem, gratiam debemus Celsitudini tue. Vis tamen verum hic accipere?

Indulge libertati sermonis, propitias aures tuas non fraudabimus arcanis rationibus, quibus adaçti sumus ad intensiorem vite curam. Multa iracundia tua indicia eruere. Quid igitur mirum, si diffidentia nobis suspicionem feceris? Auriacus & Egmondanus illum herè scrupulum eximere conati sunt. Scimus interim multos Procerum nobis infestos, & nescio quibus verbis innocentiam nostram proscribere. Rebelles, & turbulentos proclamant. Breui Regem ad ultionem venturum. Se quoque quamprimùm mandatum acceperint, facturos, ne in illum impunè peccemus. His sermonibus simplices populi aures cottidie imbuuntur. Longiùs quoque quàm oportuit silentio transmisimus. Ad ultimum patientia diuturnitati succubuit. Clandestina consilia, quibus illos malè cogitare constat, extorsere remedium, quod à presenti necessitate accepimus. Amicitias enim cum peregrinis contraximus. Illorum bonà operà usuri, si aduersus nos, aut vassallos, aut subditos experta

vim

vim fueris. Hanc nobis necessitatem diffidentia tua imposuit. Quis autem damnare potest, quod vita fortunisque presidium quasiuerimus, quarum amore etiam fera ad ultima compelluntur? Nam si tutiori remedio consulere potes desperatis, non dubitamus admittere. Securitatem duntaxat circumspicimus aduersus malevolentiam Procerum & iracundiam tuam. Ne aut vi, aut alio genere prosequaris, nemini denique libellum fraudi efficias. Auriacus, Egmondanus, & Hornanus rerum nostrarum statum ante omnes intelligunt. Cum illis nobis frequens sermo intercessit. Operapretium feceris, si tuo iussu susceperint patrocinium foederis, amplissimisq; mandatis instructi, consilia nobiscum conferant. Credibile est tantam indolem non peccaturam in fidem. Nihil deniq; suasuram contra fas officij, & compendium publicum. Virtutem, quã hactenus claruerunt, vadem, prædemq; habes. Quanquam hoc ipsum prestare nisi pro tempore non potes: postulare tamen à Rege potes, ut decreto tuo placitum adijciat in

Generalium Ordinum concilium. Caterum, Domina, celare te non decet Sancto-Trudoni agentibus oblatum nobis esse libellum à multitudine. Copiam eius hic adiunximus. Arma quæ prouocati acceperint, posituros se profitebantur, religionisque negotium submissuros Generalibus comitibus, si interpositâ fide nostrâ redderemus securos. Non expediebat nobis tanta inuidia condicionem subire. Sed præualuit fortuna publica. Igitur, miserorum causam suscepimus, patronosque nos diximus aduersus iniuriam. Proinde si tranquillitatem amas, distribuendi sumus per oppida, arma populo erepturi. ne forte ille sibi relictus, peregrinis accedat, amulosque Gallos accersat in auxilium. Hoc tibi imprimis denuntiandum volumus, ut præsentis prospicias necessitati. ne si atrocius quid acciderit taciturnitatem nostram accuses. Quod reliquum est, Maiestati rursus obsequium vouemus, & spiritum. Gubernatrix nihil quietum suspicata: tamen ad simulationem comparauerat vultum,

con-

contumaces irritare verita duriori supercilio. Ab Egmondano, Assicourtio, & Assonuilio iussit expectare responsum. Pridie Auriacum Antverpiam dimiserat, sedandis motibus, quibus rursus studere videbatur populus ille, in tantâ licentiâ nunquam tranquillus. Scripserat ad eam senatus, Prætorē Brabantiae in proximis visum cum equitibus, & hinc formidinem incessisse sectarijs, sacra sua contra fas turbari criminantibus. Vereri itaque, ne aut locum concionibus occuparent in vrbe, aut ferrum, quod deposuissent, reciperent. Prætor ergo mouere inde iussus. Egmondano imperatum, vt codicillos deferret ad Coniuratos, in hæc verba. *Nescire Gubernatricem quid in officium imprudens peccauerit, aut quid sibi velit tam confusa rescriptio; cuius plantorem interpretationem desideraret. Sectarios in vinculis detineri, vel quâ de causâ, nondum ad eam relatum esse. Perperam igitur contumacia insimulari. Quæ promissi eius fuerint, abundè seruata esse. Sed econtra*

illos non exprimere operam, quam in cœrendis concionibus attulerint. Si candidè agerent, nominarent vasallos, & subditos, pro quibus tantoperè sollicitarentur. Nam securitatis pignus, vadèsque quos flagitarerent ipsi, vicissim se exigere. Coniurati contra in hunc modum rescribunt. Multa à nobis, Domina, de industriâ prætermissa sunt, quorum ratio, & consilium ad te pertinent. Nunc verò quia ita iubes, non erit graue in copiam impingere, quam nuper in scribendo effugimus, ne superfluo sermone aures oneraremus tuas. Captiuos si placet accipere, rectius à Tornacensibus, Insulensibus, Montensibus, Ariensibus, Bethuniensibus, & Athensibus accipies. Brugenses deniq;, & Gandauenses non paucos in custodiâ habent. Diligentiam verò nostram in tranquillandâ plebe, sola si ignoras, quamprimùm dimitte per prouincias, qui consistoria, & Ministros interrogent. Inordinatorum comitiorum rationem frustra requiris à nobis. Eius tibi causa exigenda est à populo. Queritur ille voca-

tos in comitia, quibus ius suffragij non erat. ceteros, aut omninò non vocatos, aut ex-
tò comitorum die adesse iussos. Adhac quòd
delectis ciuitatum exemplar edicti petentibus
non induleris. Quòd spacium, dum ad colle-
gia referrent, non dederis. Quòd publicà do-
mo inclusi, iussi sint consilium capere, nec pri-
us inde exire passi quàm responsum dedissent
pro tuo arbitrio. Interroga conscientiam
tuam, an non violaueris libertatem pub-
licam, qua modò Gubernatorum senten-
tias promissis emeris, modò litteris sollici-
taueris delectorum suffragia. Populus er-
go iure de te queritur: nos de Proceribus,
quorum multos nobis infestos videas. Con-
gressus, & occursum nostros vitant prater
consuetudinem. Tanquam rebelles aut la-
se maiestatis piaculo contaminatos fastidi-
unt. Consanguineos quoque suos, atque
amicos deterrent imagine periculi, à nostro
commercio. Spem gratia plerisque osten-
tant, si à nobis consilia segregauerint.
Multorum quoque auribus haut obscure

insinuant, ubi Rex in Belgium venerit, aut Regem non fore, aut nefario sanguine parentaturum iniuria sua, noxiisque daturum supplicia. Hi apud te sunt. Cottidie tecum consulunt. Regis aures imbuunt secretioribus consilijs, & bonitatem illius in tristiora extimulant. Tot Veredarios iam remisit Hispania: nullus tamen postulorum nostrorum mentionem attulit. Sed Philippum Regem accipimus iter sibi, & legionibus per Gallias sollicitare. Ab eadem gente subsidia in nos exigere. Ducem Sabaudia auxilia instruere. Proceres tanquam contagionem metuentes, securitati nostrae timent accedere. Haec cause compulere nos ad externas amicitias. Quas cum Gallis tamen nullas contraximus. Si Vasallos, & subditos scire vis pro quibus merito sollicitamur; Belga sunt. Hi nempe qui causa nostra se iunxere. Sed nec illos, nec ceteros foederatos securos reddere possumus, nisi Celsitudo tua, & tres isti Proceres fidem interponant suam. Hos veluti medios inter te Regemque, & nos constitue,

nihil

nihil utique acturos, nisi ex tuo arbitrio. Ita tamen, ut non militem conscribas, non aliundè adsciscas, quàm sub illorum auspicijs. Hi duces, hi centuriones, & chiliarchas dicant. Scimus id multis prouinciarum rectoribus graue fore. Commodius tamen nobis cauere non potes. Presentem reipublica statum inuidia postferimus. Atque ut mentem nostram propius accipias, ad tempus duntaxat exigimus fidem vestram. Despiciet interim Rex rescindere velit, an admittere. Quem si recusare contigerit; aequum est, spatium aliquot concedi ijsdem promissis subnixum: ut interim securitati nostrae consulamus. Tres septimana in id suffecerint. Cautionem quam vicissim postulas, superuacuum ducimus. Quia nihil acturi sumus sine Auriaci, Egmondani, & Hornani consilio. Hec est nostra cautio. Vires namque quas foris contraximus, offerimus ad obsequium. Maiestatis, exequi parati, quidquid ex suffragio Ordinum ille iusserit.

Hæc mutuo metu, & simulatione retenti,

inuicem scribebant. Horrebant tamen prudentiores ad sceleris nouitatem, auribus Regum insolitam: quæ non conueniret cum nomine Principis summoque imperio, nec sine pestilenti exemplo proferretur in populum. Cæterum Gubernatrix non solum terrore plena; sed ad tantam negotiorum vim sollicita, Procures cum quibus conferret, ferè non habebat. Auriacus Antverpiæ hærebat. Mansveldius, Arenbergius, & Megemus suas curabant prouincias. Arschotanus Montibus Hannoniæ retentum se simulabat infirmâ uxoris valetudine. Haftenus enim nullo publico munere excultus, tragædiæ speciem eminens aspexerat. Hornanus iniuriâ faucius, curiâ abstinebat; pretextu ægritudinis leuiri sui absentiam excusans. Præter Egmondanum, & Barlaimontium nemo aderat. Vtrumque ergo, cum Priuatæ curiæ senatoribus ad se accersitos, interrogabat, quid sibi agendum in tam perplexo rerum articulo. *At ego*, inquit, Egmon-

Egmondanus, de Inquisitione, & edictis, & abolitione non querendum amplius censeo. Quorum iam nullus est usus, singulis à libidine suâ modum flagitij exigentibus. Nihil enim valent leges, nihil iudicia, nihil imperia, ubi vis, & audacia regnant, ubi mali, atque scelesti, carceribus eripiuntur ab insanâ multitudine. Id nunc agitur, bellum, an pacem velimus, alterutrum nobis fœderatis promittentibus. Nisi ergo admittimus Generalia Ordinum comitia, flagrabunt omnia civili discordiâ, armâque propediem præ foribus strepentia audiemus. Ista verò utcumque periculosa sint consilia, neque utilia publicè; tamen ut necessaria, suadeo; ut apparatus armorum fœderati destituant, sectarij verò remittant supercilium. Multum quoque fiducia decedet externis, destitutos se sentientibus conspiratione nobilium; quos econtra pro Rege suo obstinatos, abominari seditiones viderint. In summâ ex duobus malis, eligendum est minimum. Omnes quidem laudabant Egmondani sententiam.

Viglius tamen non placere sibi dicebat tam periculosa remedia, neque tantum se tribuere comitijs, ut ab his expectari possit religionis incolumitas. Demus, ait, Ordines maiorum religioni, ac venerationi Regis sui deditos, nouitatibus non oblectari: polliceri tamen nemo potest, nihil utique illos anteuertendis calamitatibus concessuros libellis, quos sectarij ex omni parte uno animo impetūque obtrudunt. Haud frustra olim placitum principibus, ne absentibus ipsis Ordines haberentur. Cum vel presentes cohibere vix possint, ne vel iura sua augeat populus, vel sceptrorum libertatem astringat. Hoc enim periculi in se habent ista comitia; ubi quod singuli non auderent, vniuersi consentiunt, infesta semper, & nunquam sat suspecta dominantibus. Nam ne Regem quidem velle existimo. Scit enim quā procaciter sibi nuper illuserint. Populo cum Principibus nunquam conuenit. Dominari illi volunt, hic liber esse. Quares igitur, quid censeam, quando nec recusare comitia, nec admittere sine periculo possumus?

Mea

Mea ferret sententia cauendum esse Coniuratis, & per aqua, per iniqua conciliandos reipublica. Comitiorum verò negotium deferendum ad Regem, ut ipse statuatur quod potissimum res exegerint. Huic sententiae Gubernatrix accessit. Nam ceteri quoque non dubitabant quin optimè Vigilius dixisset. Secundum hæc statuitur, respondendum esse Coniuratis, de postulatis eorum Gubernatrici curæ fore. Paucorum dierum inducias petere, intra quos mitteret ad Regem, Proceresque contraheret in curiam, quos in xv cal. proximas adesse omnes iusserit. Prædes quos exigerent absentes esse. Inuitos autem vadari non posse. Ad hoc decretum Coniuratis deferendum Egmondanus deligitur. Datum illi præterea, in mandatis, ut quoquo modo pacaret contumaces, hortareturque dissoluere fœderis nexum, sub cuius fiduciâ sectarij tam flagitiosa peccarent.

Gubernatrix postridiè ad Regem scripsit. Materiamq; consternationis subtrahendam

debantur. Non Ipras, non cætera Flandriæ primorum constantia in fide retinuit. Instar morbi scelus, & amentia vrbes, municipia, vi-
cos peruagabantur. Vna Brugarum ciuitas erat, quam tempestas illa non libauerat. Hanc sectarij per epistolas alliciebant in consorti-
um, & si resisteret magistratus, vim, & ultio-
nem minabantur. Momentoque temporis quatuor armatorum millia Brugas contendunt, templumq; Sanctæ-Crucis in ipsis suburbijs concionibus incesant. Neque ciuium hoc crimen erat; sed eorum maximè, qui nuper Gandauum iuxta infani, facem audaciæ prætulerant. Ducentos tamen Brugenſium interfuisse comperio. Quorum peruicaciam magistratus timens, Gubernatricem inuocauit. Missusque eò Egmondanus, trecentos ciuium adlegit in stipendium. Et sic haut ægrè suppressum est scelus, in cuius etiam odium genius vrbis durauerat. Insignis ea tempestate Hannonum constantia fuit. A Valencenensibus sollicitabantur crebris epistolis. Et haut procul Montibus concionem edixerant. Ad discutiendos eos Latrun-

culator Hannoniæ egressus, idoneâ manu in ipso conatu furentes oppressit. Montensem Urbem Arschotanus obsequio sibi demeruerat, & si cætera nutassent, Gubernatrici seruabat ad receptaculum. Luxenburgum discretæ spatijs regio, vitijs aliarum non miscbatur. Nec alia sanè prouincia per ciuiles hos motus modestius egit. Eadem prope Namurci quies fuit. In Artesiâ denique integritas præualuit. Flandrorum tamen & Valencenensium contactus, finitimos aliquot vicos, quasi agitantibus ventis, contagione infecerant. Proditumque memoriæ est, ex tot satrapis, quibus ea regio abundat, haut amplius septem coniuratis accessisse. Regebat tum Atrebatum Vice-comes Gandauensis, vir nulli aut fide secundus, aut obsequio. de cuius virtutibus trademus postea. Nusquam fides in reliquis prouincijs, quas fatalis tabes vsque ad desperationem corripuerat. Geldria, Frisiâque crebris quæriebantur motibus, Gubernatoribus frustra obnitentibus, quorum constantia in contem-

temptum venerat. Scirés omnia ad seditio-
nes vergere. Libidinem concionum multo
armatorum præsidio Sectarij tutabantur. E-
quites in turmas componebant. Vt quisq; o-
pibus validus, tela, equos, pecunias confe-
rebat. Expilationes monasteriorum, raptus,
& sacrilegia hauserant animo. Denique fi-
duciâ Coniuratorum inflatos, superstitione,
ac lasciuiâ discordes, non lex, non magistra-
tus, non pudor, aut metus cohibebat. Pro-
uincialium curiarum proiecta auctoritas;
vano conatu iura exequabatur. Imperium
viribus destitutum, decreta supplicia expe-
tere non poterat. A sectarijs vi agebatur.
Fortè aduocatum quendam Gandavi scele-
ris compertum, Procurator Generalis in iu-
dicium traxerat; cùm sex armati repentè in
Præsidem Flandriæ domi inuehuntur. Mi-
nister quoque simul venerat, superbèque po-
scebat, absolui captiuum, ac in posterum con-
cionum libertati desineret officere. Cæterùm
ille ad hoc fulmen hautquaquam territus,
paucis respondit. *Regis se Ministrum esse.*

sunt ad paria facinora. Sed pauidi ciues obiectis portis venientes excluderant. Igitur in urbem versi, proxima quæque exterruit. Nec procul Bruxellâ, aberant; iactabantque propediem admoturos se urbi multitudinem. Quibus auditis Gubernatrix non mediocriter expalluit. Tot simul flagitijs obuiâ ire non poterat, apparatu belli destituta, armisque, & milite; ac si hæc suppeterent, pecunia tamen deerat. Ordinarias turmas instrui iusserat. Sed illæ apertè inclamabant non facturâ Gubernatricem ut sine stipendiō militarent. Igitur ad conquirendas pecunias intendit, animum. Usitatum hæctenus fuerat in extraordinario discriminis articulo, sub honestâ mutui specie tributum aliquod ecclesiasticis imperare. Tunc quoque rogari placuit. Quippe cō procliuius collaturi videbantur, quod hac pensione incolumitatem suâ cogitarent redimere. Conferendi exemplū Hañones præbuere. Idem factum in cæteris prouincijs. Sed benigna illa liberalitas præteritorum annorum stipendia exonerare non poterat. Ad ea igitur dissoluenda consilium iniit, fasti-

fastigio quidem indignum, sed quod terror & necessitas facile excusat. Quæstum enim ex sorte (Lotharias vulgo dicimus) facere instituit; subleuatura ærarij angustias sine cuiusquam incommodo. Vrbes interim in finibus positas, supplemento militum firmavit. munimentum aduersus finitimos, & si necessitas postulare, contractura inde auxilium in ciuili discordiâ. Gubernatores, & Prouincialia concilia, prætores quoque, & magistratus admonuit, diligenter cauere, ne externis hostibus, ciuitatum munimenta aperiret proditio. Denique vt cum saniore ciuium parte inirent rationem, quâ illicitos coetus discuterent, vrbesque, & populos continerent in obsequio. Et quoniam non sine Dei irâ mala ista accidere videbantur, publicas preces, & supplicationes indixit. Hæc in præsens suppetebant remedia: sed vana, atq; infirma in tam vasto incendio. Plebs variè pessum ierat, cupida rerum nouarum, simul agitata pestilenti sydere illius sæculi.

Dum

Dum hæc in Belgio aguntur , Rex in Hispaniâ sollicitus, infumebat operam consultationibus, adultâ iam malitiâ nihil profuturis. Montignæus enim eodem peruenerat cursorijs equis. Et quid de mandatis suis fieri placeret ad Regem retulerat. Ille verò suos in Concilium contraxit , & quod optimum ducerent ad se referri iussit. Hi tum maximè Concilium instituebant; Dux Albanus, Gomeſius de Figueroa Feriæ comes, Antonius de Toletto magnus prior Ordinis sancti Ioannis Leonensis, Ioannes Mauricius de Lara , Archiœconomus Reginæ, Reynerus Gomeſius Princeps D'Ouoly & Comes de Melito , Ludouicus Quixada Archipposcomus, siue magnus Scutarius principis, Tiffinacquiſ , & Hopperus , & Corteuillius. Rex autem non intererat. Ne fortè studio suo suffragandi libertatem adimeret contraria, suadere timentibus. Et quia plerisque semina morbi ignota adhuc erant; ita instituere consilia, vt prius de genere mali, deinde in remedia inquirerent. Concilio Belgico Fig-

ueroa præerat. Verba eius in hunc modum traduntur. *Nunquam mihi dubium fuit, hant aliò spectare Belgicorum Procerum consilia, quàm ut in turbidis rebus, & per religionis licentiam quassatis, summam imperij ad se traherent. Primo enim quibus non machinis Granuellanum amoliti sunt? quare tamen irascerentur illi non habebant. Hoc de illo quoque inimici confessi sunt. Quid est igitur quod causabantur? Non expedire reipublica vnum aliquem in eo fortuna gradu summam imperij habere in manibus. Maiorum mores obstare. Eam prerogatiuam, deberi Proceribus. Hoc pretextu exturbauere periclitantem Cardinalem sub omnium inuidiâ. Sed re verâ constantiam eius oderant, quam libidini sue credebant officere. Deinde legatio Egmondani superuenit, de Inquisitione, & edictis querelam ferens, & curiarum omnium vires Proceribus vindicatura. Ab hac spe deiectis, libellus Coniuratorum successit. Qui sunt illi Coniurati? fratres, cognati, affines, dome-*

domestici, amici, & familiares Procerum? Quid igitur flagitant? Inquisitionem tolli, mitigari edicta, Generalia Ordinum comitia contrahi. Nempe ut in comitijs rempublicam ex suo formarent arbitrio: Inquisitione verò, legibusq; sublatis, promiscuam sacrorum licentiam inducerent. Ut vel inde nemine proficiente satis intelligas, non alienos esse Proceres à Coniuratorum consilijs, facinusq; inter se partiri, quos in unum omnes cogit eadem factio. Ne id quidem Proceres dissimulant; qui ad ultimum suasere Regi, ut Inquisitionem abrogaret, edicta leniret, præteritorum gratiam concederet, officia trium curiarum in unam confunderet. Hec sunt, quæ modò Montignaus attulit. De aduentu Regis parum aut nihil adiecit. Cuius præsentiam Proceres non desiderant. In summâ, duæ in Belgio sunt factiones, una Procerum, altera Coniuratorum. Altera alterius instrumentum est. Et in id utraque collineat,

*ut dominationem Proceribus transcribat, quàm
deinde illi vel in Regem potentiam exerçant.
Post hunc sermonem, fuere qui censerent,
prudenter facturum Regem, si vel ipse, vel
præfectorum aliquis ad opprimendum ma-
lum in prouincias transiret cum exercitu.
Sed eam sententiam plures abhorrendo;
Non paucos in Belgio fontes esse testabantur,
Multos tamen ex his non propriâ indole ab-
stractos; sed leuis animi vitio alienæ stulti-
tiae accessisse. Bonorum interim numerum
prepollere ceteris. Abominandum ergò re-
medij genus fore, pari supplicio cunctos affi-
cere. Quippe bellum geri non posse citra bo-
norum iniuriam. Longè aliam esse volunta-
tem Regis, qui mitem, & pacatum ani-
mum præstare cupit subditis; & cum illis
hanc aliter agere, quàm tractare liberos so-
lent offensi patresfamilias. Hi iustitiam pie-
tati admiscunt. Domestica flagitia sic curant,
ut liberorum salutem, non ultionem videan-
tur exigere. Regem enim corrigere velle, non
euertere; sanare, non extinguere. Cum his
& eius-*

& eiusmodi argumentis pro se quisque vicissim certaret ; in hanc tandem sententiam concessum est, vt referendum Regi dicerent: *Duo omninò suppetere remedia. Alterum verum, & solidum. Alterum medium quidem; sed necessarium. Solidum remedium in celeritate positum esse; si primo quoquo tempore in prouincias festinauerit Rex, in ipso apparatu deprehensurus sectariorum consilia. Religionem adhuc in potestate esse. Auctoritatem refractariorum caducam, atque infirmam. Si proximam hyemem otiosus extraxerit, non religionem, non fidem, non obedientiam inuenturum. Precipitatum insaniam non postulare lenta remedia. Neque etiam expectandum, donec mali iunctis sibi externis supercilium tollant, & nihil amplius sincerum sit in prouincijs. Componi adhuc res posse sine ferro, & sanguine. Sed glissentem seditionem in ipsis cunis opprimendam esse. Mox enim nihil proficiunt succinctæ legiones, vel certè non nisi inhonestis conditionibus ferociam discutient. Ipsum Regem*

hanc sibi expeditionem sumere debere. Nihil profuturam, si alteri permiserit, quantumvis egregio. In eo enim non elucebit reuerentia Maiestatis, non eminebit auctoritas. Quin. imò atrociorum secessionum causas daturum partibus, utrimque armatis, & ministerium Regis utrimque praferentibus. Sicut nuper in Gallià accidisset. Hac ergo incommoda praenire debet Rex praesentià suà. Boni enim auspicia eius sequentur. Dubij conspectu Maiestatis perculsi, ad eundem respicient. Mali non habebunt in quo fiduciam reponant. quorum cervicibus exercitus incumbens, societates ac factiones dissoluet, libratisque conatibus rebelles in leges subijciat. Tum demum religionis negotia securè componet, instructus legionibus, quas turbulentis obijciat. Si quid in ecclesiasticà labauerit disciplinà, reuocabit ad Conciliū Tridentini seueritatem. A sectariis verò exiget ultionem flagitij. De edictis, quod videbitur, constituet. Si quid in Concilio Status, vel Finantiis, aut secretà curià mutan-

dum duxerit, rectius ibi perficiet. Deesse nobis hic acta, deesse decreta maiorum, unde prateriti temporis formam, morésque liceret colligere. Controuersias quoque inter easdem curias exortas, dissoluet. iubebitque singulas contentas esse mandatorum suorum finibus. Operam denique dabit, ne indulgentia, & abolitiones, ne munera, & honores, in quibus potissimum tranquillitas, salúsque publica consistit, ad indignos perueniant. Hac sunt solidiora remedia. Quae si maturè applicari possint, vulneribus, frustra iam in cetera inquirimus. Ceterum dum instruitur exercitus, dum aule moles per se grauis mouetur, hyems est, & intempestiua aura nauigantibus. Quippe non aliter Rex in Belgium transportari potest, quam Oceano. Temerè crediturus salutem suam externis hominibus. Proinde ad media remedia necessitate compellitur. hoc est; de Inquisitione, & edictis, ac prateritorum delictorum venià, quid agendum sibi, consideret. Flagitio-

olim in praesentium scelerum remedia, & securitatem suam, futurorum praesagax Ecclesia instituit. Nihil enim sperandum, erepto telo quo integritatem ulciscitur suam, quàm ut religio exponatur iniurijs. Nec sine periculo edicta resolutus in ancipiti republicâ. Malos pœnis affici debere. Quid enim futurum si nihil prater scandala, & conciones, ac conuenticula leges corripiant? nec id quidem idoneo supplicio; sed sub prætectu turbata pacis, aut lesa tranquillitatis? scilicet ut fas cuiq; fiat, intra domesticos parietes contaminata conscientia morem gerere. Itaque si tempora admitterent, suasuros se fuisse maiorum morem retineret, nec supplicia irrogaret mitiora prateritis. Nunc verò magnoperè censere, sceleratis hominibus ignoscat, & prætorum criminum gratiam faciat. vnos tamen Ministros, & concionatores excipiat. Inquisitionis quoque Papalis potestatem exarmet, ita tamen ut Episcopalis in usum veniat. Edicta verò in aduentum suum differat. & si ne hac quidem moram ferant, Bel-

gas ipsos iubeat formulam concipere, transmittendam in Hispaniam, ut de hac quod videbitur Rex constituat.

Hac relatione auditâ, Rex ad Gubernatricem litteras dedit, quibus sententiam suam, in hunc modum commisit. *Domina bona soror mea; Haut alia mihi unquam mens fuit, quam ut clementiam cum meis communicarem. Pristino affectus absens non detraho. Nihil equidem negare constitui, quatenus inusolatus numinis cultus patietur, & conscientia mea. Quod ex litteris hisce satis intelliges. Neque id necessitati tribuo, quam representas; sed natura mea. Malo me gratia, quam vindicta pœniteat. Atenim Inquisitionem aboleri desideras. Scio quantum momenti postulatis illis subsit. Hac sunt arma, quae ex olim in rebelles Ecclesia instruxit. Quibus hæcenus dignitatem suam tutata est à sectarijs. Maiorum consilia damnare non possum. Neque tamen institutis eorum ita me addixi, ut ab illorum prudentiâ recedere nefas existimem. Ad praesentis saeculi genium*

cogitationem direxi. Imperator pater meus
Inquisitionem accepit, quia frangenda malitia
Episcopi deerant. Cum sub incuria eorum,
qui iurisdictioni praeerant, torperet Eccle-
sia, ad hac auxilia recurrere coactus est.
Nunc inter tot Episcopos eadem tempora
non videntur. Facile itaque persuaderi mi-
hi patiar, Papalem Inquisitionem expungi;
modò Episcopalis robur accipiat. Edicti for-
mulam, quam concepistis, planè inutilem ef-
se video. quia sectarij haut aliò spectant,
quàm ad libertatem religionis. Quod ex fa-
mosis libellis facile est intelligere. Fœderati
verò à Generalium Ordinum concilio edi-
ctum expectant. Sed obsecro, quid bono-
rum interest, haec, an illa rogentur leges?
Quippe suoapte ingenio ad licita, & honesta
feruntur, nec contrà maiorum morem quid-
quam attentant. In malos autem nulla
satis atrocitas statuuntur supplicia. Verun-
tamen ut tranquillitatem civium, benefi-
cium meum faciam; recudi leges non re-
cuso. Nec tam diu pressissem consilium

meum

meum, si provinciarum omnium accepissem suffragia. Absque his nihil novi statuere oportuit. Quippe in leges municipales, aut privilegia impingere non est animus. Nam si rogandi morem omittimus, bonorum offensa praesto est. Quia nec priora edicta sancita sunt inauditis provinciis. Et malè leges sciscuntur, quas vultus postea reiiciat. Imo ad exemplum pertinet, semel latae perpetuò custodiri. Ceterum si constare robur legibus volumus, quaedam à iuris communis praescripto exigenda sunt. nempe ut contumaces, anabaptistas, & relapsos ignis compescat. bona verò eorum publicentur, quos gladius extinxerit. Quis enim probare poterit, exules ipsos fortunarum suarum retinere arbitrium? Usufructus, antenuptialia lucra, hereditates, & legata ad eos pervenire, quos flagitio suo patriam expulsos, civilis beneficio indignos lex fecit? Ius commune has perduellibus poenas liquidò imposuit. Quarum mentionem in formulâ moderaminis

vestri nullam inuenio. Dubium consilio, an
errore. Sed delatores pœnâ, aut premio ad
proditionē sceleris sollicitari non video. Qua-
si futuri sint, qui sponte vult accusa-
re? nemo gratis subiturus est delatoris inui-
diam. Hac velim eo candore admittas,
quo ipso exigo. Nam quod ad me attinet,
augendo arario non studeo. Sed quia publi-
ca utilitati conducere arbitror, & ita fieri
debere ius commune demonstrat. Edictum
anni MDXLIX. idem constituit, nihil tum
detrectantibus Ordinibus. Neq; interim ad
rem pertinere puto, quo pacto obstinata men-
tes frangantur. Potestatem vobis facio, con-
cipiendi formulam; ita tamen, ut religionem
mihi, & Maiestatem illibatam seruetis.
Quodcumque autem videbitur, quamprimum
ad me trans mitte. Præteritorum veni-
am quam requiris, quantillum profecturam
existinem ex hoc conijcio, quod Fœderatos
spe suâ frustratos videam. Quanquam nec sa-
tis accipiam, utrū ipsos duntaxat Fœderatos,
an & Ministros, & sectarios gratiâ quoque
dignos

dignos iudices. Nolo tamen legibus constringi clementiam meam. De his quod videbitur ipsa constitue, & præteriti furoris veniam fac, pro tuâ prudentiâ, & arbitrio. Vnos tamen condemnatos excipio. Fæderati verò vinculum resoluant, & ad conciones, cætusque illicitos dissipandos omnem tibi industriam conferant. Hac demum lege gratiam ratam efficiam. Quò minus ipse iter in Belgium instituam, per imminentem hyemem non licet, deprehensuram me sine dubio in medijs fluctibus. Primo tamen vere appellere statui. Interim si conciones, & conuenticula non cessauerint, Ordinarias turmas, & præsidarios obijcias. In Fæderatos easdem partes amplexos, conscribe exercitum. Præfecturas delictis attribue. Horum virtus securum me efficiet. Nam & ciuitates ferè in obsequio stant. Et quò fidem illibatam retineant, prætores, & magistratus ad colendum officium lusteris exstimulo, quas sine morâ destinandas trades veredarijs. Vale. ex siluâ Sigouâ prid. calend. August.

Hanc utique epistolam in longum transcripsi, non ut moli voluminis aut copiae consulerem, quod vnum semper vitium maxime declino: sed ut boni Regis famam calumnijs exonerem. Nemo scriptorum est aliarum partium, qui nocentem non pronuntiet. Seruitutem, & regnum cogitasse mentiuntur. Et quod magis exosum populo faciant, plura innocentiae eius maledicta affingunt, praeteritis virtutibus, quas mitissimi Rex ingenij, supra benignitatem candidissimas exercuit. In sacra maiorum (nec immerito) peruiacior fuit. Haec si adsint, caetera facile populo condonauerit. Sed ab aequo lectore, sincerisque iudicijs, saniolem sententiam expecto. Fata erant, quae Belgas vrgebant. Ad quorum iram auertendam publica vota & supplicationes Rex in Hispaniam suscipi iussit. Eadem in Belgio fieri mandauit. Litteras quoque ad Proceres dedit, blanditijs plenas. Tempus appetisse monens, quo constantiam suam fidemque

que probarent. Idem quoque magistratibus perscripsit.

Missis his epistolis, alij, atque alij tabel-
larij in Hispaniam perueniunt, nunciaturi
tristiora præteritis, & afflictæ statum pro-
uinciæ. quo in discrimine religio esset, quâ
in perplexitate rerum Gubernatrix. Deni-
que cuncta feruere discordijs, sub infandâ
sectariorum audaciâ.

Ad hos nuncios indignari Rex cæpit,
quòd sibi populus tam procaciter illude-
ret. Succinctisque legionibus ad omnem
fortunam opus esse ratus, tria equitum, de-
cem peditum millia in Germaniâ conduci
iussit. Gens armis strenua, suâque indole
in martem propensa, plura Cæsari, de-
inde & Philippo Regi stipendia generosè,
fortitèrque fecerat, in venali fortitudine ig-
nara perfidiæ. Sed nec recens adacta in Sacra-
mentum vexilla destituit, quod tyrones Belge
inter flagitia non numerant. Et cum hodierna

pru-

prudencia statum robur in peregrinis constituat, inter eos Germani, nihil cæteris virtute, nihil affectu concedunt in principem, cuius ære militant. Turmas equitum in hunc modum distribuit. Eriicio Brunswicensi tradita sunt tria millia; totidem Ernesto Brunswicensi. Philippus frater quingentos accipit. Ioanni Bauaro centum quinquaginta; parum numerum Ioanni Willaertio attribuit. Pedites verò in triginta tres manipulos contraxit. Ex his decem cohortes Ioannes Nassouius, totidem comes Euerstenius legerent. Gompbergium octo præfecit. Waldensingerus quinque iussus est conscribere. Hos sibi Principes mercenarios pridem effecerat. Paucorum annorum debitam pensionem exigentibus persolui iubet, missis in Belgium trecentis aureorum millibus. quantam summam necessitas requireret, & præsens fortuna permetteret. Ex eadem pecuniâ sexaginta duo millia præsidiarijs, turmisque Belgicis in sex mensium stipendia numerari præcepit. Cæterum ne Germaniæ dynastæ ad tanti exerci-

exercitus famam, in suspensionem raperentur; necessitatem armorum Cæsari excusauit. Gubernatricem præterea quæ moliretur secretis litteris edocuit, Generalia Ordinum comitia differri præcipiens.

Iamque epistola quam ante transcripsimus, in manus venerat. Nemini dubium erat, Coniuratos malè sibi conscios, nisi ex Generalium Ordinum comitijs edicta non passuros. Nec mirius aliquid sperabat Gubernatrix. Itaque Viglium, Bruxellium, & Assonuiillum ad se accersit ex Priuatâ Curiâ, Barlaimontium, & Hachicourtium adesse vnà iubet. Soli enim ex Proceribus aulam instruxerant. Deliberare eos iubet, quid sibi statuendum de voluntate Regis; infirmo, ut videbatur, in præsens remedio. Illi commodius de his relaturam dicebant xv. cal. proximas, in communi Procerum concilio. Absentibus ijs de tantâ re statui nihil debere. Nam si infelicem exitum haberent litteræ, omnem inuidiæ molem in se vndaturam. Probatâ sententiâ, epistola magis non publicatur

catur, quàm supprimitur. Iam quoque ea quæ scripta erant ad aures Coniuratorum peruenerant; præcipuè indignantium, quòd nullam comitiorum mentionem epistola præferret, quæ tam profundè imbibebant. Credebant enim absque his tutò sibi cauere non posse. Et pro repulsâ interpretabantur, quòd Rex non scripserat. Itaque nouis tumultibus visum est opus, & atrociori scelere extorquere, quæ Rex sine scelere indulgere non poterat. Interceptæ sunt à Gubernatrice Tornacensium epistolæ, quibus significabant Coniuratis, vt illico ad se mitterent, quid postremis eorum postulatis respondisset Rex Philippus, alioquin quæ destinassent strenuè effecturos. Vnde faciliè est conijcere, ex Coniuratorum instinctu transactum esse sequens facinus, qui sectarijs tanquam instrumentis ad flagitia abutebantur.

*Initium
Iconoma-
chia.*

Ergo postrid. idu. Aug. proruptum est in apertum sacrilegium. Compositionem sceleris referre non possum. Nemo enim in tanto

con-

consensu auctores meminit. Sunt qui auspicia Tornacensibus impudent; & ab his submissos, qui perditissimorum audaciam pecuniâ conducerent. Ego verò ut non vnum aliquem populum, ita iniuriam temporum accusare non desino, mutationem rerum portendentium. Trecenti circiter numerati sunt, qui sacrilegiorum licentiæ viam aperuerunt. Obscura fax, & vappa populi. & inde in audaciam pronior, quia occulta. Quorum vnum, etsi maximè nefas, ne nominare quidem possim. Homines sine tribu, sine nomine, finibus Audomarensium egressi, mortalium omnium notitiam amiserant. Sed Monasteriorum opibus auidissimè inhiantes, primum omnium abbatiam Wuluerghemiam, haut procul Curtraco sitam, hostiliter diripiunt. Clausæ erant in eâ virgines sacræ. Ipsa solitudo loci, sexusque naturalis imbecillitas, Iconomachorum audaciam erexerat. Hoc sceleris auspiciū fuit. Imbutæque semel sacrilegio manus, nihil furori postea reliquum fecerunt. Calcare sacra, aras euertere,

insultare imaginibus, ornamenta absumere
flammis, violare sepulchra, ossibus defunctorum
illudere. Mira prorsus & abominanda
crudelitas. Quasi parum facinoris in superos
admitterent, etiam manes laceessere sustine-
bant. Nunc demum intelligimus, quanto
posteritatis damno eraserint litteras, maio-
rumque insignia, marmoribus insculpta,
quorum nunc vestigia aberranti sæpe con-
iecturâ multorum ingenia curiosè perse-
quuntur, aut à famâ memoriam requirunt,
nullo certo auctore subnixam. Neque hunc
furorem catholici tantum detestantur: sed
etiam quisquis aliarum partium liberalibus
artibus ingenium excoluit. Iconomachorum
tamen non intererat quid posteritas amitte-
ret. Per omnem illam oram grassati sunt in
templa. cæterisque ad eadem audenda exemplū
præbuere, facile sequentibus, quod timebant
incipere. Diceres ergo incendium per rura di-
scurrere. Ita confestim, & sine morâ obscu-
riores aliquot pagos, pari audaciâ in Castela-
nâ regione, pertentant Sectarij & Ministri in
parti-

partibus. Inde statim Bellam corripiunt. Cæterum Bellæ monasterium erat, quod ex Prioratu Carolus Cæsar in Abbatiam extulerat, translatis eò monachis D. Ioannis Teruānenſis Benedictini Ordinis. In hoc Diuus Antonius peculiari religione colebatur à populo. Vota quoque pendebant de pariete, ſanctitatem loci teſtantia, quam multorum annorum donaria celebriorem effecerant. Argenti ingens modus altaria inſtruebat, cultuſque ad magnificentiam ſacrorum exacti. Hæc ſectarij religionis odio, ſeu prædæ cupidine, ſcelerata pietate furijs conſecrant. Non ſacro, non profano manus abſtinent. Sedibus ſuis Monachos exturbant. Nihil intactum, nihil integrum relinquunt. Ornamenti ſacrorum abutuntur ad ludibrium, calicibus ad temulentiam. Et ne catholicæ religionis memoriam relinquerent; bibliothecam flammis abſumunt, multorum annorum labore, atq; impendio inſtructam; & in hac multa clariffimorum ingeniorum monumenta, quibus adhuc typi lucem negaue-

rant. Omnia prorsus vestigia prioris sæculi
abolere decreuerant, vt nouitatem suam im-
putarent antiquitati, aptatòque menda-
cio, fabulosæ origini apud posteritatem il-
luderent. Nihil ab infesto Christianorum
hoste immanius exspectes. Planè vt iam
non sit, vnde succensere Barbaris iure
debeant. Igitur omnia quæ reperiaban-
tur, aut rapta, aut consumpta erant. Aua-
ritiam tamen satiare non poterant. Spar-
sas per agros locupletum domos prædabun-
di irruebant, cultum ecclesiarum abscon-
di simulantes. Quæ res multorum iram,
rixasque prouocauit. Adeò vt quidem ex-
probrarent Ministris, nihil aliud ipsos, quàm
latrocinandi licentiam sub laruâ pietatis
aperire furentibus. Et certè non aberrau-
rant à vero. Et Ministri pudore victi, ad
declinandam inuidiam, aurum omne,
& argentum templorum ædituis iube-
bant restitui sub inuentario; cæteroquin,
vt in furem se animaduersuros. Fuere ta-
men qui abstruderent, & in crucem
sub-

sublati exemplum fecere. Ea res avaritiam cohibuit. At ne simili licentiâ in posterum grassarentur; non dispersi, & palantes ut antea; sed conferti, ac composito ordine iter instituunt. Primi ibant Iconomachi cum bipennibus, cæterisque instrumentis, obuia quæque fana inuadere, & si resisteretur, fores dolabris perrumpere iussi. Ministri duo proximè succedebant, homines nullo studio exercitati. In eam prouinciam ex sutrinâ vel tetrinâ surrexerant. Popolari tamen facundiâ, & miscendis seditiõibus validi apud multitudinem, crebris contumelijs in imagines debacchabantur. Post illos veniebant Diaconi, & seniores; quos immensa sequebatur multitudo armis exulta. Hoc modo Stegram peruentum est. quos Gallicus ibi Minister magno gaudio excepit. Inde Weruicum, & Menimam, & Wastenum, & circumiecta populati; ecce Messenensem abbatiam,

misc-

miserabili vastatione diripiunt. Nec Flandriâ contenti, prætereunt Lysam flumen, & Insulensium aliquot vicos sacrilegio fœdant. Donec omnem iram effunderent in Marquettense monasterium. Hinc Seclinium versi, ab accolis excipiuntur, qui ex finitimis vndique pagis ad tutandam templi religionem armati conuenerant. Multi conomachorum ferro cæsi, alij præcipitati in paludes, obscœnum spiritum in cœno euomere. Ad Rassegemium quoque fama delabebatur, qui mox superuenit cum militibus: Sed aduentum eius subitâ fugâ sectarij præuenerant. Et sic ibi aliquando rabies stetit: vt in Flandriâ rursus atrocius insurgeret, quam non satis habuerant miserrimè semel afflixisse. Vix Normannorum olim tanta fuit vastatio. Quadringenta & amplius templa triduanus furor absumpsit. Nec adhuc tamen oppida pertentaerat. Hoc vnum deerat publicis malis, Manebat ibi adhuc aliqua magistratuum reuerentia: cùm econtra in municipijs, vicisque, & pagis sine metu
licentia

licentia grassaretur. Donec & oppida ad ultimum cessere.

Cæterùm Egmondanus ad primum Iconomachorum tumultum Ipras processit, ut auctoritate nominis sui ciues contineret in pace. Habebat in comitatu Flandrorum præcipuos. His auctoribus edictum promulgat, quo externi in ciuitatem recipi prohibebantur. Salutaris haut dubiè lex: sed absque armis exerceri non poterat. Et interrogantibus Egmondanum magistratibus, num̃ templà tentantibus vim inferrent; contraxit humeros in ceruicem, mandatum sibi non esse respondens. Mox inde se Bruxellam recepit ad concilium. Plerisque multùm iridentibus, quòd aduersùs rebelles, & vim publicam molientes, custos & moderator prouinciæ mandatum requireret. Expectandum illi mandatum fuisse, cùm Grauelingam iuxtà, temerè pugnam ciens, propè in discrimen attulit fortunam publicam. Bonos ergo desperatio cepit. Multi enim haut immeritò suspicabantur ea quæ acciderent.

sponte, vel fraude Procerum euenire. Malis
autem aucta est alacritas. Et ex aliâ parte
gaudebant flagitijs Iconomachi. Nec tam
Ministros, quam prædam sectantes, proxi-
mam quamque ciuitatem rapinæ destinant.
Plures furentibus cottidiè aggregabātur. Cor-
rupta enim erat latius regio, & superstitionis
suæ vindex vnusquisque videri volebat. Ra-
ptim igitur Abbatiam Bellopratensem, haut
procul Ipris, inopino tumultu corripunt:
Inde à sectarijs ex compacto acciti sunt in ci-
uitatem nemini clausam. Vi, & licentiæ le-
ges cesserant. Obstupuere magistratus ad hanc
turbam, & quid âctura esset exspectantes, alie-
nam stultitiam immoti contemplabantur:
Parum videbatur in plebe opis esse. Maior
pars occultis studijs faucebat Iconomachis:
Quibus se obscurissimus quisq; statim appli-
cuit. Itaque cùm nemo obstaret, funestæ pie-
tatis crudelitatem licenter exercent. Ordinem
sceleris non inuenio. Totus tamen dies per
sacrilegia consumptus est. Nec in delubris
amplius restabat, quod polluerent: cùm defer-
tum

tum episcopi palatium, canonicorumque domos vi perfumpunt, & tanquam in captâ vrbe, bonis insultant. Inde tandem digressi, totam illam regionem impunè peragrantes, proximos Franconatus pagos pari audaciâ funestant. Vtèrius progredi metus prohibuit.

Auriacus hætenus Antverpienses tenuerat in tranquillitate, lætissimis auribus accipientes, quæ in Flandriâ acciderant. Quorum successu ad paria scelera animati, sordidissimorum hominum audaciam pretio sollicitant. Et inuenti sunt, qui in diurnum solidorum, decem stipendium locarent operas suas ad flagitium. Encœniorum tempus erat, decimo octauo mensis Augusti. Tradito à maioribus more, totum hunc diem impendere lætitiæ publicæ. Populus ad hilaritatem effusus, vel temulentiâ marcet, vel spectaculis oblectat ingenium. Multi quoque mortales ex proximis vrbibus, pagisque ad solennia confluunt. Magnâ pompâ supplicatio instruitur, quam longa personarum series, in historiam circumducta, exornat.

Ciues armati procedunt, cultu ad magnificentiam exacto. Post eos geminus sacerdotum ordo, in candidâ veste, & dalmaticis. quos B. Mariæ simulachrum sequitur, suppositis sacrificorum humeris sublatum. Peractâ pompâ, non statim cellæ suæ imago redditur. Sed collocatur in testudine templi, & in octauum diem pietatem populi exspectat. Is tum sacrorum ordo fuit. Ciuibus ergo ad spectaculum intentis, fuere qui prætereuntem statuam scurrili cauillo exciperent, clarâ voce obstrepentes, Mariola Fabri (ita enim appellabant à B. Iosepho, qui faber fuerat) hunc honorem tibi inter supremos numerâ. Quibus auditis mussabant inter se catholici. Sed ante alios sacerdotes excanduerunt. Iamque quod euenit, præagientes animo, sacrosanctam statuam vesperscente die cellæ includunt. Forte iuuenes à sectarijs conducti ludebant in templo. Notantésque sibi simulachrum è testudine subductum: vnus aliquis scurrilem captans voluptatem vociferari coepit, num timeret sibi Mariola, quod
tam

tam tempestiuè concessisset in cellam. Per fidem, inquit, si *Viuant Geusij* exclamauerit, vt omnes exaudiant, spondeo innocentem in sede mansuram. Cæterùm pro latere templi lignea cellula erat. in quâ sedebat anus libitina, cereolos vendens, quos supplex muliercularum pietas serrato candelabro in donarium compresso pollice affigere consueuerat. ollam præterea habebat, & in eâ absconditum cineribus ignem, extinctis faculis promittentem lumen. Dum ergo iuuenes petulantius rident, cultumque diuorum infamant contumelijs, quidam ex illis anum accessit; & rogo, inquit, mater, illicet hinc i, rerum tuarum commercium interit. Secundum hanc vocem irata anus, præteritisque verberata contumelijs, in loquentis os ollam excussit. quam effusissimus omnium risus sequebatur. Nec procul ab exitu stabant furiosa consilia; cum in proximo obambulans Prætor, ad rixantium clamorem cum stipulatoribus processit in templum, cunctisque excedere iussis, minacibus verbis ultus est suum

supercilium. Irati iuvenes maiorem nautarum colluuiem accersunt, rursusque in templum armati perueniunt. Psalmos more suo cantare exorsi, iisque peractis, *Vivant Geni*sy vociferari incipiunt. Ad quem sonum, veluti Berecyntiâ tibiâ in furorem vertuntur. Principio quidem lampadem deiiciunt, quæ de tholo suspensa, noctes diesque vigilabat cum lumine. Aras deinde, & imagines prosternunt, & tot sæculorum ornamenta. Horret animus ad memoriam. Multæ antehac hærefes libauerunt pacem Ecclesiæ. Sed animorum possessione contentæ, picturis, cælaturisque pepercere. Hæc vna exoriens, omnium ante se ferocissima, ingenuarum artium monumenta sustulit, ipsisque ingenijs bellum fecit. Centum non amplius erant, qui tantum facinus adorti sunt. Duarum horarum spatium furori indultum. Mox calentes iras ad monasteria transferunt, prælucentibus faculis, quas impijs manibus ecclesijs subtraxerant. Franciscanos resistere ausos, pluribus vulneratis in fugam

con-

coniiciunt. Et nemo postea insanos sufflaminauit. Per omnia templa liberè vagabantur, impetum festinantes, vt ante auroram sacrilegium perficerent. Quidam hæc XIII. cal. acta tradidere. quibus ego quoque accedo. Siquidem Auriaco absente contigisse constat. At ille quidem cum vxore, & Ludouico fratre publicam pompam spectauit, eadèmq; vesperà frequentauit conuiuia. Sed in tantà scriptorum varietate, exacta temporum ratio haberi non potest. Parum refert quando aërum. Omnes consentiunt in historià. Ceterùm Iconomachi scelere audaciores; expertique quàm inultè peccassent, primà statim luce feruntur ad abbatiam S. Bernardi, secundo ferè ab vrbe lapide. Nemo adhuc ex ciuibus audebat armâ opponere, subitæ audaciæ torpore correptis. Consensum vrbis latius metuebāt. Tantū stabant attoniti in liminibus suis, alter alterum quærentes ecquid vidissent. Proiectior dies, nocturnæ tragediæ calamitatem aperuit. Iacebant vndiq; imaginū fragmenta, & maiorem, quàm pro damno speciẽ fecerant.

Erant

Erant qui maiorum donaria, erant qui sua, agnoscerent. Metus deinde inualescere cœpit, ne locupletissimorum ædes Iconomachi corripere. Sed illi S. Bernardo reuersi, rursus se recipiebant in templum B. Mariæ, funditus euersuri, quidquid præteritus furor intactum reliquerat. Itaque ingentem detrahunt crucem, & in eâ pendentem Christi statuam, ad humani mensuram fastigij figuratam. Antonij Helmontij opus erat, cuius nobilissimam artem etiam in reliquijs colimus, atque infra pecuniam voluptas taxauit. Quippe harum rerum pretia, non ex euentuum commodo, sed pro cuiusque voluptate, aut curiositate extenduntur. Sed in eo scelere occupatis, Prætor superuenit; adiutus bonorum studio, quos indignitas sceleris in ultionem acuerat. Nihilque tale expectantes coniecit in vincula, ac paullò post in crucem sustulit. Senatus ius suum expertus, palam edixit, templorum spolia deferrentur in publicum. Idem quoque Ministri iuebant. Qui agrariâ licentiâ iam non

con-

contenti, concionum nouitatem in urbem traduxerant. Eminebat inter eos turbulentus ille Hermannus, è Flandriâ accitus ad concitandos torpentium animos, eâ tempestate facundiâ vberimus. Et ille statim Cathedralē Ecclesiam B. Mariæ concionaturus arripuit, suis eam deberi contendens. ambitione Caluinistarum, numero & furore præstantium, & nunquam satis patientium in secundis consistere. Accidit quidem parua res, memoriâ tamen non indigna. Fortè Ministrorum quidam monasterium S. Claræ concionaturus intrauit. Claudebâtur in eo virgines, quæ ex seuerissimâ disciplinâ sanctissimis moribus vitam instruxerant. Ad conspectum Ministri, omnes quasi fulmine ictæ procidebant in terram, pronisque perseverabant iacere capitibus. cùm ille attonitus, seu propriâ conscientia, seu nouitatem facti stupens, vocem non inuenit. & ab astantibus dicere iussus, cùm semel, iterumque frustra tentasset; pudore correptus monasterium destituit. Sed non cæteri Ministri tam segniter

agebant. Vacuam templorum possessionem
tanquam suam prædam rapientes, catholi-
cæ religionis exercitium vndique excluderant.
Indignum id magistratibus visum. Proposito-
que edicto, sectarios abstinere templis, suamq;
catholicis possessionem restituere iubent. Per-
moti his Ministri, & quanquã suorum perui-
caciæ viribûsq; confiderent, non audebant ta-
men palam contradicere. Videbant se potissi-
mum vapulare sub Iconomachorum inuidiâ,
& præteriti sceleris suspicione vrgeri. Senatum
itaque adire placuit. In curiam admissi tem-
plum sibi concedi postulant ad diuinum offi-
cium. Nihil suâ culpâ factum ab Iconoma-
chis, testabantur. Stimulis religionis actos ef-
se. nec in potestate suâ fuisse pietatis zelum
comprimere. si catholici temperarent ab in-
iuriâ, in potestate se magistratus futuros. Se-
natus in hoc rerum articulo dissimulandum
sibi ratus, benignè respondit. Non esse in po-
testate suâ de tantâ re statuere Auriaco absen-
te. gratiam futuram quam ille dixisset. Post
pauculos dies reditum promittere. Æquum
inte-

interim esse, pristino cultui delubra restitui. Hac spe deiecti, omnem tamen fiduciam in Auriaco reponebant. Excessurósque se templis denunciant.

Sed non ideò reliquæ vrbes quietem fouere. Siluæduceses eodem tempore haut absimiliter in templa sæuierunt. Inde latè, & passim per omnem Campiniã, nec per vices, sed simul & vno quasi impetu diffusum est incendium. Brædæ, & Bergæ - ad - Zomam ad lassitudinem spoliata sunt templa. Lirani ad Iconomachorum propinquantium famam, subductis imaginibus, in vacua delubra furentes admisere.

Aldenarda vt prima inter Orientalis Flandriæ ciuitates cõcionandi licentiam in publicum extulerat, ita quoque prima nefarias manus sacrilegio polluit. Nouem Iconomachi intrauerant urbem, à Bacquerelio quodam mercatore cõducti. Tantillus hic numerus sceleratæ pietatis ducatum præbuit, populúmque traduxit in partes. Cuius rabies nõ ante finem accepit, quam deesset in templis quod profanarent.

Gandauenses ex aliâ parte, alieni furoris successum speculabantur. Satisque constabat, non quieturam multitudinem, si vel propius se admouisset Iconomachorum agmen, vel imparatam urbem sectarij aspicerent. Multa furoris indicia eruperant. Magistratus, ut par erat, anxius, ex aduerso struebat consilia. Optimates omnes cum tribunis plebis vocat in curiam, sciscitaturus, quâ potissimum ratione Iconomachorum furias à se auerterent. Non vanâ se coniecturâ augurari, mox in procinctu futuros. Militare præsidium accersendum esse, aut si sua ipsi tueri mallent, solemni sacramento obstringendam esse ciuitatem in Iconomachorum perniciem. Optimates professi sunt futuros se in potestate magistratus. Idem factum à tribunis. Nam & hi ex Optimatum numero eligi consueuerant, ex quo Carolus Cæsar rempublicam à populo ad primores transfulerat. Dato igitur Sacramento, iussi sunt tribuni legē iurisiurandi deferre ad multitudinem. Sed hîc animi in diuersa trahebantur.

Incla-

Inclamantibus passim & vndique sectarijs, saluâ pietate sacramentum dari non posse. Existimare se, Iconomachos iure facere. Neque vnquam effecturum magistratum, vt vim inferant pietatem colentibus. Summa itaque turbatio fuit, neutris inuicem cedentibus, & quibus pristinæ religionis affectus inerat, & quibus odium. Paudi interim sacerdotes ornamenta templorum, & quidquid sacrum sanctumq; transferebant in arcem. Priuatis quoque gentilia donaria efferre permissum. Silebant tristi iustitio fora & leges. Silebant cæremoniæ & sacrificia. Ne prouinciale quidem Concilium solita munia vsurpabat. Captam esse urbem diceres. Paudis cæteris, & quò tandem res euasura, esset expectantibus, Sectarij quod prauâ mente conceperant, perficere constituunt. Nec ultra metus aut contatio; quia timeri se conspexerant. Itaque XI. cal. Septemb. sordidissima multitudo in globum collecta, Ioanem & Læuinum Ongena cum Claudio Goetghebure dimittit ad prætorem, denunciare iussos,

mandatum sibi à Proceribus imaginum excidium, cæterarum vrbium exemplo: si nemo obfisteret sine noxâ fore: sin arma opponerentur vi acturos. Proinde si tranquillitati publicæ consultum vellet, lictores sibi aliquot statueret in custodiam. Obtorpuit ille ad hanc vocem, irâmque multitudinis irritare veritus, satellites præsidio ire iussit, sub publicâ auctoritate licentiùs grassaturis. Propter Templariorum sanum ingens stabat manus, facinori parata, & responsum opperens. Claues templi exigentibus, visis lictoribus ædituus fores aperuit. Quadringenti omnino erant, qui mercenario opere destituto ex omni parte affluerant. fæx & purgamentum ciuitatis, in hanc amentiam à sectarijs subornatum, ne quid sacrum oculis occurreret.

Ex his triginta in aras, imaginésque sæuiebant; cæteri cum iustis armis ad defensionem confederant. Inde ad Augustinianos, ad Carmelitas, postea Dominicanos calentes iras trans-

transferunt. Augescente licentiâ, egentissimus quisque ex plebe ad prædam confluebat, nullóque obsistente irrumpebat monasteria. Sacerdotes, & religiosi secesserant in tutum. Penum ac cætera prædæ exposuerant. Magistratus torpore pavidus, finem malorum opperiebatur. Et dum boni timent, pessimus quisque impune furebat. Iam non vno agmine: sed in partes distracti, alij Nigrarum monialium, alij Agnetensium, plures sancti Michaëlis fana deuastant. Quippe Sanctæ Pharaildis delubrum in transitu contaminauerant. Post hæc rursus in vnum conueniunt; iunctoque agmine Carthusianos aggrediuntur. Quippe eâ tempestate extra muros ciuitatis in vico Royghemio domicilium constituerant. Hinc regressi Beginas, Xenodochium, Ackerghemium, Deinsam, Bylocam, Gallilæam, Goenenbrillam corripunt. Ac tum demum in cathedralem ecclesiam Sancti Bauonis, feruentes sacrilegio manus intemperanter inferunt.

Intem-

Intempeſta nox erat, & reſtabat adhuc quod polluerent. Correptis igitur faculis, ad ſancti Nicolai, ſanctique Iacobi templa decurrunt. & inde mox in ſancti Petri abbatiam, monachorum fugâ deſtitutam. Multa ibi nefanda fecerant: Franciſcani tamen vt omnium vltimi, ita extremâ rabie afflicti fuere. Quibus rebus ſenatus permotus, poſtridie rurfus Optimates, cum tribunis plebis ad ſe accerſit. Quippe ciuitatem à violentiâ diutius tueri non poterat inermi conſilio. & atrociora ſectarij minabantur, afflictuſque ſe diuitum domos, iuſtitiam & tribunalia euerſuros. Prætor quantum militum ſubitis delectibus poſſet, iuſſus eſt conſcribere, fora quoque & vicos vigilijs inſidere, tutiſque præſidijs firmare monaſteria. Quatuor duces manipulis præpoſiti, Franciſcus Wychuiſe, Antonius Stopelare, Franciſcus Paſcharis, & Arnoldus Boeſſius. Edictum extraneis vrbe cederent. Cruces in foro ad terrorem eriguntur, denunciata morte ſanctitatem templorum violare

lare audentibus. Sed iam Iconomachi portis exceſſerant. Per pagos vicósque liberrimè vagabantur. Non enim habebant qui furori eorum auderet intercedere. Nec iam dubitabant oppidis quoque vim inferre, multitudinis conſcientiâ freti. Sed magiſtratibus ad prouidendum tempus dederant. Aloſti, Teneramondæ, Cortraci à cuſtodibus excluduntur. Claſas quoque portas Brugis inueniunt. Multi quidem in eâ ciuitate nouitatibus capiebantur: bonorum tamen numerus præualuit. Et miles nuper conſcriptus, obſequium fidémque colebat.

ix. cal. Septem. Valencenenſes peruertuntur, aliquantò ſerius, quàm pro ciuium ingenijs. Noircarmius, vti diximus, huic vrbi præfectus erat, egregiâ in regem fide & obſequio clariffimus. Ad primam erumpentium concionum famam Valencenas properauit. Sed cùm ſine armorum metu, ciues in officio continere non poſſet, Bruxellam feſtinat ad corroganda auxilia. Interim Miniſtri ſupercilioſâ auctoritate plebem exſtimulant in,

Iconomachiam. Turpe sibi credentes facinus differe, cuius ipsi alijs auctores fuerant. Licentiâ à paucis orta, plures attraxit. Nullo Optimatum obsistere auso, fores templi B: Mariæ hortantibus Ministris vi perfringunt. Inde Beginasium, & S. Gaugerici, ac cætera, fana pari furore corripunt.

Eadē die Tornacēses ex composito paria incipiunt. Initiū cœpit ab obscurissimis hominibus, quos ex agricolis Ministri promisso stipendio ad piaculū conduxerant. Ea enim tū maximè ars placebat, quia semel, iterumque feliciter cesserat. Miscellanea plebs mirâ densitate coniungitur intransantibus. alios stimula-
bat cupido prædæ, plures conscientia sua & religionis odium, omnes tamen pari animo in furorem surgebant. Milites aliquot in statione locati erant, qui sacramentum Regis acceperant. Eos prætor ciuitatis ingressis Iconomachis volebat obijcere. Sed ad stringendum ferrum compelli non poterant; haut aliâ lege conscriptos se causantes, quàm vt ciuitatem à populatione, tuerentur. Sed à secta-
rijs

rijs pecuniâ corrupti erant in paratu facinoris. Vnde enim Iconomachis tanta fiducia, vt manipulis ipsis inspectantibus tam licenter sæuissent in templa ? & non vindices timerent, quos in se potissimum conscriptos cognouerant ? Delubrum B. Mariæ primus graffantiū impetus contaminauit. Rapta & fracta sunt omnia, quibus auaritia, & vis pares esse poterant. Tum denique viscera terræ scrutari incipiūt. Quippe canonici impendentē tempestatem prospicientes, aurum omne, atq; argentum, & opulenta signa, cum pretiosissimo cultu humi defoderant. Et hoc ipsum, nescio quo prodente ad sectariorum aures allapsus erat. Forte accidit, vt Adolphi Geldriæ ducis sepulchrum perfringerent, eruentes è conditorio cadauer, quod per tot annos, in hunc diem illibatum seruauerat vnguentorum suauitas. Itaque tanquam non satis pœnarum viuus pependisset, reliquijs eius per ludibrium insultant ; indignum humo clamantes, qui violare eum sustinuisset, per quem in humum venerat. Ille quidem per summum nefas scele-

ratas olim manus patri iniecerat. egerátque se auctorem facinoris, cuius ipse in alios vindex esse debuerat. tantóque immanius facinus visum, quòd nullâ aliâ causâ extimularetur, quàm vt sceptrum, quod exspectare debebat, seni eriperet. Ergo vt insignia maiestatis viuenti extorqueret, prope parricida extiterat. Inualidum quippe senem, & vix firmantem vestigia, per aliquot milliaria, nudis pedibus in carcerem protraxerat. Posthæc ab eodem exhæredatus, cùm succedere tentasset, Carolus Burgundiæ dux pari supplicio iuuenem affecit, multósque annos, diris vindictam exigentibus, in custodiâ habuit. Cæterùm Carolo sublato, à tumultuantibus Gandauensibus dux constitutus, aciéque victus, ac cæsus, Tornacensibus humanus traditus fuerat. Daturus exemplum posteritati, nunquam satis idoneo supplicio expiari parricidia. Interea, Tornacenses diebus aliquot per scelus exactis Valencenensibus sociantur; iunctóque agmine circumiectos pagos pari immanitate vastant

vastant. Vrbs Orciacum in proximo erat. Adoriri hanc constituunt improuiso facinore. Sed Rassegemius, inductis in eam agricolis, tutam reddiderat. Oppugnare non ausi, iter flectunt, & S. Amandi, Marchiani, & Hasnonij abbatias corripunt. Vicognij præterea speciosam bibliothecam flammis consumunt, quam multis sæculis cumulauerant monachi, & vt in illâ ætate memorabilem fecerant. Et sic ibant vltorius, Aquicinctensem abbatiam vastaturi. Sed ibi eos Robertus Longeuallius Dominus de Tour, & Fridericus Guyonius territorij prætor armati exspectant. Ingentem circa se habebant agricolarum manum, ex proximis vicis pagisque collectam. Multâ cum strage in sectarios inuecti, diuersis itineribus dissipatos interficiunt.

Nec cessatum est in Hollandiâ. Sed piget curiosius inquirere in tot facinora. Brederodius turbulentiâ ingenij apud plebem validus, Amsterdameses, & Viannenses facile concitauit. Quorum audaciam Vltraie-

ctini statim, & Lugdunenses imitati sunt. Prouincialis concilij reuerentia Haghenſes aliquamdiu in modeltiâ continuuit Iconomachis ad extremum vulgantibus, mandatum ſibi à Proceribus templorum excidium, permiſſi ſunt inſaniæ ſux; quia reprimi amplius non poterant. Delfenſes ſacro cultu, & imaginibus ſubductis, nuda altaria furentibus expoſuere. Induſtria conſulum Dor-dracēſes & Goudanos à furore cohibuit. Harlemū, Rotterdamū, & Gorcomiū neſcio ſanè quâ felicitate, fatalem illam ſtragem euafere.

Nutantem Friſiam Arenbergius acerrimè cohibebat. Sectarij tamen contineri non poterant; arte & impulſu Coniuratorum, res nouas vndique molientium. Leewardæ igitur, & Groeningæ ira multitudinis in ſacra incubuit.

Geldria penè tota pro religione ſtetit, Megemi ſollicitudine. Nec deerat Culēburgius, mobiliffimum quemq; Neomagi tentādo. Cæterum magiſtratus conatibus eius prudēter occurrit, urbē excubijs firmans, & exulare iuſſis, quoscumq; nouitatibus deditos perceperat.

At Zeelandi haut tardè descivere, initio à Vlissingēsisibus, & Campuērensisibus orto. Cum Optimates cum episcopo haut segniter Mid-
delburgi resisterent, valentiorum impetu ad
vltimum succubere.

In reliquis prouincijs nihil irarum. Bono-
rum numerus malitiam supplantauerat. Ca-
meraci quidam Ioannes Clericus ad confесси-
onem Augustanam prouocare ausus multitu-
dinem, stultissimam vecordiā capite expiauit.

Horum omnium ignara adhuc fere Guber-
trix, securè contrahebat Proceres in concili-
um, quod fortè tunc solemne condixerat.
Venere ergo in curiam Auriacus, Egmonda-
nus, Mansueldius, Hornanus, Arenbergius,
Hoochstratanus, Barlaimontius Hachicour-
tius, Noircarmius, Viglius, Bruxellius, & Affo-
nuillius. Recitatae sunt sedentibus epistolae,
prid. calend. präteritas à Rege missae. Ad-
duntur his mandata, quae Bergensis & Mon-
tignæus in Hispaniam detulerant. Crebri-
or sententia fuit; *Transactum esse utcum-
que de conditionibus, quas exegissent Con-
iurati. Inquisitionem quippe sublatam esse.*

Quid

Quid de legibus Rex censeat, ex eo satis intelligi, quod ad examen Concilij Status revocari iusserit. Arbitrium eius expectari de Generalium Ordinum comitijs. Hac priori libello dequestos esse Coniuratos. Posterioribus codicillis cautionem securitatis postulasse. Nec eâ in re difficilem se prabuisse Regem. nisi quod intra paucas condiciones esse voluerit, qua nihil pertinerent ad Coniuratos. Eos itaque primo quoque tempore securos reddi oportere, ut resoluant fœdus, sub cuius fiducia populus tam perniciose inciperet. Cæterum de formulâ cautionis aliquantisper variatum in senatu. Quidam enim diploma abolitionis tradendum censebant. Sed paucorum assensu audita est hæc sententia. Abolitionem enim non concedi peccasse se negantibus. Gubernatrix quoque suffragium his adiecit, iussitque Auriacum, Egmondanum, Hornanum, & Assonuillium in quem putarent modum, cautionis tabulas concipere. A Proceribus deinde remedium quærere cœpit in
præ-

præsentium turbarum incendia. Tum quidam ex his diutiùs non pressere studia sua. *Sectarijs aliquid indulgendum, dicebant. inclinatham rem aliter sisti non posse. Validissimas ciuitates nouitatibus accessisse. E tranquillitate futurum, si sacrorum suorum cultum his permitteret. Gubernatrix tantum se facinus negabat facturam. Quis desnde, inquit, in officio mansurus est, si hanc semel licentiam aperuero? An non alie statim ciuitates eruptura sunt in eandem insaniam?* Ad hæc renidens Auriacus, facies, ait, *Domina, quod placebit. Aptiorem tamen medicinam non inuenies. Hæc nobis remedia maiorum prudentia descripsit. Atque ut optima esse credamus, præteritorum sæculorum tranquillitas experta est. Hac arte Græci pacem tutati sunt, inter tot religionum discrimina. Hi mores Turcas continent, Germanos, Polonosque tranquillat. Nisi forte mauis inter se collidi prouincias, funditusque euertere quidquid præteritus furor reliquum fecit. Vides quantis viribus sectarij succincti sint.* Du-

centa armatorum millia in nos promittunt.
Quorum numerum, ut de industriâ augeant
multi, magnum tamen vel ex mendacio esse
coniçio. Tutiùs igitur est exarmatos illos
relinquere infante sue; quàm ut contumaciâ
accensi, atque omnia polluentes, dissensione
populi abutantur ad tumultus, ac mutandi
status occasionem arripiant, tradituri se re-
gendos externis principibus. Dirigit Gu-
bernatrix ad has voces. Ingentique suspirio
pectus concutiens, dimisit vultus in ter-
ram cogitabundæ similis; receptoque ani-
mo, quomodo, ait, tantum admittam placu-
lum? Egon' hisce oculis irreligionem aspiciam;
contempto Regis mei imperio? Si satis ita
videbitur, extingui malo in innocentia meâ,
& innoxium cælo transcribere spiritum, quàm
tanto dedecore famam polluere. Simul his, ira-
tæ similis, recepit se in cubiculum. Erat sa-
nè magnanima mulier, & in contubernio
amitæ Margaretæ Hongariæ reginæ, ad prin-
cipales curas nutrita, virili constantiâ vitia
sexus prorsus exuerat. Proceribus inui-
cem

cem se intuentibus, concilium dissoluitur.

Horum omnium Coniurati non ignari, infaniora præteritis agitare incipiunt. Mittunt igitur ad Iconomachos, qui iuberent eos accepto signo splendidissima quæque pervertere Monasteria, ac deinde simul ex omni parte in regiam versus iter dirigere. Interim Gandauensium, Tornacensium, & Valencenensium, aliorumque facinora crebri nunciij in aulam detulerant. Et in illo rerum articulo perplexæ Gubernatrici, Iconomachi tandem appropinquare traduntur. Hoc fulmine non mediocriter percussa, cogitationem altius mittere cœpit, quò euasura tandem esset tempestas, ex omni parte in caput suum promissa. Ingens vis hominum erat, ex diuersis regionibus ad se tendentium. Flandri Affelghemiensem, Siluæducenses Tongerlonsem abbatias quieti circumfedeabant, expectantes irrupendi signum, quod ni libertas religionis indulgeretur, daturos se Coniurati promiserant. Cum Antverpienses econtrà, dispersi per monasteria & pagos, fœdis rapinis,

incendiisq; grassarentur. Primâ luce Mech-
liniam ex improviso adorti, mixtâ sibi op-
pidanorum colluie, Franciscanos & Car-
melitas exspoliant. peractoque scelere, Vil-
uordiam se proripiunt. Aduentus tumultu-
antium latè terrorem dedit. Passim enim ia-
ctabant, postridie se Bruxellam, atque in ip-
sam adeò regiam agmen moturos, ad paria
facinora. Inops consilij Gubernatrix, iam-
que magis magisque malorum vndique
urgentium imagine concussa, cùm alij super
alios nuncij vera falsis miscētes, & tristiora
omnia referrent: Viglium ad se accersit. Con-
suetudinem illius iampridem intermiserat;
offendere Proceres verita, quibus ille fastidi-
tus erat, ob virtutem & constantiam impro-
bitati inimicâ. Metus suos strictim adueni-
enti exposuit, & quid ad hæc sibi faciendum,
ne differret expromere. *Plus*, reponit Vig-
lius, *duo anni sunt, ex quo scire potuisti, quò*
furiosa & occulta quorundam Procerum con-
silia vergerent. Sub quorum inuidiâ potissi-
mum vapulaui. quia liberiùs quàm expedie-
bat

*bat mihi locutus sum, quæ pertinere crede-
bam ad obsequium Regis, ad integritatem
religionis, & salutem publicam. Sed aures
tuæ malignis insidijs assuetæ, uni mihi ita
semper clausæ fuere, ut nihil nisi læsurum
admitterent. Illa quidem peccasse se fateba-
tur, amicitia specie deceptam; In eo tamen
articulo stare res suas, ut quærendum po-
tius esset, non quid facere debuerit, sed quid
facere debeat. Tum Viglius, an mandata
Regis exequi haberet in animo, interrogat.
Cum paratam se respondisset. *Vade ergo, in-
quit, & eandem legem propone Proceribus,
à quibus exiges fidelitatis Sacramentum. His
qui obsequium contumacia preponent, prote-
nus te adiunge. scriptoque milite, custodiam
corporis tui delectis attribue. Multi in partes
tuas haut dubie abscedent, ubi te obstina-
tatem viderint. Satis virium in his tibi.
Contumaces tamen ita non deuovebis, ut con-
tumeliosè haberi se putent. Arte nempe est
opus. Et potissimum dominantium arcanum,
dissimulationem usurpa. Blanditijs verborum**

*excultos sic fove, tanquam aliquando redi-
turi sint ad officium. Nam si pati non po-
tes ut suspectos se non sentiant, despectam
dignitatem aperies iniurijs. Non dubitavit
Gubernatrix confestim exequi virile consi-
lium. habitóque senatu eandem condicio-
nem Proceribus proponit. Mansveldius, A-
renbergius, Barlaimontius, & Noircarmius,
sine cunctatione sacramentum accipiunt.
Egmondanus paullisper dubitavit, Auriacus,
& Hornanus pertinaciter abnuere. Super-
uacuum dictitantes iuramentum dicere,
quod in Gubernaculorum auspicijs, & sæ-
pe antea aduocassent. Suos quemque mo-
res continere, nullâ religione constringi
perfidiam. De cætero præfecturam ciuita-
tis Bruxellensis Mansveldius accepit, mille
octingentos pedites legere iussus. Oppidani
mercedem in mille promiserant. Trecenti
ecclesiasticorum stipendio meritori erant.
Reliquis sufficiebat ærarium publicum. Præ-
fecturæ militares distributæ sunt in promptis-
simos. Inter quos Philippum Launoium,
Beau-*

Beauuofij dominum, Balduinum Gaurium
Inchij dominum, & D. Estanburgium comi-
tis Lignij fratrem eminuiffe comperio.

Forte per eos dies Arschotanus Bruxellani
venit. In itinere B. Mariæ Hallenfi votum ex-
oluit. Sed vt ostēderet, quantâ fiduciâ sperne-
ret sectarios, ministrorū omniū capitis tegmen
B. Mariæ imagunculis instruxit; atque in eo
habitu spectandū se Bruxellensibus exhibuit.
Cæterū is Gubernatrici magnopere suade-
bat, vt desertâ Bruxellâ, Hannoniâ peteret, ca-
put suum subductura periculis; quoad subsi-
disset tempestas furoris popularis, ac propitio-
ra fata regressum promitterent. Sed hoc con-
siliū Gubernatrici magis, quàm Viglio pla-
cuit. Cumque audiuiſſet de fugâ eam cogita-
re, obnixè rogare cœpit; *ne rebellibus regiam
proderet. Quis enim, inquit, deinde pro aris
arma sumpturus est, si fugere ipsa perseveraue-
ris, tuo metu ceteros pramonitura, quid me-
tuendum sit à sectarijs, haut dubiè erecturis
altius supercilium. ? Dignitatis tue presen-
tiâ hic est opus. Aliter ciuitas contineri non
potest*

*potest. Quid enim times? Nemo Procerum, nemo nobilium, ex saniori populi parte nemo, ubi periclitari te aspexerit, auxilium non expediet, salutemque suam tua non preponet; quos omnes pari metu fugitiua percelles, & ad resistendum ignauos efficies. Tanto in bellis momento est prasens maiestas, pro qua gloriosum sibi quisque ducit occumbere. Iterum, atque iterum cogita, quam magnum Regionum ministrorum numerum desertura sis, quorum nemo sequetur fugitiuam. Vt cumq; igitur ipsa euadas incolumis, ex maxima tuorum parte perire hic incipies. tot fidelissimos viros tractura in ruinam, opperi paratos quidquid fortuna decreuerit. Haut segniter has voces accepit Gubernatrix. Vicerat pudor contemplationem periculi. Iamque prorsus damnauerat abeundi consilia: cum Auriacus denunciat ei, Iconomachos admouisse propius agmen, omnesque omnino monachos & sacerdotes, cum ministris Regijs statuisset conficere. Idem mox Egmondanus, & Hornanus diuersi alius ab alio, detulere in
regi-*

regiam. Seu vera hæc erant, seu ad concitandum terrorem efficta, non dubitavit tamen Gubernatrix pro compertis accipere. Itaque consilium fugæ, quod paullò ante constantissimè abiecerat, rursus reuocavit, ingenti consternatione perculsa. Purpuratos quoque in sequentem diem adesse iubet, discedenti sibi præsidium. Præparatisque omnibus, ad soporem momentaneum processit in conclaue. Sed nec somnum capere, nec quietem pati poterat, tot simul cogitationibus obuersantibus animo. Luce primâ Viglius superuenit; & quò tam subito properaret, interrogat. Tum Gubernatrix præsentem metus effata, & quæ manentibus instarent pericula; *prudenter quoque facturum*, dixit, *si fugam simul adornaret in Hannoniam, depulsurus à iugulo certissimam perniciem. Parum se distare à captiuitate. Nihil mitius sperandum à furentibus, quàm insignem aliquam contumeliam, aut mortem. Non esse opus caput ruine offerre, cum Hannonia pateat, exceptura ipsos, tutissimo ho-*

spitio. Viglius conuenientem præfenti rei sententiam orsus, longâ oratione deterrere rursus eam caput ab intempestiuâ fugâ; hortando, monendo, refutando rumores, castigando formidinem. Et ob id prolixiori sermoni indulgebat, quia interim adfuturos sperabat. Proceres, quos eandem opinionem fouere didicerat. Nec mora, Mansveldius, & Noircarmius superuenere. Quorum tum operâ potissimum utebatur Gubernatrix, suspectis ijs, quos nouitatibus oblectari cognouerat. Illi bonum animum habere eam iubebant, identidem commemorantes; *ne fidiſſimos, & de Rege optimè meritos Ministros desereret. Fortioribus consilijs obfirmaret animum. Superesse vires aduersus inconditum vulgus, nullo duce, nullâ disciplinâ ad bellum, tanquam ad prædam ruens. Ausuros se tentaturosque extremam pro salute illius. Fortunam & Deum adfore conatibus, meliorem causam tutantibus. Nec suasuros hac fuisse, si crederent, caput eius obiectari discrimini, aut victoriam in lubrico consistere.* Dum hi loquuntur interim Viglio
spati-

spatium fuit, quo dimitteret ad magistratus, qui egressu ciuitatis aulicis interdicerent. Quorum imperio statim clausæ sunt portæ, firmatæque vigilijs. Multum diei processerat, Proceresque passim coibant in curiam, solemni officio. Sed impedimenta quæ præcesserant ante portas cohibebantur. Et hoc ipsum præfecti mulionum renuntiaturi accesserant. Tum Viglius, *vides, inquit, impositam tibi manendi necessitatem? Necdum intelligis quantum in te unâ momenti ciuibus sit?* His Viglij verbis, magistratus (nam & ipsos simul in conspectum admiserat) adiiciunt, spondere se milites quos promiserant, mox in promptu fore. Ciuitatem quoque Regijs partibus se applicituram. Egregiam sanè gloriam eo die Viglius tulit seruatæ reipublicæ; laxante paullatim animum Gubernatrice fortioribus consilijs, quæ ex omni parte congerebant purpuratorum fidissimi. Et vergens ad meridiem dies itineri non sufficiebat. Proceres itaque à prandio in concilium venire iussit. Actum ibi de pace; cum iidem illi

fugæ auctores, libertate opus esse rursus clamabant. Non quòd constaret profuturam in sincera remedia; sed quia pro tempore aptiora non succurrerent. Optimis quibusque iam non aduersantibus, & Auriaco potissimum urgente; *ne perseveraret obstinatâ religionis defensione religionem perdere. Multos dum pondere, quo grauantur, flecti nolunt, frangi. Temporariâ aliquâ indulgentiâ opus esse, ad auertendam malignitatem fortune, quando aliter mitigari non posset. Neque ipsum Regem, si inermis hic sit, aliam medendi ratione usurum. Quacumque tandem condicione perniciem publicam honestè redimi. Per aqua, per iniqua cedendum esse necessitati, quæ staret ante rationem, cui prudentia succumberet, & consilia omnia obsequerentur.* Cùm eadem Hornanus, & similia cæteri confusis vocibus iactarent; victa consensu Gubernatrix, multumque obtestans; *ite ergo, inquit, quandoquidem sic videtur, nunciate Coniuratis, si posuerint arma sectarum, eos qui inermes, sine confusione,*

Es' scandalo, illò ubi nunc agitentur, ad conciones procederent, non me vi armatà, aut viâ facti persequendos curaturam: quoad Rex aliter statuerit ex Generalium Ordinum consilio. Hac tamen lege, ne molesti sint Romanam religionem exercentibus, vsumque templorum Catholicis restituant.

Perplexa haut dubiè oratio erat, nec dantis, nec negantis libertatem; non mansuram tamen, quia saluo principatu concedi non poterat. Facile Coniurati quid vellent, intellexerunt. Sed verba eius in alium sensum detorquendo, sacrorum se licentiam adeptos imposuere credulo populo. Confestim igitur Affelgemium, Viluordiam, & Tongerloam dimittunt, qui iuberent inde mouere Iconomachos, atque suas quemque domos sine noxâ recedere. Post hæc Proceres illi, quos ante ad hoc officium destinatos dixi, in colloquium veniunt cum Coniuratis, tabulâque à Gubernatrice obtulere in hæc verba:

Cum supplices nobiles XIII. cal. Septemb. ad

Gubernatricem redire iussi fuerint, libello responsa daturam: commodum ex Hispaniâ nuncius appulit cum codicillis, rata omnia facientibus quæ exegerat. Quippe Rex Inquisitionem abrogari, atque edicta refingi non recusat. Generalium Ordinum conuentum tantummodo distulit. Ad quem maturandum omnem ipsa operam datura sit. Supplicibus interea cauere non detrectat, quia nihil unquam antiquius habuit, quàm scrupulum & diffidentiam eximere ingenijs eorum, qui tristioribus consilijs imbutum esse Regem existimant. Causam & occasionem malorum omnium. Ex eo quò hinc ille recessit, nullum prætermisit beneuolentia signum erga subditos. Ab ingentis clementiâ, animiq; bonitate nõ degenerauit. cùm nihil ab animo eius sit alienius quàm iracundia. Itaq; præteritarum rerum gratiam lubens fecit, & in hanc rem configmandarum tabularum Gubernatrici plenum dedit arbitrium. Cùm itaq; hoc ipsum exequi ipsa in animo habeat: à supplicibus vicissim promissorum fidem postulat; nempe ut solemni
sac-

*sanciant sacramento, non facturos se dolo malo, neq; etiam machinatu-
ros, quod Maiestati Re-
gie, quod statui publico, quod prouincijs, aut
subditis aduersetur. Officium fastigijs debitum
se culturos. Manumq; commodatu-
ros, ut tu-
multus sedentur; ut intrà frenum cohibea-
tur insurgentis populi licentia; ut multitudo
deinceps extrà leges non exeret; ut cesset
templorum monasteriorumq; vastatio, & sa-
cilegia; ut tam abominandi sceleris auctores
meritò ultione plectantur; ne vis fiat ecclesia-
sticis, iustitiæ ministris, aut nobilibus, aut sub-
ditis; arma confestim ponantur; ab insolitis
regionibus conciones arceantur; atq; hæ, sicu-
bi iam sint, aut factæ fuerint, ut inermes, si-
ne turba, & scandalo frequententur; ut ex-
ternos hostes & seditiones excludant; ut hi
denique, quos hodierni sæculi nouitas turba-
uit, patienter leges accipiant, quas ex con-
silio Generalium Ordinum decreturus est
Rex. Actum Bruxella x. cal. Septemb. sig-
natum. Margareta.*

Lectis condicionibus nihil eorum displicuit

cuit Coniuratis, nisi quòd catholicam religionem profiteri iuberentur. Nam hoc ipsum quoque legibus adscriptum fuerat. Et plerique eorum noui dogmatis disciplinam imbibérant. Dato itaque solemnī sacramento, Affonuillius diploma cautionis exigentibus, porrexit, in hunc modum.

Margareta, diuinā gratiā, dux Parma, & Placentia, Gubernatrix Belgarum, hasce litteras inspecturis, S. D. Cū nonis Aprilis prateritis, libellus nobis oblatuſ sit à non paucis nobilibus, Inquisitionem & ediſta abrogari, & secundū Generalium Ordinum concilium nouas leges constitui postulantibus; digna res uisa, quam transmitteremus ad Regem: sed ne supplices interim sinistris suspitionibus urgerentur, eundem libellum, & compactum, & quæ deinde secuta, in peiorem partem accipi: unde timeri poterant grauiora prateritis: consultis Proceribus, transcripsimus Regi, ut cauere uellet supplicibus, quidquid ante hunc diem factum esset, fraudi non fore. Sed cū in illo morā non fuerit;
Nos

Nos de pace, & tranquillitate solliciti, nihil prius duximus, quàm eosdem supplices obsequio reddere, cui ex naturâ, & sacramento obstricti sunt. Pro auctoritate, & mandato quod à Rege accepimus, pro dignitate, quam gerimus, rogatis Procerum sententijs, cautionis tabellas, manu nostrâ signatas indulgimus in hanc sententiam. Formula deinde quam paullò ante transcripsimus inserta erat. Sequebantur autem hæc verba. Sciri volumus, nos pro facultate à Rege acceptâ polliceri, libellum & compactum, & quidquid in hunc diem factum est, nemini eorum fraudi fore, secundum sacramentum nobis dictum, ad præscriptam formulam. Mandamus itaque Gubernatoribus, equitibus Velleris, Consiliarijs Status, Præsidique ac Concilio Priuata curiæ, cunctisque in officio constitutis, uti hanc eis cautionem inuolatam seruent, nec quid in contrarium fieri curent, patianturque. Quippe ita Regi placet. Bruxella VIII. calend. Septemb. MDCXVI.

Post hæc coniurati quoque solemnibus tabulis testabantur, pactis se conuentis staturos; intercessurósque ne contra fieret fædus denique ratum fore, quamdiu fidem datam Rex seruauerit. Sic ergo utcumque conciliati sunt animi. Multum irridentibus prudentioribus, quòd sponfionem à principe subditi exigerent. Quasi verò defuturi sint prætextus Regibus, iniuriæ suæ parentare uolentibus? Bonos ciues obedientia commendat, malos nulla cautio, nullum Sacramentum securos facit. Regnandi lex iugum omne excutit, quod cum summi imperij nomine non conuenit. Conuentiones & pacta priuatos obligant. Nullum tantum est sacramentum, cui salus publica astringitur. Post hæc Coniurati in curiam veniunt. Nec infesto Gubernatricis vultu excepti sunt. Promissorum fidem iterantes, necessitatem cautionis excusabant. Illa quidē memoriam omnem præteritorum delere eos iussit, cancellarique tabulas fœderis. Sed hoc vltimum non impetrauit. Proceres itaque dimisit per prouincias

uincias ad publicandam pacem, motusque sedandos, & subigendos eos qui auersarentur imperium. Denique ut terrorem seditiosis incuteret, extemplò edicit; *ne conciones frequentarentur ab armatis. Ut vis fieret templa vastantibus. Qui occideret eos, iure factorum, premiùmque accepturum, tanquam publica tranquillitatis ultorem. Qui non prohibuisset, aut restitisset iniuria, cum facere posset, eum se pro hoste habituram. priuilegia adempturam ciuitatibus in facinora consentientibus.*

Tunc sectarij paullò ante sæui, subitò metu obtorpuere. Nullâ ferè spe reliquâ in Coniuratis, quos pro defensione catholicæ religionis execrationibus videbant obstrictos. Quippe Coniurati, Inquisitionis edictorumque abolitione contenti, sacrorum licentiam communi consensu non exegerant. Multi ex his bonâ fide redibant ad officium. Singuli aut plures in contumacissimas quasque ciuitates delegabantur, qui continerent populum in pace, & promissorum fidē exolue-

rent. E quibus Ioannes Casenbróotius Backerselij Dominus, Martinum vander Moten, & Ioannem Winghenē, alterum Rotnaci, hunc Aldenardæ cuncta turbantes, animosè cōpescuit. Oeconomus is erat Egmondani, vir cæteroqui rectus, sed infelicitate temporum ad coniuratos abstractus, fidem postea Gubernatrici sincerè exhibuit, & Iconomachorum res primus afflixit. Paullò enim post quadraginta circiter sacrilegi Rotnacensium finibus egressi, ad solitas furias accingebantur. Egmondanus ad persequendos eos Backerselium dimisit cum turmâ equitum, agricolis aliquot armatis sequi iussis. Sed Iconomachi extra Flandriam processerant. Angiam Hannoniæ oppidum adorti, adulterato Gubernatricis diplomate ab ignaris intramœnia recipiebantur. Templisq̃ miserrimè afflictis ad par flagitium Gerardimontes transeunt. Obuium ibi Backerselium habuere. Non præuiderant eius aduentum, nec si præuidissent, satis virium ad resistendum erat. Fit igitur cædes, non prælium, Duodecim ex Iconoma-

noma-

nomachis primo impetu absumptis, reliqui terrore consternati in potestatem venire. Quorum alios Backerselius in patibulum sustulit, alios virgis caesos, mutare solum exilio iussit. Tantumque metum ea clades prouincijs intulit, ut ex illo die nemo amplius auderet in sacra peccare. Igitur optimus quisque resumebat animos. Coniuratorum autem praecipuis metus incessit, si turbata cuncta componerentur, ad ultimum se daturus supplicia. Ludouicus Nassouius misit ad Egmondanum sub Coniuratorum nomine, qui absterret cum ab eiusmodi coeptis, & si perseveraret, Iconomachis iniurius esse, Coniuratos ultionem expetituros. Caeterum Egmondanus hactenus medius, dubiusque, & quasi temporibus insidiatus, huc atque illuc consilia flexerat. Tum demum victus a fortuna publica, sectariorum conatibus auctoritatem obiecit, nihilque tali denuntiatione absterritus, fluentem statum feueritate restituit, quem paullò ante nimiam indulgentiam in praecipua deduxerat. Adeo turbarum remedia fortiora sunt,

quàm initia. Sed ante omnia Gandauum præsidia induxit. Iconomachos passim comprehendendi, meritòque supplicio affici iussit. Videres tunc aliam urbem, alios hominum vultus peccasse timentium. Nemo tunc applaudebat Iconomachis. Nemo faustis clamoribus, *Viuant Gensj*, tollebat in cælum. Mæstitia & pauor fontes obsederat, tacitè expectantes, quid de se quoque iudicia statuerent. Nemo fecisse facinus, cuius ante promptissimus quisque videri voluerat. Ea est natura multitudinis, vt non ante vereatur fastigia, quàm timeri meruerint. Idem hic populus, non alios olim principes magis suspexit, quàm qui lasciuientem bello, atrocissimè afflixerant. Sua igitur quies vrbì redijt, quia timere mali cœperant. Calend. Septemb. magistratus templa aperiri præcepit. Sacerdotes qui in profanâ veste hætenus latuerant, pristino decori restituantur, & sacrorum solemnia ex more repetunt. Consiliarij Flandriæ intermissa dudum numia resumunt, Egmondanus peregrinis

grinisedixit, cederent prouinciâ. Sectarijs deniq; has condiciones posuit : *Ne intra muros concionarentur. Contenti essent loco, quem præscriberet. Nemini quàm Caluenistis concionadi ius fore. Magistratus morem gererent. In templa furentibus se opponerent. Operâque commodarent ad expetenda supplicia ab Iconomachis. Ducenti ex sectariorum præcipuis tabula subscriberent.* Deinde locum haut procul à Carthusianorum monasterio petentibus assignauit. Ibi ædiculam postea construxere. primûsque in eâ Nicasius Scurius Minister concionem habuit post hunc Iacobus Carpentarius ; & ad vltimum Magister Petrus Dathe- nus , qui à Poperingensibus illuc transfierat. Rebus in eum modum Gandaui compositis, Egmondanus Aldenardam concessit. Ibi quoque sectarios intra leges cohibuit. Inde in regione Flandriæ occidentalis, alias ipse ciuitates ad tranquillitatem perduxit , alias præfectis curandas tradidit.

Ioannes Sceyffius Brabantiae Cancellarius , & Baro Petersemius ad Siluæducenses mittun-

mittuntur. Hi multitudini magnopere suadebant, vt nouæ religionis exercitium extra muros transferrent, legesque acciperent quas cæteræ ciuitates non dubitassent admittere. Sed quo mōx ludibrio conflictati sint dicemus post paullò.

Jisdem diebus sermonibus hominum agitari cæpit, militares copias à Rege in Germaniâ conscriptas, breui iter in Belgium habituras. Ea res concussit Coniuratorum animos. Videbant se peccasse in maiestatem. Neque Regem bonâ fide veniam præteritorum dedisse, persuadere sibi poterant. Dissimulationem eius suspectam habebant. Nullos tam sanctos principes, qui cum rebellibus bonâ fide in gratiam redeant. Plerique etiam credebant, nihil eiusmodi à Rege indultum esse: sed hæc ipsa à Gubernatrice ad tempus conficta, vt præsentī seruiret necessitati, & insigni imposturâ ingruentium malorum discrimen redimeret. Neque ex aliâ parte Gubernatrix securior erat. De populi rumore anxia, multiplici cogitatione quatiebatur.

tur. Generalium Ordinum spem fecerat. quæ si non succederent, nouas turbas, bellumque metuebat ab istis spiritibus, quorum coniuratio magis differebatur, quam desierat. Interdum quoque timebat, ne desperatione veniæ in rabiem efferati, ad opprimendam se venirent cum subito exercitu. Igitur his contemplationibus intenta, quod vnum licebat, Ordinarias turmas instrui iubet, distribuendas in idonea præsidia. Fiduciam postea ei adiecit Bruxellensium ciuium pro religione votū, & animus. Qui non satis habebant pomœrijs suis conciones excludere: sed contrariorum studiorum ciues, Viluordiam ad diuina concedere solitos, tunc quoque præpediebant. Eam rem Ludouicus Nassouius grauitè accepit. Neque mora, ad Gubernatricem admissus, expostulare cœpit, *an Bruxellenses plus, minusue liberi essent, quàm ceteri ciues. Meminisset fidei data Nullo se pietatis vinculo obstringi, si prior ipsa pactum frangeret.* Adhæc illa, *nihil se mutari velle,* respondit, *Et si concio-*

Vu

nes

nes ibi ante diem fœderis habita fuissent, quò minus & iam haberentur per se non stare. Cum hoc responso dimissus erexit sectariorum animos. Sed primores ciuitatis à Gubernatrice clam admoniti, opificum collegia in concilium accersunt. edictumque ex communi suffragio, *ne cui fas esset ad aliena sacra vrbe excedere.* Et si quis intra pomœria conciones tentaret, laqueo se ulturos. Adhæc frequentes armatos in portis constituunt, & quidem diligentissimè obseruant. Marcentibus sectarijs inopiâ virium.

Haut alijs artibus Louanienses religionem tutabantur. Nec ea ciuitas adeo corrupta erat, vt optimo cuique non plus liceret, quàm multitudini.

Præsentia Hoochstratani Mechlinienses continuit. Leges, quæ in rem videbantur, sapienter constituit.

Antverpiam vero Auriacus processit. Cui primâ luce statim assisteabant Ministri cum libello, & questu; *quod sub Iconomachorum*
inuit-

inuidiâ vapulantes, turbarum, & prostratarum imaginum auctores incusarentur. Procul id à modestiâ suâ. Nuper quidem per consuetudinem officij, semetipsos monuisse, ne quis profana encœniorum pompa, aut procedentium sigillorum spectaculo oculos crederet. Sed hoc quidquid esset, si crimen esset, ad Iconomachiam tamen non pertinere. Nihil tristius sibi impingi posse, quàm quòd differrentur amare licentiam seditionum, catholica religioni perniciem struere, in tributa, in portoria, in magistratum criminationibus inuehi, de surrogandis ad eadem ministeria genij sui hominibus habuisse colloquium. Hac si vera essent, exercerent leges. Non deprecari se de noxijs supplicia. Sin autem alia sibi mens semper fuisset, ne ad infamiam ciuitatis innocentiam suam traduci paterentur. De quâ si dubitarent, prouocare se ad Deum, hominésque conscientie sue conscios. Illicet mitterent, qui concionantium verba exciperent. Fidem se Regi, utpote principi, Auriaco tanquam vicecomiti,

atque ipsis patribus dare paratos. Neque interim aquum videri, cœmeteria, & templa unis duntaxat catholicis cedere, & hæc officia expleantibus eripi sibi publicarum rerum commercium. Cives omnes esse. Sub vno principe, intra eadem mania, iisdem legibus vivere. Quod ergo attineret quasi contaminatos, & piaculum meritos arceri à publico usu, quem lex communem omnibus statuerit? Mulcebat eos verbis Auriacus, libellumque in se recipiens, iussit propediem opperiri responsum. Interim tamen, cœmeteriorum usum ijs indulgit. Sequenti die magistratum accersit, & è singulis nationibus (vt ipsi vocant) delectos aliquot. E Teutonicis quatuor adueniunt, Marcus Peres, Hermannus Meerius, Cornelius, & Carolus Bombergius. Totidem è Gallis erant, Franciscus Godinus, Ioannes Carlierius, Nicolaus Viuerius, & Nicolaus Selinus. Actum cum his de concordia ciuitatis. Legesque communi suffragio dixerunt sectarijs, quarum sententia hæc fuit. Officia,

conciones, & exercitia Romana religionis ne turbanto. In fanis, aut monasterijs alijsue locis Deo dicatis, noua professionis exercitia ne habento. Contenti sunt tribus in vrbe regionibus. Nempe pradio Antonij Geuartij in foro equino, pradio D. Liekerkj, pratio Xenodochij. Hec si comparari pecuniâ non possint, tunc alia aequè commoda acquirunt consensu Auriaci. Interim in regione noua vrbis, quemadmodum hætenus, religionis officia instituunt. Intra hos limites vnâ eadémq; horâ concionari fas esto diebus dominicis, & festiuis. Cateri dies nefasti sunt. Si tamen festus dies in septimanâ non inciderit, mercurij die concionari liceto. Duos, si videbitur, Ministros, nec plures, in singulis religionibus admittunt. Ministri Belga sunt, aut præcipue alicuius ciuitatis iure donati. Iuramentum præstent parituros se Auriaco, & senatui in re politicâ. Cum telo illicito conciones nemo adito. Teli illiciti nomine gladius, aut pugio non continetur. In ciuilibus magistratus, & superioribus parento. Onera, & portoria ex æquo ferunt. Salutem, & tranquillitatem

tatem publicā iuxta custodiunt. Cuiuscumque religionis sacerdotes, Ministri & professores à seditiosis sermonibus, iniuriisq; abstinento. seditiosum tamē nō habebitur, quidquid ad doctrinam pertinet, vel in corruptos mores prometur. In electionibus, & conuentibus Ministrorum, Seniorum, & Diaconorum, unum aliquē è magistratu admittunt, qui Auriaco, & collegio relaturus sit, quid actum fuerit. Cuiuscumque religionis homines à contumeliis vig, & iniurijs abstinento. Si contumelia aut vis, aut iniuria facta fuerit, indiscriminatim ulciscuntur. Quò minùs aduersus Iconomachos, noxiōsque iure agatur, pœnaq; expetantur, ne faciunt. Nemini palam extra designatos limites psalmos concinere ius esto. Auriacus & magistratus, ciues & incolas in tutelam accipiunt, sine religionis discrimine. Ministri, & sacerdotes cuiuscumque religionis, has leges publicant, & ad custodiam earum auditores hortantur. Firma rataque sunt, quoad ex Generalium Ordinum suffragio aliter à Rege statuatur. ita tamen

si quid

si quid comitijs illis decretum fuerit, quod saluâ religione vel conscientia admitti non possit, liberum cuique sit patriâ cedere cum fortunâ & familiâ. Ministri, Seniores, Diaconi, & nouarum religionum præcipui, harum legum inuiolatam custodiam in se recipiunt. præsentisque tabulas signant in duraturi fœderis constantiam. His in eum modum compositis, consignatisque, dimissus ab Auriaco est præco, qui publicaret libertatem religionis, ciuésque à mutuâ vi abstinere iuberet, nec alterutrius iram lacescere contumelijs; præsentem mortem, bonorumque publicationem contumacibus indicens.

Auriacus inde in Hollandiam concessit, crebris Primorum litteris sollicitatus. Bredodium sibi in eâdem prouinciâ substitui petierat. Sed is Gubernatrici suspectus admodum erat, satis gnaræ quàm grauis immineret rei publicæ. Caput se Coniuratis præbuerat. Post hæc Viannæ, Hollandiæ oppido, quod iure clientelæ tenebat, aras omnes imaginésque exciderat, Culenburgij exemplo. Armato-
rum-

rúmque cateruas circa se habebat. Et hinc suspicionem multis fecerat occupandæ provinciæ. Nec vanitas homini deerat, sæpe obliquos iniiciens de principatu sermones. Prostabátque palam eius imago, laminis insculpta inter hos versus:

*Sum Brederodus ego, Batava nō infima gentis
Gloria, virtutem non unica pagina claudit.*

Libellus denique vulgatus erat sub isto titulo; HERES ET SVCCESOR COMITATVS HOLLANDIAE, qui non obliquè ad Brederodium referebatur. Proinde in subuehendo eo non immeritò Gubernatrix quatiebatur imagine periculi. Hoochstratanum ergo Antverpiæ substituit mitis animi virum. Factionibus Procerum aggregatus, in fidem tamen non commiserat. Consiliarius Assonuillius ei adiunctus, quærebat in præterita facinora, quorum ultio mitioribus factis reservabatur. Cæterùm Auriaci interuentus Hollandos compescuit. Leges verò Amsterdamsibus constituit, prope easdē, quas Antverpiensibus dederat. nisi quod sectarios

con-

contentos esse voluit Franciscanorum monasterio. Inde Ultraiectum, & ad alias ciuitates progressus, pari omnes condicione sedauit. Post hæc litteras ad Gubernatricem dedit. Ea quæ egisset breuiter recensuit. Monebat illam denique; *Gallos videret & conterminos populos, quibus non essent auersati principes idem petentibus. Plus indulgentiâ & pace, quàm seueritate proficî, in tantâ nouarum religionum dulcedine. Si vesaniam latè ferocientem vi premere cogitaret, nihil aliud profecturam, quàm ut vastatione, & incendijs prouincias desolet. Nam ne Regem, quidem totius imperij sui viribus succinctum, aduersantium furores sine periculo, & labore, sumptuq; excisurum. Hæc omnia vitari posse promiscuâ religionum libertate, vel Augustane professionis indulgentiâ, aut si intra suam cuique conscientiam sacrorum licentiam permetteret. Sinceram pacem condicionibus emi, non bello. Maximam populi partem fauere nouitatibus. Vincti sectarios posse, debellari non posse. Nec amicos fore cre-*

deret, si semel vicerit; acrius pro ultione, quam pro libertate certaturos. Tranquillitatem civium beneficium suum faceret sine sanguine. Non primos esse Belgas qui hoc ipsum necessitati dedissent. Propè totum Christianum orbem conspirare in hac consilia. Compositis rebus, melius religioni consulturum Regem; cum detumuerit ipsa novitas, cum sectarij patientur mitius se haberi, qui nunc iugulo suo metuentes, in fasciculum coeunt. Hæc quidem tanquam ea quæ egisset excusaturus, scribebat. cæterum haut perplexè petebat religionis libertatem, cui per tot ambages semper studuerat.

Longè alia mens Megemo fuit. Contra spem omnium, non invidiam, non odium pauens, gratiæ nihil concessit. Ministros omnes Geldriâ eiecit. Sectariorum præcipuos exilio mulctavit. Prorsus ut appareret, factorum culpam esse, quæ reliquis Proceribus animum ademerant. Quibus rebus Culenburgius & Brederodius permoti, scripserunt ad Neomagenses Coniuratorum nomine; ac ni exules
recipe-

reciperent, ultionem minabantur. Quorum iras Megemus generosè despexit, totamque Geldriam studio partium in fide continuit.

Arenbergium eadem in Frisiâ tentantem, fortuna destituit. Plerisque vrbibus peruicaciam induentibus, fraude præfectorum, quorum multi Coniuratis accesserant.

Maioris operis erat Tornacenses componere. Molbaisius arcis præfectus recenti Iconomachorum facinore irritatus, magno terrore ciuitatem percellebat. Et tanquam semper erupturus cum militari præsidio, trepidam plebem conficiebat vigilijs. Cæterum fœdere cum Gubernatrice iëto, duo è coniuratis illò adueniunt. Populúmque velut arbitri ciuilis discordiæ, inuitabant ad pacem. Sed cum hoc vnum potissimùm vrgerent, vt promiscua libertas intrà mœnia fieret, aduersarium sibi magistratum habuere. Durabat enim apud Optimates reuerentia obsequij, quam diuturna contumacia in plebe deleuerat. Gubernatrix eorum, quæ agerentur certior facta, Hornanum,

proficisci eò iubet. Sciebat enim non ingratum sectarijs, tantisque incommodis ciuitatem auctoritate suâ liberare posse. Urbem appropinquant, multitudo obuiam effusa, *Viuant Gensij* certatim inclamauit. In primis autem ciuibus imperauit, *adempta templa catholicis redderent. Extra menia quo placeret loco, sectarij concionarentur. Ministri Belga essent. Nec plures duobus admitterent.* Sed aduersus has leges Ministri fremebant; ades sacras in usum populi structus esse. Populum ibi intelligi, non ubi patres, aut catholici; sed quâ maior pars consisteret. Reliquam se multitudinē numero superare. Neque interim cadere condicionum; modò ad erigenda sibi templa tributum omnibus senatus indiceret. Id saepe antea à maioribus factū. Publica adificia omnium are lui debere. Contrà magistratus, *templa in nullius esse domino, dixerunt. Patere cunctis, eo sacrario ad preces uti volentibus. In alios verò usus transferri non posse sine iniuriâ ciuium, priscam religionem colentium. Parum ad rem attinere, se-*
cta-

Etarij numero prestarent. Forte haut pauciores pro catholicis, at meliores certè consistere. Imaginem ibi populi, hic senatum esse; ut sciamus illâ parte factiones, hac stare rempublicam. Struerent itaq; templa suo impendio. Nihil in hoc se aduersari. Malè enim cum catholicis ageretur, si tot iniuriis damnisq; affecti, ad onus præterea astringerentur pensitanda pecunia, quam rectius templorum suorum ornamentis, tam fœdè spoliatis, impenderint. His utrimque auditis Hornanus ratas esse voluit leges. Sæctarios protenus cedere templis iussit. Stipem quantam quisq; vltro conferret permittens accipere. Sed non ideo sæctarij parebant. Concionibus acriùs intenti, forum & templa muniebant excubijs. Dissimulante primùm Hornano vetandi pudore, an metu; & mox quod palam abnuerat indulgente, fœdâ inconstantia. Cuius turbidum, ac mutabile ingenium Coniurati obsederant, flectebantque. Molbaisius turbari leges ægrè passus, iræ stimulos vix cohibebat. Ita vt interdum cogitaret in inconditum &

confusum vulgus militem immittere. Deter-
rebat tamen eum facti atrocitas, ne eadem rui-
na bonos pariter malosque obrueret. Coniu-
ratos interim extemplò cedere vrbe iussit. Gu-
bernatrici quoque scripsit quid placeret fieri.
At illa de ciuitatis discrimine anxia, quæsito
prætextu Hornanum accersiu in curiam, se-
cretario Torrio in locum eius misso. Maior in-
de tumultus in populo exarsit. Sectarij cum
supercilio Torrium audebant despicere. Nec
languidiùs pro libertate cernebant, quàm ille
pro lègibus ab Hornano descriptis. Turbante
cuncta Taffino isto, de quo ante habita men-
tio est. Nec finis certaminum apparebat: cùm
Molbaifius misit ad Ministros, qui iuberet eos
protenus leges admittere, vel tergiuersationẽ
se pro defectione accepturum. Tristi hac de-
nuntiatione lenita est sectarijs vtcumque fe-
rocitas. Præfecto igitur referri iubent; si ca-
tholici abstinerent à violentis consilijs; si
concionibus, psalmorum concentibus, sa-
cramentis, matrimonijs, ægrorum visitationi-
bus, sepulturis, conuentibus, consistorijs, col-
loquijs

loquijs, synodisq; suis non vim, non turbas dederint: si catechizandi, scholas aperienti, scripturasq; legendi promiscuam licentiam fecerint, & in hæc idonea cautio traderetur; in se moram non fore consentiendi in leges, quas aliâ condicione detrectarent accipere. Grauia hæc magistratibus visa. Itaque Ministros alium ab alio seorsim aggressi, orabant, paterentur se esse in potestate. Imminere grauem ciuitati Molbaisium, eruptionem militum vtcumque sustinere possint, tamen non sine clade experturos. Surdæ erant Ministrorum aures ad saniora consilia. Torrius infectis rebus Bruxellam redijt. Molbaisius autem quanquam iustâ irâ accensus, vltionem tamen distulit; intentius cauens ne quid moueretur à sectarijs, magnâ libertate ius in plebem exercentibus, quod malignitas temporum seditiosissimo cuique indulserat.

Non minori cōtumacia Valencenenses agitabātur, ad eos quoq; duo è Coniuratis diuerterāt. Quos Noircarmius statim oppido eiecit,
paci

paci studens, ciuésque prouocans ad condiciones, quarum summa hæc est. *Pactis fœderatorum stanto. Templâ catholicis restituuntor. Ministri Belge sunt. Intra mania ne concionanto. Semel in septimanâ extra muros ciuitatis fas esto.* Erat in vrbe Minister quidâ nomine Grangius, linguâ admodum procax, qui per turbulentiam ingenij cæterorum insaniam supergressus, mirabili consensu plebē deuinxerat. Vnus ille pacta, in sui maximè necem conscripta, non probauit. Erat enim oriundus è Galliâ. Et hinc suspectior esse cœperat, ne rempublicam (quod facillimum factu erat) ad peregrinos traheret. Crebris itaque concionibus detonare cœpit in leges; quæsitísque suspicionum causis in peius omnia attollere. Tradito tunc more, quemadmodum in omni populari regimine, vt actionibus magistratuum, legibus, & reipublicæ, sacrificuli isti, sub pietatis specie, seditiosâ aut venali linguâ, passim illudant. Soli enim loquuntur ad populum, quē honesto nomine atrociter exagitant in suam libidinem; prauè
æsti-

æstimantes quidquid illis non allubescit. Inde non pauci ad Grangium respicere. Actóque in suffragia populo haut aliter consentiebant in leges, quàm si duo sibi templa cum Ministris relinquerentur. Quibus auditis Noircarmius excanduit, & Valencenensium delegatos Cameracum ad se accersit. Venere ex Optimatibus Antonius Poiurius Roselij dominus, Nicolaus Viuienus, Franciscus Oultremannus; è sectarijs Vincentius Restaldijs, homo audax, perinde factiosus. Noircarmius paucis insimulatos, monere cœpit, vt leges quas Antverpienses, quas Gandauenses receperant, & ipsi admitterent; locū se assignaturum extra mœnia, vbi suo ritu facere possent sine cuiuspiam iniuriâ, quoad Generalium Ordinum comitia succederent. Effecturum denique, vt alterum in septimanâ diem Gubernatrix concionaturis adijciat. Hæc oppidanis renuntiari iubebat, & si placerent, ocius ad se reuerti. Res itaque defertur ad multitudinem. Cæterum Grangius, acerbissimis questibus cuncta,

Yy per-

permiscuit. Quamlibet potius fortunam subiturum se proclamans, quàm has leges pateretur imponi. Et si armis agendum esset, Galliarum societatem ostendebat. Delegati ergo re infectâ ad Noircarmium perueniunt. Cùmque de Ministrorum genio grauitè quererentur, quòd populi mentem auertissent in tumultus; *Videte, inquit ille; etiam atq; etiam ciues, quid faciatis. Sciatis licet, aut recepturos vos leges meas, aut pro hostibus me habiturum.* Ingemuerunt Optimates ad hanc vocem. Vocatòq; rursus populo in concilium, potentissimum quemque ex plebe orare cœpere, miserarètur ciuitatis cito perituræ vnius amentia. Ne tantum concederent Ministro, vt in gratiam eius patriæ excidium quærent. Scire enim, ex vno illo capite pendere momenta præsentis cōcordiæ. Cum hæc pluribus & singulis diuersi inculcarent, perpulere tandem multitudinem ad condiciones. Sectarios deinde poenitentia cœpit. Noircarmio enim locum templi designaturo, nemo eorum adesse sustinuit. Quâ contumeliâ irritatus, indignatione exarsit. Verbisque
quæ

quæ suggerebat ira, infanientium vecordiam accusans, conterminarum vrbium præsidia contrahit. Subitis quoque delectibus aliquot militum effecit, qui diuexarent oppidanos, agrósque ex omni parte popularentur.

Dum hæc in Belgio geruntur, interim Rex *Rex in Hispania de remedio consulat.* Philippus crebris litteris à Gubernatrice cōficiabatur. Occultis curis grauem, febris excepit. Neque ideò negotium, quò tunc maximè angebatur destituit. Itaque suorum præcipuos in curiam vocans, tradidit eis Gubernatricis codicillos, & quid auctores sibi forent despicere iussit. Quidam ex illis altiùs exorsi; *Hæc tot mala, dicebant, non adeò Iconomachorum, quàm sectariorum; neq; Coniuratorum magis, quàm Procerum culpâ accidere. Quatuor esse genera hominum libertati studentium. Inter eos primos Iconomachos, sectariorum satellites, ad nefanda illa scelera pretio conductos. Quippe sectarios occultâ malignitate ab his secretos, in secundis consistere. Inde succedere Coniuratos, quorum fiducia sectarij iniere consilia in*

publicam pacem. Qui verò hi sint, aut unde processerint, facile sciet, quisquis privatis necessitudinibus Proceribus annexos intelliget. Etenim quarto gradu Proceres censendos esse, qui Coniuratis statim adfuere, privatis publicisq; affectibus. Prorsus, ne quis ambigeret, totam hanc procellam ex illis nubibus erupisse. Proinde rectè estimantibus, habendos esse caput, & causam malorum omnium. Ne id quidam Iconomachos dissimulasse. palam iactantes, hanc se licentiam, hac facinora usurpauisse illis consentientibus. Nam & publicatos esse codicillos sub nomine Procerum, Generalium Ordinum comitia Coniuratis addicentium. Ad hac accedere, quòd cum pridie Augusti referarentur littera Regis, quibus ille comitia in aduentum suum differri praeceperat: postridie Idus sacrilegia, & incendia passim, & undique erupisse. Imo ipso die quo manè Antverpiam Auriacus destituerat, vespere in monasteria, & templa impetum factum. Nec inter tot nefanda facinora repertum esse, qui ferrum stringeret. Sed

econtra quoties Rex scripisset de rebus ad religionem pertinentibus, si quid in huius libertati conducere, id ipsum Procures statim amplexos esse; cetera verò ad incolumitatem sacrorum spectantia solerti ratione fastidisse, tanquam minus apta temporibus, & intuita reipublica. Sic ergo à malo in peius cotidie transeundo, postremo libertatem, quam tantopere optauerant, fœderibus, & pactis indulgisse populo. Sed non ignari, voluntati Regis licentiam illam aduersari, corroborare velle Generalium Ordinum comitibus. Hec esse vulnera reipublica, in qua querendum sibi esset remedium. Tum verò itum est in suffragia. Tissenacquiis, & Hoperis, properandum Regi in Belgium censebant. Necdum adeo seditiones inualuisse. Sed si moram hic otiosus traxerit, concessuras in partes ciuitates, concessuras prouincias. apud quas praeualefcet Procerum amor, si duces se monstrauerint. Seditiosa consilia perniciosos exitus sequi; nisi in tempore adhibeatur remedium. Cum aduersus hæc alij instantem hyemem, & ini-

quitatem maris causarentur; *Nos tamen*, inquit Tissenacquijs, fieri non posse credimus, ut ciuili illa tempestas aliter detumescat, quàm si aduentu suo Rex occupauerit. Hanc alià ratione Carolus Caesar seditiones sedauit. Eius placita nobis vice legis seruanda sunt. Ille ad vnius ciuitatis Gandauensis motum, etiam hereditarijs hostibus in caput suum potestatem fecit. Per Gallias, quas sories concusserat, festinare non timuit. Tumultus eius euentus docuit, alios esse populi animos absente Principe, alios presente. Gandauenses hactenus feroces, ne portas quidem ciuitatis venienti clausere. Nulloque momento subacti sunt, qui forte patientiâ & dissimulatione Caesaris, in nexum agrè soluendum coituri fuerant. Sed illum aliena stultitia, aut sua fortuna magis, quàm prudentia protexit. In hac ego pericula Regem non accerso, ut per Galliam iter instituatur. Profecturo patet Italia, ne cogatur externis dubijsque genti-

gentibus, aut inconstantia Oceani credere salutem suam. Maiora profectò nos sollicitant, quàm ut unius ciuitatis curemus insaniam. Iam Gandauum, Antverpia, Tornacum, breuiter iam tota gentes & prouincia in tumultus feruntur. Quid igitur adhuc moramur? An donec etiam sana & integra omnia contagio corripiat? atque in confusionem prouincia veniant? Nam Gubernatrix quoque proximis suis litteris Regi denuntiat, haut ultra, quàm in calend. Octob. rempublicam in tranquillitate retineri posse. Videtis quantum absumus ab exitio, nisi accidimus in tempore malum, cunctatione Regis propè adultum. Obstandum est principijs, ne morbus diuturnitate valentior, omnem postea medicinam reformidet. Tissenacquijs omnibus videbatur optimè dixisse. Sed dum profectiōni tempus præstituerent, quid interim respondendum esset Gubernatrici, consultant. Nam hoc ipsum tunc potissimum Rex quærere, vide-

consilium. Nec in mentem inducere posse, quid absente se allatura sint ad reprimendam insaniam istorum hominum. Illud unum affirmare, magnum inde propendere periculum, ne in libertatem & confusionem religio erumpat. Conscientia sua graue fore, nec minus indecorum maiestati, sensum rectum, & confirmatum deponere ex subditorum libidine. Nihil concedendū esse vecordia. Semp̄q; homines, quantamcumq; libertatem adepti sint, aspiraretamen ad maiorem. Nullā vi cessuri, si semel aditum fecerint. Conterminorum Regum exemplo, ab eiusmodi consilio deterreri. Saniora videri remedia, si ferro eniteretur, & vi armatā vim reprimeret. Quantum ad sanitatem animorum id conducat, illarum prouinciarum exemplo admoneri, quae hac potissimum arte nequitiam supplantant. Pecuniam & arma in expedito esse. Nec de Magnatum fide dubitare, quorum multos sciret fidos sibi, & religioni addictos coniunctis viribus vindicatueros publicam pacem, suāsque vlturos iniurias. Secretioribus autem litteris

Gubernatricem monebat, ne quo pacto auctoritatem adijceret comitijs Ordinum. Et si forte inuitâ eâ indicerentur, tanquam minùs legitima excuteret, quæ sine consensu principum contrahi non possent.

Iisdem diebus litteræ ab Imperatore allatæ sunt Regi. Magnoperè autem suadebat; *ne vindictam precipitaret. Ut agendo, cuiusle bellum incipi. Religionem Catholicam, multis in Germaniâ principibus exosam esse, cum quibus necessitudines, affinitatésq; Proceribus Belgarum intercederent. Valida inde auxilia exciri posse à desperatis, nihil segnius dimicaturus pro salute, quàm ipse pro religione, atque imperio. Crudele bellum, cum ciuibus sumi. Victo sibi periculosum, victori funestum. Nec semper pro meliori causâ stare fortunam. Quocumq; tandem inclinaret victoria, ingenti calamitate deformaturam prouincias. Benignus facilisq; ciuibus esset, maloque caueret mitioribus consilijs. Suam in hac operam se promittere.*

Hæc in eum modum scribebantur; cum in
Bel-

Belgio magis apertum bellum non erat, quàm tranquillitas. Velut exercitatum ventis marè, non confestim & subitò; sed per gradus mitescit. Et quamvis remittatur ira tempestatis, ardere tamen non desinunt spumarum attritus, & securitatem nauigantium interrumpere. Vt adhuc nemo aliquis publicis auspicijs arma corripere; ita multi turbare ciuitatum pacem. Auctà per impunitatem licentià, genioque sectæ in discordias natæ, denique multorum animis ad seditionem propendentibus. Honscotanus quidā Minister, in conspectu vrbis Aloftensis concionari ausus, & ab oppidanis comprehensus, ad aliorum terrorem à Backerselio in patibulū mittitur. Quippe per leges foederis concionari ibi fas non erat. Quia in illum diem licentiam sacrorum nemo vsurpauerat. Ex alià parte magistratus Axellanus in Flandrià, paucos Iconomachos in atroci cogitatione occupatos corripuit. Quos raptis properè telis multitudo exemit. Sed Backerselius iunctis sibi centum equitibus, tumultuantes ante oppres-

fit, quàm venisse senserant. Legibúsq; aetum in fontes. Siquidem Backerselius; non in speciem, vt Coniuratorum multi; sed quomodo optimus quisque tranquillitati studuit. Axellensem motum Furnensis excepit. Nam & ibi aliquot Iconomachi, manifesti sceleris comperti, seruabantur ad supplicia. Nescio quis procurator, dum subuenire eis studet, audacissimum facinus aggressus est. Mille circiter sortis suæ homines ad auxilium inflammavit. Hac multitudine fretus, urbem vi inuadere constituit, Catholicosque omnes cum sacerdotibus interficere, vt ex captiuis postea rescitum est. Instructos ordines intempestâ nocte oppido admo-uit. Iamque in mœnia euadere cœperant: cum plebs urbana frementium tumultu excitata, & tela corripiciens, armata corpora obiecit scandentibus. Nullo militari ordine ruentes facilè proturbauit. Nam plures vndique ciues statim affluerant, densisque agminibus complebant, mœnia. Ter-riti igitur Sectarij, dedere receptui signum.

num. Quò euaserint, quì essent, aut unde venissent sciri non potuit. adeò postri-
diè ex tantâ multitudine nemo apparuit;
præter vnum; alterumue captiuum, accepto
vulnere retardatum sequi. Viginti ex secta-
rijs cecidere. Iisdem diebus Delfenses in Hol-
landiâ muliebri veste occùltati, Franciscanos
trucidauere. Cartusiani à Amsterdamen-
sibus eodem furto petiti sunt. Per idem tempus,
quidam Barlaimontius, genere spurius, Ant-
verpiæ rursus Iconomachos conduxit ad sa-
crilegium. Quinquaginta omnino erant. &
iam in templum B. Virginis nefarias ma-
nus immittere cæperant: cùm à prætereun-
tibus occlusæ sunt fores. Retentisque in-
tus captiuis mox Hoochstratanus superue-
nit cum satellitibus. Primo impetu quatuor
confecit. Reliqui ad genua eius prouoluti,
inditisque vinculis, postridie omnes vnà
cum egregio illo redemptore mittuntur in
crucem. Hinc sectarios quisq; criminari cæ-
pit; tanquam quietis impatientes, partâ iam
libertate ad nouorum scelerum occasionem

abuterentur. Manifestius flagitium erat,
sub certo auctore, quàm vt purgari pos-
set. Nec Ministros vtique latebat, potissi-
mùm se vapulare sub vnius inuidiâ. Com-
ponunt itaque codicillos ad Hoochstrata-
num; quorum forma talis erat. *Egregia
tua virtus conscientia nostra fiduciam tribuit.
Defensionem non paramus hesterni facino-
ris. Neminem hic excusaturi venimus. Pa-
cis interuersores non merentur patrocini-
um. Rogamus tantùm, ne maleuolorum iudicijs
plus aequo tribuas, vel patrati sceleris in-
famiam in innoxios inclines. Vnius pecca-
tum, imò vnius potius amentia fuit. Qua-
si verò ad stabiliendam religionem nostram,
opus fuerit ad nefarias artes confugere. Fi-
des est donum Dei; quam nulla vis vnquam
persuaserit hominibus. Proinde si consulere
velis salutis publicæ, promiscuam libertatem
indulge ciuibus, vni Principi, vni magistra-
tui obnoxys, onera denique ciuitatis ex æ-
quo tolerantibus. Quam multis hodiè Prin-
cipibus ad tranquillitatem profuerit va-*
num

num est describere. Neque ad rem attinet, quid alij fecerint. Necessestium hoc remedium ducimus, quando solida pax aliter haberi non potest. Quamobrem si nobis hoc beneficium prastiteris, ter centena aureorum millia pendemus arario, mercedem tanta benevolentia. Vanam hanc arrogantiam, viriumque suarum iactationem, non sine risu Hoochstratanus percurrit, transmisitque legendam Gubernatrici.

Ea tum forte pietati intentior, procurabat publica vota pro partu Reginae, quae in aede D. Gudulae solemni pompâ persolvebat. Stabant ad fores armati in praesidium. Simul ab aditu geminum ordinem satellites in longum porrexerant, ne quis armatus ingrederetur viam definientes intransibibus. Magna quoque laetitiae signa populus ostendit, festiuis ignibus nocte illustrans. Quasi ex tunc publicis gaudijs fortunâ Belgarum destinatis Eugeniae. & verè Eugeniae, hoc est, in ipsis barbarum initijs natae, ut aliquando esset, quae pietate, vitaeque exemplo, labentem restitueret religionem, vul-

vulneraque refoueret reipublicæ, tot millium sanguine inundata.

Inter quæ Valencenenses in aulam delectos miserant, questuros de iniuriâ militum, Domi tamen vt hostes bellum instruebant, Palantes per agros milites alios capiunt, plures obtruncant. Imminentes vrbi domos euertunt, tormenta mænibus admouent, aggeresque erigunt, & quidquid validissimis vrbibus repertum est tolerando obsidio. Adhæc Carthusianorum monasterium in proximis destruunt, odio, irâ, simul & metu, ne eodem præsidio Noircarmiani receptarentur. Quarum rerum famâ Gubernatrix commota, properè edicit, ne quis militem scriberet priuatis auspicijs. Veredarios extra vnum præfectum, per stathmos & mansiones nemo disponderet. Peregrini Ministri Belgio excederent. Adhæc codicillis Noircarmium edocuit, quaquâ ratione Valencenis inferret præsidium militare. Ille moram non fecit imperio. Delectis magistratuum ad se vocatis, decretum Dominæ aperuit, alteru-

alterutrum accipiendum esse dicens, aut præsidium, aut bellum. Intra paucos milites præsidium fore. Quatuor equitum, sex peditum cohortes statuisse inducere. Eam rem nemini fraudi futuram. Filium suum obsidem offerre. Renuntiarent hæc ciuibus, & cras ad se redirent. Suadere interim, vt voluntate suâ facerent, quod mox coacti facturi essent. Hæc vox audita est non sine omnium gemitu. Quomodo enim tantam rem persuaderent, superbo & obstinato populo, cuius necessaria erat auctoritas? Namque ex magistratu, & Optimatibus & plêbe ciuitas ea constat. Sed tota vis in plebe erat. Hac dissentiente, cæteri Ordines nihil poterant. Periculosa sub regno reipublicæ forma, nec immerito suspecta fastigijs. Plebs non ratione, sed impetu fertur, ea tantum probans quæ libidini suæ conducere senserit, sine respectu utilitatis publicæ. Melius cum eo statu agi experimenta docent, vbi tota plebs sub vno suffragio, cæterorum Ordinum calculo superatur. Sed frustra desideramus bonas leges

in ægrâ atque rebelli ciuitate, nimiaque licentia in furorē accensâ; vbi cuncta agebantur ex fordidissimorum hominum libidine, quos non tenebat reuerentia principum, non magistratuum: sed vnīs Ministris instar Regum dominantibus obnoxij parebant. Igitur Magistratus & optimates inter se deliberatione habitâ, recipienda esse præsidia censebant. Deinde Ministros ad se accersitos hortari cæpere, ne impedimento essent, quod minus idem plebs statueret. Si quid ipsi sibi metuerent, sine fraude vrbe cedere posse. Eam in rem fidem se interposituros. Grangius naturâ turbidus, regnoque populari superbior, ad hæc respondit. *Superuacuum sui sollicitudinem deponerent. Esse numinibus cura salutem suam. Fidem colentibus Deum adesse. Nec in animo sibi esse studia ciuium destituere. Proinde obmutescere malle, quàm tam perniciosi consilij auctor plebi fieri.* Sub hanc vocem curiâ egressus, multo acrius quàm dixerat tumultuosâ, oratione populum concitauit. Quibus auditis Noir-

carmi-

carnius iræ non temperauit. Adferri prote-
nus catenas, & delegatos ad se missos in vin-
cula duci iussit. Quos post decimum demum
diem libertati restituit. Maiores deinde copi-
as ex Hannoniâ, & Cameraco accersit. Abba-
tiæ S. Amandi, Condato, cæterisque in proxi-
mo ciuitatibus præsidia imposuit; ostentatu-
rus bellum, priusquam inferret, vt pœniten-
tiæ spatium daret turbatis. Quia crebris popu-
lationibus vexati, obsidionisq; metu perculsi
tutiora consilia inituri credebantur.

Interea Gubernatrix aduentum Regis fabu-
lantium rumoribus exposuit. Quippe emana-
ri in populum, & ab omnibus sciri tranquil-
litatis intererat. Inde bonis fiducia crescere:
malis verò nutare conscientia cœpit. Diffe-
rente simul famâ, decreuisse Regem iræ
suæ parentare paucorum capitibus. Et ille
quidem, re verâ, ingentem dolorem concepe-
rat animo. Hoc ipsum quoque Montignæus
perscripserat. Qui cum Bergensi Hispaniâ ex-
cedere prohibitus, tanquam captiuus reti-
nebatur. Nemo tunc ferè ex magnatibus gra-
tiam

tiam eius epistolis non præoccupauit. Mansveldius, Arenbergius, Megemus, Barlaimontius, Noircarmius, Raslegemius, Vicecomes Gandauensis, Vniuersitas denique Louanienfis, reddebant Regi rationem officij, quod pro republicâ, & religione impenderant. Egmondanus præterea ad Tiffenacquium litteras dedit. Siue Regem verè sibi iratum credens, siue augurio augente suspicionem animi, haut perplexè querebatur; *Sinistris rumoribus se urgeri, tanquam peccasset in officium. Si quid à se peractum Rex vellet, voluntatem suam exprimeret. Æstimaturum fidem suam ex successu. Credere se tamen, prudentius facturum, si damnato armorum consilio, cum subditis de tranquillitate transigat. Solidam pacem parari posse conditione, non bello.* Eadem propemodum Auriacus scribebat.

Benignè magnatum litteras excepit Rex. Sed non sine dolore codicillos percurrit, quibus mandauerat Gubernatrix, cuncta in peius procedere. Nulla tamen sermone, aut vultu

vultu tristitiæ signa prodidit. Affectus enim in potestate semper habuit. Et profectò in illo Rege magnæ eminuere virtutes. Multorum tamen censuram impegit, quòd grauis animus, & ad consilia tardus, nimia lentitudine præteruolantem quamque occasionem, tanquam mansuram, prætermitteret. Sed hæc naturæ vitia erant, non morum, gentibusque illis vnà cum ipso cælo passim hauriuntur: scilicet attrabile (quâ potissimum vrgentur) rapidos animorum motus retinentes cui Galenus medicus constantiam attribuit. Itaque in Belgiū proficisci certus, amicos secedere iubet, deliberaturos de ratione itineris. In eo concilio iidem illi fuere quos ante nominauimus; Dux Albanus, Comes Feriæ, Magnus Prior Ordinis S. Ioannis, Archieconomus Reginæ, Comes de Melito, Archipocomus Principis. Hi omninò ex Concilio Status. Tissenacquijs, Hoperus, & Corteuillius è Concilio Belgico. Viri omnes consilio, & auctoritate præstantes, atque eâ tempestate Optimatum præcipui. Consedenti-

bus ijs lectæ sunt Cæsaris litteræ, simul quas
è Belgio Gubernatrix, magnatésque trans-
miserant. Tum de toto negotio disceptan-
do; plerique non probari sibi dicebant, Re-
gem cum subditis condicione transigere. De
religione, & obedientiâ hic agi; id est, de præ-
cipuis nervis reipublicæ. Iustitiâ & constan-
tiâ imperium retineri; iniustitiâ & pusillan-
mitate dissolui. Proceres cum multitudine
peccasse in Regem. Vulnus hoc curandum
esse alterutrius sanguine. Clementiam in
utrosque perniciosam iuxta, ac in utrosque
seueritatem. Satius fore, cum multitudine
mitius agere. Ferocissimos ex plebe Rex occi-
deret. Eos qui tumultuantibus accessissent,
provincijs eyceret. Ceteros impunè haberet,
ut sint quibus mitem & pacatum animum
præstare possit; ne ultionem quæsisse videat-
ur, non remedium. Crudele fore tot millia
togatorum conficere. Intutum ablegare in
exilium, civile bellum daturus. Aliquot Pro-
ceribus ceruices præcideret. Illos turbines af-
fixisse rempublicam. illos passos esse lascui-
re ple-

re plebem. Illos facem subiecisse tumultuantibus. Horum exemplo admonendos esse reliquos, quid Rex possit. Ne impunè discant illudere principi, & in publicam pacem consilia inire. Assuescântque vereri hos motus, tam magnis expiatis capitibus. Claritudinem exempli supplicium nobilitare. Nullum inde paci periculum. quando pœna ad paucos, indignatio ad infirmos pertingeret. Vulgus enim nullâ fauitiâ irritatum, timidum & secors, crediturum Proceres meruisse hoc ipsum quod paterentur. Cùm econtra, pari ultione utrumque Ordinem prouocando, nobilitas populum inuentura sit quem ducat in Regem; populus verò duces, quos in bellum sequatur. Sitamen Caesar pro noxijs enixè orauerit, hætenus precibus eius deferendum esse, ut pœnitentiâ flexi, accepisse veniam se, non meruisse intelligant. Quamquam satis constaret illas Caesaris epistolas, nō ab ingenio eius perfectas; sed calliditate studioq; Procerum extortas esse. Saxonie ducē proximâ affinitate Auriacum attingere. Vxoris eius auunculum esse.

Nec

*Nec in animo Caesaris quemquam Saxone
validiorem. Nullam notiore artē esse,
quā istorum Procerum, per fas, per nefas
ad libertatem religionis tendentium. Quō
etiam spectarent ipsorum littera ad Regem
missa, postulatis Caesaris ferē congruentes. Iam
quosdam eorum, indignatione Regis percul-
sos, intempestuo fungi officio, & si quid ab
illo mandaretur, executuros se denuntiare.
Sed quidquid scriberent, haut aliō collinea-
re, quā ut ad indulgentiam flectant iratum
Principem, summāque imperij retineant
in manibus, abusuri deinde in religionis per-
niciem. Cum hæc, & plura in eam rem disce-
ruiſſent; tandem ad ea quæ deliberare iussi
erant consilium dirigunt. Duo omnino hæc
erant; quo comitatu, & quo tempore conce-
dendum esset Regi in prouincias. Albanus,
& FERIA, nec alias sat concordēs, tunc & æ-
mulī, in duas sententias concilium distrahe-
bant. Bello alter, sed alter pace longē præ-
stantissimus. Si armatus proficisceretur Rex,
omnis vis & gloria penes Albanum; si inermis
penes*

penes Feriam erat. Proinde id consilium, vterque in altero damnabat, quo potentia, vel imperium in æmulum recideret. Primus FERIA, *modicum agmen traducendum*, censebat; non socijs per quos transeundum esset, non provinciis graue; speciem magis fortune principalis, quàm exercitus. Non adeo desperatas in Belgio res esse, ut tantis viribus sit opus. Incipientem adhuc, & nondum adultam seditionem compeisci posse in ipsis cunabulis. Percussis tumultuantibus presentia Maiestatis, redituram in animos formidinem rediturum obsequium. Quod rebellantibus Gandauensibus olim acciderat. In quos Carolus Caesar nullum hinc traduxit exercitum. Remedium omne in celeritate posuisse. Regem verò eadem vestigia ingredi volentem, tot armatorum apparatus haut dubiè retardaturos. Multis Proceribus fidem constare. Atque ubi ille vim fortunamque principatus ostentauerit, neminem contra hiscere ausurum. Sin armis prouocaretur, esse conscriptas in Germaniâ, esse ve-

reranas in Belgio legiones. Adhuc ingentem stipatorum numerum, quos ad custodiam sui hinc educturus est. Maioresque copias euocari posse rebus exigentibus. Nihil aduersus hac tentaturum inconditum vulgus, implendis campis duntaxat idoneum. Sin autem nemo obsisteret, quid attineret tantos sumptus, quibus alendo exercitui esset opus, inutiliter profunderet? Non ad hostes ire sed ad ciues, non ad imponendum iugum, sed ad emendandam disciplinam proficisci; cui rei tot millia non conducerent; at bonas artes, quae satis superque Regi suppeterent. Extrema remedia nisi desperatis rebus tentanda non esse. Neminem non videre, ad tot aduentantium millium famam armaturos se rebelles, qui tantum exercitum instrui intelligent in suam perniciem. Ita bellum oriturum, ubi non sit bellum. Pacemque futuram bello tristiore, tot legionibus prouincias onerantibus, bonosque pariter ac malos eadem calamitate inuoluentibus. Equum non esse paucorum amen-

tiam

tiam omnes luere. Suo quémque insanire periculo. Bonos principes non punire, qui nihil deliquerint; armatos non facere, quod infermes prestare possunt. Castigationem paucis necessariam, feralem omnibus fieri non debere. Vulgus enim quamprimum novitatem suam peruvicacissimorum ultione damnatam aspexerit, reditutum ad naturam; cuius furor perinde cum fortunâ mutatur, ac religio cum principe. Ad ea Albanus accerrimus armorum instigator differuit. Quod si in compositam regionem, & securâ pace fruentem concederet Rex, nescio an suasurus adhuc fuerim, ne ullum omnino armatum traduceret. Sine cuius fulgore, non externi, non ciues maiestatem agnoscunt; pace & bello tutissimum presidium. Nunc verò praevalida & adulta vitia, nunc animi seditionibus elati, levioribus remedijs coërcendi non sunt, quàm magnitudo morbi postulat. Repetamus memoriâ, quoties à rebellibus illis iactatum sit, centena millia obiecturos se vim audentibus. Ego tot millia,

furentibus non opponam: sed egregium iustumque exercitum, ex veteranis, expertisque conflatum, qui sciat servare ordines, obsequi duci, hostem ferire, non expauescere. Ut hoc terrore percussi rebelles, confestim arma excutiant. Cum vires suas, non disciplinâ, non virtute, ac ne copijs quidem pares, aestimare incipient. Cum se tyrones intelligant, nec ullis magis quam hospitibus metuendos milites in aciem producere. Primis statim auspicijs debellandi sunt, ut opprimi malum cum dignitate possit. Hoc ad gloriam Regis maximè pertinet: Insitâ mortalibus naturâ, famam belli ex initijs metiri. Nam si in unam, atque alteram astatem bellum Rex extraxerit, quis non videt accessuram hosti disciplinam, et robur; et tunc non sine difficultate, nec absque periculo subijci posse? At enim nullum adhuc in Belgio ardes bellum. Quis tamen pacem esse dixerit? Quis nobis pollicebitur in eodem statu res mansuras, quas ipsa quoque Gubernatrix perscribit cottidie in peius vergere. Quid si exter-

norum

norum auxilia à seditiosis sollicitentur, quod toties minati sunt se facturos? Tunc scilicet in tempore accersemus militem, cum instructi exercitus nostris imminebunt capitisbus. Tunc nempe salutem suam crediturus est Rex veteranis in Belgio legionibus, pari scelere contaminatis. Quibus ex meâ quidem sententiâ, quamprimum appulerit in prouincias, cingulum adimendum est. Transeunda sunt denique externa nationes, religionis odio imbutæ, & à sectarijs Belgicis forsan exstimulatæ in exitium Regis, quem sibi imminere extimescent. Illa copia quacumq; perrexerit, securum eum efficiet. In omnem sanè casum, seu restauranda pietati, seu exequendis statutis & supplicijs, seu supplantandis, vel anteuertendis furoribus commodissima. Scilicet egregiâ curâ timemus vastitatem terrarum, & incommoda exercitus. Nemo mihi communem calamitatem obijciat, in communi omnium flagitio. Quam mali suo meritò passuri sunt; Boni verò quia malorum conatibus arma non opposuere. Imputare sibi debent si quid

detrimenti ab armatis acceperint. An ideo rebelles sibi relinquiendi sunt, in ceruices Regis sui sublatis, quia bonorum condicio futura sit acerbior? Nemo unquam discordias armatus sedauit sine plurimum incommodo. Hæc est condicio exercitus. Bella aliter non constant. Quantauiß gravissimâ calamitate redimendum est exitium respublica. Inselligant Belgæ nunquam impunè contemni fastigia. Hæc oratio, simul & dicentis auctoritas, inueteratâque prudentiæ fama, magnam Procerû partem permouit. Quidam etiam addebant, metuendum esse, ne idẽ eueniret Regi, quod Gubernatrici acciderat, quæ exequi leges non potuerit, armatorum inopiâ. Nam quodd Albanum, aulæ artibus æmulos suos perueruisse Connestagius tradidit, apertum est mendacium, & in odium eius adumbratum. Cuius moribus multa in deterius posteritas adfinxit. Nullam ego hac de re mentionem apud Tissenacquiû inuenio, è cuius commentario hæc transumpsimus. Nam nec Iacobus Spinosa Inquisitor Generalis, nec Bernardus

ardus Fresneda Regi à confessionibus Concilio interuenire. Tantum abest, vt alter eorum infestis orationibus cum altero certauerit, quod idem auctor memoriæ prodidit. Quæsitum inde quo tempore Rex proficisceretur. Alij velocitatem vrgebant per Oceanum cum paucis nauigijs. Sed hoc consilium minùs Hispanis, quàm Belgis placebat, *Oceanum bodie intutum*, dicentibus, *Belgicorum sectariorum metu*, portus omnes *insidentium*, quos *occlusuri essent armatis in exitium sui appulsuris*. *Securissimum per Italiam pergere*. Sed *Italiam perpetuo præruptarum alpium iugo clausam*, non nisi *duobus aditibus exercitum transmutere* Quorù vno per *Tridentinas angustias Germania intranda sit*. At *Germaniam ex maximâ parte corruptam*, ac *suspicionibus obnoxiam*, securitati Regis non conducere. Eundem ergo esse per *Sabaudiam*. *Illam verò asperorum montium scabredine impeditam*, *hybernisque niuibz obfessam*, ante veris initium iter non promittere. Proinde *utcumque festinare*

Rex

Rex velut, Februarium mensem habendum esse. Neque etiam citius impedimenta ad tantum inter necessaria expediri posse. In calend. Decemb. conuocatos esse Castilia Ordines. A quibus abesse Regem non oporteat. Præterea agendos militum delectus, petendas triremes ex Italiâ. Dum componuntur, reficiunturque sublapsa vetustate naues, aliquot mensium spacium esse. Vernū deniq; cælum clementiores fluctus promissurum nauigantibus.

Hæc igitur in eum modum decreta, x. cal. Octob. referuntur ad Regem. Qui naturâ reconditus, & multa cum animo reputans, tunc quidem nihil respondit. Paullò post Albanum exercitui præfecit. Erat hic nobilissimo Hispaniæ loco genitus, virtute militari nobilior. Acer consilio, manu strenuus, experimentisque clarus, & suorum temporum nulli secundus. Quod de illo quoque inimici confessi sunt. Multa sub Cæsare, & Philippo filio prosperè gesserat, magnis præpositus exercitibus. Fortunam nunquam temerè in discrimen vocauit. Cauta cum ratione

tione consilia, secundis euentu præferebat, disciplinæ militaris diligētissimus custos. Bello, quàm pace melior. Vincere magis, quàm victoriam regere. Fredericum deinde Albani filium magistrum equitum Rex dixit. Hispanorum præsidia ex regno Neapolitano, Sicilia, & Sardinia Genuam accersit. Quatuordecim cohortes in Hispaniâ legi iubet, in veteranorum locum ituras. Alias præterea tres cohortes, quas secum abduceret. Alberico Lodronio assignata est Germanorum legio, quam in comitatu Tirolensi instrueret. Lupo Satapa centum velites Italicos, totidem Sancio Dauilæ Ticini præfecto; Petro autem Montagnes Nouariæ gubernatori centū cataphractus Hispanos attribuit. Trecentos hastatos, cum centū cataphractis in Burgundiâ componi curat. His Baronem de Vergij provinciæ Vicegubernatorem, Baronem de Cherau, dominum de Cleraux, & dominum de Momertin præposuit. Italicis ducibus præceptum, veteranorum velitum, longâ pace, imminutorum, supplementum conscribere.

Ioanni Andreæ principi Doriæ, quantas posset triremes comparare iussit, atque ocius compellere in Berzeloniæ littora. Epistolam deinde ad Gubernatricem dedit in hanc summam. *Primo vere me expecta cum exercitu. Non ut solitudinem provincys, aut iugum inferam, quod plerosque criminari intelligo: sed ut patrocinium meorum armatus suscipiam. Inermis enim venire non possum, nisi ut externorum iniurijs dignitatem aperiarn. Si tranquillitatem alere, non bellum volumus, terrore aliquo rebelles percellendi sunt, infirmitatem suam conferentes meis viribus. Hæc mihi ratio fuit instruendi exercitus. Re ipsâ docebo, non ad ultionem me consurgere: sed ut clementiam cum subditis communicem, haut aliter quàm principem, & parentem decet. Gratiâ eam facturus, quàm publica pax, atque securitas patientur. Hæc te confestim volo mittere in populum, bona & mala magis ex rumoribus, quàm ex vero aestimare solitum. Cuius aures seditiosissimorum voces falso terrore præ-*

occupant. Gubernatricem præterea monebat, vt quantâ posset cautione, nobilitatem interim cum multitudine contineret in officio. Et si videretur, legionem vnâ in Germaniâ mercede conduceret, quam Megemo, & Arenbergio traderet, spargendam in idonea præsidia. Pecuniam quoque adiecit in stipendium. Dein fluctuare animo cœpit, an & Auriaco militem crederet. Siquidem popularibus acceptum, & vicinorum principum affinitate, atque amicitia subnixum, turbandis rebus idoneum nouerat. Adhæc multa imprudenti excidisse, quibus obliqua eius in Regem consilia deprehenderentur, & auersi animi indicia. Sciebat denique peccasse in maiestatem. Suspectum tamen videri nolebat. Sed cum Megemo, & Arenbergio copias militares committeret, Auriacum præterire non poterat, nisi vt videretur de ingenio illius diffidere. Nam Hollandiam, Zeelandiamque iuxta armis contineri, ac Geldriam Frisiâque pacis intererat. Ha-

bito itaque amicorum consilio Gubernatrici mandauit, nihil consultius, quàm quinque cohortes Auriaco submittere, quibus chiliarchus Walderfingerus præesset, refractarius & contumax futurus ad illius imperia. His consilijs Walderfingerum secretò imbueret. Dicta factaque Auriaci specularetur, & ab omni metu suspiciōem eius auerteret. Iisdem artibus Egmondanum placaret. Præfectos Ordinariorum militum rogaret, an sine exceptione ad arbitrium eius militare, & eosdem hostes habere vellent, quos ipsa iussisset. Si quis eorum condicionem detrectaret, ademptam huic præfecturam, alteri conferret, ne stipendia peruenirent ad indignos publicum ararium lassantia. Adhæc magnatibus illis à quibus litteras acceperat, aduentum suum nunciavit, missis ad singulos codicillis. Auriacum denique & Egmondanum beneuolè hortatus est ad officium. Tissenacqui-
us simul Egmondano rescripsit: *Malignitatem fama rebus ipsis rectius confutaturū. Compararet se ad voluntatem Regis, nec imperio eius*

eius dubitaret accedere. A quo planius mādandum expectare non deberet. Alia esse principum, alia clientum officia. Illos providere & regere. Clientum gloriam in obsequio consistere. Haberent sibi reges suam rationem, In quam subditis nefas esset inquirere. Si in consilio publico aliquando contraria dixisset, integrum fuisse Regi à sententiâ eius recedere; quod se prudentiorem nemo habere debeat. Apud illum electio est & imperium; ceteris consilium & obedientiam convenire. Misceri hac officia non posse, nisi ut pereunte imperio, obsequium intercidat, atque ima summis confundantur. Ne famam quidem dissimulare, sectariorum audaciam potuisse prauerti, si vel ipse, vel Auriacus expleuissent officium. Sed & nunc in illorum esse potestate, furentium licentiam aut omnino frenare, aut saltem in aduentum Regis comprimere.

In his consilijs occupato Regi, transitumque Alpium paranti, aliæ atque aliæ itineris difficultates cottidie suggerebātur. Mouebat plerosque angustiarum asperitas, præruptis

altissimisque rupibus abscissa. In quarum vertices euadendum esset cum exercitu, per arduos præcipitesque vallium anfractus, qui paucos admodum caperent armatos, & cumulatam hyeme niuem transitoris promitterent. Deleri posse totum exercitum, si quis fatigatis atque incompressis, & nihil hostile metuentibus vim inferret. Nec deesse circum nationes Regi infestas, & sectariorum causæ astrictas. Alij sterilitatem, & inopiam regionis, alij frigus, & multorum dierum lassitudinem causabantur. Quibus difficultatibus Rex permotus, sibi atque exercitui transitum à Gallis petere constituit. Expeditum esse iter appulsuro in Prouinciam, haut procul Toloniâ, quâ Caroli Cæsaris exercitus quondam traiecerat; quod per regionem Lugdunensem breui compendio in Burgundiam deducit. Igitur Franciscus D'Alaua Ordinarius in Galliâ legatus, Philippo mandâte hac de re cum Gallo egit. Responsum est ei: si quid Philippus Rex vellet, licere illi cum modico præsidio Galliam trajcere. Iter autem
exerc-

exercitui patere non posse. Frequentes in eâ regione sectarios esse. Magnitudine exercitus perterritos, & molestijs hospitij affectos, multitudinem concitatueros ad arma. Quæ sine magno incommodo ipse postea non excuteret.

Hæc in speciem. Cæterùm Reges inter se æmuli, nec vnquam satis amici, alterutrius exercitum intra fines securè nō recipiunt. Desperato per Gallias itinere, Philippus Rex ad Sabaudiam rursus intendit, Ioanne de Aragna Vela ad Emanuelem ducem misso. Haut ægrè ab illo impetratum quod petebatur. eâ tamen lege, vt centum equites, bis mille pedites Philippi Regis ære meritori scriberentur, in regionis suæ custodiam, ne quid incommodi ab exercitu incolæ acciperent. Antonius Mendoca à Carolo Lotharingæ duce transitum sine exceptione obtinuit. Franciscus d'Yuerraannonæ præfectus ad dispensanda itinera præmissus, dispositas stationes commeatu instruxit. Rhodanum Dainsumque nauali ponte iungere instituit, quo in
Bur-

Burgundiam transportari posset exercitus.

Interea Belgæ longè alijs cogitationibus inquietabantur, atrocitate famæ pulsati. Ferebatur enim cædes imminere à principe Proceribus infesto. In Auriacum, Egmondanū, & Hornanum gladio animaduersurum, cæteris iudices daturum, & supplicia. Auriaco pleraque nota, & suspecta omnia erant. Itaque ut hac dere certior fieret, disponit in Galliâ custodes, qui veredarios ex Hispaniâ remeantes, ereptis litterarum fasciculis occiderent. Consiliū eius fortuna sic gubernauit, ut Francisci D' Alaua legati Regij epistolas interciperet, ad Gubernatricem datas in hæc verba.

Ex his que scripsisti opinionem meam confirmari cognosco. Ego enim tumultuum omnium inuidiam in Proceres transfero, utcumque nunc tam egregiè dissimulent. Horum machinis inquieti populi genius in audaciam sublatus est. Quos proinde accusare non desino. Sed ex commendatione tuâ premium inuenient. Primi omnium futuri, in quos fertur ira Regis, ut supplicia expetat. Memento

inte-

interim cum his dissimules. Prebe te facilem credulis, & de beneuolentiâ Regis securos efficias, ut fides tue concedere non dubitent. Sic enim qua destinasti, efficies. Ita à me habere; si tibi supplicia eorum sint in animo, eò magis Regi curæ fore, quò hanc ille iniuriam profundius imbibit. Epistolâ perlectâ, Auriacus nouitatem facti stupens, Ludouico fratri atque Hoochstratano communicat. Vnicum aduersus impendens fatum remedium videbatur, matura defectio. Cui rei conducebat Egmondanum in societatem attrahere. Eundem strenuum militiâ, Flandriæque viribus instructum, partibus suis commodissimū nouerant. Auriacus ergo Egmondano significat, esse sibi ad communem salutem, pertinentia, quæ nisi præsentī promere non posset. Diem & locum colloquio condiceret. Bruxellam solam excipere. Vbi Ludouico fratri esse non liceret, à Gubernatrice, iussu in Germaniam secedere. Igitur vi Non. Octob. Teneramundæ Flandriæ oppido, in vnum conuenere Auriacus, Egmondanus,

Neminem principum hodie tam amicum Regi, qui magnitudinem illius non optaret premi, potentiâque Europa formidabilem, civili bello collidi. Sectariorum igitur insolentia subministrarent alimenta. Quos deinde in eâdem secum causâ, spe gratie destitutos, & extrema audentes, exercitus Regis ad desperationem obijciant, dum finitimarum gentium subsidia orrentur. Affluxuros statim Gallos, atque Germanos, nihil veteranis Regis virtute concedentes. Ludouicus Nassouius subiecit; spondere se Germanorum equitum quatuor millia. peditum verò quadraginta cohortes, quos corasis vndique pecunijs in Belgium properè adduceret. Sollicitaturum denique copias Augusti Saxoniae ducis, Cæsareo auspicio Gotham obsidentes. Ne cæteri quoque dubitabant, indormiendum non esse in manifestâ pernicië; neque expectandum donec validissimas urbes presidys inuaserit Rex, & sopitis sibi manus injiciat. Decora consilia, qua tuta. Potentiam quidem

Regis formidolosam, acriorem tamen necessitatem esse, & incertos belli exitus. Neque semper ad potentiores inclinare victoriam. Gallos non usque adeò infeliciter delibasse Regis sui vires. Opimiorum condicionem extorsisse armis, quàm obsequio. Dandum Regi pœnitentia tempus. Impetum eius quantò vehementiorem, tantò & infirmiores esse, quem inopia pecunia statim consumeret. Denique multos nobiles sibi accessuros, cum indignius forte habiti, erubescunt certare aduersus libertatem publicam, pro inuidioso Hispanorum imperio. Vrbes, prouincias sibi ut rectoribus obstrictas. Incumbere se affectui ciuium seruitutem abominantiū. Ad ultimum si cadere necesse esset, honestius acie perituros, quàm sub certo licitoris ictu velatis capitibus, ad posterorum infamiam. Inuidiosum Regi, decorum ipsis pro spiritu certare, quo nihil mortalibus charius est, quem etiam fera antequam debellata non exuerent. Hæc quidem promiscuè dicebantur. Vnustamen Egmondanus segni animo accepit. Vir

haut

haut dubiè, spectatæ fidei; sed ingenij facilitate in partes abstractus, si dicere licet, nimia bonitate hactenus peccauerat. Ordinis sui factiosis consilijs, quia speciem præferebant publicæ libertatis pertinaciùs adhæserat, pudore aduersandi; ne multitudinis gratiam beneuolentiámque amitteret. Tunc palam constantiam patefecit: *ita formatum se à maioribus, dictitans, ut nihil pulchrius atq; honestius duceret, quàm pro Principe vitam exponere: nihil econtra turpius aut scelestius, quàm fidem exuere. Contumaces autem esse, aut sectariorum licentiæ alimentum subministrare non posse, sine notâ perfidiæ. Quantò plus spei rebellando ostenderent, tantò illustriorem fidem suam fore. Quin potiùs irati Regis gratiam prauenerent premendis tumultibus. Plerosque nobiles idem tentare. A quibus obsequio vinci non deberent. Ut deinde Rex æstimet, qui gloriosius officia coluerint. Ut cumque res casura esset, meliorem fortunam tranquillando, quàm rebellando habituros, quando vincere, aut vinci non possent sine*

exitio reipublica. Cateri quâ vellent ratione, incolumitati consulerent sua. Propositum sibi esse expectare potius, quàm mouere fortunam, & in benignitate principis spem ponere, beneuolentiam eius toties experto. Neque de ingenio Gubernatricis dubitare. Nullis se urgeri conscientia stimulis. Quo denique fugam intenderet, à charissimâ coniuge, à tot liberis diuulsus? Totam suam fortunam pendere ab uno Rege: quem pertinacibus armis irritando, implacabilem sibi suisque relinqueret. Erraturum se exulem, atque extorrem, recipientibus oneri, externisque Principibus vilissimum mancipium. An tam immitis animi Regem fore, ut pro tot meritis hanc sibi gratiam rependeret, & in charissimi antea capitis duraret exitium? Quocumque tandem esset animo, clementiam eius meruisse victorijs. Vanitati D'Alaua tantum non deferre, ut apud se fidem inueniret. An solus ille explorasset mentem Regis, & in secretiora illius penetrasset consilia? Nullius
alte-

alterius indicium proferri. Ex Montigneo quidem iratum esse Regem satis se intelligere. Neque immerito. Nemo tamen ideo dixerit Proceribus infestum, quos tantâ humanitate admonuisset officij. Si quid certè statuisset atrocius, id ipsum vni Gubernatrici editurum fuisse sine internuncio. Hæc quidem Egmondanus. Cæteri tamen non dubitabant, quin certissima proferretur indicia. Auriacus quoque, Suspectam sibi altissimam Regis dissimulationem, aiebat. Neminem Principum tam placabili esse ingenio, ut bona fide in gratiam redeat cum subditis, quos semel timuerit. Facerent alij quod placeret. Neminem se potestatem in caput suum facturum. Nunquam magis blandiri fastigia, quàm cum seuire decreuerint. Securius se absentem quàm in vinculis causam dicturum. Hunc finem habuisse conuentum illum inuenio, Egmondano fatalem. De quo plerique postea ab Albano torti, atrociora confessi sunt. Atque anceps quidè est coniectura. Quia hoc se mendacio liberasse cruciatu, morientes testaban-

stabantur. Nos aliorum iudicijs veritatem relinquimus. De cetero propè omnes scriptores mecum consentiunt. Auriacus & Hoochstratanus Antverpiam reuecti sunt. Neuter Bruxellam venire sustinuit, quamvis crebris litteris euocarentur in Concilium. Egmondanus intrepidè ad Gubernatricem delatus, quæ de illius consilij traducerentur, ex epistolâ cognoscere iussit. Simul enim contulerat exemplar. Illa veluti turbata, nullas conscientia notas vultu prodidit. Dolentisquæ speciem ostentans, falsum esse rumorem sanctissimè confirmavit. *Quasi verò*, inquit, *mibi, aut D' Alauæ crediturus fuerit Rex tam periculosum secretum? Quomodo tamen D' Alauæ epistola intercepta est, cum non veredarium, non fasciculum ipsa desiderem? An qui D' Alauæ epistolas interceptit, Regias non caperet, quæ ab eodem tabellario deferebantur? Laxa animum molestâ sollicitudine nec inanes species anxiâ mente figura. Confer te ad componendam rempublicam, ut si quam forte sinistram suspicionem conceperit Rex, ex animo deleat sine cicatrice.* Egmon-

Egmondanum verbis mitigatum, percunctari cœpit de his qui Teneramundæ conuenissent, & quid actum in isto consilio. Ille nihil aliud referebat, quàm non perfunctoriè queri Auriacum de maleuolentiâ Regis, & quòd Ludouicum fratrem ablegare iussus esset in Germaniam.

Dimissus à colloquio, in Flandriam se recepit. Quadraginta aureorum millia, ab Ecclesiasticis impetrauit, in stipendium mille & quingentorum militum. Quos per idonea præsidia disposuit. Extra Gandauenses, Iprenses, & Aldenardenses concionandi potestatem nemini fecit. Hulstenses concionari ausos militari manu coercuit. Totamque prouinciam quietiorem expertus, Iconomachorum facinus rigidissimè vindicauit. Sectarios verò sub legibus continuit. Gandauenses concionaturis Ministris suggestum struere ausos, accensis in foro rogis ad dedecus, & infamiâ exurere iussit. Parua quidem res. Sed in minimis quoq; exemplum eminet. Neq; in his quisquā vindicem
Ecc manum

manum remittere potest, nisi ut ad maiora scelera audaciam instruat. Quidquid ad dissolutionem status pertinet plectendum est. in cæteris clementiam excuso. Apud omnes constat, si ab initio tam seuerè egisset, nunquam peruentum fuisse ad tantū nequitix. Sed cum etiam primū per dissimulationē corrumpit: mox ignauia ac præpostero obsequio, dum inuidiam Coniuratorum procerūq; euitare studet, maiestatis crimē meruit. At perperam vni illi imputauerim culpam, quæ temporū fuit.

Inter quæ non omittebat Noircarmius crebris litteris condiciones offerre Valencenensibus, si positā peruiciaciā præsidium reciperent. Ad vltimum nobile quendam Coniuratis ad eosdem delegauit. Sed cum obstinantiæ ciuium mentes sanioribus consilijs aures obstruerent, Gubernatrix hostes esse pronuntiat. D' Alauam deinde temeritatis increpuit, quod tantā rem credidisset veredarijs. Si quid eiusmodi denunciare vellet, debuisset fidum aliquem tabellarium ad se destinare. Ad hæc Philippum comitem Euersteinium, & Bernar-

ardum

ardum Schoonbergium in Germaniā proficisci curat, traducendis in Belgium duabus legionibus, quas in comitatu Ferettrio conscripserat. Prouinciales quoq; copias ampliori delectu adornatura, Carolum Mansveldium, Ægidium Barlaimontium Hierges dominū, Ioannemq; Croyum Reusij comitem, tria perditum millia legere iussit. Megemum verò, & Arenbergium supplementū conscribere. Ergo vndique tubæ & tympana cogeant milites, ad obsidionem Valencenensem ituros.

Quibus apparatibus Gallus regio more ad suspicionem versus, & ipse delectum agere instituit. Sex millia Heluetiorum mercede conduxit. Statariā pugnā gens egregia, per multorum regum seriem venales vires Gallis exposuit; ex quo à Carolo Burgundiæ duce ad fortitudinem coacta, virtutis suæ experimentum dedit. Maiori metu Geneuenses distinebantur. Ex hac ferè officinā hæresiarchæ omnes eruperant, aut in illam recipiebantur. Et hinc virbis suæ exitium, publicæ paci deuotum coniecerant. Cuius possessioni

Sabaudus haut obscure imminebat. Itaque delectu habito, milites distribuunt, qui intra mœnia, qui in finibus consisterent. Partem quoque Heluetiorum atque Rhætorum, ad auxilium ex fœdere obstrictam, exciuerē sedibus. Ea cum nunciarentur Philippo Regi vehementer expalluit. Timebat enim ne tot simul gētes arma sibi opponerent, angustijsq; Alpium inclusum ex improviso adorirentur. Et iam primores eum incitare cœperant, ne temeritati fortunæ Maiestatem exponeret. Præmitteret Albanum terristri itinere cum exercitu; primo statim aduentu validissimis præsidijs infessurū ostia maris Zeelandicâsq; insulas, vnde ipse Oceano succedens in portus tutò recipi posset. Re deliberatâ, Albanum cū copijs præire iussit, tanquam mox successurus ipse. Quod initium fuit malorum omnium. Neque tamen damnari consilium poterat, si Rex præstitisset sequi. Sed tædio belli, & auersantibus ministris in Hispaniâ retentus, omnia per duces facilia credidit, quæ nisi præsens componere non poterat. Sunt
qui

qui Gomeſij de Silua artes ſuſpectent. Erat ille in aulâ gratioſus, Regique chariſſimus in paucis : ſed per æmulationem Albano aduerſus. Ut potētiam omnem ad ſe traheret, remouiſſe æmulum credebatur, publicæ utilitatis ſpeciem odio prætexens. Nam Albanus impudicitiam vxoris ei obiectauerat, tanquam matrimonio illius Philippus illuderet. Nobis ea res parum comperta eſt. Quidquid ſit, non ante patuit imprudentia conſilij, quàm peruiſſe Rex abſentiâ cunctos fruſtratus eſt. Cæterum in regionem Luxemburgenſem, quâ Albano intrandum erat, Erneſtum Manſveldium procedere iuſſit. Militem, quantum opus eſſet, legeret. Præfecturam Germanorum equitum, quam Gallico bello habuerat, eidem attribuit. Bruxellæ, dū ille abeſſet, Arſchotanium, aut Boſſutium præeſſe voluit. Megemū verò tormentis præfecit, quam Glaionius dignitatem, per mortem vacuam fecerat. Maſtri artillariæ apud Belgas vocantur. Cuius munus idem eſſe, quod apud Romanos olim præfecti fabrorum plerique

existimant. Absente Megemo, Arenbergium Geldriam regere iussit. Barlaimontium verò præposuit annonæ militari. Idem munus bello Gallico cum summa laude administrauerat. Adhæc ducenta aureorum millia transmisit ex Hispaniâ, è quibus centum & quinquaginta in stipendium cederent, cætera in apparatus belli impenderentur.

At Valencenēses hostes iudicati, fortiter obsidionē ferre decreuerant, munimentis ciuitatis confisi. Igitur nihil segnius parare bellum. Affatim comēatum in urbem inuehere, arma cunctis qui ferre possent distribuere, recensitos opifices (quorum magna copia erat) in cohortes distribuere, ferocissimum quemq; his imponere. Optimates rempublicam destituerant. Cæterorum tamen amentiam sequebatur, quia aduersari non poterant. Michaël Helinus, & quidam magister Cornelius regnum obtinebant in multitudine. Helinus auctoritate & opibus eminebat: Cornelius vanitate & ferociâ. Obscurissimo loco genitus, ex fabro ferrario in Ministerium surrexerat. Agrestes nouis rebus addictos cōscribere iussus,
in fi-

in finibus Insulensium delectum fecit. Eam rem præfidiarij ciuitatis ægrè passi, cottidianum cum his prælium, & ferè prosperum habuere. Tot incommodis Cornelius atteritus, promouit ad ignobilem pagum Kesenetum nomine, omnibus qui sacramentum eius acceperant sequi iussis. Quadringentos ex his Rassegemius obuiam habuit, solutis euntes ordinibus. Impressione factâ compulsi sunt in fugam, proximûmque Waterloo templum occupant. Hinc sine damno eijci non poterant. Rassegemius igne tectis iniecto vniuersos concremauit.

Cornelium inde persequi cœpit. Cæterum ille comperto Rassegemij aduentu, castrisque diffusus, ad Tornacenses flexit. Nam & hi non minore curâ, quodam Ioanne Sorao duce militem scribebant in suis finibus; nullo quidem publico consilio: sed studijs partium, Valencenenses premi non ferentium. Huc maiorem hominum vim insania compulerat. Copiisque iunctis, proxima quæque monasteria, & prætoria vastant. Nihil crudelitati, aut auaritiæ reliquum faciunt. Raptis omni-

omnibus quæ ferri poterant, flammam deinde tectis iniiciebant. Sed Noircarmius, & Rassegemius à tergo strenuè sequebantur. Mille ducentos pedites Noircarmius habebat, cum trecentis equitibus. Rassegemius equites centum, pedites non amplius quàm trecentos. Præter eos tamen magnam agriculturalum manû contraxerat. Prior Noircarmius haut procul Lanoio hosti occurrit. Equitibus à tergo circumfusus, pedites à fronte incubuere. Vtrique vis improuisa fuit. Primo statim impetu centurio ex Noircarmianis cecidit, in fronte copiarum collocatus. Mille, & quingenti hostium cæsi, reliqui in fugam versi. Quorum magna pars proximam occupauit siluam densis arborum truncis impeditam. Maior pars in Rassegemium incidit, infesta signa inferentem fugientibus. Prælium tamen acriter sectarij excipere. Eò enim peruentum erat, vnde sine pernicië nisi victores euadere non possent. Itaque aut cadere aut vincere obstinati, loco non cedebant; donec ad Rassegemios inclinauit, victoria. Soraus non tam ducis, quàm militis

fun-

fungebatur officio. Sed cùm vnum illum omnes peterent, multis quidem acceptis vulneribus, & in equum impositus, cum paucis Tornacum euasit. Ibiverò non minus trepidatum est. Philippus Lalaingius Beauuosis dominus quadringentos milites, iussu Gubernatricis in arcem traduxerat. Centum in his equites erant. Noircarmius quoque cum suâ manu eòdem venit. Urbique pauidæ, & seruitio paratæ signa intulit. Nemine contra procedere auso. Quippe ex superiore prælio profugi, formidine cuncta compleuerant. Neque tot simul copijs sine certissimâ perniciæ resistere poterant. Ciuibus statim arma adempta sunt. De principibus seditionum sumptum supplicium. Cæteris venia data, prudenti moderamine, vt in ciuili victoriâ, cuius sæpe fructum nimia seueritas corrumpit. Comes Reusius ciuitatem gubernare iussus, legiõnem quam conscripserat, dispersit in hospitia futuram præsidio.

Noircarmius Hiergicam & Mansveldicam legiones opperiens, ijsque iunctis, Valence-

nenſium mænibus admouit exercitum. Ex omni parte obſidenti affluebant auxilia. Ab Arſchotano ducenti quinquaginta equites, totidem à Reuſio veniebant. Maximilianus Boſſutij comes ducentos adduxit. Terlonius centum, nec minorem numerum Bommius impleuerat. Marchionis Bergeniſis turma ducentos admodū, Montignæi centum & quinquaginta explere dicebantur. Ordinariæ turmæ omnes erant, quas Gubernatrix haut multò ante armari præceperat. Pedites veterani ex Hannoniâ noningenti veniebant. Paulò minùs Balduinum Gaurium Inchiſi dominum ex Artheſiâ ſequebantur. Reuſius trecentos ex ſuis tranſmiſit. Poſt quos viginti & vnum tormenta trahebantur. Iacobus Creſſonerij dominus Græuelingæ Gubernator ijs præerat. Vrbis vallo circumdata eſt, & idoneis locis tormenta diſpoſita. Noircarmius tamen aſperam fore obſidionē ratus, priuſquam fortunam experiretur, miſit ruruſus ad oppidanos, qui ſuaderent, dederent urbem, dato terrore conſternatam exſtimans

stimans. Sed non exaudiebant Ministri saniora consilia, nutantibus ciuibus spondentes, mox venturum oppressis auxilium. Nam plerosque Coniuratorum acceperant bellum instruere.

Siquidem Auriacus turbandis rebus intentus, & vt tectius falleret simulato obsequio malignitatem regens, cum Regem haut segnem videret, ex aduerso consilia struebat. Tholousij dominum, & Brederodum clam hortabatur ad legendos milites. In eam rem consistoria stipendium capitatum conferebant. Hollandiam Zeelandiamq; adoriri statuerant. Et si destinata prouenissent, duces se dicerent sectariorum causæ, & armato Regi vndarum obices pro vallo obijcerent, cum non mediocri præsidio. Superuenire debebat Ludouicus Nassouius cum Germanorum manu, ab obsidione ciuitatū auersurus Hispanorum exercitus, aut si vis fieret, fortunā tentaturus. Tres è Coniuratis in Zeelandiam destinabantur, qui factionis suæ homines sollicitarent ad defectionem. Quippe

plerasque vrbes descituras crediderant, fraude magistratuum, quorum multos Auriacus subuexerat. Adhæc Gallica auxilia occultis nuncijs pellexerant. Quibus mandatum, vt Dolam atque Vesontionē in Burgundiâ tentarent insidijs, atque Albano aduentanti iter occluderent. Missus Antverpiam à Montmorantio Galliæ Marefchalo quidam nobilis, multa cum Hornano secretò transegit. In quam rem Carolus Slufanus mercator Antverpiensis, quinquaginta aureorum millia, Montmorantio addixit.

Inter quæ studia, Proceres à Gubernatrice aduocabantur ad nouandum sacramentum. Hoochstratanus multâ cunctatione; Auriacus, Hornanus, & Brederodius apertè detrectabant. Et Auriacum quidem Gubernatrix humanitatē litterarum sæpius interpellauit. Ad Brederodium verò, Quarebbius Louaniensium prætor, & Secretarius Torrius missi sunt cum mandatis, & questu: *vt sacramentum quod Egmondanus, Arschotanus, Mansveldius, Megemus, Barlaimontius,*
dedis-

dedissent, non dubitaret accipere. Vnum ipsum esse, in quem potissimum sceleris sui invidiam inclinarent Sectarij. Debere hanc à se amoliri infamiam. Tantundem populum credere, quantum re ipsa ostenderet. Inquisitionem & edicta sublata esse. Solidam tranquillitatem Gubernatricem sperasse. Qua per sectarios haberi non posset. Ab ipso officij in Regem prodendum esse exemplum: ne oblatione libelli, seditionis causam quasisset, videretur. Gravioribus quàm antea tumultibus agitari rempublicam. Viannam ab eo militibus insidari. Vallo manibusq; claudi. Seditiosos aliquot libellos auspiciis eius excusos. Ne Regem sibi irasci cogeret, populares hos furores audientem non satius a quo animo. Adea Brederodius respondit. Nihil euenisse cur de fide sua dubitare Gubernatrix debeat. Imo verò Bruxellam iturum, ut propius acciperet dissidentia causas. Rata enim pacta esse, quae cum Gubernatrice susceperit. Quòd malignis rumoribus oneretur, id sibi fraudi esse non debere. Linguas hominum frenare non posse. Neque

nunc primum calumnijs peti. Quarum sibi non sit reddenda ratio. Malè autem conditionem sacramenti sibi præferri, quod Egmondanus, Arschotanus, aliqꝫ recepissent. Illos publicis muneribus excultos: se verò priuatū, & olim iuratum. Quid ergo opus nouo sacramento, si iurato non credatur? Frustra ab eo fidem expectari, qui sanctitatem religionis semel polluerit. Nullo sacramento mitigari perfidiam. Viannam latrocinys expositam vallo cingere. In cuius etiam tutelam militarem globulum conscripserit, ut integram ciuitatem seruaret Regi, ne quis Prado illò munimento receptaretur. Quòd ad seditiosos pertineret libellos, nihil se scire. Duos omnino typographos Vianna esse. Imprimendi facultatem dedisse petentibus. Si quid dolo malo deliquissent, mox cogniturum, pœnasqꝫ irrogaturum comperto flagitio.

Cùm hoc responso reuerſi, grauem sollicitudinem incussere Gubernatrici. Quippe iam Brederodium timere cœperat. De peruicaciâ illius dubitare non poterat. Simul mæsta

Ita omnia in aulam referebantur. A Ludouico Nassouio Germanicos ad Gotham exercitus sollicitari in auxilium. Fredericum Saxonem, & Lantgrauium Hessum memores iniuriæ à Carolo Cæsare acceptæ, ultionem meditari. Cameracenses episcopum præsidij nudatū, oppido eiecisse. Præter hæc Siluæduces hostiles animos apertè induerant. Brabantia Cancellarius, ac Petersemius, vti diximus, in vrbe agebant. Multitudinisque peruicaciam in accipiendis legibus experti, Primoribus auctores fuerant, vt præsidium militare in ciuitatem reciperent Megemus quoque Legionem propius admouerat. Ea res Auriaco suspecta admodum fuit. Occulto igitur, mandato Antonium Bombergium Siluamducis procedere iussit. Erat is homo plebeius, ingenio moribusque ferox, iuxta turbidus, & religioni infestus. Nec minorem fauorem Siluæducis inuenit, quàm Antverpiæ habuerat, vbi inter sectarios principatum gesserat. Igitur captiuitatem vrbis strui questus, plebem in senatum armauit. Cancellarium & Pe-

& Peterfemium prodicionis infimulatos in-
custodiam tradidit. Neque fenatus, quan-
quam aduerfus, imperijs illius audebat in-
tercedere. Munia magistratus in se retraxerat,
& priuati iuris sui rempublicam fecerat. Tan-
tū apud vulgates animos præfidiariorum
metus valuerat, vt alienigenam, nulla magis
re quā turbulentia insignem, non dubita-
rent in ducem assumere.

Megemus autem intrandæ vrbis spe deie-
ctus, in Hollandiam contendit ad subigen-
doseos qui auersarentur imperium. Ultraie-
ctum appropinquans, nemine resistente in-
tra mænia recipitur. Igitur quæ turbata e-
rant componere adorsus, Ministros omnes
egredi iussit, suaque catholicis sacra restituit.
Brederodius aduentum eius expectare non
ausus, Viannam destituit, & in catharactis,
quibus Rheno Lecca coniungitur, castra fir-
mauit. Mox inde pulsus, Amsterdamum
processit. Munimenta ab eo cœpta Mege-
mus destruxit.

Per eosdem dies Hermannus Antuerpien-
sium

sum Minister Traiectenses ad Mosam in Iconomachiam concitauit. Quorum mox rabiem Maïseïcenses, & Hasletenses eodem auctore imitabantur. Cæterum Gerardus Groesbekius Leodiensium episcopus id ægrè passus, ad ultionem surrexit. Tria peditum millia, ac trecentos equites subitario delectu effecit. His copijs Hasletum contendens, effusum inconditè populum obuïum habuit. Eoque leui prælio intra munimenta compulso, ciuitatem circumfedit, crebrisque tormentorum ictibus verberatâ, his tandem legibus in deditiōem redegit. *Catholico ritu uiuerent. Sectarïos ciuitate eijcerent. Publicâ pecuniâ exornarent templa. Ministros, seditionisq; auctores traderent. Sumptum bellî restituerent. Muros deijcerent, quorû fiduciâ obsidionem pertulerant.* Maïseïcenses desperatâ urbis tutelâ, delegatos misere, veniam petituros. Quâ impetratâ, Hermannus habitu Franciscani assumpto, opportunâ fugâ se subduxit. Hinc Traiectum aggredi placuit. Urbem non ciuium multitudine solum, sed

211111. Ggg etiam

etiam opere munitam. Mænia enim Mosæ interfluit. Sed cùm peruicacibus ad defensionem ciuiũ animis, nulla spes potiundi oppidi offerretur, Episcopus obsidionem destituit.

Interea Gubernatrix accessione mali turbata, ex omni parte quærebat remedia. Tot simul vrbes nequibant armis redigi in potestatem. Nec Valencenæ omitti poterant, nisi vt frustrato impetu augetur defectio. Simul in rem famamque videbatur, validissimum oppidum armis subigi, cætera exemplo suo tracturum ad deditiõnem. Pudebat deinde Cancellarium & Petersemium captiuos relinquare. Ergo inter ruborem metumq; destituta, epistolas misit ad Siluæducenses, ius gentium pollutum incusans Bombergius modò in Auriacum, modò in Brederodium perpetratæ rei culpam, & in neutrum falsò, conferebat. Quippe & Brederodius Bõbergio scripserat; quamuis uterq; manifestâ inficiatione declinaret inuidiã. Gubernatrix ergo consilij incerta, apparitorem ad legatos recuperandos Siluamducis destinat. Fecialis quoq; sequi iussus

iussus, denuntiaturus bellum contumacibus. Apparitor in senatum deductus, multa expostulauit, atque intra horas viginti & quatuor legatos dimittere, aut bellum opperiri eos iubet. Horruere senatores ad hanc vocem, & perpetrati sceleris infamiae multitudinē substituant, relaturósque se ad populum respondent, apud quem nullo suo iussu captiui teneantur. Primo mane tribunos plebis in curiam accersunt. Cum quibus etiā Bombergius intrauit, popularibus studijs accinctus. Quippe iam centuriones ei sacramentum dixerant. Vni illi patulae plebis aures erant. Facundia, & auctoritas aderant, flectendique vulgum artes, quibus omnem sectariorum factionem præcipitem egerat. Quem cum senatus hortaretur ad dimittendos captiuos; insigni cauillatione apparitorē ad Siluæducenses, nō ad Calvinistas missum arguebat. Superueniēs mox populus, curiam armis circumuenit, turbidísq; clamoribus cuncta permiscuit. Quorum fiducia Bombergius clauēs ciuitatis extorsit à consule, & ne quis inuito se egredere-
tur, validioribus præsidijs portas firmauit.

Apparitorem tamen emisit incolumem, renunciare Dominæ iubens, non ante se captiuos dimissurum, quàm Brederodius id ipsum mandasset. Post hæc fecialis urbem intrauit. Bellum indicere parantem, Cancellarius absterruit ab intempestiuo consilio. Nam si arma in animo haberet Gubernatrix, id ipsum denunciare superfluum esse ius gentium violantibus. Perduelles palam iudicari non posse, sine suâ pernicië.

Hæc tum in Brabantia. Cum interim Flandri obsequio parati, iuvere quoque Regias partes collatione pecuniæ. Ex quâ nouum delectum militum Egmondanus adornauit; occidentali Flandriæ futurum præsidio; ne quis à Noircarmio & Rassegemio dissipatos, reuocaret ad vexilla, vel irrequietos sectariorum animos ad noua rursus flagitia erigeret. Quadringentos ex his Aldenardæ imposuit, qui sectarios continerent in pace, & armatorum conspectu compararent ad patientiam obsequij. Iam quippe resumpto animo Gubernatrix, occultâ inibat viam restau-

staurandæ religionis in pristinum statum. Sæctarios concionibus contentos, baptismo, communione, sepulturis, & huiusmodi ritibus in totum abstinere iussit. Tanquam hæc ipsa tabulis fœderis non comprehenderentur. Et si verum volumus, nihil aliud quàm concionandi libertatem tumultuantibus indulserat : cætera quidem hætenus tolerans ad dissimulationem coacta. Quia intempestivo tempore prohibere non poterat. Nam is rerum status erat, ut amentia popularis componi magis, quàm irritari debuerit. Quod in omni seditione optimum est remedium, si pœnitentiæ spatium iratis concedendo, pauca indulseris, quæ ab oppressis statim repetas. Proposito itaque edicto efficienem sæctariorum licentiam ad verborum suorum formulam reuocavit. Nihil æquè sæctarios perculit. Principium esse credebant, ut mox & conciones peruerterentur. Per occultos igitur nuncios Generale suorum concilium Antverpiæ indicunt. Ex singulis synagogis Minister vnus, cum præcipuis aliquot iussi sunt

iussi sunt adesse. Illuc quoque Brederodius venit, & cum illo sexdecim Coniurati delictui militum intenti, quem ex omni parte instituire cœperant. In eo Concilio sectarij Gubernatricem incusare adorti, magnoperè querebantur *peccasse in fœdera. Simulationem duntaxat fuisse ad decipiendos Fœderatos, vanis promissis extractos, ut ex voluntate eius tempus procederet, quo rebus interim consuleret suis, partâq; securitate pactarumperet. Quem enim sane mentis non videre, concionis nomine cetera quoque exercitia contineri? Nec opus fuisse legibus fœderis ea adscribere, sine quibus stare non potest ipsa religio. Scire quoque Fœderatos hanc aliam fuisse mentem Gubernatricis cum dimitterentur ab illâ. Hoc ipsum Proceres rectius intelligere, qui eandem interpretationem interrogantibus dederint, plenâque hactenus libertate frui permisissent. Iam verò ne conciones quidem inuiolatas esse, quas in oppido S. Amandi, hanc dubiè, iussu eius, Noircarmus dissipasset. Nec Ministrorum supplicis*

*plicijs abstinere, quorum alios in crucem, alios in exilium actos acciperent. At hoc nihil aliud esse, quàm in sanguinem suum exercere edicta, & atrociolem solito Inquisitionem reducere. Valencenenses praesidia in necem religionis suae conscripta repudiare ausos, obsidione premi. Eandem mox fortunam reliquis ciuitatibus expectandam esse. Quas communes hostes duceret Gubernatrix, atq; aliam post aliam aggredieretur cum exercitu; donec ecclesias suas undiq; extirpauerit. Viderent itaq; Fœderati quam hoc tutum sibi atq; honestum esset, & sine morâ principijs occurrerent. Nunquam magis afflictam religionem. Nec aliud sibi quàm in Fœderatis auxilium, quibus pacta conuenta tueri incumberet. Brederodius bonum animum habere eos iubens, cum Coniuratis proficisci constituit ad Gubernatricem. Misitque qui peteret, num pace illius liceret venire. Ad ea Gubernatrix, si veniret, vt in hostem se animaduersuram respondit. Neque mora, centurias aliquot militum accersiu it in regiam, frequentioresque pro valuis stationem
agere*

agere iubet. Præfidiarijs denique mandauit, ne Brederodium, vel Coniuratorum quemquam in urbem admitterent. Nec Brederodius ausus est accedere. Codicillos autem misit sub communi Coniuratorum nomine Gubernatricem insimulans; *quòd nouæ religionis exercitia adimeret, publicam libaret tranquillitatem, conciones dissiparet, in Ministros fureret, deniq; nullo metu externo imminente sub signis haberet descriptum militem, commercium ciuitatis sibi eriperet, vias obsideret armatis, vim inferre iussis iter sibi facientibus. Satisque intelligi, sanguinem suum peti tot apparatibus, nec publica securitatis rationem haberi. Quid inde aliud euenturum, quàm vastitatem prouinciarum, & ruinam publicam? Despiceret igitur, an utilius non duceret, exauctorato milite abrogari edicta, ad legem fœderis se componere, libertatemq; religionis inuiolatâ relinquere: quàm contra fas iusq; gentium violare fidem solemnî sacramento sancitam. Hanc se beneuolentiam ab illâ expectare. Ad hæc Gubernatrix ex*
sentent.

sententiâ Viglij generosè respondit. *Qui sint illi Fœderati, qui ad me scripserint, satis adhuc nescio. Quia communi suffragio dissoluta est societas. Nec adduci possum ut credam, omnes queri, utpote cùm plures in officio perstare videam. Vos tamen quique estis, (nemo enim libello nomen adscripsit suum) mihi certè estis iniuri, quòd contendatis vulgatam à me libertatem religionis. Ad verborum meorum formulam prouoco. Scitis quidem quàm agrè promiserim me non imperio, non vi, interuersuram conciones, eò locorum ubi tunc fuerant, modò absq; scandalo, & confusione agitarentur. Quibus verbis utcumque conciones tolerauerim: nemo tamen libertatem religionum indultam dixerit. Neq; mihi unquam fuit hic animus. Populum in tumultus sublatum, aliquà ratione mitigare studui; quoad strictos à iugulo meo auerterem gladios: mox deinde pacatiorem à concionibus abstraherem. Hac fuit summa consilij mei. Apage mehercule ut consistoria institui patiar, hoc est; regnum in regno, rem-*

publicam in republicâ , populum in populo.
creari ab his magistratus, tributa iudici, com-
munionem, baptis mata, matrimonia, sepultu-
ras damnatorum institui, sacrum ordinem, do-
ctrinamq; peruertere. Non est profectò conscien-
tia mea tantum probare flagitium. Si quis
eam vobis libertatem indulserit, ego utiq; non
consensi. Cum illis ex postulandum est, non me-
cum. Atenim in pacta peccaui. Quoniam so-
lemnibus tabulis iussi vos esse securos. De pra-
teritis rebus quidem. Ea cautio ad futura
non pertinet. Libellum mensis Aprilis nulli
fraudi fore sponendi. Nemo quoq; securitatem
vestram in hoc sollicitat. Si qui ad magi-
stratus edicto meo pulsantur; imputandum
ipsis est, qui verba mea aliter interpreta-
ti sunt, quàm oportuit. Magistratus,
ut par est, officio funguntur. Si tamen
iusto dolori plus a quo indulgeant, defer-
te ad me illorum nomina, ego quod vi-
debitur constituam. Nescio verò quare
mihi obijciatis pactorum religionem, quam
priores ipsi violastis. Non infero vobis
iniu-

iniuriam; sed propulso. Non succurrit vobis, opinor, præteritorum scelerum memoria. Spoliata fama, ciuitates seditionibus concussas, fœdera cum peregrinis in perniciem provinciarum contracta, delectus institutos priuatis auspicijs, nobilium prætoria & monasteria direpta atq; incensa, famam Regis petitam maledictis. Quantum abest ut palam in bellum ardeatis, quod clam machinamini? Hac mihi causa fuit contrahendorum militum. In hac facinora edictis intonui. Sine exitio publico arma ponere non possum, ad qua diuini humanique iuris necessitate adacta sum. Si sani esse vultis domum regredimini, reuocata curam à negotijs publicis, qua ad vos utique non pertinent. Minas vestras secunda despicio. Desinite eam terrere, que supplicia expetere potest. Prudenter vos facturos existimo, si vanam illam & indecoram proterus in posterum omiseritis. Scitote Reges non impunè despici. Principibus longas esse manus. Pœnasq; exacturos contempti imperij.

Non omittebant interim Cōiurati clande-

stino delectu militem efficere. Reliquias claudis à Noircarmio acceptæ, per idoneos homines seorsim alium ab alio Antverpiam perducebant. Ad quorum famam certatim vndique confluebant Iconomachi acerbior quæstione domo expulsi. Multi quoque nobiles, priuatini degeneres, publicè perniciosi, nullam in pace spem, omne consilium in turbidis reponebant. Wallacriam insulam in Zeelandiâ, atque Amsterdamum in Hollandiâ ex consilio Auriaci occupare susceperant. Ibi in medijs vndis nidificantes, Regis vires quassare, ærariûmque eius lassare decreuerant. In hæc facinora duces electi, Dominus Tholousius, & Brederodius. Hunc Amsterdamum proficisci volebant, contumaciam eorum penes quos ciuitatis regimen, studio partium viribusque fracturum. Zeelandiam Tholousio inuadendam destinauerant. Erat hic ex Marnixiorum nobili familiâ, Domini S. Aldegondi frater, manu strenuus, militarium artium gnarus, & turbandis rebus aptissimus.

Nec

Nec solutioni curâ Gubernatrix agebat, cui paratus hostium fere noti. Nec inter tot conscios occulti manere poterant. Tres cohortes Tornaco venere. Iter in Zeelandiam habentes, missus statim nuncius assequitur, vt Axellæ, & Terneusæ subsisterent. Præmiserat enim Gubernatrix in Walacriam Cattemij Dominum cum ducentis militibus, arcem Rammekins occupaturum præsidio. Cæterum præfectus arcis militares copias detrectauit recipere; fide ambiguus, palam regias partes, occulto fauore rebellibus adhærebat. Cattemius inde Middelburgum contendit. Eandem quoque claudentem sibi portas inuenit; Petrus Heckius perfidiæ imminens, multitudinis animos in tumultum erexerat. Erat is deuinctus Auriaco, cuius suffragio in præturam emerferat. Et hinc dignitatis prærogatiuâ ferox, proditurum se ciuitatem Tholousio addixerat. Iacebat ergo exclusus miles in littore, nec laceffens quemquam, nec laceffitus. Quippe tanquam mox recessurus expectare credebatur Gubernatrix

triciſ imperium. Nam & Cattemius ſecurita-
tem ciuium interrumpere timens, hanc fa-
mam rumoribus dederat. Auerſis igitur à ſini-
ſtrâ ſuſpicionem omnium animis, ſurgente au-
rorâ, nemine ſentiente Vliſſingam intrauit.
Denſa enim nebula proſpectum abſtulerat.
Aduectis mox tormentis totam inſulam ter-
rore conſternatam Regij iuris fecit.

Interea Gubernatrix Auriacum & Hooch-
ſtratanum Antverpiæ agentes, crebris epiſto-
lis admonerat de occulto Brederodij appa-
ratu, atque vt oppido cedere iuberetur.
Nec moram rebelles fecere. Verebantur e-
nim maximè ne præſidarij Regij Zeelan-
diam præriperent, quos in procinctu eſſe
cognouerant. Pròximâ igitur die cohortes
ad parata deduxere nauigia. Brederodius co-
piarum parte acceptâ, curſum in Hollandiam
direxit. Maior numerus Tholouſiũ ſequeba-
tur velificantem in Walacriam. Nunciatur ei
in itinere inſulam à præſidarijs Regijs occu-
patâ, ad obſequium Gubernatricis ſe cõpone-
re. Sexcentos nō amplius milites habebat, nec
armis nec diſciplinâ inſtructos, Cum quibus
fortu-

fortunam belli tentare amentia videbatur. Consilij incertus, retortis, puppibus relegit flumen, & propinquum Scaldi pagum, haut procul Antverpiâ Austerwelium nomine, castris occupat, ampliolem delectum habiturus. Multi enim impigrè nomina dabant, studio Ministrorum, varijs artibus iuventutem subruentium.

Postquam autem de Tholousij machinis certâ fide Gubernatrici relatum est, priusquâ præcoces rebellium apparatus in iustum crescerent exercitum, prælio experiri constituit. Philippum Lanoium Beauuoisij dominum egredi aduersus hostem iubet. Quadringentos ei milites ex Bruxellensium præfidiarijs attribuit, additâ Ioannis Grauij Brabantix prætoris equitum alâ. Valentinus de Pardieu Mottæ dominus cohortes iungere iubetur, quas Axellæ & Terneuse substitisse diximus. Hanc tantillam manum Beauuoisius tertio Idus Martias promouit in hostem. Frequentē eum per agros palantem inuenit. In hoseques inuelli iussus, pedes in munimēta in-

incubuit. Multi primo impetu obtriti sunt, necdum iustis armis instructi. Et statim, paùor intrauit animos. Fit igitur passim fuga ex castris. Nec consilio, nec imperio ad vexilla reuocari poterant metu mortis perculsi. Castra in plano sita erant, & in medio prætorium, quod haut multò ante canonicus quidam ad voluptatem construxerat. In hoc Tholousius, à maiori suorum parte destitutus, se recipit cum promptissimis. Qui, magnitudine criminum à spe veniæ exclusi, ac necessitatem æstimantes, ad vltimum fortunam experiri decreuerant. Sed inde nec vi pelli, nec ad pugnam elici poterant: cum Beauuoisius ignem tectis iniijci iussit. Ac ne tum quidem deditionem fecere. Pauci viam ferro aperuerant; & confecti sunt á circumfidentibus. Correpta latiùs flamma contumaces absumpsit. Cæterum qui fugam acceperant, ab equitibus ferè proterebantur. Quorum imperum vt euitarent; multi se præcipitabant in flumen, decliua eius prosequentes, quoad eminente aquis vertice, lubri-

lubricisq̃ue stantes vestigijs , aut absumerentur ab æstu , aut destinato scloporum ictu conciderent. Sola insequentium tela metuebantur, ad quæ effugienda, non dubitabant etiam barbaro elemento spiritum committere. Duarum non amplius horarum prælium, & incruentum Regijs fuit. Duo tantum desiderati traduntur. Cécidere rebellium circiter mille. Inter eos plurima nobilitas, atrociora supplicia metuens honestæ mortis gloriam quæsierat. Fuerant qui se dedêrent, & Beauuoisij iussu occisi sunt. Per sequentes verò dies, multi ex fugâ retracti, quidam etiam prodebantur ab agricolis petulantia eorum infensis. Quos deinde Gubernatrix in exemplum crucibus affixit. Ioannem Dionisium centurionem torquere iussit, sciscitatura quo consilio conscriptus esset tantus exercitus. Delectum ille in Flandriâ habuerat. Tormentis admotus exstimulatum se ad arma fatebatur à Petro D'Atheno Ministro. nihil præterea quidquam scire.

Cæterum dum colluctantur acies, populus

Antverpiensis à mœnibus arceri non poterat. Ruebant omnes ad spectaculum prælij, in spem aut metum propensi, pro cuiusque affectibus. Sectariorum tamen animos intentior cura terrore miscebat, utique posteaquàm discusso ventis fumo & pulvere, liberius cœlum ostendit in Beauuoisianos inclinare victoriam. Vbi verò apparuit, transactum esse de fortunâ partium, Thelousiumque prætorio inclusum, ultimo discrimine laborare; clamoribus cuncta feruere, cœpere. Nec deerat seditiosissimus ille Minister Hermannus, voce, manu hortari singulos, ne publicæ libertatis protectores ante suos oculos tristissimâ morte perire paterentur. Calvinistæ igitur correptis raptim armis, ad portam quæ Austerwelium versus ducit, vno impetu feruntur. Sed eam Auriacus diligenter occludi, firmisque custodijs obseruari iusserat, Beauuoisij aduentum suspectans. Ac ne tunc quidem aperiri volebat. Calvinistę furore amentes, in pontē Merium secedunt densis agminibus. Totâ vrbe non alia vox audiebatur, quàm clamantium ad arma. Et vndique
tym-

tympaña pulsari cœperant: cùm tam ciues, quàm milites sub suis quisque signis conueniunt. Cæterùm miles ad continendam ciuium tranquillitatem in sacramentum adactus, atque in octo cohortes distributus, stationes in foro agere consueuerat. Nec tum quemquam ciuium propiùs accedere patiebatur. Ea res acuit tumultuantium animos, in se armari credentium. Consultatum est, an impressionem in milites facerēt. Plus quindecim Calvinistarū millibus stabant in Merreo ponte. Præter eos quatuor millia Coperbruggium pontem infederant. Urgebátque asperiora Minister Hermannus. Cùm magistratus famâ mali perculsus, Auriacum adiit. Hoochstratanus quoq; ad eundem peruenit. Illo protenus ad mitigandos Coperbruggios procedere iussu, Auriacus in Merium pontem contendit cum Stralio consule. Propinquantibus obuia venere tumultuantes, quasi per officiũ. In quorum mediũ receptus; *Quid*, inquit, *viri Antverpienses hac sibi vult repentina cõsternatio? quò ruitis armati? quid vobis*

vultis? quibus ista secessione excidium machinamini? si quis iniurius est vobis, accedam ad partes. Sed ante omnia intelligam in quos undaturus sit ille impetus, utrum in hostes, an, quod abominor, in ciues. Vt nemo aliquis audebat loqui; ita atrocissimus clamor oriebatur, indiscretis vocibus foro se excludi frementium. Tum ille: Si nulla alia res concordiam vestram remoretur, armorum contentione non est opus. Cōtinete manus à ciuili sanguine, nec in viscera vestra armamini. Parum interest utrum vos, an illi forum insideant. Milites quos videtis vestri sunt, vestro are merent. ducum vestrorum imperia tefferámque accipiunt. Pro vobis stant. Pro vobis excubant. Communem ciuitatis tutelam gerunt. Neq; eos utiq; in ciues; sed in seditiosos, paciſque turbatores conscripsimus, in hac potissimum regione urbis custodiam agere iussos. Ita fert rigor militaris disciplina, ut intra fines sibi assignatos, armatum neminem extra commilitones recipiant. Si tamen ita vultis, per me licet, ut pari iure in foro excubetis cum militibus; modò vos quietos, regendósq; praeste-

praestetur. Hæc dicenti, ij qui ad Coperbrug-
gium confederant, superueniunt. Nequa-
quam pari modestiâ Hoocstratanum ad se ve-
nientem exceperant. Cui nec par gratia, nec
fauor, & minor auctoritas apud vulgum,
quia non aperte, vt Auriacus, in causam se-
ctariorum descenderat. Circumstiterant den-
sis agminibus orantem, insano tumultu i-
dentidem proditorem appellantes: adeo vt
quidam pannitonfor pectori eius sclopum
admouens, minaretur se explosurum, ni sta-
tim referarentur portæ ciuitatis, ac sua iura
ciuibus restitueret. Ille præsentī metu mor-
tis exterritus, cuncta ex voluntate eorum fa-
cturum se respondit. Portarum clauēs Auri-
aco commissas, nec per se stare quò minùs
acciperent. Irent secum, & peterent, nullam
in illo moram fore. Inde seditiosissimum
quemque verbis permulcens, flectere cœpit
mobiles animos. Signo igitur clamore dato,
in pontem Merium viam instituunt. Veni-
entibus Auriacus obuiam factus, & incon-
ditâ vociferatione portarum clauēs flagitan-

tibus adferri curauit. Minister Hermannus eas accepit, & per medios erumpens cuneos, ducem se ad portam præbuit. Conclamatione factâ vniuersi sequuntur. Auriacus properantibus se inseruit, eos qui proximè veniebant crebro incusans; *quò sic ruerent, inepta bello turba, & disciplina nescia. Irent quò velent, sexcentos equites in suburbijis instructos, amentiam illorum expectare.* Eadem à magistratibus constanti asseueratione ingerebantur. Nec à vero aberrabat coniectura. Beauuoisius enim tumultu audito, equitatum omnem præmiserat, ac si res ferret, disiectis obuijs, in urbem prorumpere iusserat. Iamque frequens armatorum globus excesserat portis; cùm Auriacus ad eos qui sequebantur conuersus, *ego me clamabat in tempore subducam manifesto discrimini, ut inter necionis vestre nuncium domi expectem. Sapient is quidem, qui exemplo meo idem faciet, damnatâ illorum temeritate, quos inconditè portis egressos, presentissimum exitium accersere video.* Simul his pedem referebat.

Abeun-

Abeuntem illum primo proximus quisque, deinde qui successerant sequi cœpere. Mox ij qui egressi fuerant, cum nemo amplius sequeretur, & ipsi in urbem reuertuntur, cæteris prodicionem identidem exprobrantes. Hermannò auctore signa rursus transferuntur in pontem Merium. Aditus omnes vigilijs firmant. Præsidia & stationes in foro locant. Crebrisq; clamoribus, *Vivant Geusj*, exultantes, noctem turbidam & minacem egere. Pauida interim ciuitas, & prædæ exposita mutuo metu suspendebatur. Hi qui domi quieti confederant, Calvinistarum peruicaciam extimescebant; incerti quò tanta vis tandem erumperet. Calvinistas econtra anxios habebat, ne vlcerata cæterorum ciuium patientia, ad Regias partes subsidiâque respiceret. Ortâ luce, in pontem Merium tormenta trahuntur. Quamuis nihil in commune turbaretur, non defuere tamen qui sacerdotibus & monasterijs, potentiorumque ciuium fortunis illuderent. Crederes urbem ab hostibus

bus inessam. Suspecta tumultuantium avaritia, pari metu omnes concusserat. Nec deerat Auriacus, æquis condicionibus iratos componere. At Ministris immodicâ cupiditate flagrantibus, nullæ satis leges placebant. Animi ex seditione creuerant. Quibus rebus permotus Auriacus, residuam plebis partem, & ipsam armatam, furentibus opponere constituit. Coacto igitur domi senatu, tribunois simul plebis, atq; optimum quemque in concilium adhibuit. Et si pacem habere vellent, ostentandum esse bellum edocuit. Arma armis compescerent. Neque enim turbulentos illos spiritus rabiem posituros, quàm si contra paratos aspexerint, qui opes suas possent defendere. Nemo erat cui non placeret hæc sententia. Missi sunt clanculum per ciuitatem, qui catholicos atque externos omnes citarent armatos in crastinum. Lutheranos quoq; Ministri spondebant venturos. Multi enim in ciuitate catholici, plures Lutherani erant, iuxta Caluenistis infensi, qui in omnes semper imperium vsurpant. At hi, tametsi
vali-

validiores singulis, ab omnibus tamen numero superabantur. Cæterum Lutherani genio sectæ quieti, nec catholicis discordes, hætenus in Kilio pago pari iure diuina fecerant. Et hæc quoque inter reliquas sectas à magistratu potissimum fouebatur. Non odio pristinæ religionis; verum, ne in tantâ nouarum opinionum dulcedine, Romanisque ritibus in fastidium versis, omnia ad Caluinistas vergerent. Quorum factio regnantibus grauis; Lutherani ciuili-um patientes, nec aduersi sceptris habebantur. Et hinc magistratus æquo animo acceperat, vocatos ab his è Germaniâ plerosque doctores, & inter eos Matthæum Flaccum. Illiricum Spangenburgicum, hominem non ineruditum, vt discordias exerce- ret cum Caluinistis, haut dubiè in vtriusque sectæ perniciem instructas, quoties securâ professione, se- gnique pace aluntur. Postridie igitur Lutherani, vt constitutum erat, in forum, equinum frequentes conueniunt, & Mini- stri in partibus. Simul ad delubrum S. Mi-

chaëlis ingentem planitiem multitudine
complect. Catholici autem Oosterlingo-
rum diuersorium occupant atque vnà cum
his Itali, Hispani, Lusitani, cæteræque ex-
ternæ gentes. Nemo omnino erat, qui in
partes non secederet. Non tam studio reipu-
blicæ, quàm priuatarum rerum curâ, & Cal-
uinistarum formidine spolijs inhiantium.
Sed in eo discursu occupati, cùm alijs alij
occurrerent, inuicem suspecti, & quam
religionem colerent interrogantes, non
sine mutuo terrore ferebantur. Triste mor-
talibus spectaculum datura videbatur ci-
uitas, & sub mutuis ictibus vapulatura;
cùm Auriacus, cunctis sollicitâ exspecta-
tione suspensis, & quid futurum esset in-
uicem quærentibus, dandum adhuc pœ-
nitentiæ spatium Calvinistis censuit. Mi-
sit itaque ad ministros, qui significarent,
vsurum se promiscuâ cæde ni sanioribus
consilijs flecterentur. Neque multò post
à Calvinistis ingenti metu correptis, ve-
nere delegati. Ministri vnà aderant, tan-
quam

quam ex officio sequeſtres pacis, quam nimia ferocia concuſſerant. Illic agi de concordia cœptum. Conſenſumque in condiciones, quas pridie reiçerant. Pauca omnino erant. *Pacta menſis Septembris rata ſunt. Iſdem Regi magiſtratibusque præſtando. Externi milites, niſi conſentiente populo, intra mœnia ne admittuntor. Iurata priuilegia ſeruantor. Cuiusque religionis homines concordiam fouento. Clauis ciuitatis Auriacus obtineto. Nocturnæ; diurnæque vigilia, nullo religionum discrimine habentor. Tormenta bellica manibus, redduntor. Cauebatur præterea, ut Auriacus, cum magiſtratibus, & collegijs quadringentos equites legerent, naues ad bellicos uſus in flumine inſtruerent. In hanc rem Eccleſiaſtici cum ciuibus ſtipendia conferrent. Publicatis legibus primi omnium Hiſpani atque Itali arma poſuere. Eos mox Caluiniſtæ ſecuti ſunt. Deinde Catholici, & ad vltimum Lutherani.*

Ciuitas quidem magno discrimine exempta

videbatur. At non Gubernatrici iucunda hæc erant. Mouebatur præcipuè præfidiariorum nauium, equitumque mentione fœderibus illatâ. Et quamuis magistratus fidem faceret, non suâ voluntate conditionem hanc adscriptâ legibus; sed vt aliquo blandimento amentiam ciuium ad quietem deduceret. Gubernatrici tamen ad insidias vigilanti suspecta omnia erant. Siquidem Auriacus & Hornanus in verba Regis detrectabant iurare. Traiectenses ad Mosam, & Siluæduceses novos delectus agebant. Nec multò lætiora ex Hollandiâ nunciabantur. Amsterdamm à Brederodio militibus infessum. Præfidiarias naues à tumultuantibus exstrui. Contractis igitur in concilium Proceribus, quid de his factò opus, consultat. Quorundam suffragia ferebant; *Quarendum ab Aursaco an sacramento tandem obstringi cuperet. Quòd si id ipsum detrectaret, prouincias eo statu redderet, quo à Rege acceperat. Amsterdamm ab amicis eius occupatum esse. Ac nō concepti sceleris conscius foret, non dimissurum fuisse*

fuisse Antverpià Brederodium, cum tantà multitudinē legibus proscriptà. Quippe sciebat eum publica paci illusurum. Hec tamen utcumq; excusari possint: purgare certè non posse, quòd haut ignaro ipso rebelles in Hollandià classē instruerent, militem scriberent, palam bellum tractarent. Iam quidem ipsum scribere, paratum se renuntiare provincijs. Nempe ut excusandum non haberet, quod ibi peccaretur. Simulationem duntaxat esse, ut pro amico facilius imponeret callidissimus veterator. Nam si provincias dimittere velit, cur id protenus non facit, ut fidelioribus, quam ipse sit, tradi possint? Cur reservat sibi gubernaculum Burgundie? cur Antverpiensis civitatis? Fastidientem beneficia Regis, alia ex his retinere, alia remittere non posse pro suà libidine. Deniq; contra morem facere, quòd ordinaria turma prefecturam iniuratus possideat. In hoc potissimùm sacramentum exigi: ut Regi serviant sui milites, & eosdem amicos inimicòsque habeant, quos ipse habuerit. At non idem consultioribus pro-

babatur. *Nihil adhuc apertè agendum, cen-
sebant. Cum vulpe vulpinandum esse. Pari
arte, pari simulatione, quàm ipsos cogitaret
peruertere, fallacem eluderent. Hortandum
esse blandioribus litteris, ut ab inceptis Bre-
derodium auertat, vel contumacem Am-
sterdamo eijciat. In hanc rem Hollandiam pe-
teret, & accepto Regis Sacramento provin-
cias curaret, aut apertè denunciaret, quid de
his fieri vellet. Sine rectore diutius relinqui
non posse. Ex hac sententiâ secretario Ber-
tio ad Auriacum misso, Torrius simul ad Bre-
derodium destinatus est, cum mandatis quæ
iuberent eum Amsterdamo cedere. Inter
hæc Gubernatrix Hermannum & D'Athe-
num Ministros proscripsit. Ingenti pecu-
niâ promissâ, si quis viuos ad se retraheret.
Sed exitiabiles homines, sua ipsorum soler-
tia supplicio subduxit. Dei irâ in repub-
licam, quam post aliquot annos non mi-
nùs atrociter concussere.*

In hac religionum tempestate, III. idus
Mart. primus Gandavi. Iesuita sermonem
insti-

instituit. Quippe Iesuitarum societas surgente Luthero exordium coeperat. Quasi præcauentibus fatis, ut essent, qui effrenam licentiam, quam ille præscorum hæreticorum vestigia ingressus, torpenti sæculo induxerat, seueriori disciplinâ exemploque corrigerent. Igitur ad excipiendum concionatorem recens aduectum, magno concursu populus affluxit, ut ferme solet ad noua omnia. Multitudinem templa non capiebant. Christianæ religionis rudimenta magno plausu exposuit. Res à prudentioribus hæctenus desiderata, nec frustra cecidit. Multi illo auctore reuocati sunt ad ecclesiam. Ut facilè appareret, non tam suo, quàm doctorum ingenio laborasse prouincias. Ministri cœptis eius æmuli, ac paucitate auditorum contempti, & ipsi acrius concionari cœpere, necnon fordidissimùm quemque ex plebe donis illucere. Quibus cognitis senatus interdixit, ne quis sub eleemosynarum specie pecuniam pub

publicè distribueret. Cæterùm vt ad ordinem historiæ redeam, varia legatorum fortuna fuit. Torrium à Brederodio contumeliosius exceptum, Coniurati captiuum faciunt. Commentarios & mandata intento mortis metu tradere subigunt. Ac ni magistratus tanti viri calamitate motus, clam emisisset portis ciuitatis, haut multùm aberant à cæde legati, cuius etiam summa semper reuerentia valuit apud barbaros. Auriarcus autem Bertium benignè habuit. Pari quoq; humanitate ad ea quæ rogaretur, in hæc verba respondit. *Renuncia Gubernatrici, quæ hæcenus fecerim, omnia contulisse ad salutem imperij. Cur ergò de fide meà dubitare debeat, non intelligo. Multis honoribus à Rege excultus sum. At in auspicijs singulorum sacramentum dixi. Quod in hunc quoque diem illibatum seruauis. Idem verò reuocare non possum, nisi ut venisse videar in suspensionem perfidia. Ex quo gubernaculis admotus sum, priuatis necessitudinibus rem publicam semper antehabui. Brederodium Antverpià abire per-*

permisi, cum inconditâ multitudine, quam scripsisse se dicebat in ordinaria turme supplementum. Neque enim, quod sciam, Gubernatrix ei præfecturam ademit. Proinde si in Hollandiâ hostilia cœptauerit, fuerit eius ista excusatio. Scito me perinde falli potuisse, ac ipsam Gubernatricem. Eâdem solertiâ utriusq; imposuit. Facturum hoc eum diuinare non potui, cum quo consilia non communico. Ego ut primùm licuit, quieta turbidus anteposui. Efferatam hanc ciuitatem pacavi, non sine discrimine vite mea. Nullum ob priuatum respectum. Sed ut in obedientiâ Regis continuem. Et hac causa fuit, cur in Hollandiam non concesserim. Arctius hîc detineor, inconstantia ciuium, bonâ fide pacem non colentium. Nec me pœnitet obsequij. Quod in obedientiâ huius ciuitatis magnam partem tranquillitatis positam esse videam. Gubernacula verò resignare non possum, nisi volente eo à quo accepi. Per me non stat, quò minus Gubernatrix prouincijs consulat, prout expedire ipsa duxerit. Ego omnino manum subtraho.

Vnum tamen monitum velim, solidam pacem haberi non posse, nisi ex totâ gente Concilium contrahens Rex, prateritarum rerum gratiam sponte fecerit. Quippe eam nemo petiturus est, nisi ut ex propriâ confessione nocens esse sustineat.

His in aulam relatis, multiplici sollicitudine Gubernatrix tangebatur. Centum & amplius nobiles Coniurati cum Auriaco pacti ferebantur, haut aliter se cū Rege in gratiam redituros, quàm si & ipsos, & ciuitates, decreto suo absolueret. Antverpienses quoque hoc ipsum oraturi, libellum curiæ obtruserant. Adhæc propè tertius mensis erat ex quo Valencenenses obsidione pressi, pertina-
ciam non consumpserant. Nobilis & potens ciuitas defectione suâ reliquas attraxerat. Eaque deditâ peruicacissimorum animi redituri rursus videbantur ad respectum imperij. In quam proinde iustâ irâ stimulabatur. Sed in obsidione perseuerando grauiora timebat. Ne forte ad Gallorum auxilia oppidani respicerent. In quorum studia
Mini-

Ministri accendebant. Deinde pudebat hærere circa muros vnius ciuitatis, aliarum opportunitate relictâ. Omnia igitur circumspicienti optimum visum, oblatiis conditionibus deditionem exigere. Ad tentandos obsessorum animos Egmondanus & Arschotanus mittuntur. Velencenensium delegatos Beuuragium euocant. Eos Noircarmilus protenus adduxit, vt leges acciperent, admonens, quas Gubernatrix præcipserat. *Vrbem dederent. Præsidarios reciperent. Iis quibus placeret, integrum esset proximis diebus quindecim oppido cedere. Intra quos bona distrabere, vel transportare possent. Cateri sine fraude in vrbe agerent. In officio se continerent. Ediçta de religione acciperent. Aboleretur memoria rerum præteritarum. Integrum cuique fore innocentiam suam testificari coram Rege, coram Status aut Priuato, aut Mechliniensi Concilio. Anxijs ad hæc delegatis, Egmondanus magnopere suadebat, ne vim, quàm clementiâ Regis experiri vellent. Nullam spem in armis reliquâ. Rebelliũ copias ad internecionem casas, cum Tholousio duce.*

*Nullam opem restare. Solos in contumaciâ
persistere. Reliquas ferè ciuitates maiestatem
agnoscere. Dum liceret, voluntate suâ face-
rent, quod coacti mox facturi essent cum per-
niciæ omnium. Inducias in triduum fore. In-
tra quos responsum opperirentur. Ea postquâ
Valencenis audita, magis optimatibus place-
bant, quàm multitudini. Seditiosissimi qui-
que cum Ministris plebem stimulabant ad
bellum. In procinctu stare subsidia. Falsâque
esse quæ de Tholousio traderentur, Optima-
tes autem in contrarium tendebant. Nec in-
terim multitudo se continuit, quin crebrâ
tormentorum explosione in inducias pecca-
ret. Patrû precibus ad vltimum victa, ita legi-
bus assensâ est; si crimine laesa maiestatis ciues
absoluerentur. Edictum quo hostes iudicati es-
sent irritum fieret. Vtrunque dimitterentur
captiui. Bona in fiscum redacta, aut ab eo-
dem distracta, restituerentur. Presidiarij
are Regis mererent, sine molestiâ vel
incommodo ciuium. Urbem non intrarent,
priusquam hi, qui discedere vellent, fortunâ
suas*

suas extulissent. In hanc rem legitimum tempus præsisteretur. His perferendis, duodecim ex optimatibus delecti sunt. Proceres infesto vultu ad se venientes excipiunt; fortunæ eorum non convenire intonantes, victoribus leges præscribere. Clementiâ verò indignos videri, qui sanctitatem induciarum polluere sustinuerant. Proinde nîciuitatem, seque deditum venissent, vti sine morâ decederent. aliòquin vinctis post tergum manibus in urbem propulsuros. Diriguerunt illi ad hanc vocem, & de multitudinis genio multa questi, Ministros substituebant in crimen. Ad ultimum id modò petebant, vt sibi saltem mitigati esse vellent, ac bonâ eorum pace extra oppidum liceret persistere. Surdæ erant Procerum aures ad has preces; cùm vniuersi se prostrauerunt in terram, genibusque Egmondani aduoluti, per illius genium veniam præcabantur. Sed ne tum quoque Noircarmius flectebatur. Catenis igitur adferri iussis, contumeliæ metu in oppidum compulsi. Timebat enim ne vel inuitos re-

tinuisse crederetur, vel melioribus oppido abstractis insanæ multitudinis studio cuncta regerentur. Nam in omni seditione tutissimum esse remedium, si & boni in partes secesserint. Quod & legibus suis sanxit Solon. Ut semper essent, qui inconditam multitudinis ferociam sanioribus consilijs imbuerent. Oppidani ergo desperatâ veniâ, ad defensionem se conuertunt. Multi in ciuitate veterani erant. Quibus ferocissimus quisque ex plebe permixtus, de corpore suo ducem eligunt, & Cardoniâ portâ in stationes erumpunt. Prælium acriter, nec ut ciues sumpseret. Multi ex Noircarmianis cadunt, plures pauore amentes in fugam conijciuntur, & ingentem trepidationem castris inferunt. Iam terror quoque ad præfectos peruenerat, in suspicionem lapsos, non ciuium hanc aciem esse, sed externorum militum auxilia ferentium. Ad primum tumultum Noircarmius contra legiones instruxit. Cum parte equitatus victoribus incubuit, & non sine strage in ciuitatem compulit.

Huius

Huius verò cladis dedecore admonitus, intentiore disciplinâ suos habuit. Militibûsque distributis, qui ad tormenta consisterent, quique vallum tuerentur, Mansveldicam legionem secum assumpsit, & quâ extrema defixit fossâ, vallum promouet. Deinde portæ Montensis suburbia, nullo suorum desiderato, intempestâ nocte occupat. Ibi verò aggerem erigi curat, propè æquantem portarum fastigia. Quo intra secundum diem absoluto, machinas attrahi, & in summitate eius constitui iubet. Vnum & viginti tormenta erant. Quibus ingens globorum vis fuit excussa. Turris S. Nicolai, in quo oppidani machinas aliquot locauerant, in primis deiectur. Sub cuius ruinâ non pauci oppressi sunt. Mox in eminentiores domos tormenta diriguntur. Tunc plura vndique funera, & femiuuorum hominum amputata, & adhuc palpitantia membra, ipsis funeribus propemodum tristiora. Eiulatus quoque, & tectorû cadentiû fragores per totam urbem passim audiebantur. Questusq; mulierû præcipuè, & puerorum

rorum, alijs maritos, aut liberos, alijs parentes desiderantium. Iamque muri ciuitatis crebro verberati, ictibus cesserant. Portæ quoque nudauerant latera; cum obsessos ingens desperatio incessit. Iam non ambigua bonorum voluntate, ijs quoque qui ferocius egerant consensu multitudinis victis, ix. cal. Apri. caduceator mittitur, condiciones petiturus. Sed maiora per contumaciam deliquisse videbantur, quàm quibus ignosci posset. Deditionem sine exceptione facere iubentur. Hæc vox non sine consternatione audita est. Sed si aduersarentur cogi poterant. Itaque vt petebatur, Regis potestati se permittunt. Ingressus urbem miles, per custodias diuiditur, ne quis exire aut dimitti posset. Noircarmius ciuibus arma ademit. His qui seditiosius egerant, catenas iniecit. Eos deinde Gubernatrix ad terrorem omnium publicæ paci immolauit. Bona publica priuatorumque in fiscum redacta. Insignis calamitas singulorum fuit. Nec multò post Michael Helinus, cum filio, simul Guido Bresseus, & Gran-

& Grangius Ministri, ex fugâ in urbem retracti, tanquam principes seditionis damnantur. Helini pecuniâ, potentiâ, & auctoritate; Breseus & Grangius turbido ingenio, & virulentiâ linguæ primum ad cœptandam seditionem, mox ad obsidionem contumaciùs tolerandam populum crexerant. Et Ministri quidem patibulo suffiguntur. Helini verò gladio percussi. Sed non aliud supplicium spectantium oculos maiori misericordiâ affecit, præteritæ fortunæ magnitudinem recordantium. Quippe tanta vanitas inerat illis hominibus; ut Egmondano se potentiâ sustinuerint æquare. Cœptaveritne seditionem multitudo ad supplicij spectaculum conglobata, an cœptare credita fuerit, haut satis liquet: miles tamen circum theatrum positus, ut in tumultuantes impressionem fecit, paucisque interfectis vniuersos discussit.

Valencenensium deditio quantò tristior, eò velocius audita est per prouincias. In vnius huius ciuitatis fortunam intentis omnium

fusionem venirent. Tum iustâ irâ accensus Rex, militares copias ad ultionem instruxit. Et hinc metus quibusdam Proceribus, conscientia stimulo pulsatis; quia sectarijs indulgentiores fuerât. Ex metu verò diffidentia nasci coepit, non habētibus fidem verbis Gubernatricis quam suis detraxerant. Quoad ad ultimū Auriacus, vt vel inuito Rege incolumis esse posset, à sceptro defecit. Quem statim secuta est frequens nobilitas, deinde & populus. Nam (vt postea trademus) vtriusque patientiam Albanus iuxtâ exasperauit, cum alteruter tantum plectendus fuerit, vt multitudini eriperet capita, quæ sequeretur in Regem: vel capitibus multitudinem, quā Regi opponerent. In summâ, tutissimum fuerat, suppressos tumultus in pace relinquere, non adeo inhonestis sopitos condicionibus, nec diutiùs māsuris, quàm Regi libuisset. Nunquam enim prætextus defunt dominantibus, vt à tranquillis repetant, quod rebelles expressere. Hæc illius temporis sententia fuit. Quam nec affirmare, nec refellere sustineo.

ANNO M
1517.

Gubernatrix victoriæ potita, non modicâ lætitiâ ferebatur. Quidquid virium sectarijs fuisset, illâ deditiōe videbat prostratum. Brederodium, & si qui præterea in armis erant, audebat despiciere. Nam quid posset, rebelles admonuerat, clauēs se ciuitatum inuenisse iactitans. Itaque Billium in Hispaniam delegat, nunciaturum Regi de victoriâ, & ut in prouincias maturaret sine exercitu. Sectariorum res planè accisas. Nulloque se negotio totam breui prouinciā sub imperio, legibusque habituram. Deinde religionem erigere adorsa, conuenticulis & concionibus, sectarijs vndique interdixit. Vniuersos ciues pro Rege ac religione obstringi iussit. Vulgi affectus cum fortunâ mutabantur, quod non aliter Principes, quàm ex successibus æstimat. Et semper ij meliores creduntur, quorum virtus timeri meruerit. Sectas, quas tanto plausu populus exceperat, pari fastidio detestabatur. Pauci in Flandriâ, & nisi sectariorum peruiacissimi, iurisiurandi condicionem repudiauere:

Præ-

Prætor eis arma ademit. Ministri prætoris fugâ Antverpiam se contulere. Perculerat animos eorum Valencenensis exempli atrocitas. Et quod ipsis timendum foret, expectare non audebant. Gandauum, Alde-narda, & Ipræ nouis cohortibus firmatæ. Et apud eos, qui sacramentum distulerant hospicia iussæ sunt accipere. Duæ aliæ cohortes Axellam missæ, quarum operâ in domandis Antverpiensibus vteretur Gubernatrix, & circumiecta regionum à nouitatibus abstraheret. Ecloa, Rotnacum, Deinfa, & si quæ alia opulenta municipia, ad Prætores Metropolitanos arma deferre iuebantur. Sectariorum templa euerfa. Ac ne quod vestigium sceleris relinqueretur, ipsa etiam fundamenta eruebantur. Certantibus æmulatione populis, ne externus miles hanc laudem incolis præriperet.

In hac rerum facie, Auriacus quoque timidâ sollicitudine pulsabatur. Egmōdanum itaque rursus sollicitare constituit in partes; magnum indole virum, armisq; clarissimum.

Qui Gallicanis expeditionibus ita se semper
gesserat, vt Albani prouidentia laudaretur
magis, audacia Egmondani timeretur. Cùm
Auriacus contra ciuili prudentiâ, & consilio
insignis, armisque timidior, imperatorijs arti-
bus vtrique concederet. Dicta est colloquij
dies in Willebroeckio pago, non adeo procul
Antverpiâ sito, quâ Bruxellêsis alueus Scaldi
comittitur. Ibi rursus Auriacus Egmondanũ
hortari cœpit, *vt nunc saltem admoneretur, ad
tutiora consilia imagine periculi. Et occupatâ
aliquâ insigni prouinciâ, coniunctis viribus
Albano resisterent, in vtriusq; perniciem ac-
cincto. Arma & consilia in expedito esse. Po-
puli mobilem animum. Non defutura auxilia,
si ducem se partibus ostenderit. Principem præ-
teritis rebus infestum, & vindicem, nunc qui-
dem ficta beneuolentia speciem facere. Sed ubi
prouincias exercitibus infederit, non illi, non
Albano securitatem redituram, nisi sublati
capitibus, quibus præteriti furoris insaniam
imputant. Hac se crebris litteris ex Hispaniâ
admonitum, & de salute eius sollicitum, non
dubi-*

dubitasse denunciare : ne vir tantus infami caderet exitu, & ut piacularis victima Regis ira immoletur, spiritumque, quem per virtutem retinere posset, per contumeliam effunderet. Eas voces Egmondanus segnius quam ante accepit. Neque tantam Regi iracundiam, referebat, ut non maiorem in clementia illius fiduciam poneret. Penè peccare Auriacum, quod in animum induceret tam nefandam perfidiam. Si quid eiusmodi moliri Rex vellet, nemini fuisse proditurum. De officio Procerum queri non posse, qui concionandi licentiam proteruis ademerint, Iconomachos iustis supplicijs affecerint, ferocissimos quosque sustulerint. Hac esse beneficia in Regem sua, quibus vel gratiam sperare meruerit. Quod alioqui tantum suum delictum, ut in corpus suum peccare sustineat? Si tamen ille perserveraret irasci, ad ultimum, se pro fide moriturum. Paullatim inde Auriacus ad indignationem prolapsus; age ergo, inquit, fidem ei ut voles serva, qui te perfidia sua decipiet. Uter nostrum

nimia

nimiā credulitate peccauerit, tempus aperiet. Hoc unum scio, acturum te aliquando pœnitentiam spretū consilij mei. Trunco corpore pontem substernes, per quem Hispani calcaturi sunt prouincias. Post hæc mutuis complexibus functi, inuicem valedicunt. Adiecit Auriacus cum se posthac non visurum, nisi amplecteretur saniora cōsilia. Et sic in præparatam descendens nauem, ad Antverpienses, quibus potissimum fidebat, redijt. Egmondanus in curiam regressus, & futurorum sollicitus, Gubernatrici blandissimè adulabatur. Conuiuia comiter instituebat, quibus ipsa quoque Gubernatrix frequens intererat, vt ex animo eius eraderet diffidentię cicatricem; insigni dissimulatione intimos sensus, verbâque recondens.

Interea Noircarnius paucos dies Valencis componendis rebus insumens, & accepto Gubernatricis imperio, Traiectum ad Mosam traduxit exercitum. Duodecim tormenta simul trahebantur. Quorum conspectu ciues, desperatâ vrbis tutelâ delegatos misere

misere ad Gubernatricem, potestati eius omnia permittentes. Nec ingratus Gubernatrici aduentus fuit. Quippe & huius vrbis obsidio magni operis videbatur. Itaque facto veniam dedit, splendido exemplo cæteras ciuitates inuitatura ad deditionem, clementiam eius doctas. Ministri tamen & seditionis auctores tradi iussi. Sed illi hoc ipsum metuentes in tempore excefferant. Præsidio Traiecti relicto, Noircarmius Tornhautum mouit; quò propiore metu Antverpienses Siluæducensēsque percelleret, & terrore virium reduceret ad reuerentiam maiestatis. Nam in omni populari tumultu plus fama, quàm vis potest. Megemus cum Friscâ suâ legione eodem contendit, Noircarmioque iunctus magnum terrorem cunctis iniiciunt.

Inter hos dies grauior motus Siluæducenses concusserat. Ciues ex edicto Gubernatricis citabantur ad Sacramentum. Et erant qui præstarent. Cùm Bombergius suorum agmine stipatus processit in forum, clausasque curiæ fores vi perfregit. Nemo violentiæ ob-

stabat. Diuturna tyrannis reuerentiam pepererat. Ergo senatum ingressus supercilium suum verbis vlciscitur; & quid hoc rei esset, quòd iniussu populi conscientias obstringerent, interrogat. Senatu contra fortiter loquente, vtrisque clamor oritur. Et concursus vulgi ad certamen instructi, fiebat in curiam; cum senatus furori cessit, iussâ multitudine ad sua quemque redire opificia. Sic per aliquot dies quies stetit. Donec pauidi agrestes, aduentum Noircarmij in urbem referrent, consternatúmque famâ populum, máiori terrore afficerent. Quippe Noircarmius popularium animorum haut nescius, lento agmine Tornhauto mouebat, vt contumacibus daret pœnitentiæ spatium, atque ex seditiosorum manibus sine sanguine tela excuteret. Tum oppidani versare animo cœpere, quanto suo cum discrimine exspectarent exercitum. Neque mox parem conditionem habituros, si morâ deditionis perseverarent irritare victores. Valencenensium supplicium in oculis

oculis erat. Et Bombergiani passim marcebant deposito supercilio. Faciliq; impetu, ut sunt vulgi studia, á multitudine destituebantur. Plurimi cum senatu sentire coeperant; cum Bombergius, & ferocissimus quisque, vrbe excedunt. Nullòque factionis duce iam reliquo, tota respublica concessit in gremium optimatum: qui confestim quadringentos suarum partium ciues conscribunt in centurias. Petersemium, & Cancellarium liberos dimittunt, & trecentorum ciuium præsidio deducunt in regiam. Delegatos denique ad Gubernatricem destinant. Pollicentes se imperata facturos, modò ne cogerentur præsidium accipere. Sed illam conditionem omnem aspernante, rursus alios mittunt qui deditiorem offerrent, in quam vniuersus populus sponte, aut metu iam consenserat. Noircarmius ciuitati præsidium imposuit, & Tornhautum rursus exercitum traduxit.

Siquidem Antverpienses defectione validissimarum urbium, Procerumque in pacem conspiratione perculsi, simul abscissa vndiq;

spe, remittebat sensim altiores spiritus, & haut obscure ciuium studia nutare cœperant. Nec Gubernatricem fallebant illa consilia. Proinde ostentari potius obsidionē, quàm promoueri iusserat. Longè tunc alia ciuitatis facies. Quid de ipsis quoque statueretur, si cōtumaces esse pergerent, propinquo Valencensium exemplo admonebantur. Redacti itaque sunt ad summam desperationem. Nec tacita consternatio in omnium animis percipiebatur. Ministris impetus exciderat. Metus seditiosissimis furorem excusserat. Sciebat quoque magistratus, nihil salutaris, quàm pacem experiri, gaudebátque id ipsum non displicere ciuibus. Auriacus in pristinâ simulatione perseuerabat. Eoque auctore missi sunt, qui Gubernatricem deprecarentur, datisque conditionibus inuitarent in oppidum. Illa nec se pacem daturam, nec ante venturam respondit, quàm præsidium militare recepissent. Hæc in urbem relata Ministris & seditiosissimis non satis aridebant, querentibus vnos se peti, daturos sanguinem vindictæ

dictæ publicæ. Placuit tamen delegatos ad Gubernatricem rursus proficisci. A quâ tandem has condiciones accepere. *Ministros, apostatas, exules, ceterosque improbe nota homines, finibus eijcerent. Illicitas conciones & ministeria tollerent. Religionem catholicam, & delubra restituerent. Sectariorum templa, si ita Regi videretur, diruerent. Nova non edificarent. Cives sacramento Regi obstringerentur. Religionem quam vellent, sine fraude profiterentur. Miles à magistratu lectus, idem sacramentum acciperet. Incola obedi- rent legibus, quæ de religione deinde ferrentur à Rege, vel sine fraude oppido cederent. Ad Iconomachos, perduelliones, reosque maiestatis hæc pacta non pertinerent, nec diutius rata essent, quàm Maiestati placuisset.*

Dura profecto hæc omnibus videbantur: sed per fortunam recusare non poterant. Ad flectendas vulgi mentes magno momento Auriacus fuit. Non amore pacis, quam tunc potissimum oderat, sed necessitatem æsti- mando obsequium præferebat. Tacito, quàm

professo odio semper perniciosior consilij
publicis. Aduentum Gubernatricis opperiri
non ausus, Bredam se cum vxore recepit. Ibi
paucos diēs moratus, priuatorum negotio-
rū obtentu in Nassouiā proficiscitur. Hooch-
stratanus, & Hornanus eum sequebantur. Post
quæ, dimittitur per vicos præco, qui intra ho-
ras viginti & quatuor Ministros omnes exce-
dere iuberet. Exulibus, apostatis, diaconis, se-
nioribus, breuiter omnibus qui è Consistorio
fuerant, triduum præstitueret. Tunc primū
tacita indignatio defixit sectariorum animos.
Quid agerent, quid secum efferrent consili-
um præ metu defecerat. Compita & por-
tas implebat continens migrantium agmen.
Illi vxores & liberos tanquam vltimū vi-
suri amplectebantur. Hi secum in fugam
trahebant. Iram Gubernatricis expecta-
re nemo audebat. Pars ad Brederodium in
Hollandiam, pars in Germaniam proficisci-
tur. Magistratus interim sacramentum Regis
accepit. Nec reliquā multitudo, mutari faci-
lis, moram fecit. Quinque vrbane cohortes

exauctorantur. Cùm statim turma equitum superuenit sub Gubernatricis auspicio. Sequebatur Ernestus comes Mansveldius cum sex peditum signis. Et post eum Carolus eius filius cum plenâ legione. Dein tria vexilla Beauuoisius induxit. Cuius terga claudebat Lickij dominus, cum eâ centuriâ, quæ Gandaui per aliquot dies steterat. Miles tanquam in hostili solo iter fecit. glande ori inserta sclopos puluere onerauerat. Tum demum successit Gubernatrix, succincta mille admodum equitibus, armorum fulgore splendentibus. Proceres Dominam sequebantur. Quidam è Finantijs & Priuatâ curiâ comitatum instruxerant. Noircarmius quoq; propius admouit exercitum, vt si tumultus in vrbe oriretur, in tempore adlisteret. Armati pedites gemino ordine dispositi, intrantem Dominâ excipiebant, deducebantque in hospitium quod publicè præbebatur. Animis ciuiû expectatione detentis, quid primùm actura esset, quatuor captiui repentè producuntur. Eos Brabantia prætor ex fugâ retraxerat. Cruce in foro erectâ seditiosum spiritum laqueo euomueret.

Nec multò post Ioannes Onghena (quem
Iconomachorum principem Gandaui exti-
tisse memorauimus) eodem supplicio dig-
nam sceleribus mercedem accepit. Tranan-
tem Antverpiæ flumen, Gandauensis consul
sibi notauerat , manúmque iniici fugitiuo
iusserat. Oëtauo cal. Maij his legibus ciuita-
tem ordinauit. *Incola pacem quietémque fo-
uento. Concionatores noua religionis amissis
bonis capite plectuntor. Fautores eorum pu-
niuntor arbitrio Gubernatricis. Parentes &
heri, pro familiâ tenentor. Conuenticula ne
sunt. Magistratus hac ipsa dissipanto. Si
quis indicasset, impunitatem habeto, ita ta-
men si deinceps legibus se accommodauerit.
Iconomachi laqueo vitam finiunt. Si magi-
stratus non prohibuerint, damnum refun-
dunt. Matrimonia, aliósq; ritus noua reli-
gionis exercentibus, laquei pœnam irroganto.
Infantes ab hæreticis baptizati, rebaptizantor.
Obstetrices intra horas viginti & quatuor pu-
erperas magistratui denunciant. Ludima-
gistri non publicè, non priuatim iuuentutem
instruunt, nisi priùs examinati, & iurati.*
Docere

Docere illicita capital est. Magistratus, pratores, visitatores bibliopolarum & typographorum diligentem rationem habento. Qui libros illicitos sapius distraxerit, capite plectitur, ceteri pœnâ extraordinariâ. Tributa iniussu Regis ne imponuntor. Ne conferuntor. Qui secus faxit quadruplum restituunto, & arbitrio iudicis plectitur. Eleemosynarum collatione pauperes ad nouam religionem ne alliciunto. Qui ad legendum militem pecuniam contulerit capite luito. Conuenticulorum auctores rebelles habentor. Exules & apostata, urbe excedunto, similiter & hi, qui in prouincias confluxerunt, sine vita testimonio. Catholicis vel sacerdotibus nemo iniurius esto. Sin secus, capite & amissione bonorum punitor. Nulli sua religio fraudi esto. Ecclesiasticis pareto. priscis legibus editisque statois quoad à Rege ex consilio Ordinum aliter statutum fuerit. Gubernatrici interim cura fore, ut generalem gratiam Rex indulgeat. Post hæc sectariorum templa militibus prædæ dedit. Ciues arma sua ad ma-

salutem publicam redimi credentibus. Cum
econtra paullo post Albanus, nullo neces-
sitatis pretextu eadem augendo, res prisca
nouare, vimque Regiam intendere arbitra-
retur. Populo certe nimiae libertati innu-
trito alijs artibus imponere debuerat.
Omnia ipse per externos agebat. Cum
id rectius provinciales faciant. Qui fa-
stidita tributa non fauori, non libidini,
aut sceptro; sed necessitati publicae dare
creduntur. Tantum interest quid à quo-
quam, & quâ causâ fiat. Populus duci
vult, non trahi. regi, non subigi. Nec re-
fert quâ viâ, dum eo quo tendis, peruenias
Ergo rebus in hunc modum Antverpiæ sta-
tutis, comes Mansveldius ciuitati præfi-
citur. Summâ beneuolentiâ populum
continuit, nullâ remedij asperitate la-
cessitum.

Cum interim in Flandriâ acerrimæ que-
stiones de noxijs haberentur. Ciuitates tan-
quam semet absoluerent, ultione gaudebant.
Multitudo metu perculsa impunè cōtemne-

batur. Nam & vis aderat imperium exercen-
tibus. Ipris duo Ministri attolluntur in pati-
bulum. Quibusdam spectatorum fremere
ausis, circumfunditur miles, & intento fer-
ro turbatos discutit. Cecidere multi ex ple-
be, & quidam innocentes in promiscuo di-
scrimine. Nemo deinde ausus est obstrepere.
Seditionum auctores per provincias con-
quisiti varijs suppliciorum generibus affici-
untur. Ioannes Winghene & Bacquerelius,
vitam laqueo finire. Sectariorum quippe
principes fuerant. Illi crimini datum, quòd
Rotnacenses ad publicandas conciones Gan-
dauum deduxerat. Hic verò Iconomachos
in sacrilegium Aldenardæ redemerat, vt su-
pra retulimus. Bona vtriusque fisco illata.
Reliquum vulgus extrà periculum, quod
alienâ magis insaniâ, quàm proprio ingenio
deliquerat. Pro Rege tamen & religione iu-
ramentum præstare iubetur. Iconomachi
passim & vndique sine misericordiâ necan-
tur. Infamati magis, quàm conuiçti rele-
gantur in exilium. Replentur cruces cada-
ueri-

ueribus, Germania exulibus. Nullâ tum,
quidem Gubernatricis inuidiâ, quando
omnia per magistratus agerentur. Nam &
ipsi magistratus non iræ, aut sæuitiæ impu-
tabant supplicia; sed vtilitati publicæ. Sedi-
tiosissimi quique iure putabantur damnari,
tanquam sceleribus suis promeruisent exi-
tium, quod à proprijs ciuibus irrogabatur.
Et hoc re verâ in eiusmodi tempestate sin-
cerissimum est remedium, vt optimorum
ciuium suffragijs delicta vindicentur. Qui
à nutu Regis pendentes, ex vtilitate eius om-
nia constituunt. Et si quid seuerius fecerint,
meritò facere videntur, sine infamiâ, vel cri-
minatione Principum. Et si dicere licet, fa-
mam Albani nihil magis oneravit, quàm
quòd extraordinariâ ratione, & externis in
consilium adhibitis, in eadem facinora tam
animosè surrexerit. Poenam remedij loco ad-
mouere non credebatur: sed malis publicis
ad occasionem avaritiæ abuti, qui consci-
entiam magistratuum suspectans, extra or-
dinem iudicia institueret. Quarum rerum

documenta apud antiquos multa recensere possem. Sed hæc commodius suo tempore. Igitur sectarij ad dandum sacramentum passim citabantur. Contumaces ademptis bonis in exilium acti. Et quia promiscua fuga fuerat, ne ciuitates incolis destituerentur, & ad externas gentes transirent commercia, fugitiuis eâ lege edicto publico reditus permittitur, si religioni Regique sacramentum dicerent. Fuere qui præferrent exilium, fuere qui reuerterentur.

Cæterum Lutherani tam infami proscriptione exulcerati apud Electorem Saxoniae fortunas suas deflebant. *Nullâ culpâ provocatam Gubernatricem maximas contumelias in se statuisse. Non se sponte concessisse in Belgium: sed communi consensu inuitatos. Ibi quoque in summâ magistratuum obedientiâ egisse, citra cuiuspiam iniuriam. Civitatem imperij Antverpiam esse. Vnde certè ejci non possent sine religionis suae infamiâ, quæ non alia esset, quàm religio imperij. Quod ergo suum delictum? an quia pro catholicis*
nuper

nuper armati, & ne violarentur, vitam suam obtulissent in discrimen, in quorum perniciem Calvinista surrexerant? At si pœniteret obsequij honestius saltem dimitti potuisse, quàm sub seditiosorum inuidiâ. Lutheranorum protectorem Electorem esse, eique potissimum incumbere, ut innocentiam illorum velit adiutam. Hæc & plura in eam sententiam referentes: peruicere tandem, ut Oratores mitteret in Belgium. Quibus Gubernatrix, habito consilio, in hunc modum respondit. Scitote me, quæ de religione constitui, nihil proprio fecisse iudicio. Regis imperium executæ sum, quod sine crimine prætermittere non poteram. Cum illo igitur expostulandum est vobis. Prudentiùs tamen facturi, si eodem iure permittatis Regem frui, quo ipsi utimini. Quid vobis cum nostrâ prouinciâ? quare vultis alijs regnandi modum præscribere, quem ipsimet à nemine accipitis? Quid in Germaniâ Vestrâ faciatis Regem non sollicitat. Religionem quam libet amplectimini. Paci publicæ, ut pla-

ut placet, consulite. Nemo deposcet à vobis
rationem imperij. Relinquitte, precor, Regi
prouincias suas, in quas nemo principum ius
sibi vindicat. Ille quidem religionem à ma-
ioribus traditam, & solemni sacramento
sancitam retinere statuit. Bellum & omnia
potius toleraturus, quam libidini populari
electionem sacrorum permetteret. Neq; enim
videri ex maiestate, ut his malis tanquam
impar, succumbat, ac libertatem indulgeat,
quam vulgare non potest, sine sceptri discri-
mine. Quod & Illustrissimus Elector probè
intelligit. Qui extra vnos Lutheranos sacri-
ficandi licentiam nemini facit. Ministri ergò
vestri quid queri possint, non video. In pacem
publicam serpentes, prouincijs exegi. In quas
iniussu meo nouas religiones, & nescio qua tur-
bamenta ausi sunt adferre, & in questionem
adducere, quàm ratione colenda sint numina.
Ut in tantà fidei varietate, nihil sacrum,
nihil sanctum, nihil denique de superis certum
populus credere assuescat: deinde viribus sce-
ptri contumaciam suam conferat. Au-
diui-

*diuisse vos arbitror, labefactatam ab his popu-
lorum fidem, descriptos exercitus, sublata
vexilla in Regem, parùmque abfuisse ab om-
nium perniciæ. Quid si vires illorum homi-
num patientiâ nostrâ adolescant, qui pacem
ferre non possunt? Cum hoc responso ora-
tores dimissi sunt.*

Dum hæc Antverpiæ geruntur, Noircar-
mius interea cum totâ exercitus mole con-
tendit ad subigendos eos, qui auersaban-
tur imperium. Arenbergius in itinere con-
iungitur ei cum suâ legione, & non modi-
câ Germanorum manu, quos sub præfe-
ctis eiusdem gentis, ij quibus impera-
tum erat, paullò ante in Belgium deduxe-
rant. Bröderodius multo armatorum præsi-
dio Amsterdamum tenebat. Sed tolerandæ
obsidioni imparem se existimans, vxore at-
que omni instrumento, & pecuniâ nauigio
impositis, fugam adornat. Profectio in Ger-
maniam parabatur cum Coniuratis; militi-
bus verò iussis sibi quemque consulere. Pe-
cunia in stipendium deerat. Nec erat tutum

tot armatos, & in illum fortasse peccaturos, sine stipendio dimittere. Circumiec̃ta monasteria prædæ data. Gaudebátque rapinis miles. Duces è Coniuratis erant. Qui & ipsi infaniâ feroces, imparatos circa agrestes undique diripiunt. Lasciuebant ergo prædâ graues, expilato per vim Egmondano monasterio, quod in illa regione habebatur lautissimum. Sed in tempore superuenit Megemus. Primum exercitus agmen ducébat. Prægressúsque cum parte equitatus, cos omnes qui occurrerunt, fudit. Incondita turba erat, non imperio, non disciplinâ instituta, neque aliter quàm in latrocinij fortitudinem exercere solita. Multi incompositè fugientes occisi. Alij refugiebant in ciuitatem. Plures longiùs terror abstulit. Centum & ampliùs in æstuarijs maris securè prædæ incubantes, proteruntur ab equitibus, quos adesse necdum perceperant. Quinque naues Amsterdami stabant in anchoris, quæ ad fugam à Coniuratis conductæ, exspectabant vectores. In has non
tan-

tantum Couiurati, sed & Ministri & exules
& flagitiosissimus quisque defiliere. Nullò-
que iam partium duce reliquo, quia nihil
magis Amsterdamsibus, quam deditio
placuerat, delegati ad Megemum destinan-
tur condiciones petitori. Quibus impetratis,
intra mœnia recipere præsidium. Bredero-
dius propitijs vsus ventis Emdam appulit.
Vnde se in Germaniam contulit. Vbi paullò
post morbo ex mœrore contracto, extin-
guitur. Vna omninò naus erat, quâ vehe-
bantur Coniuratorum præcipui. Hæc Hol-
landiam Frisiâque inter, puluino depre-
hensa, hærebat in breuib. Quibus prora
cumulis arenarum impedita, par esse non
potuit. Casu id acciderit, an irâ guberna-
toris, ebriorum vectorum iniuriâ faucij,
non satis constat. Et vtrumque traditur.
Cæterum Mulardus Arenbergij iussu fugi-
tiosos persequébatur cum quinque nauigijs.
Quos cum mirâ opportunità comperisset
ijsdem breuib. occupatos, ad deditionem
compulit. Inditis vinculis Harlingæ in

Frisiâ carceribus mancipauit. Superueniēs inde Arenbergius, de singulis quæstionē habuit. Eos qui arma in Regem tulerant, laqueo confecit. Nobilium sanguine abstinuit, Gubernatrici significans quid de his fieri vellet. Illa verò ad se perducī iussit. In septem gladio animaduertit. Reliquos septem altiori sanguine genitos, arctâ custodiâ Viluordiæ habuit. In his duo fuere Battenburgij, fratres admodum iuuenes, Hermannus Galama, & Sicutius Bayma Frisij generis. Octo & triginta ē captiuis, ad Wackemij dominum, eâ tempestate Zeelandiæ præfectum vincti mittuntur: vt de singulorum sceleribus ille cognosceret, traderetque supplicio. Flandri omnes erant, aut fugitiui, aut proscripti. Apostatæ laqueo necati sunt, reliqui catenis constricti alligantur remigijs.

Omnes iam provinciæ in gremium Gubernatricis concesserant. Albanus tamen, tanquam manente adhuc bello iter instruebat. Septendecim Hispanorum cohortes nouis delectibus effecerat. Eas omnes Cartagi-

ni Nouæ imponit in naues. Quippe Andreas Auria triginta triremium classem in portum deduxerat. Rege deinde protenus salutato, v. Id. Maij soluit à littore. In itinere febriculâ correptus Nicæam diuertit. Ibi curandæ valetudini quatrimum infumens, septimo demum, postquam nauigare cœperat die, Genuam appulit. Classis in portum appulsa exposuit militem. Ex his quatuor cohortibus Sardinienſi legioni in supplementum adiectis, cæteræ per Insubriam in præſidia distribuuntur. Albanus paucorum dierum intervallum Genuæ traxit, prodagrâ invalidus: sed tolerandæ moræ impatiens numerum copiarum iniri iussit. Hispanorum peditum octo millia, sexcenti & octoginta censi traduntur. Alfonsus de Vlca Neapolitanæ legioni præpositus duo millia, ducentos & triginta habebat. Decem vexilla Iulianus Romero ex Siciliâ traduxerat. Totidem Sanctium de Loudogne ex Insubiâ sequebantur. Octingenti ex Sardiniâ appulerant, quibus tyrones illi, vt ante diximus, permixti, mille

sexcentos & viginti milites explebant. Gonsalvus de Bracamont ijs præerat. Hæc pedestris acies, & veteranorum propè tota. Mille & ducentos numerus equitum impleuerat. Hispanorum cataphractorum duæ turmæ, quinque ex eâdem gente levis armaturæ. Itali tres, duas turmas Albani leuiter armati explebant. In hunc modum recensitos, Sancto-Ambrosium pergere iubet. Vrbs hæc sita est in radicibus Alpium, Italiam à Germaniâ, Galliâque separantium immani fastigio. Albanus Turinam profectus, aliquot dies fuit cum Sabaudix Duce. Inde ad præmissum exercitum se recepit, & per Alpium angustias iter instituit. Acies hoc modo processit, in tres partes distincta. Frontem Albanus tuebatur, speculatores qui explorarent iter subinde præmittens. Neapolitanicam legionem & cataphractus Hispanos sibi applicuerat. Quos Itali antecedeabant leuiter armati, simul itineri parati, & prælio. Medium agmen curabat Fredericus à Tolledo Albani filius. Insubricam legionem habebat, &

& Hispanorum equitum quatuor turmas. In hoc impedimenta vehabantur. Tergum exercitus Sicula, & Sardinica legio cum Albanis equitibus constituebant. Præerat huic Chiapinus Vitellius Marchio Cotonæus, magni in Italiâ nominis, manu promptus, bellóque clarissimus. Arcta erat semita, & occurrentibus sæpe rupibus inclemens, quæ paucos admodum caperet armatos. Viam tamen sic dispensauerant, vt in statiuâ, quæ primum agmen habuisset, sequenti die secundum succederet. Post alterum diem tertium agmen perueniret, iisdem statiuis vsurum. Hoc modo exercitus descendit in profundissimam vallem, exiguâ planitie procumbentem in flumen, cuius fons per prona magno strepitu aquarum decurrens, paruo alueo vehitur, donec Iseræ commissus, haut aliter quam ponte traiecitur. Latera vtrunque asperis, præruptisque rupibus clauduntur, cacuminibus in immensam altitudinem surgentibus, humano negatis vestigio. Hac semitâ Annibalem Romanis bellum inferentem, prorupisse

pisſe volunt in Italiam. Neque dubium, quin in his anguſtijs deprehenſus Albani exercitus debellari potuerit, ſi extitiſſet, qui modicâ manu reſiſteret in vltiori ripâ, tranſitu prohibiturus. Vbi non ſolum cum hoſte, verùm etiam cum iniquitate loci præliandum erat, qui tantam multitudinem redigiſſet ad paucitatem. Vnde ſine pernicio, ac niſi victores recipi non poterant. Nam ſi reuerterentur quâ venerant, eos ibi deprehendiſſet inopia rerum omnium, famêſque ferro acutior, conſumptis alimentis, quæ ſterilitas loci ſuppeditare non poterat. Quippe ſtatiua ſic inſtructa comitatibus fuerant, vt non niſi in vnam noctem toti exercitui cibaria ſufficerent. Sed continua felicitas exercitum decimis quartis ſtatiuis in Burgundiam perduxit. Ibi quatuor turmae, nuper conſcriptæ, Albano iunguntur. Militem ſociorum terram permeantem, egregiâ ſeueritate & diſciplinâ continuit. Flagitiorum militarium inſignis vindex, atque implacabilis peccantibus. Quod etiam inter laudes eius à
con-

contrariarum partium scriptoribus numeratum est. Qui tamen ex odio, atque irâ famam illius diuisere mortalibus. Cogitaueritne Geneuenses Caluinisticæ sectæ artifices & propugnatores ad deditionem compellere, & hoc ipsum cum Sabaudo agitauerit, equidem nescio. Vtrumque tamen calumniatus est rumor. Nec Geneuenses solùm multo præsidio urbem compleuerant : sed & Heluetij montibus suis egressi, ingenti multitudine fines infederant. Gallus quoque subitis delectibus multum militum effecit, Heluetiorum sex millibus mercede conductis. Quacumq; incedebat Hispanicus exercitus, paribus ipse passibus obequitabat in confinio regni, lateriq; Albani suum admouebat exercitum.

Sic tandem in Lotharingiam, atque
indè in Belgium peruen-
tum est.

F I N I S.

HISTORIA Belgica, quam ab ANNO
CHRISTI M. D. LVIII. Nobilis at-
que Clarissimus vir, Dominus NICOLAUS
BURGVNDIVS I. C. & Codicis in Vniuersi-
tate Ingolstadiensi Professor Ordinarius con-
cinnauit; quia nihil Fidei Orthodoxæ, vel
bonis moribus aduersum continet; adeoque
concinne ac eleganter conscripta est, vt le-
ctu non vtilis minus, quàm iucunda futura
videatur: typis & luce publicâ digna esse
videtur.

Ita censeo.

Nomine atque loco Admodum
Reuerendi & Spectabilis Domi-
ni Decani Theologici.

*Leo Menzl. S. Theolog. D.
Prof. & Vniuersitatis In-
golstad. Pröcancellarius,
&c.*

Errata.

A Liquot accentus inephere super aduerbii vitio correctionis. Vtputa pag. 1. lin. 9. supr. verbum nihil, sæpius, olim & similia. pag. 18. lin. 14. lege volumus. pag. 71. lin. 19. dele; pag. 81. lin. 10. insolitâ. pag. 92. lin. is. post verbum retinetur, pag. 102. lin. penult. contemplatione. pag. 137. expungendæ sunt tres primæ lineæ. pag. 158. lin. 6. eradicaturos. pag. 190. lin. 11. erat. pag. 191. lin. 4. & 10. item pag. 121. anabaptistæ. pag. 200. lin. 3. Sonnius. pag. 221. lin. 1. mercurios. pag. 223. lin. 6. obstructis. pag. 241. lin. antepen. denique. pag. 279. in fine flagitiosum. pag. 319. lin. 11. Gubernatrix. pag. 323. lin. 6. pervertere. pag. 342. lin. vlt. munia. pag. 334. lin. 4. Caluinistæ. pag. 346. lin. 20. Sapient. r. pag. 349. regionibus. pag. 358. lin. 11. structas. item lin. 19. dominio. pag. 365. lin. 8. integra. pag. 379. lin. 12. emanare. pag. 381. in fin. confidentibus. pag. 392. lin. 3. iter. pag. 425. lin. 3. Maseicensis. item in carmine præliminari disticho 11. loco faueas lege Astræa item pag. 418. lin. 6. centum pag. 421. lin. vlt. hominum pag. 448. Caluinistis pag. 454. lin. vlt. post Gandaui dele punctum. 456. lin. 10. auriacus. pag. 463. deijcitur.

The first of these is the fact that the
 system is not a simple one. It is a
 complex one, and it is not a simple
 one. It is a complex one, and it is not
 a simple one. It is a complex one, and
 it is not a simple one. It is a complex
 one, and it is not a simple one. It is a
 complex one, and it is not a simple one.





